

近代中國史料叢刊第二十輯
沈雲龍主編

劉壯肅公（省三）奏議

劉銘傳著

文海出版社印行

劉壯肅公
奏議

劉澤源署檢

劉壯肅公奏議 目錄

卷首

清史本傳

劉壯肅公家傳

劉壯肅公墓誌銘

劉壯肅公神道碑

書劉壯肅公碑陰

紀劉省三宮保守台事狀

書先壯肅公守台事

咨吏部履歷

卷一 出處略

劉壯肅公奏議 目錄

督師陝西請訓摺

恭報到陝日期並難扼守纏金摺

分隊扼要籌商大略情形摺

甯靈回寨收復陝北防務已鬆並陳北山防剿情形摺

纏金道遠賊勢南趨仍請飭定安撥隊駐守摺

調防邊境並探報情形摺

遵旨密陳左宗棠軍情片

請撤銘軍留譚仁芳軍駐陝摺

復陳暫難出關懇假離營養病摺

詳奏轉運情形並懇續假三月回籍調理摺

密薦曹志忠接統替歸片

俄事入都日疾請假就醫天津片

假滿疾沉仍請續假回籍摺

懇續假回籍摺

補授福建巡撫謝摺

法兵已退請開撫缺專辦臺防摺

再請開巡撫缺並銷督辦差回籍養病摺

目疾未癒續假兩月摺

幫辦海軍謝摺

耳目俱病請假一月摺

因病懇請開缺摺

再請開缺摺

三請開缺摺

奉旨革留謝摺

四請開缺摺

開缺假歸謝摺

卷二 謨議略

籌造鐵路以圖自強摺

覆陳津通鐵路利害摺

遵籌整頓海防講求武備摺

密陳武備廢弛亟宜整頓並遵保將才摺

覆陳台北情形請旨查辦李彤恩一案以明是非摺

條陳台澎善後事宜摺

覆陳撫番清賦情形摺

台灣暫難改省摺

洋商子口半稅應聲明約章劃清界限摺

台勇長夫不能再裁摺

卷三 保臺略

恭報自津起程日期並遵旨會商情形摺

恭報到台日期並籌辦台北防務摺

請飭南洋遣回四輪片

敵陷基隆砲台我軍復破敵營獲勝摺

請將曹志忠移紮山後並拆移煤礦機器片

法擬調陸兵來攻台北片

法船併犯台北基隆俱危移保後路摺

敵攻滬尾血戰獲勝摺

密陳台疆危迫援餉俱窮片

台紳捐資募勇屢戰獲勝並各軍分守情形摺

密陳餉絀請令閩督早籌並法人封口劫殺商船片

覆陳封口後兵危餉缺勸紳捐助各情片

台北極危請飭速調勁旅援救摺

密招敵探仍留敵中通信片

法攻暖暖月眉山連日獲勝並現在戰守情形摺

法攻月眉山大水窟一帶衆寡不敵各營退守河南摺

卷四 撫番略

剿撫滋事生番現經歸化摺

剿撫生番歸化請獎官紳摺

督兵剿中路叛番並就近巡閱地方摺

督兵剿撫中北兩路生番請獎官紳摺

各路生番歸化請獎員紳摺

中北兩路代番滋事派兵剿復摺

埤南叛番圍攻廳治派兵解圍摺

攻克後山叛番並北路獲勝請獎官紳摺

全台生番歸化匪首就擒請獎官紳摺

副將開山戰沒摺

剿辦台北內山番社獲兇正法移駐宜蘭摺

勦平南澳番社請分別賞罰摺

卷五 設防略

遵籌澎湖防請飭部撥款摺

覆陳台灣出入款項懇飭速籌的款以便分省設防摺

籌借洋款購礮台借台還片

請撥兵商各輪船片

購買輪船片

添購輪船片

請撥兵船並請同購魚雷船專備台急片

變賣舊輪船以資新購摺

購造小船片

購辦水陸電線摺

台灣水陸電線告成援案請獎摺

請撥援台洋款百萬趕速辦防片

請飭部定外洋購料章程摺

採購機器模片等件銀錢數目附奏片

擬購水雷磺藥附請核議片

買礮到防立案片

英國購砲請獎監辦叅贊片

奏報造成機器局軍械所並未成大機器廠摺

脩造礮台并槍礮廠急需外購機器物料片

擬修鐵路創辦商務摺

台路改歸官辦摺

卷六 建省略

陳請銷假到閩會商分省協款情形摺

遵議台灣建省事宜摺

台灣郡縣添改撤裁摺

台灣水師員缺並武職補署章程摺

移設陸路副將酌撥營伍摺

台北建造衙署廟宇動用地價銀兩立案摺

新設郡縣興造城署工程立案摺

澎湖建城立案片

請建沈葆楨吳贊誠專祠摺

請建林文察專祠摺

請卹戰死將士建昭忠祠摺

台設西學堂招選生徒延聘西師立案摺

覆陳台省初分各局驟難裁併摺

恭報南北考試完竣摺

增設府縣請定學額摺

卷七 清賦略

量田清賦申明賞罰摺

整頓屯田摺

台畝清丈將竣擬仿同安下沙定賦摺

陳報台灣啓徵新賦日期請獎各員紳摺

埔裡廳暨恆春縣田園減等升科請立案摺

全台清丈給單未竣請展奏銷限期摺

全台清丈給單完竣覈定額徵摺

全台清丈給單用款造銷摺

釐定全台官莊田園租額摺

台灣清賦全功告成彙請獎叙員紳摺

台灣清賦全功告竣再將請獎詳細開單摺

卷八 理財略

調何維楷辦礦片

奸商吞匿釐金道員通同作弊請撤任委署查辦摺

改百貨釐金片

遵籌全台捐款片

宜蘭縣勒捐革職片

台捐減成片

林維源允捐巨款請獎京秩片

撤留勇營綜計款目請撥餉需摺

劃一統費長夫草價並卹病亡將士片

行軍用款截清立案以憑覈銷摺

造銷法防軍需摺

擬撤糧台設善後局仍留沈應奎經理片

接收台地兩海關片

官辦基隆煤礦片

續報十一二兩年籌防善後撫番等款摺

請免陣亡殉難各員短交銀兩摺

英商承辦基隆煤礦訂擬合同摺

附合同二件

海關贏餘指撥鐵路經費片

基隆煤礦仍改歸商片

遵旨飭商退辦煤礦並籌議情形摺

官辦樟腦硫磺開禁出口片

創收茶釐片

卷九 獎賢畧

請還沈應奎布政使銜片

基隆法兵全退台北解嚴請獎戰守各員紳摺

奏獎道員邵友濂龔照瑗片

請加恩總兵吳鴻源片

覈減基隆立功將士懇照前單給獎摺

請獎洋員片

奏雪林文明冤殺片

奏留李彤恩片

援照南洋成案請獎運台各員摺

保陳鳴志片

統兵大員先後積勞病沒請卹摺

請留已革都司管輪片

請卹王郊片

道員方策勳病沒請卹片

明保道員陳鳴志片

調何嗣琨辦文案片

請休致台灣鎮總兵片

台灣水土惡劣知縣員缺請飭部暫寬例章變通補署摺

奏請林維源幫辦全台撫墾事務片

請緩揀發知縣員缺由閩咨補片

奏保紳士片

開復藩司片

奏請沈應奎會同藩司辦理清賦片

遵保勦辦埤南叛番彰化土匪並歷年剿撫肅清各員弁摺

請仍寬新設各官補署及留補在台各員片

總兵留辦海防暫緩赴任摺

台灣歷剿叛番並彰化土匪保案請保武職摺

奏請剿撫番社出力人員應照異常勞績核獎片

密保沈應奎程起鶚片

請建劉朝帶傅德柯專祠片

奏保張兆連將才片

總兵在台病故請卹摺

卷十 懲暴略

奏參朱守謨片

嚴劾劉璈摺

密保陳鳴志署台道片

澎湖法兵退去查明失守各員分別處分摺

道員攻剿已撫番社請旨懲辦副將摺

奏參林文欽等片

迭平土匪請獎官紳摺

參記名提督方春發尅扣銀餉片

參記名提督柳泰和營伍廢弛片

奏參羅建祥摺

革降參將都司片


彰匪圍城劫館派兵剿平摺

查明知縣功過並官紳比匪情形摺

參遊擊鄭有勤等請革職正法片

劉壯肅公奏議
目錄

十



劉壯肅公奏議

卷首

叙


天柱之山自終南東邁矯然特立中幹間江漢河淮襟帶萬里居鄭洪澤鬱爲
隩區潁亳淝泗之鄉厥惟千古雄豪之地自管氏徘徊潁上創霸中原厥後陳
范滅秦孫曹霸漢楊吳代李徐常造明奇烈迭興大都憲章仲父唯獨蒙莊一
老異畧縱橫九萬逍遙竟辭楚相高風潔韻曠代闐寥蓋奇勳偉節並著之難
如此同治初中國大亂故大學士合肥李文忠公獨創淮軍趨上海規江蘇一
時名將程忠烈張靖達吳武壯之倫蹈厲雲興不可一世唯壯肅劉公年最少
獨角巾孤劍長嘯其間蘇城旣克程公戰死嘉興李公顧諸將唯劉公足勝艱
鉅軍無大小一以決之年二十九遂拜提督畿疆之命於是南平吳越北定
中原振旅策勳授封五等而公則浩然歸矣明年詔督師關中事平輒乞去

更十年俄羅斯難作再 詔入京師和議成復抗疏歸里又四年法蘭西構兵海上復起督師臺灣血戰經年臺以無恙既授巡撫專疆事撫番清賦建省設防毅然保全台爲七省海疆樞筦 朝廷鑒其忠既晉宮保銜長兵部復 命佐賢邸贊海軍大臣基之公則堅乞臥山中不出公去四年而日本難作再詔入京師卒不出而台輒亡公益悲鬱死矣嗟乎人之云亡邦國殄瘁此豈特一人一家之痛酷已耶緊古功名之士每不樂以湖山勝美易軒冕之榮而高蹈之賢又不惜舍天下國家自安林壑故禹稷巢由雖太史無能合傳而專制之君讒賊之相遂不憚犧牲豪傑自騁其予奪生殺之威雖若鄴侯異烈再造李唐代宗之賢至乃放棄衡山以脫元載之媚嫉青田奇峇且陷胡惟庸讒毒而罔或伸功名之際賢者或不克保其令終自古然矣我 朝優禮大臣遠符宋氏然觀甲午之敗其禍實始司農罷鐵道禁海軍倉猝無能戰守而東征既

敗雖忠摯若李文忠且將險蹈岳子之慘戮流風摧靡則雖擁強疆稱物望靡不覲然仰貴臣呼翁以爲轉移夫天下烏有容悅以求富貴而能舍其身以當國難者痛乎彭剛直有言士大夫出處進退厥惟人心風俗之盛衰而晚近人才至乃甘奴隸犬馬而不知恥恤以此而當敵國外患有相攜崩角已耳然則公之醉心巖壑敝屣節旄其苦心遠抱爲何如哉公才兼文武所著大潛山房吟稿曾文正歎爲鏘姚勁悍類其用兵在官奏牘下筆輒數千言沛乎若不可禦其大要尤在成敗得失靡不畢達其真誠絕無一言相誑飾其所自屬草尤覺英風浩氣磅礴楮墨之間澹然生長江淮慕公三十年不獲一見丙午客海上公孫荃莊部郎方處京師獨最公事略屬爲墓道之碑旣幸得比歐公與名韓相之堂以爲慶美今秋棲遲都下荃莊復舉公奏議屬爲校勘蓋深見將相子孫刻其先冊大都纖悉靡遺懼不足垂後世自非知言之深烏能及此公疏

凡二十二卷語皆實驗遠異空談洵足以爲世法澹然懼讀者不獲窺其體要也謬加釐訂別爲出處謨議保臺撫番設防建省清賦理財獎賢懲暴凡十略各爲小序以括其端篇之內別爲圈識提要鈎元篇卒或甄輿論或采遺聞與時局變遷之不能不具者則爲按語以明概略庶幾論世知人之君子得窺豪傑之真要非荃莊邃古知言烏敢妄圖斯指蓋纂述之微固有未易語諸天下者公性不樂人節度平吳平捻動冠當時屬在李公未嘗自達於時文牘蓋已唾遺今之所存則自督師關中始而臺事爲獨多淮人言公嘗登基隆山望日本歎曰彼區區一島國耳吾苟速圖尙可併吞以張國勢不則爲彼虜乎因歛歎而罷嗟乎文相孤忠安能保嶺南無滅史公奇節安能必江左無亡惟此忠臣烈士浩氣丹精貫日月薄星辰而與之終古則土疆雖去且將盪激文人之歌泣鐫入萬世人心目而使之長存其理固有確乎不拔者悲夫臺灣已矣

神州雖廣何一非臺東患方殷莫知所屆讀公書者俯仰於當時血戰孤危之苦與其後經營締造之艱深念尺土隻民無一非忠臣烈士肝膽精誠所搏聚不使神州大陸坐致臺疆異族之悲斯則荃莊繼述之義者夫光緒三十有二年冬十月桐城陳澹然謹叙於都下桐城館



出處畧叙一

嗚乎大臣出處之際難矣哉或庸闇而乘非據或賢俊而被寵榮是二者大都行殊迹類易進難退千古歎之夫庸闇無論已中興名烈若曾左李巨矣然使曾無津案左辭樞府李謝海軍而皆急退此其爲樂南面王烏足道哉然此三公者既被殊知進退焉能自主李自甲午奇謗退處獨難迹其南北徘徊造物亦若留其身以待庚辛之挽救蓋其心爲獨苦矣吾攷劉公疏十六年四月十四日始准海部咨奉幫辦海軍之詔越明日疏謝之又四日遽上疏乞去私獨訝之公以武臣拜封爵擁專圻一歲間迭晉太子少保兵部尙書不數月復授海軍重寄綜中國大臣自王公閣部督撫都統將軍提鎮何啻數百人而清秩之加不過數人而止况乃海軍之鉅實爲國家萬世遠謨總以親藩任之上相及公乃纔四人將帥之尊榮朝廷之倚畀俱可謂極至者己公獨皇皇引

退若恐弗及者何哉且鐵道之舉海軍之謀皆公之所獨創也其撫臺也疏言使孤島自強固七省海疆鎖鑰副微臣經營海表之初心其志可謂壯矣今倚畀方殷而轉渝初志則又何也及舉其生平出處大節而詳考之然後歎公之志行實有非常度所能測者公始以咸豐九年團練保鄉鄰授千總十年自將五千人備糧餉解壽州圍同治元年春江督曾文正始奏擢游擊 詔未至五月仍以千總從李公赴江蘇三年擢直隸提督六年冬東捻平始拜三等輕車都尉輒稱疾歸引退乃自此始七年 詔再起討西捻滅之於是中原大定拜一等男 命下復稱疾去八年 詔蒞任遂乞李公奏開提督缺 詔許之蓋請疾已三次矣同治九年津事棘畿疆重地僅一銘軍公則聞召疾驅中道而和議定 詔命以原官督陝軍專摺奏軍事十年復 詔出關圖新疆獨三疏請疾去卒 薦曹克忠代將乃歸光緒六年秋 詔復強入都議俄事乞假兩


月 詔促之既入復三疏乞返光緒十年法事棘 詔強之復出公始泛西湖
謝之 詔復促之出李公益函電速之五月甫至津李公擬請佐北洋軍事座
間示以意公笑謝之閏五月朔方入覲 特詔晉巡撫銜督臺軍九月授閩撫
督臺軍如故十一年六月法事定卽奏辭閩撫請專治臺防不許遂抗疏乞歸
是年冬 詔建省臺灣改臺撫公乞去益堅 溫詔益慰留不許越六年省防
既定海軍 命下復五疏堅乞乃得歸及甲午再召乃堅辭不出矣綜其生平
自始戰江蘇訖臺灣凡五進而辭退乃十有八焉乞退之疏存者乃十有四按
其歲月皆處恩綸稠疊之時實爲千古名將所未有夫豈潔身高蹈如古石隱
者流哉蓋其雄略縱橫不可一世喜勞惡逸樂任人所難尤以奉節度擁虛名
爲深恥當其提督畿疆授封五等中原大定千里謳歌斯亦武臣之至榮矣脫
令優游 輦下坐擁節旄疇復能議此者獨念風塵無警上將虛糜左武右文

已成風氣提臣雖貴展布莫由故決焉舍其官而不屑其督陝軍也異軍特起
專達 朝廷不復見制文吏斯亦上將之殊遇矣然關中既靖終類虛糜 詔
出新疆更憂餽饋而西陲經略又非可共功名絕塞蹉跎且將恃牴故決焉舍
符節而不居其赴俄難也既以主戰而忤相臣復以鐵道而違台諫棲遲海上
誰省孤懷故決焉全吾身以待天下及臺疆甫定門戶傾排辭撫任臺庶圖專
致此固當時之苦心也而樞臣不察責難紛投設險無資更謀建省大臣治獄
復事調停自非制府公忠親相慰助有不決焉逕去者乎厥後撫番清賦建省
設防七載憂勞固已歸然自立脫令逍遙海上坐擁巖疆峻秩殊榮睨萬國
斯亦大丈夫得志之所爲也獨念海軍之重非有實權莫由擔荷以成其志賢
王既逝 醇王堯在十五年冬 大司農已請禁海軍十年毋增器械將以海部虛名內竊賢
豪外炫強國而諸臣秘術方挹海軍巨帑莫知所歸一旦強鄰激戰巨艦敗亡

清議之徒且將歸獄於海軍羣帥必致海軍淪喪臺且隨之吾獨奈何罹此厄哉嗚乎公所爲請疾經年脫焉敵疑者此也公去四年而甲午戰作 詔令李公傳 旨促入都李公命長公子函電勸之公復書謂起家行伍身任封疆今乃等之列將吾其何以行哉卒不出李公太息久之夫以條然泉壑之身明知勢不可爲復致佞臣之掎擊是尙得爲智者哉且軍興將帥未有自請撤軍者公督陝軍時獨首行之其言曰民生凋敝餽餉奇艱臣卽忍恥虛糜抑復何裨大局此其苦志亦可見矣議者不察至謂迭辭 詔命迺類要君是惡覩古君臣之義者乎公始倡淮旅練洋操議鐵道建臺省此四者實創中國未有之奇淮軍馳騁中國三十年高麗越南至今歌泣銘軍諸將尤震赫當時 朝旨至敕諸行省本公練兵爲程法蓋同光間倚重如此至其平吳平捻奇戰實多方略具存無難考索獨公自平捻歸輒鄙戰功爲不足道當時文牘一以火之而

深嘆古賢王命將之義嘗曰古之拜將也曰閫以外將軍制之故將在外君命有所不受秦漢專制斯義已亡雖曾李奇勳往往坐牽樞部此風不變將帥終莫由自盡其才故其督陝軍也迭 詔遣軍赴烏城守蒙邊復命馳肅州待俄變公度其不可則堅屹不搖及赴臺疆 明詔許便宜乃往厥後用人行政復請銓部寬文法以盡其謀要與辭新疆舍基隆謝朝鮮等所謂卓然自立者耶方公之在臺也銳意興海軍謀日本嘗助其名士倉信敦處幕中不令與軍事暇輒對奕以詢其政俗而思爲之備歸後其人猶感公寄日本棋譜於山中公手書答之甲午之戰西報言日議院聞公出則大驚已聞其不出也則大喜曰劉某不出吾無患矣始公之歸也劉忠誠坤一方督兩江以殺李洪故公作書讓之忠誠大恚及聞公沒拍案驚曰長城頽矣蓋中外推重如此嗟乎身爲名將立奇勳其爲世嫉固已多矣不務審時局以圖進退雖汾陽偉烈不能不牽率於河陽之奔甚乃忠愈奇而禍愈烈將一身不足惜奈國事何

岳忠武熊襲愍之賢夫豈樂高官貪巨祿擁兵戰伐以自豪哉卽是而公乃矯然千古已




謨議畧叙二

公少負奇畧討捻時謨議已聞天下初羣捻日馳數百里官軍嘗逐躡莫能遏其鋒故雖僧忠親王忠勇絕倫卒敗死曾文正代師請設四鎮兵害之道遠兵單終以不效公獨上書檄列縣循黃運膠萊諸河側建堤塹塞其衝然後盪決縱橫扼其死命復自練奔卒如捻狀躡之羣捻以滅然其書已不可考矣今所存斷自鐵道始伊犁事棘 朝旨促入都公首上書李公爭主戰既至見廷議之主和也則獨上此疏以去廷臣昧遠略劾罷之中國言鐵道實自公始要其所言道成則一兵可敵數兵之用使兵餉大權盡出 朝廷督撫無能牽制則固中央集權之至略也至其造路之法則請借民債以速其謀當時國力未衰取償且易故蒞臺後益痛切言之使早用其謀何至甲庚之師餉援俱阻償割乃至此哉方公之奉 命赴臺也 詔詢海防策公奏請保商埠改砲臺變水

師譯西籍及其他船械槍砲選將練兵之術尤詳海軍之謀自此始及蒞臺疆所規畫管繫天下法事既定 詔令舉將才公獨上言武備過弛請飭海軍部定練章一軍志嚴舉主拔真才因舉將才以待擢任其他爭口岸保洋稅革漕站緩營夫創郵政則皆當時軍國之大者甯特臺灣一島而已哉卽以臺論則所陳臺澎善後練兵設防撫番清賦諸策與臺灣建省之宜緩圖則又審時勢以規緩急至若臺戰之危基隆之退撫番清賦之艱則抗辨二疏尤可窺其概略其辨臺戰也曰臣渡臺之日軍械無存礮臺已敝蒼黃接戰歷盡艱危半載孤撐幸無挫失若輕言浪戰內無可據之險外無策應之師必至一敗塗地臣治軍三十年惟求實濟不善鋪張若徒放言高論縱令欺罔 朝廷能不遺笑萬國臣實恥之其辨撫番清賦也曰臺灣一海外孤島耳坐安簡陋何以自強拘守例章何以自保臣所爲任勞任怨者妄計就地籌款不勞仰助隣疆庶幾

孤島自強固七省海疆門戶爲 朝廷建遠大之謨卽此以觀論臺事者可以
決矣故附諸謨議後使後世談國故者攷焉初同光間公之退處也歲往來秦
淮日與諸名士談讌諸名士每促公出公酒酣太息曰公等識之中國不變西
法罷科舉火六部例案速開西校譯西書以厲人才不出十年事且不可爲矣
吾安能促促與文墨吏爭尺寸哉當時舉國晏然諸名士咸咋舌然則公之鬱
抱爲何如哉惜乎當世清流之不悟也悲夫



保臺略叙三

臺灣孤峙閩海中南去廈門且五百里其北乃近琉球固海外絕域也舊制鎮道專摺陳兵事而道益專其勢略與巡撫等顧自道光間姚瑩任臺道禦英人被詔嶽後固未有能行者光緒十年法蘭西攻越南岌甚越吾藩國也乞援朝命滇粵師合救之法人大怒驅鐵艦入南洋倡言奪臺灣要我劉璈者湘軍將大學士左文襄舊部也及是任台道四年歲餉百數十萬金所部軍二萬裨將非進財色不獲將一兵閩督何璟聞其狀廉察之不能治也是年公之蒞臺也閏五月十四日始 詔用巡撫銜督台灣軍事璈性固驕恣見其非閩撫意輕之公念台北形勢制全台滬尾通商而基隆煤產著海外法艦遠來數萬里必踞基隆奪煤廠濟舟師奪滬尾商埠資饋餉基滬相接非速赴基隆保臺北全台且亡獨解兵既久所部駐畿輔江南廣東西諸帥畏法軍輒強留不遣李

公憂其孤往將不能制臺軍也而莫能助公乃率親卒百餘人部將十數奉命
纔十日輒抵基隆法艦已縱橫口外閩五月二十四日也初公之過滬也法使
數來會探行期公則置酒高會聲言某日乘某艦渡台是夜大風雨公乃微服
乘小艇登他艦疾行去岸數時法使乃覺疾發兵艦追之思要之於海比至滬
尾則公已登岸兩時矣公既至淮軍至者纔六百合湘土諸卒不逮四千人連
奏乞江閩兵輪皆不至礮臺僅五礮當一面臺勢且乖公首拊諸將相勞苦急
命築新臺建新壘爲衛六月望日工未葺法軍已鼓五鐵艦犯我師公急合諸
將血戰禦之法艦環巨砲助陸軍臺輒圮公輒誘敵軍陸戰夜令壯士鄧長安
梁復初冒雨蛇行潛登法壘毀其砲復初被敵追戰躬帥師襲擊之卒破其壘
奪其燄追奔至鐵艦乃還既念敵艦多巨砲我軍近海終不足支且臺北一城
爲軍餉根本非舍基隆陷敵師徙軍後山避敵砲扼滬尾以保孤城敵且綴

我師基隆而陰襲臺北則吾且不戰自潰迺陰徙煤礦機器毀其宅斷敵謀移軍截獅球嶺別遣大將扼滬尾而自駐淡水策應知府李彤恩急請填石塞海口禦之當是時敵既大破閩海軍毀兵輪三十將軍督撫欽使諸大帥擁重兵莫能制也閩師既燼法大將孤拔益鼓勝兵集基隆雪前恥我軍壁山後敵攻滬尾謀臺北大將孫開華章高元禦之張李成以奇兵五百人夾擊大破之法兵死者千餘人半歲法卒不獲徙基隆兵覬滬防窺臺北方閩軍之既毀也朝命左文襄蒞閩督軍事李彤恩者久事基隆精外交孫開華者湘軍宿將也薦其才公任之道員朱守謨浮妄昧軍事公斥焉則嫉李基隆之退朱獨謗李得敵賂鼓臺衆譟之幾大亂朱既去陰結劉璈並謗李於左以撼公初公之督陝軍也左公方督師隴上朝旨密詢左軍狀公以其久頓也密告之及是左公蒞閩纔一日輒據兩人言劾公退基隆爲李罪公力雪之前序所稱辦臺戰

疏者也於是兩公交惡劉璈益傲睨其間方臺北餉絀公請勸台人募白金百萬助之事未集復乞 朝旨別助之璈獨上言令臺捐二百萬集兵械無闕復告左公及新督斷朝援實寢台捐置兵械不問公既苦餉絀命軍凡四十日關餉金一月餉至補焉及冬璈瞰臺北之無餉也故令湘軍發全餉脅淮軍且聲言臺南之餉竭也寔擁金百萬不一仗淮軍激使變始法船之禁海也商船且往還通聲息璈獨告英人曰法禁弛九月法乃嚴海禁併商船搜劫不使通以此坐困三月援餉俱窮而瘴癘更作將士十九病且死軍且絕炊公則短衣草履臥山野戰輒親出當軍鋒一日法兵開炸砲所乘馬忽屈伏於地彈丸從頂上過得毋傷蓋自中國外戰以來未有險絕如此者嗟乎外寇如彼內患且更若此嚮非公孤忠奇略守死不撓內結紳民外拊將士空拳白刃灑血登埤此其爲狀尙忍言哉公之退基隆也深見我軍孤微法軍槍砲精利莫能敵堅令

各軍掘長濠嚴守禦俟精械待援師毋浪戰以損精銳 朝旨屢飭復基隆公獨守便宜不進八月我軍血戰復基隆江閩爭入告 詔大喜詢狀公知其難守也寢不言然敵卒不克越基隆乘我左公既蒞閩爭言戰明年春特遣兩大將六千人潛濟以東 朝廷亦命故陝督楊公岳斌間入台督戰大集官土軍二萬誓死復基隆基隆山後故有河我軍固堅壁河北及戰湘軍大將獨慷慨北渡河當前敵淮軍繼之前敵軍大敗將士死傷如積乃急退河南掘濠塹仍公策拒之湘軍將乃不復言基隆矣四月盟成法兵退基隆乃歸 朝旨猶以未克基隆爲公咎方公之舍基隆以啗敵也部將章高元痛哭伏地下阻焉公大怒拔佩刀砍前案叱曰不舍基隆台北不能保也違者斬乃全師壁後山故司馬懿論兵謂非上智不能割棄嗟乎戰陣凶危萬變呼息當局且不能喻其幾樞府書生乃欲制勝萬里之外明之季世復何遠哉故詳著其事告後之任

兵御將者
朱劉情狀詳懲暴略中
知言君子可並考焉

撫番略叙四

臺嶠生番亘古不通人迹明季鄭成功始逐荷蘭居臺南日經營戰艦西通滇將李定國之師冀獲江海諸行省以存明社未暇內及生番也全台形狀若巨魚尾南而首北前山若魚腹內向廣而平後山若脊梁乃狹生番所處則梁骨萬山中亘山南北七百里番社都八百有奇光緒間衆且二十萬各規地勢爲酋相雄長與黎種苗瑤等蓋大地生人之始類然也番既無衣冠味倫紀踞深山狎禽獸山中多寶藏居民外至輒艷之用此冶鐵製鏢鎗工戰鬪互市既開西槍入中國奸民假番地爲藪益盜精械濟諸番諸番益橫桀不可制嘗突外山穴民居恣殺掠歲殺千百人文武吏瞠視莫敢相何問光緒初日本人入番境番怒殺之日本始遣舟師踞基隆要我 朝命船政大臣沈文肅公檣蒞臺北治之事定乃請闢番地設流官然所闢僅後山埤南恆春兩廳縣未幾移鎮

江南事輒罷厥後吳公贊誠理船政復經營番地以病歸閩撫丁日昌繼之亦半途以去最後岑襄勤公踵其事復擢滇督而西坐此番地多犬牙廳縣間非搜濯不治公始蒞臺覽形勢深念地孤險非財足自守不能以爲非闢番地廣耕桑則財無自出蒞臺十日輒抗疏言之法事定復疏言非清賦撫番不足言守禦且番地多藪盜不清其內猝當外患將有腹背受敵之憂武侯謀魏先靖南蠻理勢然也顧番乃人類苟無害安忍殘殺相加卽見虐官民亦非自懲不足平其怒十一年夏法兵告歸臺南副將潘高陞殘殺無罪番虐甚公抗疏劾治之疏具懲暴略中爲番事之始因參劾故別錄之番感通譯言謂新帥一視民番不復袒官吏固已忻忻嚮化矣是年冬彰化新竹淡水間紳民屢上言番殺居民擾耕穫請剿公乃命紳吏挾通譯諭導之降則納不則威以兵淡水馬來番者岑襄勤撫而不至者也及是輒降乃定規約凡十條以社長爲社丁月給勇糧如營制總日月

銀六兩躬至縣署領其銀使與官吏治社長各遣子弟入城塾讀書使還耕故地軍民奪者罪之番至咸雞髮被衣冠與民齒於是新彰罩蘭番成就撫以安臺灣故制取屯租備撫番經款屯兵敝久不能軍乃請減屯兵積餉專撫事寔番至日多餉不加勞而用自給 優詔許之故前後六年未嘗一增兵餉此撫番之始也既念番地多僻險非開道不能達也乃命提督劉朝祐首自馬來關番險百里爲巨道通宜蘭十二年春淡水東南大科坎與新竹菜甕諸番既就撫肆殺如初朝祐率軍逼大科都十三社成就撫旁社不下者克之惟貓裏翁八社不下朝祐瘴疾歸公乃自將拔之於是菜甕以南六十餘社番畢下春深瘴作方息軍而三角屈尺諸化番忽見殺偵其爲加九岸竹山番也復請剿乃命唐仁元深入百五十里涉蠶叢絕險拔之而北道以靖林朝棟之壁罩蘭也武榮十餘社番虐克之而帶日二十餘社不下乃命提督柳泰和以師往並克

之於是新竹大湖番迭出火民居暴甚兩將闢道四十里深入拔之中路彰新
前山番畢克自土匪橫嘉義南道不通特命提督章高元壁嘉義高元別遣將
撫後山蓮港六十餘社下之後山統領張兆連亦撫恆春埤南番百七十二社
復請自嘉義開道達埤南減恆春道數百里公大喜許之半歲間招撫四百社
暑作兵乃歸七月而蘇魯之役作蘇魯番者既就撫突殺罩蘭民復結馬那社
繳歸化旗以叛朝棟泰和連剿困山中公大怒特檄澎湖總兵吳宏洛合四將
兵親督戰大兵踰絕險環攻一月拔其巢番酋誓天不復反乃訴官民侵虐狀
公怒易墾吏劃其地乃安軍欲還而白阿之役作白阿社者亦就撫番也既定
復殺民勇二十人學士林惟源請討乃復合諸將越羊腸闢道五十里深入襲
之其酋馬來詩昧率妻子以降赦不殺分遣諸將拔餘社畢下之十二年秋冬
事也初張兆連之請開中道也遂自後山水尾鑿石磴而西章高元自彰化集

集街鑿石而東峭壁深谿懸崖伐木自冬及春闢道建飛橋百八十里橫激前後山扼其中萬衆轟騰聲威震疊山腹中不聞王化者皆震怖乞降於是兆連復招後山二百十八社高元撫前山二百六十社都八萬八千人闢田園畝數十萬成功數月不折一兵遂頒憲書奉正朔設條教雉髮立社長束之蓋進道之功如此十三年春夏事也內山既定方檄諸將息其軍而內山疫作隘勇徙山外避之番俗喜殺人禳災於是北道大埧諸番復肆殺竿其頭於門勇劫復見殺諸將請討公曰疫甚不可爲也徐之九月乃請惟源率將討平之而中路裏冷白茆復肆殺林朝棟朱煥明並往討之八月間連戰二十日軍且殆卒攻其穴迭敗之番埋石且誓天不反乃歸呂家望者後山埧南強社也諸番尊其主號曰番王既降矣十四年六月復出殺誅其凶外山匪首劉添汪勛之大集四千人以叛所過焚殺無留行全台大震兆連千五百人埧埧南分防六百里

弱甚賊圍廳治及張營攻守十七日幾死急命總兵萬國本鼓兵輪炸砲解其圍別命吳宏浴往討電乞北洋總兵丁汝昌以兵輪炸礮佐之八月賊集鄰番以死拒諸將血戰半月燬其巢於是諸叛番皆乞撫獲匪首劉添汪誅之南路再定而中路萬霧社獨悍虐異他番通判吳本杰令各社壯丁爲營勇箝之輒逃歸肆殺乃下令絕鹽糧火藥入山中萬霧懼乃復降送子入學且爲質許焉惟北路繞食竹加山衣卯京孫兒諸番數十社既降仍肆殺不可制十一月軍至其酋紅衫佩鈴鶴立待戰於是鄭有勤劉朝帶苦戰冒絕險盡拔之獨陳羅剿內溪既定兩作而橋亡疑番之毀陷官軍也斬六級番怒襲殺營官練勇十餘人有勤移軍討之內溪四社復乞撫公怒罷羅軍諸番輒送子爲質北路復安於是全臺番八百社衆二十萬人靡不就撫者此十四年秋冬事也十五年全臺大定方論功而後山之難忽作初八九月間番例殺人曰做享九月副將


劉朝帶請自內山開巨道八十里遙達花蓮港通海岸利耕民道中伏弁勇死者二百人公憤甚察其地近老狗社加九岸也則令吳宏洛統諸軍十一月入內山攻勦十二月大軍至白阿社番酋築碉堡死拒我軍築台山巔用炸砲環擊破其巢獲其酋有敏阿斬之加九岸以平十六年正月公親赴宜蘭蘇澳督戰老狗番去蘇澳深入八十里山高路絕迹且窮乃命軍開道設橋梁以往二月宏洛自南澳循高山以進諸將自溪底赴之社番拒輒破師行十日乃至老狗社隘口兩山壁立絕壑巉岩中道僅一人出入總兵傅柯德鼓勇方入隘伏作死之後軍至已無迹矣宏洛自武搭山巔走西北抄老狗社後與溪底軍懸絕二十里聲息俱窮山險不得下衆番數百人突至血戰破之是日公自登武搭山勘形勢宏洛已去二十里不相聞武搭以西奇峯疊嶂天日不開師危甚土人言老狗諸番無村落散處羣谷間雖深入不獲也獨地狹無田非出山不

獲食大軍誠壁隘絕其糧可不戰下也公從之乃令宏洛毋下山折兵銳設地雷羣隘絕之開道武搭山南與溪底軍合番夜出求糧值地雷盡死三日餓益甚痛哭送子以降乃振旅而返是役也始以游擊鄭有勤冒餉違節度誅之終以提督李定明失援傅柯德罷其軍奪職萬衆竦然此十六年春事也蓋自十一年冬撫諸番至此乃克大定初臺之撫番也動需兵餉數十萬剽一社輒用兵數十營公既未增一兵餉特奏林惟源任墾事佐之疏請免船資招閩海貧民墾畝輒數萬使番衆狎居民深慕衣冠文物倫理婚姻之樂羣化無形則耕織自精貨財自殖撫事既定各就墾撫局設義塾番童讀書者千數百人父母來觀輒跳舞歌呼以去使盡其功微特田園百數十萬畝設官分縣富庶在指顧間卽古木名香珍禽奇獸寶石五金之饒利賴甯復可億公經營六年三親絕域蒙瘴涉險不騎而徒彼豈不知暇逸哉其所志者遠也乃番叛粗安公已

不安其位令坐巖疆千里拱手強鄰嗚呼可勝言哉可勝言哉

撫番略叙四卷首

五



設防略叙五

台灣南北七百里東西廣者三四百里其海口大甲以南至鳳山沙線闊者五十里兵輪不能泊岸惟大甲以北至新竹港汊紛岐迤邐達宜蘭兵艦皆能近泊基隆滬尾雖可泊而山險猶多部以雷礮尙堪自守惟新竹沿海皆平沙後壠中港三號兵輪皆堪出入非全恃兵力不爲功然以視澎湖猶可爲也澎湖者距臺廈皆二百五十里拳石孤危地不過數十里石沙迷漫草木不生四顧驚濤莽無撮土礮臺之築待土隣疆此天下絕地也然內深口狹船塢天然據狹口以建礮臺闢船塢以爲重鎮扼南洋之樞筦通臺閩之咽喉別擇臺港增礮臺布雷礮以爲守禦廣置兵輪練海戰縱敵輪飛渡吾且乘便以襲其師敵雖狡卽焉能睨視吾國哉故公嘗言臺澎之防豈特臺澎所以固吾國也初劉城之久任臺道也歲糜餉百數十萬不聞購一精利槍礮以備軍防故雖基隆

險要礮臺僅足當一面且失勢不能支礮僅五尊莫能一戰公始赴臺也道上
海僅購毛瑟槍三千乞江督伙前門礮十後門小礮二十水雷數十備基隆別
請巨金四十萬購槍礮當時固未遑也臺地四面皆海無兵輪則聲息俱絕當
時台地四輪永保琛航裝煤台北伏波皆歲久行遲不適用船政故有四輪備
台用澄清登瀛洲乃悉赴江南江南新購二鋼船合舊輪已足請飭江督以澄
清四船返台灣資緩急江督止焉及戰乃無一艦僅租英德商輪運兵械遇敵
則逃敵無禁海台固已坐困矣伊古軍勢瞬息萬端自電報興而萬里乃如一
室臺居海外乃未一圖故戰急而聲聞俱絕法禁海時在十年九月公上一疏
次年二月始奉批摺其隔絕如此
併此數者公輒痛之和議成亟請設防備不測 詔嘉納之然非巨款不能爲
也初公請以左文襄濟臺洋款百萬金助防事十二年春部議借款僅餘六十
萬已入海署莫能資請飭臺撫節臺款存儲可次第爲也公抗疏力爭之且言

上年法兵退後臣卽飭各員趕造基滬砲臺與洋商定購巨砲三十一尊款銀六十萬全臺歲入初只九十萬臣逐而理之約增十餘萬防軍裁減仍存三十五營月餉并輪船製造各要需歲且百五十萬閩省關協銀四十四萬尙不足百五十萬要需何由樽節 詔飭部速議乃名撥各海關三十六萬誑之以詢各關部撥爲已久矣蓋中國苟安已成故習庚子李文忠奉 召至上海陰語所親曰世人詬我海軍不能一戰吾辦海軍名爲三百萬實則每百萬只三十萬餘皆莫知所之事焉能辦 法軍退後事已經年 明詔設防實乃若此公憤甚輾轉至冬乃無一錢於是舉全臺細款入告此單現附理財略且言法人圍攻之際宵旰憂勞內外臣工無不以未備臺防爲恨解嚴後 詔由英德購鋼甲快船四隻專備臺澎需款二百萬並開行省竭力經營斯固發憤圖強矣顧從前沿海造一礮臺款輒數十萬臣於澎湖基隆滬尾安平旂后五口購礮築臺請款僅八十萬部推兩載未獲纖釐礮價到期洋人催索何以答之

萬不獲已擬由閩臺各借洋款四十萬金專籌礮價閩臺各還 詔曰覽乃就
借款購巨礮三十一尊備五口焉初十一年夏法軍之甫退也公復請南北洋
撥兵輪三艘駐基滬澎湖閩廠撥運輸二艘運城臺物料十四年埤南之變陸
道自臺北至埤南千三百里遠甚復奏言前 詔購四快船備臺用已歸北洋
請撥次快兵船二艘臣再購水雷船數艘 詔詢三省及海署未之詳也十三
年五月奏言澎湖僅海鏡兵船供差遣此似三省所撥臺北伏波船已損待修萬年青
亦沈沒今各工並舉僅購威利輪價三萬八千金不敷運載復以二萬六千金
購德商輪船命曰威定十五年復奏言威利威定皆沈失伏波海鏡皆敝不支
臣前由商務局招股購鋼快船二曰斯美曰駕時都計銀三十六萬今諸商允
以兩輪爲官物仍作商輪以運資抵兩船用款運臺官物不費養船之資其價
由海防經款陸續籌還伏海兩船歲用六萬今並撤裁卽以此抵新船之價六

年即可清償既於公款無虧所裨於海防甚巨詔許之台之爲港也內淺外深巨輪苦難泊岸十年法事急連購南通北達前美如川四小輪十四年工作復造小輪駁船一無事載運有事乃置水電又見海口之易塞也複製挖泥機器船備疏鑿通計購兵商輪四小輪六然後戰守可資更慮海外音問之難達也十二年復自基隆至淡水遶彰化達台灣府城分達安平旗后造陸線八百里除木杆需銀三萬兩復造海線自滬尾遶抵石川至福州更自安平澎湖六百里需銀十萬兩都水陸千四百里設水陸報房凡九所又慮海線之斷而難續也以銀九萬兩購鋼輪一艘復以萬兩製修電纜器附之外購測量器凡一電報器凡三運放保險銀二萬兩逾歲成之又廢驛站創郵局然後聲氣悉達自時厥後復就台北府建機器廠百七十間購製造槍彈機器實之更慮軍械之難儲也復建軍械所七十間別建製礮彈廠以待緩急於是澎湖基隆滬尾安

平旗后建台凡十座用鐵水泥十五萬箱購水雷八十具內保險運費在艱難締
造瘁瘁萬端更謀鐵道達全台通間阻振商務以速兵機而其心爲益苦矣初
公屢上言非鐵道不足振中國清流無遠慮扼之及鎮台深念省治必居彰化
山谿奇險更非鐵道不爲功十三年春特命商局李彤恩函致南洋西貢新嘉
坡閩商陳新泰等還臺振商局首集巨資三十六萬購二輪即駕時新美通中外各
埠爲之倡乃請自基隆造道達臺南計款百萬金本資就鐵道取償不勞公款
公大喜上言臺環盡海雖基滬安旗四口購礮築臺差資守禦而新竹彰化海
口紛歧安能設兵遍守建置省城必居彰化不隣水道貨物難通加以大甲房
裏曾文三溪大者闊乃十里其次小溪二十餘亦寬百丈春夏奇漲淹溺尤多
岑毓英創大甲石壩耗銀幣三十萬元數月衝流乃歸烏有自非鐵橋鐵柱終
不足禦橫流省治初開何來巨款今鐵道成卽有兵端隨地皆堪飛駛策應無

勞南北流通必經彰化人物易集建省無難溪上鐵橋皆歸鐵道不勞公款坐致坦途實惟台省無疆之福詔許焉十四年冬復上言李彤恩之謀鐵道也勘地南北逕直六百里除地價車房碼頭土工外估銀百萬兩議令兵代土工惟基隆淡水間須闢山洞九十丈大小橋梁百二十座削高補低工程險巨軍士築台剿社代工莫由商局雇夫民勞費劇今基隆六十里已造坦途鋪軌乃三十里費夫價橋梁十九萬金始議辦時衆商聞利巨兩月集銀七十萬現收三十萬金已購兩輪由官墊三十萬及工師細勘土工已須三十萬金衆商觀望彤恩急公好義慷慨不撓已購鋼軌三百二十里火車七十具自基隆至彰化材器裕如今彤恩既沒替代無人稟由官辦細叩工師估計基彰三百里按里需銀三千兩自彰至臺南里需二千五百兩今兩輪入官已還官墊基隆工畢後屬坦途閩協歲四十四萬尙款百二十萬金原備建城之用今城工可緩路

工未可稽延請移緩就急詔可之蓋辦事之難如此

建省略序六


臺疆當鄭氏時僅三縣厥後榛莽日闢官吏日增然規模固未備也光緒初沈文肅公始建臺北府固臺北移同知治埤南以固後山建省之議自此始 朝廷憚興作乃議閩撫建行署於臺以半歲駐臺如直督始駐天津制詔從之岑襄勤之撫閩也尤銳意更張親勘彰化爲形勢建省之地東西奔走疲憊寡成十一年五月法事初平六月公上言臣病不勝閩撫乞辭專駐臺疆任防守詔強任之當是時醇賢親王參大政銳意厲海軍深計必劃臺疆設臺撫專力經營庶可作東南保障九月 詔改閩撫爲臺撫議分疆十月公奏言臺地分疆必俟撫番清賦措置無遺財堪自立處常處變乃可自全今利未開非閩協無能自給一經劃省督臣雖無畛域司道以下歧視必多請專令閩撫駐臺專臺事閩事一任督臣五年後籌進止復引疾乞歸 詔不可疏再三入詔卒強之

十二年四月總督楊公昌濬躬渡臺視疾兩帥甚歡公深慮臺防之無款也楊公許還閩圖之公見其忠坦四月日漸瘳乃赴閩中等建省建議臺撫仿甘肅新疆號福建臺灣巡撫兼學政設布政使佐用人理財加臺道按察使銜理刑法所任文武將吏均請敕部寬文法擢真才初前山彰化嘉義鳳山新竹淡水五縣大者縱橫二三百里耳目難周後山中北兩路延袤三四百里僅劃五區設碉堡無專駐之官尤稱難治乃親巡考圖籍度焉彰化橋孜圖山環水抱氣象宏開全台適中足爲省治分彰化東北境設首府曰臺灣府附郭曰台灣縣改故台灣府曰台南縣曰安平嘉義之東彰化之南自濁水溪止石圭溪長約百里增縣一曰雲林新竹苗栗街左右扼內山之衝地多新墾分新竹西南增縣一曰苗栗裁鹿港同知合彰化及埔裏通判四縣一廳爲臺灣府淡水之北東抵三貂嶺番社紛歧距城過遠基隆爲台北門戶商埠紛煩分淡水東北四

保隸基隆廳改通判爲理事同知重其職此前山也後山形勢北以蘇澳爲總隘南以埤南爲要區控扼中權厥惟水尾其地與雲林縣東西相值已自丹社集集街達彰化關路百八十里貫山中省城既定中權前後脈絡貫通水尾實台東鎖鑰設台東直隸州駐之左界宜蘭右界恆春地縱五百里橫三四十里通隸此州而屬諸台道埤南廳舊治設直州同治之水尾迤北曰蓮港新墾既多海口水深數丈設直州判駐之而均隸台東州此後山也詔從之建置既成必謀兵備台兵水陸營凡十有八水七而陸十一共額萬四千人三次迭裁陸存四千五百歲餉十七萬金水師七營分隸澎湖安平滬尾噶瑪蘭諸港船艦無存今昔勢懸非兵輪不能戰守安平旣設副將台灣總兵又駐台南府城距安平纔七里兩大員並居一地勢等駢枝謹裁水師各營以安平副將駐水尾爲台東協移北路副將駐埔裏社均改陸師並扼前後山適中地陸兵月餉四

兩五錢視勇糧尤重將貪兵滑簡練莫由請月加考試能中五槍以次者分別補署不論年資庶鑽營可除疲殘自去部議經制副將移改不行廷議不能決也番兵精悍實過綠兵請仍舊額四千人加餉嚴訓練許之澎湖舊制副將與通判主兵地重勢孤非大員不治請以福建海壇鎮移澎湖曰澎湖總兵裁水師以兵輪礮台專戰守郡縣吏緩部選惟其才 詔悉從之彰化省城久定議而籌防既急巨款難資公之始蒞台北也軍餉皆集府城所居淡水縣署幕僚或處草廬城內多水田不能通輿馬興造既衆局所漸繁不得不暫恃台北爲根本乃先購民田築官道招商設闔閭通貨財商務漸興始就城西北建撫藩行署設兵房銀庫八局所附焉淡水改廳爲縣舊治乃爲新竹縣所居淡水縣令及參將各官多賃居城外非便也因復各署於城內壯之海外商民重神道禮關帝天后益虔則廟以祀之又念船政大臣沈公葆楨吳公贊誠撫番開墾

勞苦實多水師提督林公文察立功海疆親平台亂基隆之戰淮楚將士死者千六百人既建三公專祠復建淮楚昭忠祠以祀益創西學堂課西國語文測繪格致諸術厲人才建番學教番民子弟復就考試學額以廣振士風臺事粗備乃建澎湖城於媽宮與砲台相聯絡既念省城與分治兩縣之無城署也復合台紳籌捐集造之踰年而公去矣




清賦略序七

台灣一歲兩熟田日闢而賦不增墾戶之租未減也蓋紳民包墾但呈一稟募佃墾荒其私納曰大租屯租番租隘租於公家無與也公上言雍乾之世迭詔減台賦不准升科此蓋全盛之時台無足重今建爲一省財足方可自存舍維正之供一聽豪強之私納而乞濟鄰疆非政體也故當法兵初退首陳善後策卽以清賦爲斷斷而其事必以查戶丈田爲簡要十二年春建省議定始令台南北兩知府各設清賦局董其成調官吏三十人履各縣合正紳切勘之其法逐戶問田園多寡然後勘丈以校之前匿者免其罪私租悉革一入公家嚴官吏賞罰爲策勵善者按異績補署賄匿者劾之兩年而事畢原額賦銀纔十八萬兩今溢原額田輒數倍約四百萬畝官屯各地一律清釐歲徵銀七十萬兩按畝瘠腴定賦增減額增於舊民減於前丈畢由藩司給由單杜田畝兩乖之

擾故事劇而民樂趨惟彰化蔡施二族私匿獨多不利官丈陰煽土寇圍縣治
撓其成十日之間竟歸殄滅黠者復賂台諫劾之辨疏見謨議略公抗爭持益固卒底
厥成其操縱得宜則尤在屯田一事初乾隆間大學士福康安之征台也番目
潘明慈以番丁助戰有功亂定選番屬四千人設屯十有二以番社長授千把
外委十八人爲屯軍授番地及民田近十萬畝歲折徵番銀四萬元備屯軍俸
餉閱歲既久番不能耕輾轉歸民番乃益病公念番丁訓練實過綠營請仍番
軍四千人月餉四元今倍之過勇餉而以田歸民畝徵賦爲番餉台鎮主之節
賦羨入公家毫強不得擅其利蓋其術皆奪豪強私利入之官故賦溢而民不
病嗟乎庚子以來中國之禍亟矣新政日煩賠款益急掘羅竭澤國敝而民志
益乖然正賦之供侵匿不知凡幾 朝廷永嚴加賦而豪強蝕蠹官吏吞剝莫
敢誰何況乃江湖河海之濱滿蒙新疆之地苟加墾闢且倍正供所慮姑息成

風一媪喧撓萬官辟易富強大計何自而謀得強毅如公舉全國土疆概歸嚴
丈闢荒土以富游民內杜豪強外絕隣國十年之後中國其有豸乎惜乎本計
無聞日令大司農仰屋而憂坐歎理財之無術也哀哉故綜其事告天下有財
政之責者



理財略序八


理財之法莫大乎開源不絕虛糜源何由拓國朝定鼎中原所恃燕齊晉豫吳皖豫章湘鄂隴秦粵東閩越十四行省之賦已耳若至川滇黔桂賦額已等羈縻滿蒙藏海新疆且無不仰資國帑而台無論矣夫天下有一地之土自足生一地之財不卽其地以闢其源而徒恃隣疆以求自保嗚乎此豈謀國之道哉公始蒞台卽上言闢全台自有之利養全台自守之兵其識固已卓矣然沈文肅有言台局未成譬若商不費財焉能獲利廷議乃思片言建省遂不相資抑何偵歟當法事之殷戰守不暇自部撥六十萬金購礮外未助其他劉璈旣擅財權復謀撓抗蒼茫絕海幾致覆亡自非 廷詔紛綸羣帥環協雖聖者不能謀矣然觀林惟源託身廈島一書遠達卒捐四十萬圓 明詔借捐璈方抗阻一聞公命台人卒以五十四萬捐飲危軍自非英風偉略忠懇動人烏能上下

感孚若此法事既定外濟輒停公奏言全台入款正供外僅恃關稅釐鹽抵餉不過九十萬撤軍而後存者三十五營軍餉雜支至少需百五十萬而設防建省不與焉十二年夏總督親履台疆見公苦心經畫敬之乃定閩省關歲協四十四萬金備建設期厥五年而購礮急需尙賴閩台分借八十萬其拮据如此公首招商股購二輪以擴商務而以官購兵商大小輪十艘助之又設電報達閩疆嚴水陸巡防清匪盜復謀鐵道開番途開港口以振農商之氣免船金招墾佃以廣耕藝之謀開海禁製樟腦硫磺以博官民之利然後農商浩樂百物繁興更慮賞罰偶乖莫由鼓人心而驅夙弊也首薦林惟源劉壽鏗以獎其義俠部捐過重則請減成數招徠之捐民被虐則黜縣令獎慰之台吏死難則蠲官逋矜恤之奸商賂吏則俱懲而更易之局員朦蝕則嚴劾而勒償之然後改貨釐肅關稅推茶捐迨田賦既清歸時歲入且三百萬自購礮借款終已台償

雖平匪剽番迭興師旅建城設署時創巨工未嘗再乞閩援更需部撥惟曠學未興礦謀屢蹶公實憾之初沈文肅之創基隆煤礦也閱年未幾耗折已多公始蒞台月虧至八千金之鉅核其月報均屢贏餘戰事方興不遑根澈乃奏磁礦道員何維楷任之未至而法踞基隆乃徙機器毀其廬免資敵寇法退張學熙以人工續辦未籌機器積水難勝積虧以去公曰煤之爲用固船廠兵輪機局所必需未可棄也乃約滬局閩廠及臺各湊母金二萬兩知府張士瑜集商股六萬綜十二萬金聘洋師購機器十三年春去積水續之盡歲日出煤百噸支局用士瑜上言基隆浪險難用駁船陸道逾山運資益巨非鐵道不爲功請辭時全臺鐵道方興公念道成煤用既多銷售益利乃自十二月收還官辦聘洋人瑪體蓀以商法治焉令鐵道自礦達基隆期迅捷歲久煤質且窮月虧三四千兩洋師言非集資百萬另闢新基不可於是英商范嘉士願集百萬金承

其乏償舊礦本四十萬兩另闢新窰二所采之十五年五月並議章入告總署奏駁之 詔令擇賢員仍自辦十月洋商已告退另委任之十六年六月公復上言通政司副使林惟源推薦知府蔡應維集洋幣三十萬元與官合辦官一商二期十二年仍繳原礦本銀十二萬兩承局中機器以十萬元爲官本餘按月扣煤礦務歸商官不與而利乃三分得一奏入 詔令戶部及總署議之會議稽延而諸商已定七月朔承其局八月望議上 嚴詔斥止焉謂官商合辦宜主自官而疑議章總管以洋人爲影冒以濬港爲撤藩籬且曰敕議擅行其交部議處部議奪官 詔留任公疏謝仍官辦解之公恢廓大略惡拘牽不樂事朝貴其赴臺也 明詔許便宜及任台撫謀省防屢抗言台疆草創難泥部章乞 旨飭部臣寬文法文墨吏已陰嫉之時醇賢親王當國政所請輒行乃獲稍行其志事王薨戶部嫉公甚已抗疏罷海軍公迭疏方乞退忌者益銜之

故所議如此明年春公乃堅乞以歸實則公赴台時卽疏請官商辦礦主自商人祛積弊 詔固嘉納之云



獎賢略序九

天下萬事莫大乎用入顧才俊用人其敗也或加於庸闇何則庸闇可腹心豪傑才俊輒睥睨自尊也公之始赴臺北也所部既分防江海留不遺挈親卒纔百二十人將吏十數當是時劉璈以台道擁湘軍將士二萬人諸將皆位尊勢重孫開華且以湘將出霆軍攝提督與湘將曹志忠並駐基隆相逼甚公乃以直隸提督加巡撫銜未官閩撫主客之勢既已相猜而又無實權以伸其節制且湘淮銘霆之不協二十年矣公道津時李相國見孤身入台兢兢以難制台軍爲公懼公笑謝之其始至也淮銘軍將章高元劉朝祐至者纔六百人湘軍已三千人駐台北法艦逼基隆聞者皆戰色公至卽召湘霆將慰勞之疏其才以上縱橫談讌歡若故人諸老將固已震其聲威而樂其風采矣故當時之戰孫曹諸將皆奮死不撓旣捷上其功則首志忠次高元尊開華之攝提督也述

其功於前疏而別請獎勵於附摺不敢相屬也朝祜固公從孫行則述其功而辭其賞而於開華諸將士尤特獎之示大公之無我也蓋自是而湘霆諸將士無不竭肝胆効死於公矣 朝廷慮其難協也 特詔開華佐台軍公益剖肝胆相左右每奏輒偕故雖左文襄視師閩海楊公昌濬且以湘帥督閩疆劉城怙湘軍威抗節度促法軍禁海絕其生險絕孤危自分必死公獨從容談笑驚不一言湘霆將感其誠益誓死絕未有忍相背負者太史公慕淮陰破趙驅市人與戰以爲奇功誠見公之銳身虎穴肝膽仇讎悲歌歎悼宜何如哉且台民悍狡易動難馴國家所恒懼者也法事之來 詔諭鄉人舉團練於是狡桀之徒乘風而起爭請募數百千人助官軍公深見外洋火器之精訓練之久非若昔時寇盜之可揭竿勝也且起家團練深知鄉民無器無法終不足助官軍而敗且滋累餉絀則練多益且不支更慮事平而盜益衆也恆謝絕之獨見郎中


林朝棟生長將家負地望則令統鄉練佐之故戰法之後剿匪撫番恆得其死力而團練亦無尾大難制之憂凡此皆危難可法者軍事之艱莫如籌餉而官之所忌莫若紳權公獨惟紳是賴林惟源前助軍餉八十萬公至復助四十萬飲官軍特奏擢京卿以風厲台人故百萬之金不勞而集厥後省城之建台民復爭請輸巨金皆惟源朝棟之所爲也故凡撫番清賦墾荒諸大政公輒請詔惟源佐之而亟歎其賢遂自五品卿晉通政副使每奏必挈其銜秩闕官廨刻關防勢乃與欽使等故凡所規畫靡不坐致其成而彰化之圍朝棟解圍旬日郎中蔡占鼇復解匪黨三十六莊縛其族匪渠以獻主事林啓東不待官檄且倡練保其鄉卒未見奪官權者而今之大府獨絕賢紳何異去弓矯以自求弋獵乎哉公肝胆賢豪絕無畛域而用沈應奎陳鳴志則尤奇應奎者官貴州布政使嬰嚴譴奪官十年冬法困臺時左文襄檄令赴臺察團練渡海以東近岸

二十里遇法船砲擊船幾覆舟人大哭應奎獨堅坐不撓卒潛身抵臺北公大奇之抗疏表其狀乞賞原銜爲冒險援臺勸詔稱其罪重不許公獨舉全臺軍餉付之時法軍禁海獨嚴餉援俱絕劉璈復擁巨餉阻民捐應奎拮据萬端勸民捐數十萬察奸商匿稅濟危軍法事定公復上言全臺裁勇留軍餉需屢紕扶危濟困實賴應奎且言臣不諳吏治清賦要政查戶爲先皆應奎一人所規畫今上親政復密薦之始詔以湘人邵友濂任臺藩公迭稱其才請勿調己而邵疾去廷議謂公之嫉湘人也乃命蒯德標繼之公復奏德標與臣同里至交忠勤廉樸然臺居海外情勢多殊應奎久勞此間迭請歸里臣以清賦煩劇悉賴主持請爲蒯助意蓋以臺藩屬之也已而德標果不至應奎卒授臺藩代公護巡撫乃歸鳴志者湘人也官江蘇候補道劉璈之獄公獨檄鳴志代使整治之或曰湘人門戶重臺南將吏皆湘人且將掩覆之也公卒任之鳴志竟

併散局撤冗員歲節銀四萬兩公復迭奏請留閩題奏存記軍機嗟呼黨援門戶牽怒不幸以快其意者多矣今沈來自左陳出自湘公獨堅任不搖而奇効輒獲抑獨何哉湘軍之戰也王詩正喪師失地吳鴻源援渡無功奏保不行而求恩獎則固英雄之權略者已自古豪傑大都讒謗滋紛而一眚微瑕輒足困非常之士李彤恩謗成重辟公獨請同罪雪其冤鄭漁罪已遣臺公獨惜其才而留爲將選此管仲所爲甘心鮑叔李嚴所爲痛哭武侯者也故雖張兆連始附劉璈卒邀薦達吳光亮因貪罷秩卒被覃恩至乃遠念賓僚奏徵賢士近傷部曲恤及黃泉斯則賢帥之常良不足爲公異獨其白林文明冤獄足令千載下歌泣不衰文明者彰化林文察母弟朝棟叔父也文察署福建提督同治二年臺灣戴萬生反踞彰化城蔓延三百里文察東渡滅之師還死漳州之難諡剛愍立傳建專祠公疏建祠臺省者也文明從戰浙閩擢副將性粗豪臺民喜

誣告吏不嚴反坐巨室輒危文察之平戴賊也文明實從亂黨多見殺遺種仇之文明歸兄亡勢且替文明多武斷仇益恨之同治九年遂以謀反告督撫飭鎮道用便宜時臺道黎某悍甚委吏凌定國蒞彰城牒問狀文明坦然冠帶入縣庭以爲就質也定國出不意縛殺之以露刃登堂率衆拒捕報其母戴氏年八十痛子冤四入京控都察院事下督撫輒蔽之光緒七年編修何金壽御史吳鴻恩孔憲毅察其冤爭入告舉人邱敏光等復合數十人呈察院雪之嚴詔促斷結時久控十三年家已落戴泣留閩誓不歸朝棟念祖母年逾九十羈省病且危而黎道方擢京卿督船政與總督何璟皆粵人也勢不雪承審吏許雪文明謀反冤請旌戴氏朝棟乃痛哭用祖母姓氏具結乞銷總督遂據請罷其獄奏言當時告示謀反一語爲過當未能盡雪其冤也附片乃言林朝棟爲善於鄉林戴氏深明大義懇旌表以慰其心戴固不知獄定也死閩時猶執

朝棟手堅囑舍生命雪叔冤自法寇台疆朝棟與文明子朝昌捐餉練鄉軍戰守有功明年法退乃乞辭兩人官追復文明副將白奇冤籍紳益爭稟陳狀公惻焉奏復之 詔不可公復奏建剛愍祠塞其悲然公疏皎然公論已縣日月 閩人言朝棟積功晉二品階候選道再平彰亂解圍城踐父志 特賞黃褂寵異之日本據臺朝棟獨華裝不歸日日吾不忍負劉公也嗟乎林氏三世如此可不謂奇烈哉惜乎執法者之不悟也



懲暴畧序十

臺灣之暴莫大於劉璈而彰化盜次之朱守謨潘高陞則狐兔之屬也昔者李相國之潛兵上海也始至以延建邵道晉二品階督蘇軍處上海絕地上海道吳煦兼布政使攝餉權勢蓋與劉璈等相國歎曰餉軍命也寄命爲軍其可飽乎一夕單騎岸幘入吳廨談諠甚歡瀕行微問曰君司蘇餉月出納幾何其簿帙可一覽觀乎吳坦然出帙示之相國一瀏覽顧左右懷之曰猝難遽罄明日返君矣上馬逕去吳大愕不敢言相國歸摘其隙疏劾罷之卒按吳帙命專官司出納軍以不飢蓋英雄大略固如此公之渡臺也視上海軍危益甚相國知臺軍之難制也誠請一人代臺道始戰旣勝卽請授撫帥重公權台難其可蘇乎惜乎兩公雄略之不及此也自古外戰易內戰難內外交攻靡不危且覆者璈之穴此四年矣督撫久居閩璈擁大兵二萬皆湘人生殺號令若大帥一旦

以容帥臨之況乃挾湘淮之見假故帥之威重之以守謨之譏乘之以基隆之退其能帖焉奉節度乎奈何守謨煽譟公不執法以誅且縱其去而不先發以制之也嗟乎左相之來年且八十矣誠若李相之豁焉大度盡遺關陝之嫌則璩與守謨之謗將斥不行李彤恩之難且將不作璩雖跋扈卽烏敢遏民捐挾巨餉激軍變以困新帥促敵禁以絕全臺也且璩之遏餉公既密薦龔照瑗爲代矣江督曾忠襄輒復挽照瑗不使東故公益堅忍刻厲法事既定而後圖之嚮非濡忍歲時卽臺北湘軍服公無變而臺南湘將三倍北軍內外交訐臺事尙忍言乎故竊以謂璩之驕淫貪黷植黨鴛財猶爲當時之公罪而激軍陷帥險喪封疆其罪乃不容誅惜乎楊勇愨之賢

諱岳斌故湘帥爲陝督與刑部尙書錫珍勘獄至奉詔

以治斯獄終乃調停左相舉彤恩守謨兩罷之而因斥絕守謨示不用以彰其罪璩則遣戍以畢之故公辭臺撫一年幾不復與軍事十二年春閩督楊公昌

濬度公憤親渡臺北慰結之既依臺餉四十四萬凡五年復借洋款四十萬償購砲公乃慨焉復起爲建設之謀嗟乎貪戾僉壬無責已大臣意氣忍不忍之微其効乃積於軍國可畏哉可畏哉君子是以歎門戶之足亡天下而楊公昌濬之爲不可及也白墩參効公以陳鳴志攝之乃得稍行其志以此見任吏之權操之政府官方兵政將必至於不可爲誠以屬之督撫而嚴法以戢其私疆事其猶可治乎循是而公於將吏乃可見矣副將潘高陞城所任也濫剿化番肆焚掠則効奪戍之游擊鄭有勤公所奏爲將才使統一軍者也始縱兇番隘勇四十人皆被殺公親出剿復以墾民三百人冒營勇吞其餉及戰復觀望不前則并其將吏三人斬之湘將提督方春發柳泰和迭保爲將才任統帶者減勇冒餉則并其營官効奪之傅柯德之死也淮將李定明擁兵不進則並其營官効降之凡此皆公所奏爲將才者也劉城之獄臺紳林文欽吳朝棟各減長

夫餉百九十人則嚴劾以督其償既償又原而請復之羅建祥者嘉義令也始勤斷獄減巨盜則擢知府獎勵之繼任清賦飾虛糜則嚴劾勒償之李嘉棠者彰化令也峻法嚴刑叛紳鼓亂雖守城堅定卒獲亂民終奏劾罷之此固公所奏調特保者也其磊落無私如此故彰嘉多盜巨首至百四十人首飭將吏殄滅之彰化民變叛紳鼓衆四千人冀免清丈快其私終緝亂首叛紳駢誅之嗟乎瘴癘悍疫之鄉絕海驚濤之地風雲萬態起滅無端戰守皆危死生俱幻欲求展布非重賞不足以激人心苟有智才且將掉臂以去故自戰法來戰守協援苟勞寸績靡不頌言 天闕迭沛 恩綸事平之後經綸草昧海國震驚三駕窮荒不增兵餉羣才輳輻戰守交資是遵何道以致此哉重賞而已故凡部臣偶駁抗論不撓不得當不止人尤感之然恩多則怠非殺奪不足振其威賢帥亦將致敗曾文正不能定中原之揔李文忠不能禦日本之師豈必運籌之

未當哉年老則氣衰喜恩賞而惡殺戮其弊固足以致此也然斯二者苟有偏私微特殺奪致危卽恩賞亦將致禍何則一私則功罪不當固無能服天下也善乎彭剛直疏言人以好惡爲是非臣以是非爲好惡公之保沈應奎也曰臣統兵數十年獨賴用人無畛賞罰無私差獲勉圖寸効嗟乎是二公者名將風流並高天壤有以哉有以哉

按銘軍大將自唐忠壯殿魁戰死尹隆河後其弟定奎鎮江陰從沈文肅定臺灣已著聞矣保臺之役名者惟吳宏洛章高元高元故以師戍臺公至卽歸臺北基隆之退高元痛哭伏地以死爭公大怒拔佩刀砍案角誓曰軍家大計非若輩所知違令者視此果遭重譴某自當之不累若曹也乃定計全師而退漚尾之戰高元功最奇袒身銳入敵始退惟嗜酒戰畢乃痛飲爲豪醉臥不能起孫開華獨以首功聞高元既醒上言公已入告矣厥後甲午遼

戰高元死守蓋州嘗譏宋慶善退慶惡之敵圍蓋州高元孤守纔七百人莫能敵乞宋援不答事定乃棄軍歸德佔膠州高元實官膠鎮德艦砲環擊焉乃師公基隆策扼山後絕敵入陸地吭德將大驚陽請爲好會歡飲德艦中而潛兵襲其壘 詔乃徙高元避之自是竟落拓常不給可歎也宏洛性至孝篤友愛公困臺北宏洛方守粵督帥強留之屢疏調不遣宏洛聞公急獨舍軍孤身詐漁服用大雪抵台入軍帳大呼曰吳宏洛來公大驚狂喜出見其寒且凍也急脫狐裘服之事定乞歸養公以澎湖事函乞乃來皆賢將也

清史本傳

新城王樹枏撰稿

劉銘傳字省三安徽合肥人少有大志會天下亂起倡團築堡寨自衛淮淝里豪並起相雄長一日其父惠途遇別堡大豪爲所辱銘傳躡豪數里奪其佩刀殺之乘馬緩轡而歸時年甫十八耳西鄉諸堡皆怖懾不敢平視咸豐九年率鄉勇從官軍克六安十年援壽州皆有功同治元年江蘇巡撫李鴻章募淮勇東征銘傳以千總率所部從至上海獨立一幟號曰銘軍戰降南匯賊首吳建瀛劉玉林以其衆來屬別賊吉慶元寇南匯擊卻之克川沙連破奉賢金山衛累功擢參將予驃勇巴圖魯名號再踣賊野雞墩解四江口圍擢副將二年會攻福山驅常昭之賊升總兵楊庫汎者沿江要隘也悍賊密布營壘爲死守計銘傳會水師攻之戰六日江陰援賊屢受創不得逞而僞忠王李秀成渡江率五僞王水陸軍數十萬分道來援銘傳合諸軍迎擊大破之乘勢克江陰取無

錫金匱蘇州之勢遂孤詔以提督記名賞頭品頂戴既大軍克蘇州降賊皆見殺僞護王陳崑書死守常州不下而程學啓又戰死嘉興鴻章亟檄銘傳特將一軍攻常州銘傳遣將壁奔牛鎮降賊渠邵小雙卽令扼丹陽斷援賊而躬率敢死士攻城破賊十餘壘降萬餘人僞章王犯奔牛牽我師李秀成復鼓輪舶濟師礮擊奔牛饜且絕銘傳聞之宵驅五百人襲賊後內外夾擊呼聲震天地剗賊壘三十餘座斬馘十萬蹙諸江三年遂拔常州生禽陳崑書磔之常州平賞穿黃馬褂時湘軍旣復金陵士卒苦戰久諸老將功成名立多散歸而淮軍繼興志銳氣盛銘傳又獨年少勇略冠諸軍銘軍之名遂噪海內會大河南北捻匪大熾四年春僧格林沁戰沒曹州朝命曾國藩督師山左乃奏募淮勇設四鎮重兵特檄銘傳壁周家口連破捻於瓦店南頓解扶溝之圍國藩以其兵精捷改爲游擊之師於是詔授直隸提督仍命率師援鄂克黃陂追北至潁州

破之茅屋店兼旬之間逐賊千七百里優詔褒美銘傳獨念中原平曠捻騎飄忽分合狼奔豕突動輒數千里我師專主游擊與賊並驅不能制其死命於是建議築長隄扼沙河蹙賊河南爲聚殲之計銘傳自任朱仙鎮以下河防分汛與築工甫竣而賊毀汴防以出銘傳分軍躡擊創之於鉅野捻首張總愚遂竄陝西任柱賴汶光竄山東自是捻有東西之日李鴻章尋代國藩督師銘傳提所部自鄆城至京山東西數十戰賊望風披靡無敢撻其鋒者六年正月賊走尹隆河銘傳與鮑超約期會戰不及期失利四月破賊於黃安東追至宛郡屯信陽整兵再戰於是東自應山黃陂西出安陸襄棗北從南陽至鄭州銘軍常爲選鋒賊狂奔連日夜不獲一戰乃復議防運河扼膠萊築長墻北起夏店南抵柳林口以遏賊西秋引兵破沐陽圍賊追北至諸城日照殪任柱於贛榆賴汶光圖竄青濟問道馳濰邀擊破之賊西走新城爲所截東走壽光薄之於洋

溯兩河間悉殲其衆河流盡赤諸任既歿絕汶光尋投死楊州東捻平論功以銘傳爲首詔賞三等輕車都尉世職銘傳自剿捻以來血戰四載積勞成疾莫能騎乃乞歸養病七年西捻張總愚渡黃河突綏疆京師大震詔起銘傳馳抵東昌會師進剿疊破之鹽山滄州德平鴻章仍築長墻困賊賊圖撲運河適馬頰河黃水並溢銘傳會諸將縱橫遮擊賊衆盡殲張總愚挾數十騎走荏平南鎮蹈水死西捻平晉一等男爵詔壁軍張秋九年上命督軍陝西剿北山回匪部署諸軍既定上疏陳大勢復引疾歸里銘傳善用兵能以少擊衆與程學啓齊名其初出也將五百人稍增至七千常敵賊數十萬討捻益騎兵合萬二千人其用械器悉改泰西新式戰髮賊戡捻匪卒以此收功平居持議尤以建鐵路爲自強要圖光緒六年俄人爭伊犁應詔至都因力陳造鐵路之益請修南路由清江經山東由漢口經河南俱達京師北路則由京師東通盛京西通甘


肅其疏略言自強之道練兵造器固宜次第舉行然其機括則在急修鐵路鐵路之利不可彈述而於用兵一道尤爲急不可緩之圖中國幅員遼闊畫疆而守防不勝防鐵路一開則東西南北呼吸相通視敵所驅相機策應無徵調倉皇之慮無轉輸艱阻之虞合我國二十二行省聯爲一氣從此裁兵節餉併成勁旅則一兵可抵十數兵之用而權操在上又不爲疆臣所牽制所以立自疆之基礎者在此所以杜外人之覬覦者亦在此疏上議雖格不果行而中國鐵路之興實自銘傳發之光緒九年法人奪越南擾閩越窺臺灣扼我南洋門戶十年上命李鴻章趣銘傳治軍不之應閏五月法事岌詔給巡撫銜督臺灣軍迺強起條上海防十事行抵基隆巡視砲臺僅存五砲不能軍居七日法來犯基隆臺立碎基隆南距省治臺北府六十里而獅毯嶺橫亘萬山之中法旣毀臺更築堅壘置巨礮銘傳移軍基隆山後曉乘大霧選曉將率精卒百人潛入

壘傍空室出不意猝以砲擊壘近陣者半傷死別以領兵出僥道超敵後鼓噪薄之敵驚潰爭赴舟多墮水死是役也斃法酋三人斬馘數百奪燧二他兵械數十遂復基隆事聞上嘉獎出帑銀三千兩犒軍銘傳念滬尾爲瀕海要區距臺北僅三十里軍資餉械皆萃台北死守基隆敵且襲後路制吾命且敵艦駛海上我無艦以應之而江督以三輪舟濟師輒敗返此絕域也不舍基隆啗敵避艦攻致陸戰直坐斃耳及徙軍滬尾留將卒二百人扼獅球嶺明日法果以巨艦十二載師至基隆而別分精卒襲滬尾毀壘而進我以羸卒誘近大軍戰移時別將張李成伏兵突出叢箐中腹背夾擊殊死鬪敵大潰蹙至海濱斬千餘人時法人毀我砲臺殆盡我軍全恃肉薄銘傳每當陣一呼將士皆奮躍致死法人既三犯滬尾不得志月眉山之戰將士忍飢冒雨誓死拒營將跣足往來督戰無不一當百法人益驚自此不敢輕試初銘傳之棄基隆也將卒皆力

諫朝士聞之駭然大譁銘傳不爲奪曰兵事變化豈局外人所能遙度耶躬壁淡水策應指揮短衣麻履時親出當軍鋒炸丸墮馬下從容談笑不顧堅持八閱月卒保危疆上嘉其勞授福建巡撫明年媿成朝議臺灣阻海爲南洋鎖鑰當立行省自治乃改銘傳爲臺灣巡撫於是斟酌舊制奏增府一曰臺灣縣三曰臺灣雲林苗栗廳一曰基隆改舊臺灣府爲臺南府臺灣縣爲安平縣卑南廳爲臺東直隸州增設布政司一澎湖鎮一臺灣之立行省自此始生番窟宅台南北七百里與民居犬牙交錯歲戕民千餘盜賊出沒其間土豪假防番釀金募士抗官吏違號令賦稅不以時至銘傳檄將吏分路剿撫時親督大隊入山威懾惠懷南中北三路及前後山生番皆雉髮歸化復集番童教之臺北府久之語言衣食皆如腹地人至不願歸又念足兵必先足食於是丈田畝清糧賦四年溢經額三十六萬三千三百兩有奇其諸所創土田茶鹽金煤林木樟

腦之稅充羨府庫始至歲入金九十萬後至三百萬因築礮臺購火器設軍械局水雷學堂要以興造鐵道爲綱紐輔之以電線郵政穴山梁水闢巨道七百里以迺南北臺防益固先是銘傳兩上疏陳鐵路爲強國計既屢沮於朝議至是始建路臺灣創興一切新政其意不但爲保障東南七省已也且將舉一隅之設施爲全國樹之範焉時醇親王載灃督海軍李鴻章佐之皆銳意任銘傳特加太子少保十六年加兵部尙書銜命幫辦海軍銘傳益感奮思致身自效嘗登滬尾礮臺東望日本欷歔歎曰卽今不圖我爲彼虜矣未幾醇親王薨鴻章孤立戶部忽奏請天下海軍十年內毋增艦礮銘傳喟然大息曰人方憇我我乃自抉其藩亡無日矣鴻章爭之不能得銘傳遂三上疏求去去四年而朝鮮之難作銘傳才兼文武治兵喜用奇信賞必罰善於弛張將卒滬尾之戰以千餘疲病之師當十倍強敵嘗令軍中殺敵一級賞百金有哨官朱某者見前

軍不利裸身銜刀大呼衷敵師裂其陣血淋漓至不能辨面目戰歸卽戮前軍之却者以其衆畀朱率之故人人皆樂爲效死然性恬淡功成不居自始出治兵訖居方鎮凡五進而乞退之疏至十八上識者謂見幾而作不俟終日銘傳庶幾近之然觀於士大夫出處進退之間亦可以覘世變矣甲午中日之役銘傳方臥病山居朝廷命李鴻章諭意銘傳不肯出乃以書報之曰朝廷果使銘傳督師則請練兵四十萬以二十萬分屯沿海而以二十萬扼鴨綠江不使日人越江一步兵法所謂先人制人者也時翁同和當國素忌淮軍故但使鴻章促其出而延不降明詔實陰尼之云二十一年以疾卒於家年六十是年臺灣割隸日本遺書入天子軫悼贈太子太保諡壯肅建專祠平生所著有大潛山房詩集二卷奏議二十四卷藏於家



劉壯肅公家傳

江寧程先甲撰

公諱銘傳字省三氏劉廬州合肥人也先世耕邑之西鄉至公而不以屑意有大志嘗登所居大潛山仰天歎曰大丈夫當生有爵死有諡咸豐四年粵匪踞安徽陷廬州六安公倡團築堡賊憚之西鄉豪傑蠡午起數十里間往往堡寨基置互相雄長亦時有攻伐一日別堡來攻力却槍藥不繼其妻程夫人躬自造藥猶不繼老媪發其家所蓄藥十數甕以進堡卒不動西鄉豪傑莫不怖公矣九年從大軍克六安保千總明年援壽州晉都司銜同治元年李公鴻章攝江蘇巡撫次上海募淮勇雅知公檄爲管帶官於是銘軍立焉降南匯賊首吳建瀛劉玉林復南匯建瀛所部三千人玉林所部千人皆屬焉別賊犯南匯擊却之克川沙擢都司晉遊擊銜攻奉賢金山衛克之擢叅將予驃勇巴圖魯名號從浦東還援破賊野鷄墩又解四江口圍二年常昭苦賊久會諸別軍攻福

山克之遂解常昭圍摧總兵與水師提督黃翼升同攻楊庫汎六日克之江陰賊復犯楊庫擊却之僞忠王李秀成渡江還救合僞章王護王普王潮王侍王軍水陸數十萬分道內犯公與諸別將各迎擊大破之七月進攻江陰克之詔以提督記名九月攻無錫金匱克之賞頭品頂戴十一月進規常州至奔牛鎮賊目邵小雙乞降受之攻常州小北門大土城克之僞章王犯奔牛欲以牽我常州之師往援大破之僞忠王以小輪船濟兵來爭並擊燬之六日奔牛圍解三年復規常州剗城外賊壘數十環攻之會禽僞護王陳崑書遂克常州賞穿黃馬褂六月江寧殘賊操僞幼主竄踞廣德公從建平往擊克之復追北大破之四年春忠親王戰沒曹州撚大橫曾文正公奉命視師赴山東重公智略奏設四鎮重兵以周家口重任付之公於是屬曾公大破撚於瓦店又破之南頓解扶溝圍以公兵精易爲游擊之師冬率師援鄂克黃陂追北至茅屋店

上褒美之時公已授直隸提督特命交部優叙其明年公念張牛任賴四撚渠者忽分忽合馳馬隊於中原平曠之地剽忽數千里我師專主游擊非策也於是創扼守沙河之議驅撚於沙河以南以蹙其勢公任朱仙鎮以下河防分汎築長牆俄汴梁隄牆爲撚毀分軍進擊之破之鉅野無何撚渠牛老洪死張總愚竄陝西任柱賴汶光竄山東於是有西撚東撚李公代曾公視師公於是復屬李公督師逐東撚東至鄆城西至京山大小數十戰皆捷又與鮑超軍追擊之安陸四月破撚黃安東又追北至宛郡屯信陽整軍兩月復躡撚逐之東自應山黃陂西出安陸襄棗又從南陽至鄭州日踔百里撚望風奔不得戰於是剽防守運河進扼膠萊之議六月與潘鼎新相度膠萊河道形勢乃合諸別軍分築長牆北起夏店南至柳林口秋破撚沐陽南解沐陽圍追北至諸城日照槍殪任柱賴汶光圖竄青濟公從安邱閒道馳濰迎擊之又夜擊之濰東北

大破之撚西走新城截擊之東走壽光薄之於洋河瀾河間盡殲之暴尸四十餘里河流盡赤諸任殄絕汶光尋自投揚州防軍東撚平李公疏稱是役爲軍興罕有之奇捷論功公當第一 詔賞三等輕車都尉世職公自四年辦捻以來轉戰數省略無一日休病莫能騎乃乞假旋南七年西捻張總愚由陝竄河朔 詔旨促公乃馳赴東昌會諸別軍追擊張總愚於鹽山滄州德平疊破之撚圖撲運河與諸別將環遮之徒駭黃運閒從橫夾擊盡殪之張總愚蹈水死西撚平晉爵一等男 詔次張秋九年 上命督辦陝西軍務乃之陝秋屯乾州部署戲下諸將略定未幾引疾歸自號大潛山人蒔花木竹石築盤亭以度克常州時所得周虢盤圍棊賦詩若將終身焉 上卽位之十年法蘭西擾海疆命督辦台灣軍務寵以巡撫銜閏五月甲辰朔丁卯抵基隆行其礮臺僅有洋礮五且僅守前面不能應敵之旁攻歎曰不足恃也居七日法來犯基隆礮

台果毀公以台灣無兵艦不可與海戰乃移軍基隆山後以誘之且以屏礮頃之法登陸趨山巔而陣命章高元鄧長安東西鈔擊之槍斃法僧三法兵百餘奪纛旗二洋槍數十桿帳房十餘架餘卒奔其艦奏入有 詔褒美 皇太后爲頒內帑銀三千兩以勞軍七月法以偏師絀我基隆軍別以五艦犯滬尾滬尾者基隆後路也臺脆兵單去臺北府三十里而器械軍食悉萃臺北府滬尾失則臺北危基隆之師將自潰公乃夜率全師移駐淡水立揮諸將赴滬尾援內地聞公退基隆則駭然公曰兵事變化惡有隔海可遙度者邪不爲奪已而法益增兵艦我軍肉薄而柱槍礮法艦別游弋滬尾口外匯利萬利華安三輪船又不克濟師其勢岌岌然公一呼勞將士莫不奮激卒大破法師於滬尾斬馘千餘人堅持數月不懈由是雖四夷亦驚公矣公爲人果毅伉爽貌威厲眸子爍爍如巖下電語音喑大戲下見者毫毛竦樹用兵不主故常多機變躬

冒煙彈爲士卒先故人樂爲之死幼不慧十五六歲嘗夜寢見有虎搏己遂敏
達喜讀醫藥壬奇占候堪輿五行之書尤好兵家言常以古兵家皆以治兵列
奇零之數其正者則在治國故雅不以武功自震祿尤殫精經世之務十一年
春和議成臺灣解嚴臺灣舊設府一縣四廳二隸臺灣道軍事隸臺灣鎮 穆
宗末年沈公葆楨始增設恆春縣其明年復增設臺北府領淡水新竹宜蘭三
縣規模草創 上念臺灣南洋門戶非改立行省不可公既以是冬由福建巡
撫改拜台灣巡撫於是斟酌舊制議增設府一曰台灣縣三曰臺灣雲林苗栗
廳一曰基隆改舊臺灣府爲臺南府臺灣縣爲安平縣卑南廳爲東直隸州增
置布政司一澎湖鎮一 上悉從之臺灣之立行省自此始生番蔓延臺灣南
北七百餘里與民居犬牙交錯戕殺歲至千餘人盜賊出沒其間土豪借防番
以贖錢募士官吏莫敢誰何南北四路聲氣壅閼公勦撫四年而南中北三路

若前後山各路之生番咸薙髮奉正朔喁喁向化集番童於臺北府而教育之被衣火食讀書久遂化爲內地人肌膚言語如一至不願歸又倡辦清賦事四年而竣較舊額年徵銀十八萬三千三百兩有奇已溢出三十六萬三千三百兩有奇而公之治臺尤以興造鐵道爲亟其煩費亦最巨初我國之與俄羅斯爭伊犁約也 詔公起公至京上書曰中國今日非速開鐵道萬不能自強鐵道成非特利於漕務賑務商務礦務與釐捐行旅而於用兵尤急不可緩蓋呼吸靈通則可裁兵節餉幷成勁旅轉運軍火朝發夕至十八省合爲一氣一兵可抵數兵之用此後兵權餉權盡歸朝廷不爲疆臣所牽制利孰大焉 詔下其議於直隸總督李公李公深韙之欲請 朝廷以其事屬公矣而劉參贊錫鴻新使日耳曼還疏爭甚力議遂廢公爲之歎惜者累月至是周覽全臺謂臺南臺北相距六百餘里崇山大澤縣互上下卒有敵師截其中則消息陡絕


乃奏請開辦鐵道拔林闢塗孔山梁川悉安施鑿軌而駛火車而南北通台防
愈益鞏公之素志始於是發舒焉十五年晉太子少保銜十六年賜兵部尙書
銜 詔命幫辦海軍事務旋乞病歸邵友濂唐景崧相繼代蓋自中國有台灣
巡撫以來起自公訖邵唐而止中日之役 詔旨疊促公海內知與不知皆延
項跼足以覬公出卒以病不克赴二十一年冬終於家年六十 天子軫悼追
贈太子太保銜賜諡立傳建祠官其長孫朝仰員外郎仲子盛芸舉人三子盛
芾亦擢員外郎尋賜祭葬二妾李絕粒殉焉旌祠如例
程先甲曰余兒童時卽知海內有公其季子盛芥余同歲生也公嘗第江甯欲
見之而弗果後其次孫朝望從余學舍於其家獲讀公之大潛山房詩公之沒
數年矣父老往往爲余道公初起時事乃求登所謂大潛山者尋公發歎之所
爲想見之焉然滬尾一役血肉相薄僅乃完之日夜靡心力以締構其土公去

五年乃指揮談笑而齎敵人豈不哀哉

劉壯肅公家傳

卷首

五



贈太子太保兵部尙書銜福建台灣巡撫一等男爵劉壯肅公墓誌銘

桐城馬其昶撰

公姓劉氏諱銘傳字省三合肥人曾祖某祖廷忠考惠世業農後皆以公貴贈如公官爵公生而英特有倬抱嘗登所居大潛山歎曰生不爵死不諡非夫也會天下亂淮淝居民爭築堡寨自衛各相長雄一日有大豪呼公考至馬前責供給不時至訶罵而去公憤甚躡豪行數里奪其佩刀殺之乘馬徐歸於時年十有八矣同治元年合肥李公以曾文正公奏薦巡撫江蘇募淮勇東征公以千總從所將卒號銘軍連擊破川沙奉賢福山解常昭圍合水師奪揚舍汛要隘苦戰六日乘勝下江陰取無錫進攻常州奇兵出奔牛鎮降其酋推鋒直進寇復犯奔牛還軍郤之再攻圍常州先登生獲寇酋陳坤書常州平積功至提督賞黃馬褂而程忠烈已前定蘇州遂越境應浙軍攻嘉興克之至是公平

常州亦出屯句容以應江寧圍軍於是湘軍拔江寧殄洪寇積苦久遂皆散遣羣捻復縱橫齊豫吳楚之郊曾公受命督師湘軍將旣已罷歸乃益募淮勇設四鎮重兵公屯軍周家口戰捷於瓦店於南頓於扶溝 詔授直隸提督率師援鄂克黃陂追賊至潁州大破之公以中原平曠地賊四走疲我乃建議築堤扼沙河爲守賊潰突汴梁堤追創之於鉅野捻首張總愚竄陝西任柱賴汶洸竄山東自是有東捻西捻之日李公代曾公督師公率所部自鄆城至京山西東數十戰賊皆披靡望風遁由是東至黃陂西至安陸襄棗北至南陽鄧銘軍常爲選鋒復議防運河扼膠萊築長塙北起夏店南抵柳林口遏賊騎西六年引兵南救沐陽追北至諸城日照還殪任柱於贛榆賴汶洸圖竄青濟閒道馳濰西北擊破之蹙之海濱殲其衆河流盡赤汶洸自投揚州防軍以死東捻平論功最給三等輕車都尉乞假歸七年西捻張總愚由陝竄河朔畿輔大震

詔責諸將率公臥疾在家李公假 朝命強起之會師進擊鹽山滄州德平李公仍議築墻臨邑屬之馬頰河墻成值大雨徒駭河盛漲賊不得渡漲總愚赴水死西捻平晉一等男爵 詔駐師張秋資鎮守旋命督軍陝西剿北山回匪引疾歸論者謂李公江蘇之功推程忠烈平捻功公爲大忠烈攻嘉興遽戰死而公初起將五百人稍增至七千討捻益騎兵合萬二千人西防陝增多至二萬逮後臺灣之役以異數改巡撫位望乃益崇矣自程忠烈始識外國械器利其戰江蘇悉改用新械淮軍竟以此勝而公尤以鐵道實自疆要圖其關於兵事利害爲重光緒六年與俄羅斯爭伊犁約應 詔至都卽上言鐵道便利數大端李公因奏公主辦議格不行十年法蘭西擾海疆再起公以巡撫銜督臺灣軍務至七日基隆礮臺燬公以臺灣無兵艦不利海戰移軍基隆山後避礮彈且誘敵登陸尋擊斃法酋二兵百餘奪二艦他兵械數十有 詔褒美法兵

以偏師絳基隆軍別遣五艦犯滬尾滬尾者基隆後路也距臺北府三十里軍資饕械皆聚臺北公夜退師駐淡水犄角滬尾謗譏流聞取斷於中不眩時議敵益增艦來攻是時馬江已挫上海用三輪船濟師皆遏不達諸將冒風雨跣足督戰堅守八閱月 詔授福建巡撫明年媾成朝議臺灣阻海峙南洋門戶當設立行省自治乃改公臺灣巡撫奏增一府一廳三縣生番窟宅臺南北七百餘里奔狂叫呶風氣湮闕擣虛斧頑釐其馴稚一皆化熟不以異類自疑念兵制久敝不饒給財用無能革新於是清丈田畝賦收倍經額而諸所創土田茶鹽金煤林木樟腦之稅亦充羨府庫始至歲入金九十萬其後至三百萬因益築礮臺購火器設軍械局水雷局水雷學堂要以興造鐵道爲綱紐輔之以電綫郵政功費大萬百餘公思以一島基國富彊迹所已效威名樹立如其初志累加太子少保兵部尙書銜又特命襄辦海軍事務嘗登滬尾礮臺東望日

本歛歎感發曰卽今不圖我爲彼虜矣已而戶部奏請天下十年內毋增置艦
礮復喟曰人方甚我我顧欲樽俎折之乎遂三疏求去臺灣之立行省自公始
公治臺灣凡七年而歸歸四年而朝鮮難作屢召不出遂以疾終於家春秋六
十是年臺灣割隸日本遺疏入 天子軫悼贈太子太保諡壯肅建專祠史館
立傳長子盛芬直隸候補道前卒官其長孫朝仰三子盛芾皆員外郎朝仰承
襲男爵次子盛芸賜舉人記名道四子盛芥舉人候選道女四人皆適望族配
程夫人側室有出者曰項氏陳氏絕粒以殉得旌者曰二李氏公以某年月日
葬某鄉某原其諸孫朝望舉人刑部郎中致公所爲大潛山房詩二卷並致狀
曰先公墓碑未刻敢請銘乃銘公所箸別有奏議二十四卷藏於家辭曰
公專闢寄方壯其齒金節瑠戈詭浪書史蛩居在壑公謹無止 皇忱外証詔
速公起公來岷驩彼驕亦駭韜智銜勇創古未有漲天大澤納於一泚公胡遽

歸公歸不竢疆場成壞彼此一時悲膺雄志雖死而視焯功鏡詞萬古是記

清太子太保兵部尚書臺灣巡撫合肥劉壯肅公神道碑

桐城陳澹然撰

聖清光緒二十年夏日本奪朝鮮我師壁牙山不戰 朝命李鴻章傳 旨召
故台撫劉公於里第公臥病不出海軍燿明年夏割台灣盟成公輒悲嘯數月
竟以是冬薨於家初咸豐間粵寇踞蘇常爲金陵內府同治元年大學士李公
鴻章起淮軍東討自將程學啓討蘇松命公與其弟鶴章討常州太倉斷蘇松
援賊僞忠王李秀成合五僞王軍數十萬連屯二百里來援公合諸將血戰破
之諸列城畢拔蘇援絕乃降僞王陳崑書痛蘇降之見殺也則死守常州不下
程公既沒李公亟表公特將逼常州公則遣將壁奔牛鎮斷賊援僞忠王鼓輪
礮環擊奔牛軍饜援絕且死公聞宵驅五百人襲賊後夾擊呼聲動天地遂以
四千人斬馘十萬燧諸江三年夏竟拔常州磔崑書軍威達於皖浙逾月湘軍

始克金陵當是時湘軍圍金陵三年不下朝論輒推淮軍功駸駸出湘軍上淮軍固後起公少特起冠諸軍湘中諸老將益驚歎以爲弗及自粵寇據東南淮捻隴回並起颺蕩數千里中國無甯土者殆二十年公竟以此名震中國同治四年春僧忠親王戰死曹州 朝命大學士曾公國藩壁徐州統四鎮兵討捻特拜公提督直隸爲大將壁周口重鎮攝之管兼旬逐寇千七百里曾公特表歎奇之逾年李公代帥壁濟甯公益發舒騁奇略捻騎恆突數千里公則創議建堤塹扼沙汴黃運膠萊諸河二千里罟之斥巨金練奔卒萬人躡擊齊豫皖鄂淮徐五行省之郊血戰三載卒滅東捻王任柱賴文洸病劇乃歸同治七年西捻王張總愚自關北渡河突畿疆京師大震李公特表公節度諸軍爲上將血戰滅之中原大定論功第一 詔錫一等男九年回寇突關中棘甚 特詔督陝西軍爲大帥未幾復引歸自是海內承平公獨寶古周盤築亭大潛山抵

要人不悔嘗角巾往來秦淮上樂詩歌琴管十年翛然若忘天下獨酒酣太息
敵國外患輒孤嘯不忍言光緒六年俄羅斯奪我伊犁 特詔入都詢方略輒
復歸又四年而台灣難作卒保危台任巡撫八年迺歸初光緒九年法蘭西奪
我越南遂盪閩海覬台灣扼南洋要我十年 朝命李公趣公出公方泛西湖
未之應閏五月台灣事岌始 詔用巡撫銜督台灣軍事迺強起以東台嶠孤
絕海中危甚公至建軍府台北而基隆適當敵衝蒞台十日法將驅鐵艦輒大
至基隆僅五礮不能軍艦礮攻台輒毀公曰台北萃餉爲根本地死守基隆敵
且襲台北制吾命且敵艦橫海上我獨無江督貨三艦濟帥輒敗返此絕域也
不舍基隆啗敵避艦攻致陸戰如何哉則徙軍滬尾扼基隆山後斷其衝躬壁
淡水策前軍衛軍府朝士大譁堅不動血戰逾年屢破法軍於岸上斬其將法
兵死者千數百人軍士至飲溺爲活身爲大帥短衣草履臥山野戰輒親出當


軍鋒一日炸彈墮馬下左右皆驚公則從容指揮距躍奮進衆以是益服其神勇當是時法既大破閩海軍絕台援基滬距台北裁八十里卒不獲奪台灣要我 天子聞其狀特拜福建巡撫寵嘉之蓋自中國外戰數千年未有險絕如此者公自是威名震海外矣十一年和議成朝議建行省臺灣堅國蔽 天子鑒其忠遂拜巡撫臺灣之命公念制敵莫先自守以臺保臺而後可縱橫海上台疆周二千里生番亘山中七百里歲出殺掠苦吾民紳吏貪殘賦財益絀則撫剝悍番六百社廓墾疆懲貪墨清賦稅增設府廳州縣布政使固其民建澎湖總兵移兩副將制前後山扼中權合台鎮張厥武創商輪郵電廣硫磺鹽茶鑿前後山二百里闢巨道謀鐵道七百里縱之擬建省城於彰化鎮全台始至歲入九十萬及歸歲迺三百萬既開製造廠興武校拓營臺廣兵輪鎗砲製水雷當是時醇賢親王督海軍李公佐之皆銳意任公經營海表 兩宮大喜

特晉太子少保兵部尙書銜幫辦海軍公益慷慨激發銳志闢海軍謀日本爲國家東南保障未幾醇王薨李公孤立戶部抗疏令海軍十年毋增礮艦李公爭不獲公乃迭疏乞骸骨以歸歸四年而朝鮮之難作矣公鐘聲鐵面雄俠威稜爲治用兵曰勤廉簡少讀書喜奇畧功成勇退則益靜研中外得失之林嘗慨古兵法多主奇其正迺在治國故雖年二十九提督畿疆三十五輒拜欽使督關軍顧不樂以武功爆天下居恆日營心摹思贊國家於富強之列事權旣不盡屬輒鬱鬱不得發舒晚治巖疆艱難締造雖績效炳然顧未竟其志性伉爽剛毅謀國一本血誠不顧問流俗毀譽雖李公患難久知獨深及抗論大計輒面赤背裂李公恒屈下之蓋其縱橫奇俠實有非常度所能測者同治間士大夫方詠太平競黨爭詬西法公獨謂非罷科舉火部案關西校拔真才不出十年中國將不可問及伊犁事起獨抗言開鐵道通國脈使兵餉出朝廷督撫

無能牽制然後天下可爲今事敗乃踐公謀患且不可治矣公嘗登基隆山張遠鏡東望慨然曰彼葱鬱者非日本三島耶失今不圖吾且爲彼虜乎及聞海軍罷則頓足歎曰人方盜我我乃自挾其藩亡無日矣故卒歸不出今公歿十年李公亦崎嶇庚子間以死中興諸老盡矣自古憂微之士每不獲行其說於未敗之前衰世之臣每不恤以國家殉其門戶固如此然則公之進退生死其重繫天下爲何如哉公諱銘傳字省三安徽合肥人咸豐之亂年十八獨起誅土豪團練保鄉里嘗登所居大潛山謂大丈夫當生爵死諡安能齷齪科舉間當異軍特起輒思獨樹淮南北不樂隸他人卒建銘軍名天下薨年六十 兩宮震悼贈太子太保諡壯肅賜專祠列傳爵子孫如其志迺最其大者著於墓道之碑銘曰

霍古天柱雄鎮江淮鬱彼間氣蕩厥叢羶赫赫徐常越劉代起曠五百年英風

疇似既平大難獨藏厥躬元鶴麗天萬籟斯融晚鎮危疆氣吞強敵壯志沉埋
臥我巖壁臺亡公逝函夏安歸浩浩江淮萬古長譔



書劉壯肅公碑陰

桐城陳澹然撰

同治間海內承平文儒喜黨爭競門戶李劉二公皆豪傑尤厭絕之霍山黃從默言號季子白盤者固周宣王十二年所製故物也道光間常州徐燮鈞任陝西郿縣得而寶之常州陷沒於賊劉公克常州得之則大喜築盤亭於所居大潛山爲樂某氏者常熟巨家也出巨金購之公不可則請連婚媾陰圖之公辭益堅則大怒李公之克蘇城也見蘇人頌李秀成碑壯麗甚蘇巨家某氏名皆列焉始固未之詰也既克蘇軍多餉益絀取富捐佐之蘇人効諸朝李公怒曰若輩頌賊酋吾不問乃假此懟我哉則命五百人匝其碑將按治蘇人大懼斂餉金數十萬謝之乃已苗沛霖之亂淮北也某氏之兄方撫皖結師弟右之亂作逮諸朝其父固師相貴甚乞皖人疏救之皖人持不可益大恨仇曉益深同光間兩人方以名士主朝局奔走清流二公益傲睨不下李公常笑曰若曹但

善走東華門耳烏足與言天下事哉自西人之起二公輒深憂太息非變科舉重西法練海軍開鐵道不足圖吾存清流溺文字日不見西書益大譁以爲亂法故李公困畿疆二十年疑謗紛拏終不獲行其志公益痛心不出厥後鐵道之阻海軍之罷甲午之戰嫉者固未達中外強弱之殊要其議主自李劉則固有不惜舍封疆以殉門戶者方朝鮮之亂作也我師壁牙山寡甚桐城陳澹然方報罷客京師擬疏乞某公達諸朝請拜劉公欽差大臣督朝軍與李公相表裏某公不可強爭之不獲則請某給練達之翌日而廷寄命李公傳旨召公出公曰吾任封疆卽引歸固大臣也今廷寄等之列將豈朝廷所以待大臣之義哉辭不出八月朝軍潰復召之卒不出其明年同里張雲錦過謁公叩之公嘆曰朝事方起朝廷苟命吾爲帥督前軍吾當重扼鴨綠江保全遼觀釁而動邊事尙可爲也迨平壤旣敗其事尙可爲耶且觀吳大澂之出何啻

王化貞之撫遼夫已氏之處樞廷何雷葉向高之爲相微論鐵道不興海軍久罷事固未易謀也卽勉圖一出有不千撓百折致吾態襄愍之續哉嗚呼此公急流勇退之不可及也公偉幹雄豁始年十五尙不慧一日夢虎搏已驚而寤輒奇敏絕人年十八土豪假團練虐其父豪去公自書塾歸怒謂諸兄曰丈夫當自立安能耐此辱哉徒手躡豪馬請決戰豪顧狂笑曰孺子敢當我哉吾授若刀能殺我則壯士也公喜手豪刀猝斬之乘其馬手其頭登高大呼曰某豪虐鄉里吾斬之能從我者當保若里壯士大喜歸者數百人遂築堡寨爲其長寺中有銅佛數百尊寇侮之輒死公獨治銅佛製砲佛竟寂然里人益相驚以爲天授當是時官軍寇盜錯肥西公輒奴下之謂莫足當吾意者嘗思獨樹淮南北騁其奇久不獲同里張靖達公樹聲言于李公請召之李公困曾幕久自請討蘇州則召公以出始將纔五百人及防陝銘軍乃至二萬淮軍獨行中國

三十年銘軍輒冠其曹告歸所部輒戍重邊當一面其討捻也捻方阻河冰自固諸將爭演劇禱河神河神者狀類蛇微甚獨奇變若神嘗平地湧水數十丈朝廷敬憚之所封某大王者也及是公獨手佩刀擲神案叱曰吾奉天子命討捻明日冰不開當斬汝是夕冰竟豁然其自臺歸也有巨物擁其舟海濤壁立舟蕩甚軍將大恐請曰龍物送公返請謝之公出命發砲揮赤幟遣之巨物竟去風濤晏然其神勇天授蓋有非人力所能爲者公性傲睨厭華士得賢才輒尊禮之和州李煌言其師朱景昭者號默存合肥優貢生奇士也博學多奇識英果敏公翰撫皖重其才嘗爲兄弟交英公閱武坐將臺朱獨布衣手蒲扇以往英公虛左席敬之朱輒岸然不忤李公旣相誚朱曰君深漢書近何讀曰讀霍光傳耳李公嚴憚之不能用也公獨尊入幕賓禮之討捻之師久不効公問之朱笑曰捻如馬賊官軍欲以步武勝之如何哉惟以捻制捻耳公大悟

卽日焚短香置巨金壁門外令曰能刻寸香繞六營三匝首至者取此軍士皆樂奔最後至有刻寸香繞十四營三匝者故捻颯疾如風雨銘軍亦風雨赴之卒以成大功名天下朱死公獨厚賻之既貴家居有石超者湖北童生也年少獨以兄弟稱請見長揖跪上坐公奇之命屬對則應如響出云持三寸帖見一等男童生大膽稱兄弟對云手八行書行萬里路布衣長揖傲王侯公大喜延爲上客當告歸時清流論將才於公率嘗議獨聞人陳閣學寶琛奏議中一語推重之厥後公撫臺陳適罷貧甚公恆以他事給之其肝膽如此

光緒十七年余客金陵落拓甚上書李文忠公於天津冀得一言於南帥劉忠誠俾得著書養母李公笑曰此才類省三舍老夫惟省三能用之耳劉峴莊安能用此才哉惜乎其歸也然卒不獲見兩公而國事乃不忍言矣故於兩公尤耿耿云自記

紀劉省三宮保守臺灣事狀

桐城張傳紹

華夷交聘乃前古未有之變局而戰爭遂不可以寧光緒乙酉法蘭西構難於安南既而東窺臺灣謀內犯 朝廷顧念南服以今宮保劉公省三撫其地台灣者本孤島爲地數千里懸海外 國初降草竊者鄭成功之孫克塽始入版圖置郡縣隸於閩而爲東南海疆之屏蔽至是更改設行省焉 命下之日有以書致公京師謂敵將邀於海而爲公危者公陽懼先期徵師船爲衛至滬上更示趨超狀而陰則潛舟以濟比至敵人躡公者之舟亦至而已無及矣當是時台灣絕未備師不逾千餉不盈億戰守之具無一可恃者公雖至倉卒不遑有施設第檄鎮兵八百人扼基隆而已基隆爲涉海遑陸之首途南距省治曰台北府六十里連峯絕巘而獅球嶺橫阻於其中越日法蘭西以兵艦九艘集隳其壘更築壘置巨砲爲仰攻獅球計公夜窺敵形謂左右曰徵師未卽至敵

銳甚恐不可久守盍戰而却之將曙天大雨霧乃命饒將率精卒百人潛入敵壘旁之空室更以鎮兵從別將出他道趨敵後百人者出不意猝舉砲擊敵壘近陣者多死鎮兵復鼓譟薄之敵驚潰爭奔其舟舟泊處近斷岸陡絕不可攀擠而墮溺者若鳧鶩之集斃其巨酋一獲級數百計遂復基隆初法蘭西之入安南也以爲必可舉其國及至其境劉永福以諒山之衆堵拄於其間 朝廷復以馮鮑諸軍遏之其分兵窺閩疆犯臺灣蓋智窮思有所襲據以爲和議地耳不圖公甫臨治卽以單師却之用是益忿公而公亦知其必不已也省治西百八十里有瀕海要隘曰滬尾者由基隆鼓輪舟半日可至復基隆後數日敵更以巨艦十二載師續至而以前所至舟攻滬尾若爲以勁師襲基隆也者公下令棄基隆獨留二百人扼獅毬嶺左右皆以基隆必不可棄環跪而諫公曰是吾意也咎吾自當之若以基隆失他隘君等能任其咎乎衆不能對公遂以

師夜馳入滬尾密爲備明日敵舟果悉至毀壘而登衆以萬計我師接戰不利將敗北別將率伏兵從他道突出殊死鬥敵始潰却蹙至海濱其舟不可近乃爭以漆艇渡艇小不任重滿則溺焉遺械彌地斬馘逾千蓋至是士氣始大張未幾閩師失利和議成遂無可戰矣是時法蘭西屢見絀於安南其在臺灣者復被創不得逞倘閩疆得人直可使無片帆歸耳而惜乎不能夫甯非天歟且法蘭西爲泰西強國果使大有所挫則海外國必震懼修睦惟謹況其餘孤弱島國尙敢爲他日患乎而惜乎不能夫甯非天歟是役也以千餘疲病之師當十倍之強敵非公機智沉絕不能至是然聞戰之日敵所用炸礮多墮泥淖中不能再發傷人其間抑又似有天焉先是公下令軍中日殺敵一級者賞百金有朱哨官者見前軍乍却乃盡裂其衣服袒身啣利刀持礮狂呼轟擊而進其屬五十人亦大呼馳進遂衷敵師裂其陣比罷戰朱哨官血淋漓滿身不可睹

面目公戮前軍之却者卽以其衆俾朱率之觀此則公之弛張進退與素所以待將士者爲何如哉公在臺灣數歲多惠政而平番社闢疆土尤有偉績乞歸後以詩酒自娛時與田夫野老相過從笑語爲樂後數年日本人犯遼陽我師輒挫衄有勸公出就徵召者公喟而不應嗚呼公之心人或未能盡知之而東邊之事則固已爲公喟所料矣其可慨也夫公從孫伯海太守宦於蜀臺事固其所目覩者他日述於余至危險處猶慄然變色余因獲聞其詳而輒狀其顛末如此

書先壯肅公守臺事

孫朝望謹述


先大父壯肅公既夷粵捻之難放浪山水者十餘年晚鎮臺疆威信敵國治臺八載厲行新政奏疏具載世可得稽獨其戰守之情狀公牘既不盡備論者多莫能詳爰考之奏議徵諸故老務求翔實書其梗概將以上史館備采擇焉光緒十年法西擾海疆詔以公督辦臺灣軍務加巡撫銜公既奉命率親卒百餘人部將鄧長安輩十數閏五月甲辰朔丁卯抵基隆時淮軍至者纔六百人合湘土諸軍士不逮四千人湘軍將曰孫開華宿將也嘗隸鮑超淮軍將名者章高元位望不逮開華而勇略與之齊兩人皆先數月各率所部防臺公以兵單連奏請令江閩兵輪赴援皆不獲至公既至基隆行其砲臺僅有砲五且僅守前面不能左右應曰此絕地惡足恃居七日法兵艦來犯基隆礮臺果毀公以臺灣無兵艦不可與海戰乃移軍基隆山後以誘之頃之法人登陸趨山巔而

陣勢銳甚我軍仰攻不利公念敵礮瞰射莫能禦欲出奇計陰毀之未知所使乃召諸將議而激挑之諸將至公方食語幕客曰吾嘗以數千人破粵捻十萬之衆然皆吾將唐殿魁劉盛藻力也使是二人者在吾豈憂法人哉於是章高元鄧長安聞之氣咻皆盡裂乃進曰某等從公亦十餘載矣公今困絕域某等義不生還唯公命之公釋箸遽起前握兩人手曰好男兒勉立功名唐劉不得專美於前矣乃各授以計於是長安夜率壯士冒雨蛇行潛破法壘毀其礮高元與蘇得勝曹志忠東西襲擊之敵死拒良久高元冒雨奮進敵兵披靡陣斃法將三兵百餘奪燧二洋槍數十桿帳房十餘架餘卒奔其艦奏入有詔褒美皇太后爲頒內帑銀三千兩以勞軍七月法以偏師絀我基隆軍別以五艦犯滬尾滬尾者基隆後路也去臺北三十里而軍資饌械悉萃臺北孫開華時守滬尾告急書一日三至公念事急不得出十全必有所棄而後有所取今敵既

不得志於基隆必以全力攻公軍滬尾失則台北危基隆之師將自潰獅球嶺去海稍遠地險阻易守乃下令退軍諸將以爲方戰勝而退軍非計有叩馬泣諫者公按劍叱曰吾計已決罪譴吾自當之有違令者斬諸將乃不敢復言我軍既退扼獅球嶺立遣高元馳援滬尾而自駐淡水策應用知府李彤恩計填石塞海口彤恩宦臺久有智略然鬱鬱不得志公一見奇之數稱其才彤恩於是言公欲誘敵陸戰非填石塞海口不可公從之彤恩因益進張李成張李成者臺灣人任俠喜結交死士人未之奇也彤恩獨知之言於公使募土勇五百人中朝聞公退基隆則大駭嚴旨趣公旋軍基隆公曰兵事變化惡有隔海可遙度者卒守便宜不進當是時法既摧閩軍於馬江毀兵艦三十法大將孤拔益鼓勝兵攻滬尾朝命江督用三輪船濟師皆遏不達會盛暑疫厲流行我軍既疲勞復感瘴多疾病軍中炊煙日減公短衣草履親拊循士卒弔死問疾與

同食欲將士感奮人人皆樂爲吾帥死法旣增艦攻滬尾公令開華高元分大軍爲三距海數里緣山而伏誠曰待敵薄我而後戰令張李成以士勇五百人伏海濱叢草中而以羸兵數百當海岸法艦開巨礮聲震屋瓦然莫能中欲入海口爲石所阻則登陸攻我海岸軍海岸軍詳北法人逐之薄我大軍我大軍殊死戰開華高元身先士卒血肉相薄法人死力進槍彈雨注卒不可敗鏖戰久法軍稍益懈我軍逾濠奮擊張李成所將五百人者突出敵背敵愕顧我軍前後夾擊士卒皆一以當百短兵接呼聲動天地法軍亂則反走其艦我軍乘勝縱擊大敗之斬馘千餘人餘衆奔走相蹂躪我軍益進蹙之海敵衆登小舟相擠舟覆死於海者無算自是法人不敢復犯滬尾其踞基隆者扼於獅球嶺不得進尺寸十二月法人攻我月眉山林朝棟曹志忠劉朝祐等苦戰敗之公以孤軍懸隔海外屢摧強寇凡戰守八月而孤島卒全外人觀戰者皆驚歎以

爲不可及於是公威名動海外矣初公之銜命過滬也法使數來會探行期公則置酒高會聲言某日乘某艦渡臺是夜大風雨公乃微服乘小艇登他艦疾行去岸數時法使乃覺疾發兵艦追之思要之於海比至滬尾則公已登岸兩時矣其督師基隆也嘗親出當軍鋒一日法軍開炸礮所乘馬忽屈伏於地彈丸從頂上過左右皆驚失色公獨夷然益揮軍進衆以是益服之初退基隆朝士以爲怯論者前後數十疏詔旨切責有謗書盈篋之語公卒守便宜不爲動然朝士終以爲怯及滬尾戰捷軍威大振中外人士聞其戰狀者始交頌劉公艱苦絕人云



咨吏部履歷

光緒十六年十月初八日准 貴部咨考功司案呈前事等因內開恭查乾隆二十四年二月二十日奉 上諭向來內外文武三品以上大員遇京察軍政之年援例自陳文具相沿無裨實政曾經降旨停罷第念伊等薦陟崇階並有特簡其人賢否優劣雖已均在洞鑒然其間亦不乏旅進旅退持祿戀棧之人若以平時既無大過足干例議又不按例甄核任其迴翔日久必致職業不振甚非澄叙官方之道嗣後吏部於京察時將在京之尙書侍郎以下至三品京堂以上在外之總督巡撫分列爲二本兵部於軍政時將在京之都統副都統在外之駐防將軍都統副都統各省之提督總兵官分列爲三本繕具簡明履歷清單進呈候朕鑒裁以重考績大典著爲令欽此茲屆光緒辛卯年京察之期相應移咨等因到本爵部院准此竊本爵部院劉銘傳年五十五歲安徽合

肥縣人由軍功咸豐九年辦理本鄉團練屢勝髮捻由前安徽巡撫福濟保獎千總並五品頂戴咸豐十年自備糧餉帶練勇五千救援壽州經前兩江總督曾國藩查明保奏同治元年三月奉 上諭千總劉銘傳着以遊擊補用欽此是年五月應募管帶銘字營隨前江蘇巡撫李鴻章駐紮上海克復南匯縣保奏奉 上諭以遊擊補用並 賞戴花翎欽此又連克奉賢縣川沙廳金山衛各城浦東肅清保奏奉 上諭以叅將儘先補用並 賞給驃勇巴圖魯名號欽此旋因遊勇滋事鎗斃奉賢縣經前江蘇巡撫李鴻章奏參失察革職是年十一月奉調統領銘樹等營戰敗四江口大股賊匪殺賊數萬保奏奉 上諭開復原官以副將儘先補用欽此同治二年正月奉調統領銘軍救援常熟縣解圍奉 上諭以總兵補用欽此旋署江蘇狼山鎮總兵是年五月克復江陰保奏奉 上諭著以提督記名簡放欽此又於克復無錫案內奉 上諭著賞


給頭品頂戴欽此同治三年三月克復常州保奏奉 上諭著賞穿黃馬褂欽此六月收復廣德等城奉 上諭劉銘傳著補授直隸提督欽此十一月奉調隨前兩江總督曾國藩統軍勦捻行抵安徽六安州 僧親王在山東曹州府剿捻陣亡奉 上諭劉銘傳著一併革職欽此同治四年克復湖北黃陂縣城保奏開復原官同治六年在江蘇贛榆縣克復大股捻逆擊斃捻首任柱十一月初三日奉 上諭劉銘傳忠勇耐勞追賊迅速著加恩賞給白玉柄小刀一把火鏟一件大荷包一對小荷包兩個欽此又於山東壽光地方勦平劉賴大股捻逆東豫皖鄂一律肅清案內十二月二十二日奉 上諭劉銘傳著加恩賞給三等輕車都尉世職欽此七年奉調統領各軍於山東茌平地方剿平張總愚大股捻匪直東肅清七月初十日奉 上諭提督劉銘傳著由三等輕車都尉晉爲一等男欽此是年因病請假八年呈經直隸總督李鴻章奏請開缺

奉 上諭劉銘傳著准其開缺欽此九年天津教案經直隸總督李鴻章奏調
奉 上諭劉銘傳著即赴天津欽此十月奏請 陛見初四日奉 上諭前任
直隸提督劉銘傳著督辦陝西軍務欽此軍機大臣面奉 諭旨著即行請訓
欽此初六日 陛辭十一月初六日到陝十年因病請假並請 開去差事九
月十六日奉 上諭提督劉銘傳著賞假三個月所統銘軍交提督曹克忠接
帶欽此是年十二月曹克忠王家璧先後奏參暫行革職十三年奉 特旨已
革提督劉銘傳著賞還原官欽此光緒六年奉 旨到京 召見後因目疾請
假到津調理七年正月續假回籍十年奉 旨劉銘傳著來京聽候差遣欽此
五月二十九日到京請 安閏五月初一初二日 召見兩次初四日奉 上
諭劉銘傳著賞加巡撫銜督辦台灣事務欽此初五日謝 恩十二日請 訓
召見 陛辭出都二十四日到台七月初二日於基隆戰勝法兵案內奉

上諭交部從優議叙欽此部議照一等軍功從優議叙例給予軍功加三級九月十一日奉 上諭劉銘傳著補授福建巡撫仍駐紮臺灣督辦防務欽此是年於澎湖失守案內奉 上諭劉銘傳困守臺北鞭長莫及自應稍示區別著交部議處欽此部議降二級留任十二年十二月十二日於剿平中北兩路生番案內奉 上諭交部從優議叙欽此部議照二等軍功從優議叙例給予軍功加二級續因奏保剿服中北兩路生番出力人員請獎摺內未將各員籍貫履歷另立清單奉部議照違令公罪律罰俸九月奉 旨銷去紀錄一次仍罰俸三月十三年恭逢 皇上親政 恩詔加一級是年 奏辦商務摺內抬寫錯誤四月初十日奉 上諭劉銘傳著交部察議欽此部議罰俸一年公罪例准抵銷奉 旨銷去紀錄二次免其罰俸十四年正月十九日接受新頒巡撫關防當卽奏報啓用並請 旨撤銷督辦防務差使是年恭逢 京察奉 上

諭福建臺灣巡撫劉銘傳著開復降二級留任處分照舊供職欽此是年四月十九日於捐助皖賑案內奉 硃批交部從優議叙欽此部議給予隨帶五級台灣改設行省學政改歸巡撫兼管十四年十月初七日據台灣道委員賈送學政關防卽於是日祇領兼管任事十五年六月十五日准 貴部咨正月二十二日欽奉 慈禧端佑康頤昭豫莊誠皇太后懿旨現在歸政伊邇允宜分別施恩福建臺灣巡撫劉銘傳著賞加太子少保銜欽此又恭逢 歸政典禮恩詔加一級 歸政禮成崇上 皇太后徽號 恩詔加一級十六年恭逢 皇上二旬萬壽慶典正月二十六日奉 上諭福建台灣巡撫劉銘傳著賞加兵部尚書銜欽此恭逢 皇上二旬萬壽 恩詔加一級是年四月初十日准 貴部咨三月初二日奉 上諭朕欽奉 慈禧端佑康頤昭豫莊誠壽恭欽獻皇太后懿旨福建臺灣巡撫劉銘傳著幫辦海軍事務欽此九月十三日

承准軍機大臣字寄八月十五日奉 上諭戶部總理各國事務衙門會奏台灣煤礦招商承辦章程毗繆請敕停辦一招劉銘傳著交部議處欽此未奉部議現供今職伏念本爵部院忝任封圻受 恩深重涓埃未報寢饋難安茲逢考績 鉅典合將年歲履歷備叙咨達爲此合咨 貴部請煩察照施行須至咨者



卷首勘誤表

保臺略叙		頁數	行數	字數	誤	正	脫	衍
一	四	三	嶽	獄				
一	十八	廿三	鑑	鑑				
一	二十	四	胃	冒				
撫番略叙		頁數	行數	字數	誤	正	脫	衍
四	七	廿三四	柯德	德柯				
四	十五	十一	柯德	德柯				
設防略叙		頁數	行數	字數	誤	正	脫	衍
一	二	九	入	人				
建省略叙		頁數	行數	字數	誤	正	脫	衍
四	二	九	疆	疆				
理財略叙		頁數	行數	字數	誤	正	脫	衍
一	九	七	措	措				
獎賢略叙		頁數	行數	字數	誤	正	脫	衍
二	一	廿九	曠	曠				
清史本傳		頁數	行數	字數	誤	正	脫	衍
一	二	九	入	人				

劉壯肅公奏議

卷首勘誤表

一

一

五	五	四	三	三	三	三	三	二	二	二	頁數
九	七	十六	廿二	十七	十	五	二	十五	十	一	行數
廿六	十九	十五	十二下	十一	二十	三十	六	十	十三	廿一	字數
着	和	載		及	毬	疆	彈	鹽	沐	傅	誤
著	蘇	奕		乃	球	張	彈	鹽	沐	傅	正
			習								脫
											衍

二	頁數	劉壯肅公神道碑	二	頁數	劉壯肅公墓誌銘	三	頁數	劉壯肅公家傳	一	頁數		
十九	行數		二	行數		十九	行數		二	行數	十	行數
廿八	字數		廿七	字數		五	字數		廿五下	字數	廿一	字數
璜	誤		漲	誤		沐	誤			誤	摧	誤
璜	正		張	正		沭	正			正	摧	正
	脫			脫			脫		臺	脫		脫
	衍			衍			衍			衍		衍

卷首勘誤表


頁數	行數	字數	誤	正	脫	衍
三	廿二	十三	蕩	蕩		
書劉壯肅公碑陰						
頁數	行數	字數	誤	正	脫	衍
一	十八	十五	練	諫		
二	二	廿一	態	熊		
二	八	十六	治	治		
二	廿一	五	傳	傳		
紀劉宮保守臺事狀						
頁數	行數	字數	誤	正	脫	衍
一	廿一	十三	毬	球		
書先壯肅公守臺事						
頁數	行數	字數	誤	正	脫	衍
二	十七	九				唱
咨部履歷						
頁數	行數	字數	誤	正	脫	衍
二	一	十三	公軍	滬尾		
一	廿	十五	治	治		
四	二	十	毗	紕		
目錄						
四	六	七	代	化		

劉壯肅公奏議

卷首勘誤表

一一

一



劉壯肅公奏議 出處畧

卷一

赴陝督師摺

督師陝西請 訓摺 同治九年十月

本月初四日內閣奉 上諭前任直隸提督劉銘傳著督辦陝西軍務並由兵部傳知軍機大臣面奉 諭旨劉銘傳著卽請訓欽此竊 臣少長江淮適丁寇亂淮南千里髮捻交訐骸骨邱山田園茂草仰奉 詔行團練轉致強暴迭興苗李縱橫黔黎殆盡 微 臣弱冠讀書未嫻軍旅獨念生廬六之郊當中原之蔽不興堡寨疇保鄉鄰爰起健兒孤撐羣寇苟全性命無志勳名會當同治初元大學士曾國藩視師皖上察其保廬之狀錄其援壽之勞猥以姓名上塵 天闕更值大學士李鴻章創起淮師遠征吳會託 臣年少召領偏師遂乃感激殊知馳驅王事常州之戰勉克強酋廣德之圍倖回危局三年吳越一介孤寒竟

令提督畿臣仰荷 聖朝殊賚寵逾涯量祇悚冰淵懼蹈愆尤乞還田里旋以
中原捻熾再任前驅六省奔馳五年冰雪方以羣酋久獫愧 九重特達之知
豈期巨寇粗平荷五等崇封之錫凡此迭邀 異數已非夢想所蘄是用養疴
田間不敢妄圖進取茲復仰承 異命俾總師干聞 詔自天拜慚無地伏念
關中古帝王都會之區山河險塞形勢之勝雄絕中華回漢雜居久稱難治况
臣客軍懸寄無地方賞罰之權又當陝省凋敝之餘餉饋既憂不給更值隴表
進攻之會後路更慮難防 微臣賦質粗疏深懼貽羞隕越惟有籲求 宸訓敬
謹遵循秉 勝算以宣威作將士前驅之氣審邊防而決策分 朝廷西顧之
憂謹陳感悚微忱無任企切屏營之至

按同治九年天津民鬧教殺法領豐大業曾文正方督畿輔李文忠督師關
中法人洶洶調兵決戰文正懼開邊釁請諸 朝實則德意志與法仇方舉

國興師敗法帝拿破侖第三降之遂入巴黎殘其國法固無能與我戰也乃中國方平髮捻國兵未充不諳西勢急調諸將衛京師先是同治七年公方平捻寇以直隸提督晉一等男爵引疾請開缺家居及是李公自關陝召入都代曾公爲總督法事未定奏調公出山公至曾公已奉 朝旨與法廷議和遂命公承李公後督陝西軍務此公受特達之知之始也 陳澹然記

國朝近制提督爲武職大員之冠然受總督節制除到任謝恩具摺由總督代奏外不准專摺言事公督辦陝軍許專摺體制乃與督撫同此咸同用兵來新制也

恭報到陝日期並暫難扼守纏金摺 同治九年十一月初八日西安發

竊 臣於閏十月二十七日陝州途次准軍機大臣字寄閏十月二十二日奉上諭定安奏遵撥官兵赴烏會剿並陳歸綏喫緊情形邊外望援不可不設法

籌撥著劉銘傳迅派大枝勁旅由靖邊安邊取道甯條梁馳赴纏金扼要屯紮以保糧源等因欽此十一月初二日行抵潼關復准兵部火票遞回洛陽拜發原摺承准軍機大臣字寄閏十月二十五日奉 上諭昨諭劉銘傳迅派大枝勁旅馳赴纏金卽著該提督兼程赴陝速行派隊扼守纏金以保糧源其餘邊內邊外並著統籌全局擇要布置毋稍疎虞欽此仰見 聖謨廣運訓示周詳臣於本月初六日統兵行抵西安計由天津繞道山東河南到陝不下三千里長途跋涉軍士苦寒現擬稍息疲勞藉觀賊勢查纏金至陝省尙有二千餘里中隔北山千餘里人稀道險遊勇士寇嘯聚成羣扼守纏金分兵匪易軍需餉項轉運尤難應請 飭下定安就近撥隊扼守纏金俾免貽誤 臣俟後隊入關餉項軍火運到後應防應剿當與撫 臣蔣志章隨時會商竭力趕辦斷不敢稍事推延仰負 朝廷委任 再聞此次回陷烏城實由通昌通貴竄去之賊無

論烏城克否蒙古地闊人稀此後甯靈一帶無歸之賊必以蒙地爲掠食之區非得大軍專顧邊防不足以遏賊竄查湖南提督宋慶忠勇敢戰忍苦耐勞所部現駐黃甫川而兵多分散其在甯夏劉廷一軍暫難撤併其守潼關李成先一軍論目前地勢賊情似可調歸北路潼關尙有馬德昭六營堪資扼守如當緊急臣必隨時派兵策應以中原門戶河南撫臣李鶴年久鎮中州素關大局應請飭下李鶴年仍將李成先一軍調回北地照舊歸宋慶統領節制以厚兵力將來臣軍疏通北山之後兵駐定靖山西河務較鬆宋慶卽可以包頭爲老營會合定安馬隊專爲蒙地游剿之師遏賊東竄之路實於軍務大局有裨

十一月十五日奉 上諭劉銘傳奏到陝日期暫難拔隊扼守纏金並請調李成先一軍仍歸北路一招前因烏城失陷當諭劉銘傳撥兵紮守纏金以便富

勒輝統帶馬隊起程赴烏茲據奏稱纏金距陝較遠分兵不易轉運尤難請飭定安就近派隊扼守等語烏城竄匪據張廷岳等奏已於十月二十三日仍回肅州此時該提督兵勇既暫難撥赴纏金卽著定安遵令富勒輝照舊嚴防仍著劉銘傳俟後隊入關餉項軍火運到後派撥得力隊伍前往纏金節節進紮並將應防應剿處所與定安蔣志章隨時會商妥籌布置甯靈賊匪圍剿已窮難保不以蒙古爲掠食之地劉銘傳請令駐紮潼關之李成先一軍仍回北路所籌亦是卽著李鶴年飭令李成先統率所部移赴北路照舊歸宋慶調遣以厚兵力劉銘傳於疏通北山後卽駐兵定靖俟山西河防較鬆卽咨商宋慶以包頭爲老營會合定安馬隊爲蒙古游擊之師遏賊東竄欽此

分隊扼要籌商大畧情形摺

十一月十六日西安發

竊臣於本月初六日行抵西安業於初八日奏明在案連日審觀地勢籌畫邊

防查陝甘接壤之區甘回竄陝或由慶陽甯州以達乾耀或由定靖以入北山或由秦州清水以擾汧隴道路紛歧非分防扼要不足以遏賊竄已於十二日派令記名提督劉盛休王德成等馬步十四營進駐乾州記名提督吳宏洛總兵張佩芝等馬步九營駐紮耀州以防中路復商撫臣蔣志章派提督譚仁芳所部七營移駐鳳翔會合李輝武一軍以防南路擬調記名提督唐定奎所統周口武毅軍十五營作速來陝由韓城宜川以入北山屯靖定以防北路惟昨接唐定奎來信本月初十內外始能接收武毅各營將弁既待更張勇丁更須挑補定期拔隊急切尤難當飭其速加整頓務於年內到陝以便進兵部署粗定臣即於十八日督率親兵礮營移駐乾州其後路糧餉軍需俱交前甘肅藩司林之望督委各員迅籌接濟俾免稽延仰副 聖主垂念關中至意

十二月初二日在乾州奉 旨知道了著即督飭各隊認真防堵毋稍疏懈北

山伏莽尙多並著派得力隊伍實力搜剿繼金一帶仍遵前旨派軍前往扼紮以厚兵力欽此

同治九年十一月十六日奉 上諭兵部奏請飭各省督撫及各路統兵大臣依期咨報兵勇數目各摺片軍興以來舍兵用勇本係權宜之計而勇丁遣撤易滋事端流弊日甚若不將綠營及早整頓致國家費千百萬帑項養之於平日不能用之於臨時身任封疆者問心何安現在天津之案雖經了結何可復事因循況甘肅滇黔各省軍務未靖我君臣臥薪嘗膽正宜力圖自強以期有備無患著各直省督撫將所管各營設法整頓限奉旨後六個月將如何汰弱募強如何分日操練及各省可得有精銳士卒若干之處詳晰奏聞直隸天津江蘇上海及劉銘傳軍營均練習槍隊砲隊步伐尙爲整齊號令尙爲嚴肅其教演之法著各該省自行咨取章程照辦總期實事求是變疲弱爲精強不得

空言粉飾以致有名無實年來各督撫曾有裁兵減餉及酌調額兵訓練之奏然爲政不在多言而在實力奉行若以一奏塞責日久又漸形廢弛甚非朝廷倚任疆臣之意也將此各諭令知之欽此

按本朝乾隆以前旗綠各營戰勝攻取聲震百蠻不可謂非一時之盛迨嘉慶時川陝教匪猝興旗綠各兵皆難抵禦固已盛極而衰然滿將中額勒登保明亮輩漢將楊遇春楊芳皆擅知兵名故不敢恃旗綠各兵而別求召募於是羅思舉桂涵之屬崛起盜賊之中建節而爲大將固已陰相變計矣乃事平之後樞臣兵部類皆起自翰林無一能知大計不知裁綠營以任募兵遂致道光海戰靡不潰亡創巨痛深似亦宜知變計矣直待髮捻回苗之亂僅一向忠武起自綠營號稱名將塔忠武雜收兵勇戰必先登外此未聞有用綠營制勝者然此二公者雖名起綠營所用實皆新募則綠營之宜革明

效更較然矣乃事平之後鄉勇滅賊成功而散之使爲會黨及同治九年天津案後樞臣猶津津整飭綠營迄今更四十年而綠營尙存名色補一守備奏請紛綸部臣猶以合例與否以爲允駁而旗兵議歸農墾乃至羣起紛拏幕雀釜魚嬉然自得嗚呼豈非天哉

澹然記

又按此 諭稱直隸天津江蘇上海及劉銘傳軍營均練習槍隊礮隊步伐整齊號令嚴肅其教演之法著各省督撫自行取章照辦總期實事求是化弱爲強等因觀此知西人槍礮隊法惟淮軍獨精公軍尤爲獨擅至爲通國導師惜乎未有能遵辦者公奏臺澎善後章程言湘軍老將與言西人槍礮之精抵死不信及光緒十一年春基隆一戰湘軍死亡獨多始信臣言之非誑云云嗚呼中國之大積弱一至於此是豈一朝一夕之故哉思此不禁三歎

澹然記

甯靈回寨收復陝北防務已鬆並陳北山防剿情形摺
同治十年正月七日乾
 州發

竊臣於上年十一月十六日奏報移駐乾州分兵駐防扼要十二月初二日奉旨知道了著卽督飭各隊認真防堵毋稍疏懈北山伏莽尙多並著派得力隊伍實力搜剿纏金一帶仍遵前旨派軍前往扼紮以厚兵力欽此又奉十一月二十八日 上諭蔣志章奏銘軍進紮中路並派軍分防南北一摺據稱劉銘傳統率所部到陝後當卽飭令提督劉盛休等十四營進紮乾州吳宏洛等九營分紮耀州該提督復率親兵前往乾州駐紮並商派提督譚仁芳各營移紮鳳翔與李輝武一軍聲勢聯絡北山一帶亦經嚴飭派防陝軍會哨分防等語著蔣志章劉銘傳飭令派出各營協力巡防嚴密堵禦毋任甘回竄擾陝疆至北山自宜洛以達靖定地曠人稀游匪零回時虞紛竄並著蔣志章劉銘傳

悉心會商先就現派陝軍飭令隨時偵探認真搜捕俟唐定奎一軍到陝卽令前進以顧北路門戶蔣志章卽飭成定康等舉辦賑濟招集流亡使遊匪無從勾結以靖邊陲欽此仰見 聖慮周詳無任欽悚臣於移駐乾州後曾撥記名總兵丁汝昌蔣希夷等各率馬隊百餘名分往延安定邊一帶察看地勢其時尙不知烏城已復全積就撫故擬派唐定奎一軍駐防定邊以固北路現據金積堡探差回稱回匪窘饑乞撫後盡繳馬械漸毀寨牆其能戰之賊半逃西去河北王疇等寨亦經金順張曜攻克甯靈一帶已可肅清惟金積未復以前北山地曠人稀每有土匪遊勇百十成羣肆行搶劫上年冬季經撫臣蔣志章嚴飭駐防二十餘營分段巡哨臣復派記名提督吳宏洛由耀州抽拔兩營並蔣希夷馬隊一哨駐紮延安會同陝軍勤搜密捕疊據署延榆綏道成安康延榆綏鎮劉厚基報稱該處鎮道等於榆綏境內屢次斬擒遊匪多名蔣希夷喻步

蓮亦於安定保安各屬數有捕獲並陸續收捕百餘人分別遣散山內粗安以後能得良將嚴師以鎮之良吏實力以撫之漸次招徠遺黎即可復業撫綏安集固非倉猝所能奏功善後經營亦非大軍所能爲力也唐定奎一軍於上年十二月十二日自周口拔隊於二十六七日先後入關現在北路無事似可毋庸囑健卒於山谷之中勞師耗餉已令分紮華陰朝邑暫行屯息照常操練將來軍情何似再定進止

奉 旨覽奏已悉著嚴飭各官兵認真防堵毋稍疏懈唐定奎一軍卽分紮華陰朝邑等處實力操防另備調遣欽此

纏金道遠賊勢南趨仍請飭定安撥隊駐守摺 正月二十八日乾州發

竊 臣於本月二十六日奉正月二十日 上諭定安奏請飭副都統回任一摺據稱歸化城副都統事務繁劇刻下甯靈軍務已定後路稍鬆請飭富勒琿回

任等語著照所請飭令富勒琿卽回本任以重職守其留防纏金馬隊卽交薩薩布統帶認真防範毋稍疏虞前據該將軍奏俟劉銘傳之隊一到纏金卽飭富勒琿統帶該兩省馬隊一千二百名取道烏拉特旗馳赴烏境協剿當經飭令劉銘傳派兵填紮該處以便騰出吉林黑龍江馬隊起程赴烏劉銘傳何以久未派撥著懍遵前旨迅派一軍馳赴纏金駐紮毋再推諉定安候劉銘傳派兵到後卽飭薩薩布統帶前項馬隊馳赴烏城欽此查定安前以烏城失守奏令臣派隊防纏以便派兵遠赴烏城時臣尙未到陝所部隨行亦只銘字一軍無能分撥曾經據實復陳請 飭定安就近撥守仰蒙 恩准令緩撥兵唐定奎一軍甫經入關本擬派赴北路適因寧靈回寨剿撫粗安邊內邊外皆無戰事疊據探報河州回匪三千餘騎於臘月杪潛越洮河竄至岷州與官軍接仗復竄鞏昌阜陽川長驅東下分擾距秦川數十里之平南川娘娘壩鹽關李子

園等處時有戰馬二三百匹遊掠傷民實多又據探稱岷州叛勇仍與官軍相持雖經議撫拒抗如故若更圖東竄唐定奎所部卽須移屯汧隴以固陝防此外仍無可撥之隊現奉 飭催派軍赴纏駐紮以便薩薩布統軍赴烏臣何敢更行推諉纏金去陝二千餘里北山外尙有草地千餘里道路隔絕久無人烟若由陝分兵必由山西歸化包頭計程四千餘里懸軍遠隔聲勢不相聯絡將官無所稟承且淮軍皆操槍礮軍需重滯不惟轉運多艱遠塞奔馳更慮運資無出艱難情狀想在 聖明洞鑒之中現聞黃河冰凍已開賊在數千里外河防無事以臣度之北路各軍足資展布應請 飭下定安就近由河防內撥軍駐守纏金以免迂緩倘慮河凍雖開賊蹤雖遠河防仍不能鬆或由定安指段交臣就近撥守以便定安撥軍赴烏似此接防俱易轉運無難彼此均無可諉是否有當伏乞 訓示遵行

調防邊境並探報情形摺

四月二十四日乾州發

竊臣於奏報唐定奎一軍填紮寶雞一摺奉四月初四日 上諭劉銘傳奏派兵填紮寶雞一摺據奏唐定奎一軍已由華陰拔隊馳赴寶雞分駐隴州鳳縣著劉銘傳飭令實力嚴防遇賊卽擊甘省秦州一帶與寶雞接壤刻下有無賊蹤范銘所部叛勇雖已收降有無餘匪滋事金積堡克復後降衆是否安置妥協抑尚有餘匪竄擾河州劉銘傳如探有確實情形隨時奏聞北山一帶伏莽未清該提督仍當派隊搜捕以靖地方並飭所部各營認真操練勿滋事端欽此仰見 聖慮周詳曷勝欽悚查秦州一帶自 臣到陝後疊據探稱雖有零回時來滋擾尙未大害地方本月初一日突自河州竄出回匪一股分掠兩當徽縣一帶當經李輝武所部於兩當城外堵剿獲勝回遂敗折而西復據平涼探報本月十六日隆德縣周其俊會同恪靖馬隊於馬廠野雞峴地方遇賊接仗

周其俊並幫帶官同時陣亡現在平涼派隊出剿等語查隆德固原遊匪零回出沒無定兼之叛回馬彥瀧黨衆四百餘騎潛伏其中賊知陝境嚴防固不敢輕來擄掠惟現當二麥登場之時特恐賊騎飄忽擾及陝邊除飭唐定奎一軍嚴密分防外復調記名提督吳宏洛所部銘字左軍六營步隊自耀州移駐長武並派記名提督陳鳳樓所部馬隊三營由三原移駐墊屋記名總兵張佩芝馬隊三營由富平移駐邠州據吳宏洛報稱現已料理拔隊赴防至於陝北一帶自春至今搶案殊少能得防軍營規整飭有司吏治安詳自可日漸起色撫臣蔣志章正躬率屬必能飭在防文武弭盜安民仰副朝廷綏靖地方之至意

遵 旨密陳左宗棠軍情片

再查金積堡未復以前悍賊逃併西去甚多克復後所餘皆婦女老弱經左宗

棠安插得宜諒無反覆惟西路賊勢甚大金積堡雖克軍事稍有歸屬豈得謂已定已安左宗棠固實心任事奈所部兵將堪戰者稀自金積堡克復後諸將星散至今尙無進剿之期賊騎肆掠鞏秦之間如入無人之境兵貴乘勢乃有虛聲抑或猛攻乃見實力今特遷延歲月不計虛糜賊勢未衰兵氣已散揆形度勢既恐蕘事無期叛勇降回猶恐變生意外臣目覩心憂情難自默仰蒙

天語下詢用敢據實密陳伏求 聖鑒

請撤銘軍留譚仁芳軍駐陝摺

同治十年七月初九日

竊臣一介武夫毫無建樹上年十月仰荷 聖慈逾格 詔令專閩入關謬督陝軍撫躬慚感原冀稍圖尺寸庶幾仰報涓埃到陝之後陝境已無賊蹤惟有督率練操藉資鎮撫俾得流亡安集邊鄙無驚不料入夏以來頭風肝氣坐臥難安漸入秋寒愈增羸劇足不出戶已踰兼旬若果關中事急賊勢東趨自應

力疾在營藉維秦局現在秦徼鹽固之間游氛日少左宗棠將駐靜寧甘軍已圖西進縱不能尅日蕩平諒可嚴扼洮河遏賊東竄此後秦關千里更無風鶴之驚惟汧隴一帶接壤秦徼略須防兵以時緩急查記名提督譚仁芳所部七營前以湘警時聞 詔還鄂上現在湘中會匪已平似可毋庸回鄂該提督久駐秦中情形熟悉主客既能相得兵民亦可相安若令屯駐陝南足資防守臣所部四十營每月正餉雜支需銀不下二十萬當此民生凋敝賦財乏缺之餘似未便籌餉於萬難之中養兵於無用之地坐視拊髀太息精銳潛銷縱令忍恥虛糜抑復何裨大局且軍營紀律成之數年而不足敗之一旦而有餘久無戰事鋒銳寢衰訓練稍疏輒成暮氣臣抱疾日久尤恐廢弛入關經年寸長未効雖已負慚於既往安敢貽誤於將來倘蒙 聖鑒陝事粗安 飭知兩湖督臣李瀚章仍將譚仁芳一軍留陝撤回准軍臣當力疾率部出關商請兩江督

臣曾國藩直隸督臣李鴻章酌量遺留用期妥協否則惟有仰懇 派員接辦
陝軍以重職守卽請 賞假三月俾臣得回里就醫一俟病體就痊無論如何
軍務得効馳驅定當赴營從事決不敢自甘淪棄仰負 裁成無任悚惶懇
命之至

復陳暫難出關懇假離營養病摺

七月二十五日乾州發

竊臣於七月二十三日准軍機大臣密寄奉 上諭劉銘傳奏因病請假離營
調理一摺覽奏實深厯系現在秦徽鹽固一帶游氛漸少陝省無須多兵譚仁
芳一軍卽着留紮該省以資彈壓該提督所部各軍毋庸撤遣本日據總理各
國事務衙門奏俄國派兵於五月十七日代爲克復伊犁已諭榮全馳往籌辦
惟聞該國尚有派兵窺取烏魯木齊之信心生覬覦漸不可制倘烏魯木齊再
爲所得將來藉詞要挾辦理更形棘手本日已諭景廉成祿先後帶隊前進相

機規復烏魯木齊期以先發制人惟景廉成祿帶隊無多亟須精兵勁勇接續西行庶足以壯聲威該提督忠勇性成情殷報効且以有用之兵置之無用之地尤屬可惜卽著督率所部由乾州鼓行而西繞出蘭州之北由甘涼肅一路出關節節前進爲收復新疆各城之計刻下河州西寧逆氛未淨關外如烏魯木齊等城又不能任令外人從而生心該提督惟有力疾從公專任其難以副朝廷厚望後路餉需已令曾國藩李鴻章寬籌接濟矣欽此跪誦之下仰見聖慮宏深無遠弗屆曷勝欽悚惟查伊犁至嘉峪關五千二百餘里與烏魯木齊相距一千九百二十里自乾隆二十年勘定以來新疆用兵皆以肅州爲糧臺重地節節安設轉運車駝需費浩煩不可勝計當時財賦充盈甘肅無事運以天下全力故能師出有功目前肅州賊尙盤踞河湟逆勢方張自靜寧以西非大隊不能前往臣卽督帶所部轉戰出關以後餉項軍需隔絕數千里運道

不通何由接濟此道路暫難出關之情形也臣部准軍多隸江皖步隊居多器械煩重耐寒行遠非其所長且勇非營兵去留無能限制一旦驅之關外逃散必多尤恐中途潰敗滋成事端大局更多妨碍此兵勇暫難出關之情形也臣夙患頭風請告家居原期休養數年除去病根再圖報稱上年五月天津民夷滋事奉臣飭到營其時畿輔只有銘字一軍臣若不星馳赴急上無以報國恩下無以勵士氣初擬天津事定後仍乞假歸養疴不期行至中途渥邀賞賚甫瞻天闕卽令專征自顧何人疊蒙高厚敢不竭誠圖報勉効駑駘且恃年力正強雖夙疾在身尙可勉圖支柱不料到陝後任大事繁偶一操勞頭風卽發交秋更劇飲食日微兼之肝氣上冲或遇風雨將作或當意外繁勞輕則昏暈片時不省人事重則腦痛欲裂坐臥難安據醫家云從前頭受槍傷出血過多瘡口未平復經風雨病根久遠非藥石能遽爲功計惟靜養不勞或可

漸圖輕減臣再四思維日久不能視事深恐貽誤戎機致負 聖朝委任故前摺陳情乞歸調養武夫粗直言必由衷何敢稍存僞飾似此沉疴不減安能從事疆場惟有籲懇 天恩賞假三月離營調養所有營務一切暫交記名提督賂國忠河南簡放知府方策勳會同照料一俟病體稍痊定即回營視事決不敢偷安退避自外 生成倘蒙 聖主矜全恩施逾格從此有生之日皆 天恩再造之年曷勝惶恐待 命之至

詳奏轉運情形並懇續假三月回籍調理摺

九月初九日自乾州發

竊臣前奏暫難出關並請離營養病一摺奉八月初七日 上諭劉銘傳奏復陳兵勇道路情形暫難出關並請賞假離營養病一摺新疆遠在西陲朝廷本欲俟甘肅肅清再行籌餉籌兵力圖大舉近因伊犁地方經俄國代爲收復并有代規烏魯木齊之說若不迅赴事機爲先發制人之計竟令鄰國得遂狡謀

以後更難措手是以特命劉銘傳率旅西行力任其難建茲偉績茲據所陳各節河湟未靖轉餉艱難江皖之人不宜衝寒涉遠自係實在情形劉銘傳又因傷疾舉發亟須靜心調養披覽之餘曷勝厪念惟邊外事機緊迫萬不可置爲緩圖准軍素稱節制之師且非劉銘傳居中調度亦難兵將一心劉銘傳賞假一個月在營安心調理一俟病痊卽行督率所部陸續西進由甘涼一帶轉戰而前卽在肅州屯紮毋庸出關庶聲威較壯成祿等軍卽可一意西行不至跋前疐後該提督軍餉應於何處設立轉運糧臺並著斟酌情形詳晰奏明與曾國藩李鴻章酌度辦理欽此仰見 聖恩寬大訓示周詳莫名欽感查由陝州赴肅州北自固原中衛以達涼州素非官道人烟稀少城郭蕭條覓食採薪軍行不便須由平涼會靜以達蘭州迤邐而西惟洮河以東賊氛未靖大軍啟行自無阻礙以後轉輸餉械必能隨地屯兵隨時護送始克奮袂而前如甘軍之

在狄道疊據各統領函稱轉運不濟困苦異常尤爲明證准軍到肅呼應既無甘軍之靈車駝又無甘軍之衆道出甘軍二千里外彼此相形艱阻情狀諒在聖明洞鑒之中且聞肅州一帶兵亂迭更民居寥落一旦屯數萬之衆必得近地有糧可辦方能持久無饑臣奉旨 後卽派員往察情形商請曾國藩李鴻章妥籌餉項擬俟病體稍痊卽行統軍西上不料兩月來病勢日增毫無輕減八月初兩足腫痛舉步維艱臥榻兼旬青腫愈甚邊方瘠苦既乏良醫軍事紛勞尤難靜養更慮久不視事營規日漸廢弛積久患生難保不滋貽誤病中憂急徹夜難安今假期已滿痼疾難瘳惟有仰懇 天恩續假三個月回籍調理所有部下淮軍並請 派員接統迅赴事機曷勝惶恐待 命之至
密薦曹克忠接統替歸片

再肅州形勝之地能得勁兵強將坐鎮其間既可爲關外聲援更可分河湟賊

勢 聖謨廣運規畫周詳 微臣 自應力疾西行勉圖報稱且明知淮軍部伍易將爲難奈病勢日增萬難支柱躊躇再四不敢坐誤事機惟淮軍自立門戶越蘭州而西進駐肅州三千餘里賊踪飄忽後路未清若由平涼安設糧臺節節屯兵隨時護送縱有轉輸之費亦無護運之兵且恐主客相猜各存界限尤非軍務所宜查前任甘肅提督曹克忠有謀敢戰久悉西情回寇憚其威略若將 臣 所部分配馬步二十營令其統赴蘭州歸穆圖善會商調度由甘涼相機前進兵數較少轉運稍易其餉卽由李鴻章按數撥歸西征糧臺袁保恆搭解運至蘭州再由穆圖善派隊護運既可免分門別戶又無須添餉增兵似於西軍大局所裨甚巨如蒙 聖明採納曹克忠現在天津卽請 旨飭下李鴻章飭該提督尅日來陝接統 臣 部以期早赴事機 臣 當俟曹克忠到陝後交代清楚再行回籍其餘軍隊或就地遣裁或撤回兩江交會國藩李鴻章酌量留遣並

乞 皇上訓示遵行

軍機大臣字寄 同治十年九月十六日奉

上諭劉銘傳奏病難速痊懇恩賞

假回籍調理並請派員接統准軍各摺片劉銘傳著賞假三個月回籍調理至請飭曹克忠來陝西統帶馬步各營本日已諭令李鴻章傳知該提督卽行前往矣甘省軍情緊要曹克忠未經到陝以前劉銘傳仍當妥籌布置不得以接統有人遽行諉卸曹克忠到陝該提督再行回籍調理以重防務欽此

召籌俄事摺

俄事入都日疾請假就醫天津片

光緒六年十一月初二任京發

再臣於八月奉 詔入都本因日疾請假兩月十月初八日由籍起行赴天津就醫調治茲奉十月初四日 上諭劉銘傳不必拘定假期迅速來京等因欽此遂於二十六日力疾就道十年田里久戀 天顏仰蒙 召諭殷拳彌深依

慕方喜藉依 闕下稍舒犬馬微忱不料到京之後日疾愈重疼痛不已寢食難安若不速就醫療日久恐成盲廢天津西醫精審較勝華醫往時日疾屢嬰皆賴津醫治理擬懇 天恩賞假二十日至津就醫一俟日疾稍痊卽行來京銷假謹附片具陳

假滿疾沈仍請續假回籍

六年十一月二十四日借天津道印發

竊臣於本月初二日在京附片陳明日疾請假至天津就醫仰蒙 天恩賞假

二十日欽此遵卽來津延醫診視原期日漸就痊回京銷假祇以抱病日久沿途受風旬日以來兩日更形障痛據醫云紅筋俱滿非一日所能奏功臣遠聞

詔命力疾赴京原恐外患猝乘馳驅圖報雪壯士枕戈之恥杜天驕跋扈之憂日來揆度勢機當可粗安無事且臣所部唐定奎等軍久戍江南兩江總督劉坤一奏明不能遠調劉盛休一軍保衛畿疆尤難遠去津沽臣卽無疾病落

落一身何關軍國邊塵未定報稱有時將來目疾可痊行年未老苟承 明詔
自當遠赴 闕廷決不敢堅臥山林仰辜 高厚現在目疾日沉急難調治惟

有仰懇 天恩續假三月回籍調理出自逾格 鴻慈

懇續假回籍摺 光緒七年正月借天津道印發

竊臣於上年十一月二十四日具 奏日疾日沈請假三月回籍調理奉 旨

劉銘傳著再賞假一月安心調理無庸回籍等因欽此仰見 聖恩高厚體恤

至周莫名欽感伏念 臣解兵十載伏處田間被 命來京卽行乞退縱無螻屈

求伸之意豈無犬馬戀主之情況蒙 恩假迭邀繫維殊切更何敢以病軀微

悃屢瀆 宸嚴奈日疾日沈肝風更作現當春木發舒之際正肝火益旺之時

肝目相通兩目更形昏障津醫數月經減無期假滿至今未能陳 奏目前事

機大定時局已安惟有仰懇 天恩續假三月俾得歸田調理倘蒙逾格 矜

全庶冀殘軀可愈則感 生成於此日尙可圖報於將來急切微忱伏乞 慈
鑒

按此三摺因光緒六年秋俄佔伊犁 召公速入都詢方略公至津 詔復
促之既入 覲知廷意主和乃奏請開鐵路以圖自強附片請假至天津以
待至津三月和議已成乃連奏假歸始焉 朝旨仍令毋庸回籍繼則不俟

報行矣 陳澹然記

補授福建巡撫謝摺 光緒十年十一月十二日請閩督代繕

竊臣於十月初五日據廈門民船由鹿港間道到臺鈔到北洋大臣李鴻章電
寄本年九月十一日總理衙門奉 上諭劉銘傳補授福建巡撫仍駐臺灣督
辦防務著竭力籌辦以副委任等因欽此伏念臣猥以謏陋庸材渥荷 生成
知遇南征三載提督 神畿北討五年忝邀爵秩養疴田里謬拜督師關陝之

榮久臥江干屢邀奉 詔入都之寵凡荷 聖慈之曲逮輒慙圖報之無從今
夏督師臺疆尤切枕戈待旦祗以才非遠馭莫由展效涓埃屢迫孤軍困守之
難支上煩 聖主憂勞之遠系深宵繞泣徒喚奈何茲復仰被 恩綸 畀以
封圻重寄承 命戰慄莫知所爲竊念我 朝武臣中如趙良棟岳鍾琪楊遇
春等皆以非常勳烈 特簡專圻微臣自顧何人膺茲 殊遇且當閩臺危迫
援餉俱窮縱竭駑駘終慮難勝險鉅加以海程圍塞飛渡無從莫由遠覲 天
顏敬聆 慈訓泥首北望彌切悚惶惟有殫竭血誠將 諭旨飭辦事宜隨時
設法密商督臣妥爲辦理蠟丸奉表彌深犬馬依戀之忱戰壁拜 恩矢圖頂
踵捐糜之報現當法輪禁海商船皆肆掠搜不能恭摺專贄上呈 天闕謹繕
稿密遣漁人潛達督臣代繕拜稿零涕不知所云

按公初以巡撫銜督辦台軍急切倉皇隻身東渡抵台之日法兵輪已環布

基隆二十日卽行開戰當時左文襄方以大學士視師閩浙總督巡撫株守福州台灣道劉璈以文襄舊部蒞台四年專兵專餉公以督師孤寄無地方督撫之權遂致劉璈敢肆壽張迫之死地昔者粵寇之亂曾文正以侍郎督師湖南北江西之間所至督撫牴牾州縣抗其威令崎嶇奔走卒以父喪逕謝以歸故胡文忠抗疏力陳謂非督撫身任地方不能治兵討賊文正卒得江督乃展其才厥後左李分師皆授吳越撫臣始得各行其志公初以提臣督辦陝軍迭辭歸里固以關中無事亦未嘗不有鑒於斯此次渡台廷臣獨以武臣不肯驟加巡撫上下牽掣險與台亡猶幸法船禁海餉援俱絕之中得授巡撫然後官民上下生死相依卒能堅守待援強敵無能逞志故詳著其事爲後之任將者法焉

陳澹然記

再正具摺間准督臣楊昌濬密派委員劉烈藩由民船潛渡來台抄奉九月間

三次電 諭仰荷 聖慈逾格既免微臣退守之罪復 示援兵進剿之機

天鑒昭回糜軀莫報奉 書泣拜涕泗橫流謹當固守危局以俟師期仰副

聖主矜憫微臣之至意督臣籌援籌餉竭力經營體國公忠感佩無地臣已將

援師應於台南設法潛登之處密告督臣台南北團練鄉民已令一律舉辦士

紳稍有鄉望皆已禮羅練勇苟能奮殺敵師臣皆先行記獎聲明策保台紳林

維源遠避泉廈臣已函致督臣就近諄催俾令遵 旨還台共支危局謹附片

覆陳仰慰 宸懷

法兵已退請開撫缺專辦台防摺十一年六月初五日

竊臣汪承 恩命督辦台軍旋授福建巡撫受 命於戰陣憂危之際自應曲

陳於軍勢粗定之餘臣一介武夫不諳吏治持兵台島未立寸功仰蒙 皇太

后 皇上破格恩施畀以封疆重寄力所能効敢不殫此血誠惟外察時勢內

審殘驅有不得不瀝陳於 君父之前者台灣爲東南七省門戶各國無不垂涎一有釁端輒欲攘爲根據今大局雖云粗定而前車可鑒後患方殷一切設防練兵撫番清賦諸大端均須次第籌辦縱使專心壹志經營十年尙恐難收實效福建巡撫曾經前兩江督臣沈葆楨奏請移駐台灣尋以通省事繁殊難兼顧於是議令半歲駐台究之倏往忽來終屬有名無實雖若前撫岑毓英勤明果銳不遑啟居卒乃於台奚補臣平居私議常謂台灣孤懸海外土沃產饒宜使台地之財足供台地之用不須取給內地而後處常處變均可自全此次蒞台經年訪求利病深見台事實可有爲深歎前此因循之誤固知補牢未晚而時會所迫勢不能併日兼營况臣才質鴛庸卽竭力謀台已恐才難勝任若更加疆寄內地九府公事繁多而又遠阻重洋凡督臣所商榷司道所稟承函牘往來究形間隔若駐台日久則顧此失彼必致遠曠闕官若駐台不常則一

暴十寒更屬何裨台局臣宿患日疾到台後瘴煙風雨昏障益深公牘稍多汗流背赤昏眊痛踈幾不自持况乃全省簿書病目安能勝任與其貽誤於後曷若陳乞於前再四思維惟有乘此未受撫篆之時仰懇天恩准開臣福建巡撫本缺俾得專辦台防庶幾勉効寸長或可無致隕越台事幸甚微臣幸甚
軍機大臣奉旨本日已有旨令楊昌濬兼署福建巡撫矣劉銘傳督師無功正當力圖自贖着將台灣善後事宜認真整頓以觀後効所請開缺之處不准行欽此

按此摺實係審時度勢台閩不能兼籌故有此請夫閩台相較閩撫何安台防何危閩撫何逸台防何勞兼任閩撫地大而權尊專督台防不過一虛名欽使平時設防兵餉仰人鼻息一有外患輒當其危雖愚者亦樂去台而撫閩公奈何獨辭閩而就台蓋公一生血性既已身當台難必思安治台地以

自有之利辦自守之防不至仰人接濟然後可保七省門戶以快其心計非
辭閩任台不可不然公豈不知從容台上擁閩撫之威權爲樂哉任閩撫則
必治閩事治閩則必不能專力籌台故不若舍安就危舍逸就勞舍大地專
權而就一臺之無牽制英雄舉動每思獨闢規模實非尋常所能窺測也

陳
澹然記

再請開巡撫缺並銷督辦差回籍養疴摺十一年九月二十五日發

竊臣久患頭疾舉發不時治兵二十年迭乞假歸在案近六七年更罹日晡復
經迭陳到台年餘感蒙風熱蠻烟瘴雨晨夕內攻元氣既傷日疾因之日劇曾
於本年六月初五日奏請開缺八月初七日恭奉 上諭本日已有旨令楊昌
濬兼署福建巡撫矣劉銘傳督師無功正當力圖自贖著將台灣善後事宜認
眞整頓以觀後效所請開缺之處不准行欽此跪聆之下悚感莫名顧念 訓

勉優加 恩施逾格既原情於已往更策勵於將來敢不力疾從公亟圖報稱
謹將善後應辦事宜擇尤先辦庶期稍蓋前愆惟基隆五月以來疫癘橫流將
士十病八九七月而後死喪益多勇不能工軍無可爨既傷逝者益用自愴回
顧殘軀乃居絕域獨念台防重要未敢苟延先將滬尾礮台購料興築分建水
雷遍資防護開設製造軍械各局爲製造彈藥屯儲軍械之區一面乘輪馳赴
安平旂后澎湖往還二千里察看形勢籌畫設防方期殫竭血誠力求整頓不
料台南往返風燥日浸日疾日增精神益憊左目障滿久廢無瞳今右目並昏
新翳陡塞微光一線茫不知人數武相離開聲始辨若再遷延不治必致雙目
俱盲台灣既鮮良醫又無珍藥瘴深疫重斷非北人所可久安臣自東渡以來
隨從文武將官十亡四五現在建甯鎮總兵蘇得勝營官鄭洪勝皆嬰猝疾旦
夕瀕亡以此人人自危紛紛乞骸歸里天下苟非戰事富貴之念終不敵其畏

死之心性命所關雖王法不能強之不去感羣僚之競返傷衰病之孤羈悵望
海天生還何日伏念臣自上年五月隻身渡台猝臨大敵內憂外患環擊交攻
孤子艱危無復生人之趣自分不死於敵必死於讒冰蘖孤懷至今心悸仰荷
聖明萬里委任不搖海外孤臣幸逃讒誅每念聖慈再造碎頂莫酬烏敢
自外生成妄圖引退惟臣智識駑庸賦性愚直才力既不能勝艱鉅德望又不
足洽同寮督師不力既經負罪於前補過無方焉敢貽誤於後且台番危險全
賴練勇辦防早辦一防早得一防之效多練一勇多得一勇之功微臣目疾已
六七年斷非數月假期所能調理思維再四與其病軀戀棧無補消埃何如披
瀝瀆陳免虞叢脞惟有仰懇天恩並開差缺迅簡賢員不勝迫切待命
之至臣受恩深重雖赴湯火所不敢辭際此時艱豈復忍耽暇逸倘荷聖
慈許歸田里兩目不致俱盲定當趨謁闕廷乞供驅策萬不敢飾詞諉避自

悖古人鞠躬盡瘁之忱惶悚微誠伏求 慈鑒

光緒十一年十月二十二日奉 上諭本日據劉銘傳奏日疾日重懇請開缺一摺劉銘傳經朝廷特簡督辦臺灣事宜正當次第經營力圖報稱上年督師不力謗書盈篋仍復曲予優容尤宜奮勉圖功以期自贖何得因日疾未愈遽請開缺著賞假一個月毋庸開缺該撫籌辦善後尙屬認真仍將兵事吏治及地方一切利弊力疾妥籌悉心辦理凡事當行之以漸持之以恆總期成效可觀方爲不負委任欽此

按宣聖有言使臣以禮事君以忠我朝 列聖優禮大臣情文甚摯近世以來樞臣不知體要擬呈 詔令往往奴叱賢豪臺灣之役公以孤軍死守援絕餉窮從容退軍保全根本相持牛載孤島以全而滬尾一戰以寡摧衆法人至圖畫戰狀張於巴黎詫爲近世奇功乃樞臣不知其深謀徒見以基隆

委敵遂時以督師無功等詞相齟齬宜乎公之脫焉求去也 陳澄然記

目疾未愈續假兩月摺 十二年正月二十四日

竊 臣於上年九月二十五日因目疾日重奏請開去差缺回籍調理一摺奉

上諭據劉銘傳奏目疾日重懇請開缺一摺劉銘傳經朝廷特簡督辦台灣事宜正當次第經營力圖報稱上年督師不力謗書盈篋仍復曲予優容尤宜奮勉圖功以期自贖何得因目疾未愈遽請開缺著賞假一個月毋庸開缺該撫籌辦善後尙屬認真仍將兵事吏治及地方一切利弊力疾妥籌悉心辦理凡事當行之以漸持之以恆總期成效可觀方爲不負委任欽此 臣跪讀之下惶悚莫名伏念 臣起家行伍遭際 聖明特簡於海疆緊要之區 優容於衆口交讒之會欽聆訓勉彌益慙惶惟有懍遵 諭旨於台防善後兵事吏治及地方一切利弊力疾經營如現應籌辦之撫番緝匪開墾丈田設官分治築台購

砲諸大端無一非目前要務臣愚以爲禦侮首在自強攘外必先安內台灣民番仇殺土匪橫行上下欺蒙視爲常事臣已派署台灣鎮總兵章高元記名提督柳泰和專辦嘉彰土匪記名提督劉朝祐道林朝棟總兵翦炳南副將張兆連周鳴聲分撫諸番現在生番歸化日多土匪亦漸斂跡擬卽丈田分治招墾開山基隆滬尾安平旗后各海口派令道員方策勳總兵蘇得勝記名提督王貴揚楊金龍方春發等趕辦防務修築礮台工竣之後兵勇不任版築之勞方能嚴行操練維內撫生番外辦海防以及清賦招墾開路伐木一時並行既慮難得人材尤恐難籌經費臣固不敢因循衍飾亦不敢急切圖功惟謹遵聖謨凡事當行之以漸持之以恆以期辦有成效庶不負聖主諄諄訓誡之苦心所幸上年臘月底台灣天氣陡寒積雪滿山土人詫爲從來未有之事開霽後瘴氣頓銷將士臥疾者一時皆起臣本擬正月初九日內渡赴省遵旨與

督臣楊昌濬會商一切不料交春以來日疾又發左目障翳未銷右目又生紅腫畏見風日更劇於前閱視公牘模糊莫辨現在已滿假期萬分焦急思維至再合無仰懇 天恩再行 賞假兩月冀得稍痊一切善後事宜謹仍力疾籌辦微臣生性戇直從無欺飾之詞受 恩過深日疾縱難速痊一日不盲必盡一日之職斷不敢蹉跎貽誤上負 朝廷區區懇摯微忱伏求 慈鑒

軍機大臣奉 旨著賞假兩月欽此

幫辦海軍謝摺十六年四月十六日

竊臣於本年四月十四日承准海軍衙門暨吏部咨光緒十六年三月初二日奉 上諭朕欽奉 慈禧端佑康頤昭豫莊誠壽恭欽獻皇太后懿旨著臺灣

巡撫劉銘傳幫辦海軍事務欽此拜命之下震越莫名臣嘗綜覽環球獨居深念謂中國負山俯海雄絕六洲自鴨綠劃朝鮮北行至旅順極山海關南下逕

大沽烟臺走膠墨峇嶺榆遂達崇明趨定海匝瓊臺抵欽濂延遶萬三千里虎
 視環球實有秦人開關延敵之勢故漢唐之盛海外萬國奔走來王自歐美崛
 興利礮堅船橫轢海表中國數千年一統之勢廓焉盡變其初臣嘗發憤太息
 謬思得雄才大略總括海疆內厲耕商外興製造船臺雷砲戰守相資循此十
 年且將縱橫萬國今者欣逢 皇太后 皇上創興海部綜肅全綱肇中國數
 千年未聞之盛仰蒙總以賢王佐之上相經綸締造固宜震懾遐方臣何人斯
 敢參鉅任况臣撫台六載壯志徒殷既荷青宮少保之殊榮更邀戎部長卿之
 曠典 詔書迭賚 褒語頻加稱其久歷戎行熟諳輜畧勤勞不懈懋著殊勳
微臣自省疚愆能無慙忤矧當海軍創始贊任需賢復蒙 懿旨遙頒囑臣佐
 理俯循涯量倍益慙惶際茲國步艱難未敢虛文引避降拜登受如見 天顏
 咫尺之尊嚴感激馳驅勉乘海宇澄清之歲月謹摭謝悃拜表以聞無任感悚

屏營之至

按公於光緒十五年正月二十二日因 慈禧皇太后歸政加 恩封疆大
臣有戰功者公加太子少保銜十六年正月二十六日因 皇上二旬萬壽
慶公加兵部尙書銜至是復有幫辦海軍之命考海軍衙門之設醇賢親王
爲督辦大臣李文忠與將軍善慶爲會辦十五年冬醇邸於善公薨乃命公
與山東巡撫張勤果公曜爲幫辦張公亦自提督授巡撫負時名然歸政之
恩公加少保張公則未逮焉蓋公之戰功非時賢所及也 陳澹然記

耳目俱病請假一月摺 十六年四月二十日

竊 臣素患目疾今已十年疊奏乞假調理在案到台之後軍事憂勞兩耳並聾
時發時愈多方醫治左耳目俱廢右耳目尙賴保全舍左用右見聞猶未盡塞
也上年八月間右耳閉氣流水初以爲溼氣上升未嘗着意今春三月親劓宜

蘭番社感受瘴溼病痢旬餘幾成危疾不料痢疾粗安手足木麻酸痛不止右耳閉塞轉甚昔時方就醫療右目又加紅腫下生雲翳上膜黑睛閱看公文昏花流淚偶見僚佐視聽俱茫連診數醫俱稱大病之後原氣未復心經過虧風溼隨心火上攻非靜攝不能奏效仰懇 天恩賞假一個月俾資調理所有地方例行公事檄令署藩司沈應奎代折代行遇有要公臣仍力疾自治不敢稍滋貽誤謹恭摺具陳

因病懇請開缺摺十六年六月初五日

竊臣前因手足木麻耳目俱病本年四月二十日奏懇 賞假調理欽奉 硃批賞假一個月欽此欽遵之下調理至今原冀稍爲痊愈即可奏明銷假免致曠官不料醫治多方手足木麻如故耳閉日重目障日深端節以來又增咯血衷氣喘促舉步奇艱醫謂瘴溼內侵關竅阻塞原氣虧損臟腑過傷斷非醫治

一時所能奏效伏念臣受恩深重未報涓埃及今年力未衰正思殫竭血誠仰酬萬一苟能勉支歲月縱不能效古賢盡瘁之義又何敢存引身乞退之心奈積疾已深心神久憊耳既重聽目又不明輾轉籌思不得不瀝陳於君父之前微臣到台七年先後隨來舊部文武員弁不下二百人相繼死亡十不存一兵勇死喪更僕難終固由瘴癘之鄉水土惡劣亦因海外孤島醫藥不時臣病本由瘴溼而生安有日居瘴溼之中而可望其痊好自乞假彌月署中公事悉委署藩司沈應奎代拆代行現在新授藩司于蔭霖不日到台應奎自籌交代無暇再替臣勞若再戀棧遷延必致事多貽誤應懇天恩俯准開去台灣巡撫實缺並幫辦海軍要差賞三個月俾得還家醫治微臣年未六十報效之日方長如能醫治稍痊咯血諸證減輕耳目不致聾瞶卽行銷假出效馳驅決不敢堅臥山林上負聖主肉骨死生之至意

再請開缺摺 十六年九月初九日

竊臣前因患病奏蒙 賞假嗣以病勢增重復於六月初五日籲開缺欽奉
硃批著賞假三個月毋庸開缺欽此跪聆之下仰見 聖恩優渥 眷畀逾恆
感荷 鴻慈急圖調理方異如期銷假勉報涓埃不料痼疾已深咯血不止手
足耳目有甚無瘳加以七月中旬寒熱並增吐瀉俱作內虧外感紛至沓來飲
食俱廢肌膚銳減顛連牀褥疼痛不支夢繞松椒神魂飛越 臣年力未衰苟能
勉強支持何敢再三陳瀆無如百病叢生精神頹靡公牘不能閱看見客倦於
語言偶一用心咯血頭昏幾若身非已有元氣虧損斷非一時所能驟痊伏念
臺灣海外危區交涉軍防尤難措理稍不留心籌度卽有叢脞之虞 臣自五月
至今非極緊要事件皆付藩司徒擁虛名絲毫無補若以戀棧貽誤 臣身不足
惜 臣心何以自安用敢瀝情籲陳伏望 聖慈俯准開缺並 幫辦海軍要差

賞假回籍調理一俟病體痊可卽當出効馳驅勉酬 高厚無任迫切待命之至

再臣自四月抱病請假以後委令藩司沈應奎代拆代行七月中旬病勢益危至今不能起坐地方公事悉令沈應奎主持辦理措置裕如台灣雖設省分究止三府一廳經臣奏請興辦諸大端皆已逐漸就緒以後公事清簡無多臣久抱沉疴呻吟待斃海外無醫無藥斷非在任所能醫療倘蒙 聖主矜憐 俯准開缺不特微臣有再生之望亦免台防有隕越之憂否則擬懇 天恩賞假三個月內渡就醫灣巡撫印務請 旨卽派沈應奎暫行兼護如臣調理稍痊假滿卽行回任決不敢因水土惡劣畏避遷延自負 聖明委任謹附片具陳三請開缺摺 十六年十一月二十七日

竊臣前因假滿病劇續於九月初九日奏請開缺欽奉九月二十八日 上諭

劉銘傳奏假期屆滿病勢增劇請開缺調理復稱如不得請懇賞假內渡就醫各摺片率意瀆陳殊屬非是著傳旨申飭仍着賞假三個月在任調理勿庸開缺欽此臣病久神昏陳奏率瀆仰蒙 聖主寬仁不忍罷斥仍復留任調理逾格優容自分何人膺斯 高厚跪聆之下感愧莫名遵卽悉心調理冀得稍痊卽行銷假無如內受損傷咯血頭暈午後潮熱橫生外感煙瘴左半耳目閉昏手足木麻酸疼日勞醫藥不見微功醫云縱能殘喘苟延亦恐半身痿廢伏念臣到臺七載竭蹶艱難今春始將內治大端經營就理尙有省城並鐵路未竟之工若非病勢沉重萬難支持縱不戀祿位之榮安忍棄垂成之績奈自夏秋大病之後委頓異常既不能接見紳僚又不能閱視公牘呻吟牀褥憂懼不安輾轉籌思萬不敢戀棧貪榮徒滋咎戾且臣兼管學政現當科試亟須按臨各郡就試生童似此沉疴斷非一時所能痊愈惟有籲懇 天恩並開差缺免致

上誤軍國下誤台疆無任哀懇屏營之至

光緒十六年十二月二十三日奉 上諭劉銘傳奏假期屆滿病仍未痊籲懇開缺一摺着再賞假三個月毋庸開缺所有台灣科試事宜著派唐景崧暫行代理欽此

奉 旨革留謝摺 十六年十二月初一日

竊准吏部咨台灣煤礦招商承辦章程請停辦一摺欽奉 上諭戶部總理各國事務衙門會奏台灣煤礦招商承辦章程種種糾繆請飭停辦一摺劉銘傳以特旨勅令另議之件并不奏明請旨輒卽議立章程擅行開辦尤非尋常輕率可比劉銘傳著交部議處欽遵到部劉銘傳應照違 制律私罪革職八月二十二日奏奉 上諭吏部奏遵議處分一摺福建台灣巡撫劉銘傳應得革職處分著加恩改爲革職留任欽此跪聆之下悚感莫名伏查基隆煤礦 臣屢

次辦理乖方咎無可追仰蒙 聖主格外恩施曲加原宥僅予革職仍復留任
聞 命自 天抱慙無地臣惟有勉竭愚忱倍加謹慎力圖自効稍贖前愆冀
答高厚鴻慈於萬一北望泥首不知所云

四請開缺摺十七年三月初四日

竊臣前以假期屆滿病仍未痊上年十一月 奏請開缺奉 上諭著再賞假

三個月毋庸開缺所有台灣科試事宜著派唐景崧暫行代辦欽此仰見 天
恩高厚格外矜全遵卽多方調治原冀病稍輕減卽行力疾從公免至再三之
瀆無如咯血日多飲食日少筋骨疼痛坐臥不安左目已盲右目又生雲翳紅
腫昏暗咫尺不辨人形皆由瘴溼過深關竅阻塞內虧外感氣血難通補瀉兩
窮羣醫束手僉以病情過雜元氣過虧必須靜心調理非一時醫藥可以奏功
伏念臣受 恩過重福薄災生年力未衰遽嬰痼疾好生惡死人之至情一息

苟存不無倖生之望 皇上如不以臣爲不肖 准假北歸俾得稍寬時日從容調理以救危軀倘能醫治就痊不歸廢棄一旦邊塵有警尙可出效馳驅似此病骨支離遷延尸位既不獲委心任事又不獲珍藥良醫一日在台卽多一日貽誤於 朝廷何取焉且臺灣地險民強新開省治一切規模制度大都草昧經綸非若內地循守舊章皆可從容臥治臣卽康強無病聚精會神尙恐變生不測彰化已事前轍昭然况乃經年累月病榻呻吟萬一奸宄生心乘茲間隙臣一身不足惜如大局何微臣孤嘯悲懷不能不哀乞於 君父之前者此也倘蒙 天恩准開差缺 迅簡賢員俾得回籍就醫免臣再瀆地方幸甚微臣幸甚

光緒十七年四月二十三日奉 上諭劉銘傳奏病仍未痊懇請開缺一摺福建台灣巡撫劉銘傳著准其開缺並開去幫辦海軍事務差使欽此

開缺假歸謝摺 十七年四月二十五日


竊臣前因假期屆滿病仍未痊續於光緒十七年三月初四日 奏懇 天恩
開缺回籍四月二十三日奉 上諭福建台灣巡撫劉銘傳著准其開缺並開
去幫辦海軍事務差使欽此拜 命之下感戴莫名伏念 臣一介武夫幸遭
聖主受任危難遠領巖疆守台一年動滋撓謗撫台七載徒切焦勞猥荷 聖
慈曲加原憫鑒其孤撐無助察其愚戇無私 溫詔時矜 殊恩轉沛既拜
青宮之秩復 加司馬之尊自省斗筭久逾涯量况乃 天恩無際 異數頻
頒更令仰贊 賢藩遠參海部凡此文臣所罕遘豈期末將之頻邀雖鳥魚之
性時戀江湖而犬馬之情敢忘芻秣况 臣久誓戰場之馬革忍懷湖上之蹇驢
方冀殫竭血誠勉酬殊遇詎料屢搜奇瘴竟染沈疴福薄災生 恩深命蹇經
年藥鼎難回冰雪之春萬里炎荒徒灑松楸之淚遂使一籌莫効五疏哀陳屢

瀆 天顏乞還骸骨復荷 天心曲摯 恩假時頒詎期臣命孤危哀呼愈迫
何幸漢廷飛詔喜仲升生入玉關轉慚交趾無功笑新息虛鐫銅柱從此餘生
未老皆我 皇再造之年但令一息尙存矢異日 二天之報歸來已晚山中
之松菊都荒壯士長歌海上之鯨鯢已靖翻恨匈奴未滅惜殘軀於瘴雨蠻烟
且欣絕域生還話 恩澤於田夫野老束裝待 命期已逾年脫屣還山決諸
三日除將交卸日期另行奏報外謹陳感激下忱無任忭舞屏營之至

按公於四月二十五日具摺謝 恩二十八日卽行交卸八年台撫事牘殷
繁三日卽脫然歸去蓋其摒擋歸計久矣 陳澹然記

卷一勘誤表

卅四	卅四	卅二	卅一	十六	十五	十一	十	十	三	百數
十九	六	十五	三	十九	十	十五	十二	四	五	行數
七下	十九	二下	十八下	卅下	十五	十九	十四	十二	十二	字數
	椒				經	冉	遣	上		誤
臺	楸				輕	再	遣	士		正
		典	員	於					保	脫
										衍



劉壯肅公奏議 謨議畧

卷二

俄事入都摺

籌造鐵路以圖自強摺 光緒六年十一月初二日在京發

竊臣以菲材渥承 恩遇自解兵柄養疴田園每念中國大局往往中夜起立
皆裂泣下恨不能竭犬馬以圖報於萬一也近者被 命力疾來京仰蒙 召
見訓誨周詳欽感莫名竊念人臣事君之道知無不言况事變至迫利害甚鉅
敢不竭其悽悽爲我 皇太后 皇上敬陳之中國自與外洋通商以來門戶
洞開藩籬盡撤自古敵國外患未有如此之多且強也彼族遇事風生欺陵挾
制一國有事各國環窺而俄地橫亘東西北與我接壤交錯拊背扼吭尤爲腹
心之患我以積弱不振不能不忍辱含垢遇事遷就不惜玉帛以解兵戎然而
和難久恃財有盡期守此不變何以自立今論者動曰用兵矣竊謂用兵之道

貴塞敵情俄自歐州起造鐵路漸近浩罕又將由海參崴開路以達琿春此時之持滿不發者非畏我兵力以鐵路未成故也不出十年禍且不測日本一彈丸國耳其君臣師西洋之長技恃有鐵路動欲逞螳螂之臂藐視中國亦遇事與我爲難臣每私憂竊歎以爲失今不圖自強後雖欲圖恐無及矣自強之道練兵造器固宜次第舉行然其機括則在於急造鐵路鐵路之利於漕務賑務商務礦務以及行旅釐捐者不可殫述而於用兵一道尤爲急不可緩之圖中國幅員遼闊北邊綿亘萬里毗連俄界通商各海口又與中國共之畫疆而守則防不勝防馳逐往來則鞭長莫及惟鐵路一開則東西南北呼吸相通視敵所驅相機策應雖萬里之遙數日而至雖百萬之衆一呼而集無徵調倉皇之慮無轉輸艱阻之虞且兵合則強兵分則弱以中國十八省計之兵非不多餉非不足然各省兵餉主於各省督撫此疆彼界各具一心遇有兵端自顧不暇

徵餉調兵無力承應雖 詔書切責無濟緩急若鐵路造成則聲勢聯絡血脈貫通節餉裁兵併成勁旅防邊防海轉運槍砲朝發夕至駐防之兵即可爲遊擊之旅十八省合爲一氣一兵可抵十數兵之用將來兵權餉權俱在 朝廷內重外輕不爲疆 臣所牽制矣方今國計絀於防邊民生困於釐卡各國通商爭奪權利財賦日竭後患方殷如有鐵路收費足以養兵則釐卡可以酌裁並無洋票通行之病裕 國便民之道無踰於此且俄人所以挾我日本所以輕我者皆以中國守一隅之見畏難苟安不能奮興若一旦下造鐵路之 詔顯露自強之機則聲勢立振彼族聞之必先震驚不獨俄約易成日本窺伺之心亦可從此潛消矣本年李鴻章奏請沿海安設電線此亦軍務之急需但電線須與鐵路相輔而行省費既多看守亦易或者以鐵路經費難籌無力舉辦爲疑竊謂議集商股猶恐散漫難成今欲乘時力辦莫如議借洋債借洋債以濟

國用則斷斷不可若以之開利源則款歸有著洋商樂於稱貸 國家有所取償息可從輕期可從緩且彼國慣修鐵路之匠自願效能於 天朝此誠不可失之機會也查中國要道南路宜修二條一由清江經山東一由漢口經河南俱達京師北路宜由京師東通盛京西通甘肅雖二費浩繁急切未能並舉擬請先修清江至京一路與本年議修之電線相表裏此路經山東直隸地界最多或謂於民間墳墓廬舍有碍必多阻撓不知官道寬廣鐵路所經只佔丈餘之地與墳廬墓舍尙不相妨卽偶有牙錯亦不難紆折以避 臣昔年剿捻中原屢經各該省其地勢民情固所稔知非敢妄爲臆斷也事關軍國安危大計如蒙 俞允請 旨飭下總理衙門迅速議覆若輾轉遷延視爲緩圖將來俄約定後築室道謀誠恐臥薪嘗膽徒托空言則永無自強之日矣 微 臣無狀將不知所稅駕矣迫悚上陳無任惶恐待 命之至

軍機大臣密寄大學士直隸總督一等肅毅伯李鴻章兩江總督劉坤一光緒六年十一月二十一日奉 上諭前據劉銘傳奏請籌造鐵路當經諭令李鴻章等妥議茲據張家驥奏稱開造鐵路約有三弊未可輕議施行等語著李鴻章劉坤一悉心妥籌具奏原摺均著抄給閱看將此各密諭知之欽此

撫臺論事摺

覆陳津通鐵路利害摺

光緒十五年二月八日台北府發

光緒十五年二月十六日承准軍機大臣字寄欽奉正月十五日 慈禧皇太后懿旨前據總理海軍事務衙門奏請由天津至通州接修鐵路當經降旨允准嗣據御史余聯沅等先後奏請停辦均諭令總理海軍事務衙門會同軍機大臣妥議具奏茲據會商籌議逐款臚陳詳加披閱所陳各節辨較精詳敷陳剴切其於條陳各摺內似是而非之論實能剖析無遺惟事關創辦不厭求詳

在廷諸臣於海防機要素未究心語多隔膜該將軍督撫等身膺疆寄辦理防務利害躬親自必講求有素著按切時勢各抒所見迅速覆奏用備採擇等因欽此并鈔各摺片遵 旨寄信前來查閱海軍衙門會奏一摺洞中窾要纖悉靡遺微臣意正同符實覺無從置議惟 聖懷虛挹仰荷 垂詢特就原奏資敵擾民失業三條推闡海署未宣之蘊爲我 皇上敬陳之竊維天下大事惟斷乃成萬國紛拏惟一乃定五大洲幅幘遼闊駕馭爲難於是鐵路與電報興焉此固囊括中外之機緘統一環球之功用也仰維 朝廷屢垂明詔銳致富強倘通盤籌畫綜攬勢機苟有加於鐵路者抑何苦輕貽衆謗效法西人無如外審海疆之形勢內揆戰守之機宜縱覽環球計實無能逾此故臣於十年前卽有創修鐵路之奏徒以格於迂論議不果行今者 聖明在上與在廷王大臣堅持定見決意舉行臣等方額手稱慶以爲從此推行盡利庶幾富強可以

立致敵患可以潛消不謂言者轉疑爲資敵也自火器之製日精舍海口礮臺險無可扼奧法俄德諸國牙錯唇依鐵路縱橫並通都會城垣故蹟毀棄無存如謂藉端尋釁兵車卽到都門則列邦相忌屢起衅端固已吞併殆盡何僅於海上與問罪之師不聞都下有要盟之舉其不足慮固以皎然言者又謂山溪溝塹爲敵所憂林木紛叢爲敵所患一旦邊塵偶動彼將挾其槍礮驅火車以入都門其患將不可測玩其詞意若指海口未失而言則安得若許洋人從容布置而我之官若兵竟同木偶任其所爲乎若指海口已失而言則津通相距二百里皆屬坦途卽無鐵路亦何難長驅直入至若山溪林木關塹溝渠臣熟經其間視若無覩敵何膽怯如斯而憂之耶夫海口者京師之門戶安危所繫固宜呼吸相通臣以爲鐵路建至京師方爲盡善有事則津沽之勁旅卽爲宿衛之禁軍無事則遣神機營與海口各軍合隊併操聯爲一氣臨變策應

進退綽如是遇敵者莫如鐵路而顧以爲資敵豈不偵哉不謂言者又疑爲擾民也非特室廬邱墓呈訴無多卽令羣起紛撓而事關軍國安危亦當權衡輕重安能以小不忍而亂大謀且世之講求風鑑而改葬其親者衆矣給以重價遷地抑復何傷兵家籌備於平時無異決勝於臨敵王者克敵初不聞以傷殘物命爲嫌倘以籌備爲擾民則是兩國交綏斷斷於重傷二毛之說矣方今強鄰環伺其敢與我難者乘我之無備耳誠擇沿海衝要之區徧開鐵路一省有警數省環攻一省有兵數省資調天下惟能守而後能戰亦惟能戰而後能不戰以屈人兵洋人趨避最工誰肯遠涉風濤自取覆亡之禍如此則和局可恃上以奠億萬年有道之基闔境肯安下以全億兆姓生靈之命是衛民者莫如鐵路而顧以爲擾民豈不異哉不謂言者又慮民之失業也溯自河運廢而轉輸全改爲海船輪舟興而商賈競趨於海道北五省人煙寥落旅店荒涼久非

嘉道繁華景象果使鐵路自通州建至清淮則運貨無沈失之虞行人免風濤之苦將見上海商民盡歸腹地奪洋人之權利卽以廓小民之生機洋人無利可圖必將廢然思返乃一則曰車脚店行勢將歇業再則曰船戶水手餬口無資不知鐵路僅設於大道通衢至於港汊紛歧船行如故村鎮羅立車載益多試觀長江輪船往來不絕幾見舟人失業坐斃江湖是厚民生者莫如鐵路而顧慮民之失業不尤重可笑哉尤可怪者謂鐵路爲開闢所未聞 祖宗所未創不知人事隨天道爲變遷國政卽隨人心爲旋轉今之人旣非上古 先朝之人今之政豈猶是上古 先朝之政使事事繩以成例則井田之制自古稱良弧矢之威 本朝獨擅行之今日庸有濟乎泰西制造之精日新月異中國踵而行之已居人後若再因循坐誤一旦變生倉卒和戰兩窮其將何以自立 臣前閱俄報載其君擬由托木司克城增建鐵路至距黑龍江六百餘里之司

他城計長六千一百里已深訝之旋據德商面稱此路俄君諭今日成十里兩歲告竣雖成功遲速原不可知而其經略東方壯志已可概見際此中俄無事尙能未雨綢繆待其既發而後乘之必且噬臍莫逮預防之法斷非鐵路不爲功微臣所爲瞻顧旁皇不能自默者此也或謂外洋以商爲國自強實在經商中華立國在民愛民斯爲邦本不知商卽民也商務卽民業也經商卽愛民之實政也歧而二之是尙足爲知大計者乎抑臣更有請者恆心必根恆產足食方可足兵中國生齒日繁土田日寡謀生乏術緩急堪虞故欲自強必先致富欲致富必先經商西國官商一體在下無不達之情中國官商久睽在下多難言之隱頗聞前借洋戰之款多屬華資賄託洋人爲之營息從古因民建國保國惟民顧令肝胆乖離腹心疏逖非所以療貧振弱自振拔於傾側擾攘之時也當此改絃易轍發憤爲雄亟宜講求商政 特派廉正大員認真督理舉凡

絲茶紡植墾礦製造諸大端招集股商廣籌資本妥議保商防損章程各就所能分途認辦銀錢出入商自主持官但察其贏虧護其艱阻內地辦理得宜然後推之邊省中土行銷既暢然後推之外洋五行百產之菁環顧全球莫吾華若徒以地利未闢遂致民氣日衰如此行之十年且將無敵於天下尙何敵國外患之足慮哉夫不聚斂於民者不能不藏富於民不與民爭利者不能不與敵爭利此事與鐵路相輔而行關繫綦重應否籌議伏候 聖裁臣自督辦台防適值法人肆擾占踞基隆向非仗 國威靈滬尾一捷全台重地且屬他人無他無鐵路兵輪爲之手足也故和議甫成卽請開辦鐵路明知山路崎嶇溪流梗阻鑿山開道築路建橋費鉅工艱視內地且將倍蓰所爲不辭勞怨毅然獨行者良以臺疆千里四面濱海防不勝防鐵路一成則骨節靈通首尾呼應此中利害自非身親大難未易決其深微人情樂與觀成難與謀始往若削平

髮捻全恃抬鎗劈山礮制勝疆場湘軍老將狂視前功語以西國後膛槍礮恆鄙夷不屑及與法交鋒始歎格林礮黎意槍運用之靈命中之遠夫物之精粗經用而始顯事之利害親歷而後知今之訾議鐵路必爲異時贊美鐵路之人伏願 皇上宸斷獨操宣示大計俾天下曉然鐵路一事爲安內攘外刻不容緩之急圖使知非一隅之利乃四海之利非一時之利乃萬世之利非一二人之私利乃千萬人之公利衆志旣協財力自充成效旣彰浮言自息臣身膺疆寄目擊時艱大局所關不容自己謹披瀝上陳伏乞 聖鑒

按鐵路大計惟公獨見於舉世撓沮之先故前後兩疏曲折深至如此所稱鐵路一成則兵餉大柄咸屬 朝廷疆吏無能掣肘尤爲透抉無遺惜當時張家驥阻之於前劉騰鴻扼之於後千秋大計竟格不行至甲午中東之戰各省私其兵餉不助北洋至日人有二十二行省如二十二國之謂然後知

兵餉出自 朝廷所見爲獨遠也 陳澹然記

越事在都摺

遵籌整頓海防講求武備摺 光緒十年閏五月初二日在京發

竊自泰西各國爭開商埠以來或佔海疆或吞藩屬無端欺藐遇事生風一波未平一波又起每當外患紛來言戰言和紛紛不一言戰者當審兵將是否可戰器械是否可戰礮台是否可戰兵船是否可戰空談無補後禍焉窮言和者當思伊犁和而兵費倍償天津和而義民受戮臺灣和而琉球坐失越南和而藩服無存剗肉補瘡欺陵胡底夫戰不如人而欲圖強猶井中求火也器不如人而不知變猶當暑著貂也今中國戰不如人器不如人矣不思改圖後將奚立 朝廷虛懷下問詢及芻蕘仰見 聖主厯念時艱力圖振作無任欽佩惟自古辦極大極難之事必須存愈久愈堅之心倘外承 嚴旨內託空言或畏

難而苟安或始勤而終怠或狃於成見曲示沮撓或昧於知兵故爲飾辯甚或以爲和約既定永無兵端僥倖一時頓忘實禍反謂忠諍之士好爲激烈之鳴種種因循久在聖明洞鑒之中此後惟望上下一心始終不懈臥薪嘗膽奮發圖存整頓海防以濟當時之急講求武備以立自保之基若謀富強圖久安尤非鐵路不可此中利害臣已於光緒六年具奏並由李鴻章詳細覆陳無庸再瀆除將所擬砲台圖式送呈軍機處外謹將應行整頓海防講求武備諸大端敬陳十條恭候採擇

一沿海設防宜分緩急重輕以期扼要也泰西各國遠涉重洋數萬里與我開釁勢必批亢擣虛爲專注之謀中國七省各海口惟廣東可由香港拖帶民船裝兵上岸若北趨閩浙萬不能拖帶民船惟以兵輪嘗試無論敵輪多寡中國海口紛歧萬無處處設防之理用兵之道實宜合而不宜分守禦之機在扼要

尤在守險查各國以商埠爲要區輪船以煤炭爲性命如將各商埠及產煤之處布置周密守禦得宜各國商賈貨財皆已入吾掌握一國稱兵構怨實非各國所樂聞其兵輪久居海中既無煤炭又無淡水卽得我沿海一州一邑無關大局之區堅力以持當可不戰自困且外洋羣趨環視全以強弱爲重輕卽尋常無事見我致力於通商口岸防守精嚴必不敢輕相欺侮此通商各口設防宜重宜急者也

一各海口礮台亟宜改建以嚴防守也外洋現造礮位大者重至數百墩城營之守禦萬不能用墻垣爲障蔽查各口所築礮台雖形勢各殊細究皆不合法度外人恆竊議之臣現製礮台圖式恭呈採擇究之築台雖堅尤須礮利兵不善守與無兵同現計各口防軍雖重地兩面設防六營已無不足次則二三營皆可支持惟必用礮隊兼操水雷方足以資戰守否則兵多糜餉敗益難收

尤可慮者敵以陸兵由他口潛登襲攻瑕之故智則後路必籌遊擊之師庶免重戰輕防之失然非有鐵路呼應終不能靈此則大可愛耳

一洋面水師兵輪宜次第籌辦以固海疆也海防以船爲命無師船卽無海防各國皆然中國豈能獨緩綜計沿海七省須備兵船百隻方可以敷戰守惟急於購辦微特經費無出亦慮管駕無人海軍爲各國專門將領尤爲難得自海防議起環顧海內惟李鴻章一人留心講求選將造器稍爲可觀管駕多閩廠學生未經戰陣或陸營將弁未解測量 朝廷屢念海防似宜另設海部衙門於南北洋閩廣要區各設海軍學堂慎求教習先教管駕之才次練水手必使技藝嫻熟習業專精再令出洋遊歷泰西皇子無不先入海軍充當水手以次而升故人才勃興戰無不克應請令八旗貴介多入海軍以固國本一俟妥籌船費按歲遞加歲必造船數隻大鐵艦價值過昂現既購有數艘餘可稍從緩

議以鐵船財力先購鋼快各船計一鐵船之價可購鋼快船五六隻費非過鉅歲易增加且可暫就現有之兵船先爲整頓程功既速緩急可資似較鐵船之曠日籌資尙足以收急效一切海軍制度學校章程均應責成海部以免紛歧一長江太湖水師急宜改製以收實用也軍興以後曾國藩彭玉麟創設長江太湖各水師原備嚴防內寇現在鎗砲精利輪電飛馳內寇萬難猝發水師散駐漸成額兵與綠營並歸無用歲耗兵餉造船之費且百萬金若改鐵面十丈小輪每隻不過萬金以外每鎮酌裁師船五成改製小鐵輪數隻較之長龍舢板奚翅天淵萬里江湖聲勢且將立壯既可以當外侮又可以節餉需將來卽以管駕小輪已效之將弁酌升外海兵輪之頭領此外江湘閩粵水師皆可仿行儲將之謀莫捷乎是

一福建船政局上海機器局宜加緊整頓以求實濟也自沈葆楨創設福建船

政原冀開拓風氣以圖遠大惟一鐵一木皆取材於外洋每造一船計值實昂於外購查近來商船多用鋼殼價既不昂且能經久其船內修造儘可搭用中國材料取價尤廉大抵船廠承辦工員每持必用外洋油木之議查從前美國造船之費不如英價之廉美商皆赴英購造執政患之嚴定限制簡明價值仍令國人自造究其用意惟慮製船之學中衰其用意甚深正與中國今日之勢相合應請 飭下船政大臣開台灣之鐵礦採後山之木材考工匠之技能以定賞罰較船價之廉貴以便推行某船宜行某處某船宜用某材某船宜安某機詳細考核刊定章程不獨專造兵船卽商人亦可羣來取購並可廣製船之學使之日進高明不至半途中輟上海機器局每年需費五六十萬自開局以來辦工監造每不得人鎗礮製成適用殊寡南北洋互相推諉不嚴賞罰敷衍成風匪特經費虛糜且爲外洋所誚應請 飭南北洋大臣嚴加整頓或照福

建船政章程 特派大員督辦以專責成庶可漸求實效

一請籌購大批槍礮以節經費而免欺朦也中國製局雖開槍礮不聞精利計其價值轉倍外洋每有軍事各省倉皇分購洋商索價驟昂輾轉侵漁所增輒倍而考其所購無一精良查英法官廠皆不製槍大抵購之民廠商民造器必經官廠驗收苟不中程別還無貸此等棄物外洋無可出售類皆運至中華以爲銷路各省徒慕虛名不求實際莫明優劣甘受欺朦既糜國帑更誤軍需一有爭戰敗徵且見應請 飭下總理衙門會同北洋大臣李鴻章籌款四五百萬兩專派熟悉洋務精通槍礮之員赴西洋各廠訂購後門槍十萬桿一尺徑口以外大礮數十尊一尺徑口以內礮並拖礮數百尊槍礮分三年解清價值亦分三年清給一面分 飭各省按年繳價以實軍儲免致紛紜貽誤外洋鎗砲零購則貴躉購則廉如新到黎意鎗零買每桿需價銀十四兩多購減至七

折砲亦如之是槍砲價銀總計四五百萬兩躉買已省銀百萬且可就該廠逐細考查不致收其廢棄既節經費又免紛歧一舉數善莫急乎此

一稽查軍械整頓礦務宜特設軍器局切實經營以專責成也各省購買槍砲新舊參差前門後膛過時輒廢查外洋簡器夙號精嚴一國之兵必用一律之械新精於舊然後舉國更張故操法可併一途戰陣不虞錯雜應請 旨於天津或金陵上海特設軍器局由京慎選嚴明精覈大員 飭下各省督撫將購存鎗砲開列呈明分別新舊以舊鎗專備操練以新鎗歸軍器局收儲以備戰時領用惟洋鎗忌濕銹卽棄材存械之區屋必高廠分門別類毋致混淆某槍用某子某礮用某彈某項水雷某項火藥分存編號位置秩然然後取之不亂尤有陳者製造爲自強之本礦務爲製造之原爾來開礦招商類多誑騙富強大業轉若畏途其將何以自立以後應由軍器局特開礦學延訪名師招生研

究或先籌公款試開一二處以爲之倡礦質果精再招商股商自經理而官爲保護蓋官難持久不能不歸之商商畏官撓不能不因勢以導外洋各國時以礦盡爲憂中國礦產豐饒皆歸廢棄我不自取人將代謀此尤情勢之較然者一酌裁募勇參用練軍以節餉需也查近來偶有兵端紛紛募勇未經訓練焉能抗禦列強其他沿海防軍固多精練餘或未知新法仍用刀矛拘執成規牢不可破亟須安定軍制嚴限日時務使餉械衣糧號令操法一律遵守新章各省新募之軍一俟越事就竣卽應酌加裁併歸入練軍十年爲期連環具保計每勇每月餉銀三兩六錢每月扣存一兩十年積存百二十兩以爲遣撤之資庶不至流而爲匪且逃一勇卽失一槍利器劫人尤爲地方之害此不得不預防者也今綠營久成無用各省練軍之法多與勇同卽可推行辦理合計一省綠營嚴除老弱度餉項之盈虛定練兵之多寡務令五年爲斷全數練齊更迭

番休周而復始無論馬戰守兵凡調練者除坐餉外加餉與勇糧等其未入練者酌留守護之資餘則概歸嚴汰自古有強將無弱兵故外洋有撤兵養將之法倘仍旋招旋撤始招之勇半係有業農民久駐防營遂成驕惰一朝遣散勢豈能耕不爲游民卽爲盜賊故議者每思改勇爲兵實則綠營積弊由於習氣太深誠能嚴汰烟病老弱之徒認真訓練多一可用之兵卽少一外募之勇數年之後無用皆歸有用安見制兵之不可戰哉是在統將之得人耳

一嚴定賞罰以求將材也防營久無戰事敘保格於成例登進無階將材安出查地方州縣尙有三年考績暨特疏密保之條海運河工亦邀獎勵沿海兵將邊省駐防非冒風濤卽嬰烟瘴偶違軍律執法旣嚴若不明定賞格何以拔人材而作士氣惟軍營結習偶邀 朝廷寬大之恩輒起濫保越階之弊似宜嚴定章程沿邊某省勇隊若干練軍若干自統將至弁兵以及幫辦文員何年成

軍何年到營先令造冊送部所有邊海駐防遊擊之師平時操練一以槍法之精粗爲賞罰之準則一年內本軍統領考驗兩次凡中五槍四槍三槍者皆由統領註冊先考營哨次考兵勇期以三年請保一次擇其紀律技術宿優者列保每營酌保八才人其在腹地駐防操練有效每營三年酌保四十人如有督操勤謹約束嚴明之將領準由督撫專摺奏保其營哨官或由統將聲明咨請越保一級其餘嚴禁越級以杜冒濫其未經冊報者概歸駁斥若將領嗜好多端操練不力亦應隨時參革以免效尤

一請設局譯刻西書引導後進以廣人材也自海上多事以來 朝廷屢下徵才之詔顧或通洋務而昧於兵機或識兵機而不諳洋務甚或迂拘之士鄙洋務爲不足言捫籥扣槃原無足怪查外洋於中國精要之書多取譯行海外其西國兵農食貨製造測量諸籍月異日新翻譯既微何用考鏡夫禦侮貴在得

情而致用尤先博覽不究其治軍交鄰之要政何以得情不研其制器造術之本原何由致用伏見我 聖祖仁皇帝因欽天監與西人互相爭測算特合中西之法泐爲成書一時羣才蔚興象數之學遂超前古應請 旨飭下總理衙門並北洋大臣李鴻章或在京師或就天津特開譯局延訪通才取外洋實用之書先行譯刻發行各省務使人人講求父詔兄勉人材庶可奮興承學既多謗疑自少由是按其學科廣其登進決不至若科名愚闇貽害蒼生

臺疆應 詔摺

密陳武備廢弛亟宜整頓並遵保將才摺

光緒十三年閏四月二十一日台北府發

竊 臣於本年四月初四日准軍機大臣字寄光緒十三年四月初八日奉 上諭各省提鎮大員均有專闡之責必須才略素優方足以資整頓邇來軍務救平尤應安不忘危物色將才用備任使著各直省督撫於軍營著績人員內無

論實缺候補各就其人之才具或長於陸路或熟於水師出具切實考語分別保奏其曾經引見發往各省差委之提鎮各員本欲令其練習營伍以備緩急並著隨時留心察看如有才識出衆之員一併奏保聽候簡擢各該督撫身膺疆寄以知人爲最要務當確切考察勿採虛聲勿徇情面用副 朝廷訪求人
才整頓武備之至意欽此遵 旨寄信前來仰見 聖謨遠大安不忘危莫名
欽佩竊維國用不足兵伍不精實爲國家之大患目前財用匱乏已不待言兵
武不精尤非一致有操後門槍砲者有操前門鎗砲者有終年不操者大約不
操者十居八九操者十不二三暮氣日深將貪卒惰虛名空額習爲故常竟成
積重難返之勢若不切實整頓籌餉於萬難之中養此遊手好閑無事非煙卽
賭有事非潰卽逃何以備捍亂保邦之用泰西各國武備日新其練兵有一定
課程一日不懈今各省所購後門鎗砲甚多若不操練鎗久則機器銹損砲久

則零件遺亡俱成廢物整頓之法惟有嚴肅營規認真操練方足挽回積習神機營與直隸督臣李鴻章所部均經久練步伍整齊請旨飭下海軍衙門王大臣詳定營規操練章程刊行各省嚴定賞罰如一省防軍萬人能鍊勁旅三千可資徵調則緩急猶爲可恃不至巨餉虛糜惟練兵必先選將將才端在樸誠今記名提鎮每多貪滑鑽營疆臣公事繁多考察將才但觀其表剛勁者黜便辟者升本原既隳復何振作朝廷整頓武備物色將才必先實技或槍礮命中或操練優嫻或明中國地輿或悉外洋戰法身體強建才畧深長督撫均應保薦俟海軍衙門議立營規操練章程刊行各省後限期一年將各疆臣所保將才調京考驗如所保與考語不符卽將原保大臣議處並請每年特派知兵大員巡閱沿江沿海各營考驗槍礮操練陣法查點勇丁嚴其賞罰朝廷之精神一振山澤之猛士雲興惟在我皇太后皇上加意而已臣一介

武夫仰蒙 天恩破格成全畀以封疆重任事關軍國安危何敢因循緘默謹將智慮所及聊獻一得之愚用備 聖明採擇至 臣部將官如提督方春發柳泰和等營伍廢弛已經叅革其可爲干城之選者自應遵 旨保薦以備任使統帶澎湖防軍記名提督吳宏洛臨陣勇決布置有方操練勤勞營規嚴整統帶滬尾防軍記名提督李定明勇於任事臨敵身先文事粗通槍能命中該二員才勇俱優均足獨當一面其餘如駐防安平總兵萬國本駐防淡水副將余德昌棟字營營官已保都司鄭有勤或勤奮有爲或才勇出衆年力強壯均堪造就爲 國家有用之將才至若外省實缺提鎮 臣所深知者福建水師提督彭楚漢九江鎮總兵朱淮森俱忠勇樸勤持躬純謹實心實力辦事認真該二員如蒙 聖主飭辦防練各軍稍假事權必能竭力整頓其餘非 臣所知不敢濫保有負 朝廷訪求人才整頓武備之至意

五月二十日奉 慈禧端佑康頤昭豫莊誠皇太后懿旨劉銘傳奏整頓武備請飭海軍衙門詳定營規操練章程刊發各省並遵保將才一摺除所保各員已交軍機處存記外其餘所陳各節均著該衙門議奏欽此

覆陳台北情形請 旨查辦李彤恩一案以明是非摺

竊 臣於正月初二接准大學士左宗棠來咨具奏抵閩詳察台灣現在情形一摺恭錄十年十一月十八日 上諭左宗棠奏詳查台灣情形妥籌赴援一摺據稱八月十三日基隆之戰官兵已獲勝仗因劉銘傳營務處知府李彤恩駐兵滬尾以孫開華諸軍爲不能戰三次飛書告急堅稱滬尾兵單將弱萬不可靠劉銘傳爲其所動遽拔大隊往援基隆遂不可復問李彤恩不審敵情虛詞搖惑擬請卽行革職遞解回籍不准逗遛台灣等語前敵軍情關繫極重必應確切查辦不得含糊了事李彤恩所稟劉銘傳各情人言藉藉果係因此貽誤

厥咎甚重非遞籍所能蔽辜前諭楊岳斌迅速赴閩援臺卽著該前督於到台後詳確查明據實參奏李彤恩著卽行革職聽候查辦等因欽此知照前來伏查基隆退守情形已於上年八月十五日奏明在案無庸瀆陳謹將左宗棠所參各節爲我 皇太后 皇上陳之臣渡台時隨帶親兵一百二十名其次臣孫開華三營曹志忠六營每營精壯祇三百餘人當由台南調來章高元淮勇兩營其時台南疫癘盛行兵丁多病僅來五百人嗣又添調巡緝營一營合之劉朝祐百餘人張李成土勇一營統計基隆滬尾兩處共祇四千餘人左宗棠疏稱基隆各營數且盈萬不知何所見聞自七月杪基隆疫作將士十病六七不能成軍八月十三日之戰九營僅挑選一千二百人內中尙有抱病勉強應敵者當孤拔未來之先初九初十兩日臣接香港上海電報知其全股犯台其時滬尾祇孫開華三營劉朝祐一百餘人並張李成新募土勇一營甫經到防

礮台尙未完工又無營壘地勢坦平無險可扼危迫情形不待旁言臣早已憂慮及之曾函致孫開華李彤恩如果敵犯滬尾臣卽撤基隆之守來援囑令堅守以待一面派員赴下游趕雇船隻將軍火笨重之物先運下船十二日孤拔率大幫兵船進口臣料敵兵必由仙洞登岸當同曹志忠等密商如敵兵明日戰後卽紮仙洞則不致遽攻滬尾如戰後收隊下船我軍卽須預備回援滬尾以保後路十三日酉刻敵軍收隊全行下船當接孫開華李彤恩劉朝祐先後來信俱稱法船五隻直犯口門升旗開礮臣同孫開華李彤恩已有成約無用李彤恩虛詞搖惑左宗棠疏稱李彤恩三次飛書告急卽係孫開華李彤恩劉朝祐三人三次之書非李彤恩一人之書也臣當卽傳令拔隊惟四十磅大礮二尊不能運動埋於山下其餘軍裝鍋帳以及傷病勇丁毫無遺棄若果因李彤恩三次飛書告急倉猝拔隊退回軍裝焉能毫無遺失基隆退後敵兵上岸

住營兵勢已分往攻滬尾不足千人若不撤基隆之守敵必全隊攻犯滬尾無兵往援雖提臣孫開華驍勇敢戰器械不敵衆寡懸殊何能保其不失二十日之捷左宗棠前據劉啟稟報奏稱孫開華所部並淮勇士勇三路迎戰獲勝七次又奏係孫開華數營戰勝不獨於台事未加訪察卽奏報中亦自相矛盾不加斟酌所陳臺北距滬尾三十里如果危急地方官當慎重過於他人等語查基隆至滬尾水程祇八十餘里頃刻可至臣五里安設一站往來通信尙恐聞警應援不及若俟地方官稟報必至滬尾失後敵至台北城下方能回援台北府知府陳星聚屢次稟請進攻基隆並有土著之人願告奮勇往攻基隆者皆有其事自滬尾捷後俱以李彤恩所募張李成土勇得力提臣孫開華曹志忠蘇得勝柳太和各請添募千人台北府陳星聚等聯名稟請基隆通判梁純夫招募土勇二千候補知縣周有基稟請招募一千俱告奮勇進攻基隆其時記

名道朱守謨請假尙未銷差倡言多招土勇迅攻基隆至於餉項軍械之有無不計也忽有台北府書識陳華聲稱願招土勇一千五百人自備槍械包取基隆每月每勇需銀洋十二元託親兵哨官奚松林來說當經臣申飭不許多事朱守謨聞有包取基隆之說卽私許陳華招募及臣以淮楚營制每營祇月餉四兩二錢陳華大言輕敵不知能否得力卽給如此重餉何以服老勇之心堅執不許添增口糧該勇俱知台北府無兵祇親兵數十名卽聚衆吶喊鼓譟臣派弁往看陳華所募皆城外艫艸市井之徒器械毫無當傳陳華來見諭以兵餉不能加增如果能克基隆立給賞號銀二萬先發十日口糧令其帶赴水轉脚聽候曹志忠調遣嗣曹志忠見其勇多滋擾器械毫無不能見敵不肯節制臣令蘇得勝親至曹志忠營與之密商陳華土勇先行挾以兵威裁去五百名復調三百名赴觀音山歸柳泰和裁併其餘隨卽一併裁撤費餉一萬餘兩周

有基募勇尙未成軍卽鬧餉鼓譟經臣將已募四百餘人派歸柳泰和節制梁純夫見土勇不遵約束屢次滋事不敢招募此卽左宗棠疏中所稱各將領以及土著之人願告奮勇往攻基隆者係九月初旬事也又紳士陳霞林等屢言內山禦番土勇常見仗可以挑募臣告知各軍前往內山選募一面令工匠連夜修理各營所繳舊槍分撥應用搜查餉項僅數月餘各軍招募有尙未成軍者亦有成軍尙無器械者時值疫氣染至台北滬尾一帶軍民俱病提臣孫開華署台灣鎮總兵章高元總兵柳泰和等俱抱重病曹志忠六營營官無不病者臣隨從文武員弁日歿數人自封口後內地音信不通兵單援絕土匪四起臣日夜憂急無所措手台北府知府陳星聚每見必催進攻基隆臣因其年近七旬不諳軍務詳細告以不能進攻之故奈該府隨言隨忘紳士陳霞林并署淡水縣知縣劉勳皆明白曉暢見將士多病土勇尙未募齊器械缺乏俱知不

能前進陳星聚除面催進攻外復稟請進攻臣手批百餘言告以不能遽進之道該府復慙患曹志忠進攻并以危言激之曹志忠一時憤急遂有九月十四日之挫幸傷人不多未損軍銳敵於十五日即渡河耀兵七堵陳星聚妄聽謠言謂基隆法兵病死將盡又謂業已退走上船故日催進攻自十五以後該府始自言不諳軍務不再妄言此即左宗棠疏稱陳星聚屢次稟請進攻基隆之原由也左宗棠參臣坐守台北不圖進取機宜坐失臣曾將兵單器乏不能進攻情形疊奏在案基隆近靠海岸敵船入口即不爲我有故於六月十六日之捷并未奏報克復曹志忠所守營壘逼近海邊如法人添兵添船即須退守山後亦經臣附片密陳我之所恃者山險敵之所恃者器利彼來攻我我得其長我往攻彼彼得其長且敵營據山傍海兵船聚泊其下若不能逐其兵輪出口縱窮陸師之力攻亦徒攻克猶不克如果易攻現在兩軍俱在疲乏之際王詩

正統帶勁旅三千不日當可奏功以雪臣懦怯株守之恥臣治軍三十餘年於戰守機宜稍有閱歷惟事事求實不慣鋪張粉飾若空言大話縱可欺罔朝廷於一時能不遺笑於中外臣實恥之臣渡台時軍務廢弛已極軍裝器械全不能用礮台營壘毫無布置接戰於倉猝之間所部多疲病之卒歷盡艱難支持半載臨敵應變大小十餘戰幸無挫失若聽局外大言輕敵浪進上月初十日孤拔添兵大舉戰無策應之師守無可據之險必至一敗不能立脚軍事瞬息千變其中動止機宜同非旁觀所能盡知亦豈隔海所能臆度也至浙江候補知府李彤恩本係滬尾通商委員臣到台北提臣孫開華稱其辦事勤能熟悉洋務現因身弱多病決意乞退臣商之提臣台北現在用人之際不可任其乞退託其致書慰留六月十二日臣同提臣並台灣道劉璈至滬尾察看礮台地基李彤恩扶病出見瘦弱不堪臣令其趕緊調養不必請假當委兼辦滬尾

營務六月十五基隆開仗以後李彤恩稟請買船填石塞口時值秋茶上市英商阻撓李彤恩同英領事往復辯論始將口門堵塞隔日法船卽至英兵船告以口門封塞隨卽駛回七月二十日臣至滬尾查看砲台孤拔親坐三號兵船亦至滬尾查探水道並託英兵船代覓引港之人若非李彤恩先期塞口法船混入一隻台北已不堪問紳士陳霞林等每晤談時輒稱其功臣到台北有言招募土勇者臣因其所用土槍不能禦敵不肯操練未曾招募李彤恩力保張李成打仗奮勇請募五百名發給後門槍二百桿令其操練助防八月二十日之戰張李成包抄得力官紳共見共聞十月初臣因餉項支絀札令李彤恩來城同福建候補知縣鄭建中會同官紳辦理捐借餉事該守到後卽同陳霞林等議向城鄉殷戶借銀票二十餘萬元毫無勉強現已辦成如果李彤恩有誤大局之處紳民當共切齒曷有聽其分派捐借者該守不領薪水未邀保獎究

其所辦數事有裨於大局皆非淺鮮左宗棠甫到閩一日不加訪察遂以劉墀之稟並朱守謨挾嫌傾陷顛倒是非之言率行奏參臣若緘默不言使出力有功之人忽遭不白之冤當此孤島險危之地軍務萬緊之時臣何以用人辦事應懇 天恩將已革浙江候補知府李彤恩開復原官並請暫免查辦一俟軍事稍定請 旨飭令楊岳斌或 專派大員渡台逐細訪查如果左宗棠所參情事屬實臣妄用匪人辦理不善貽誤事機應請將臣一併從嚴治罪以明國法而昭公允誠如 聖諭關繫極重非李彤恩革職遞解所能蔽辜事愈久則是非愈明臣無任惶恐待 命之至除記名道朱守謨規避鑽營業已具摺嚴參外所有左宗棠奏參台北情形具實詳陳伏乞 聖鑒

條陳台澎善後事宜摺

十一年六月十八日台北府發

竊法兵退讓澎湖已同前陝甘督臣楊岳斌於本月十七日會奏在案臣前因

澎湖未退雖遣撤台南北土勇各海口仍未撤防除基隆設立撫卹局先將被燬民房派員查明撫卹外其餘善後各事未敢預奏現在澎湖兵退急需舉辦數端謹爲我 皇太后 皇上陳之

一 台澎防務急宜設籌也查全台各海口大甲以南至鳳山沙線遠闊兵輪不能攏岸遠則四五十里近則二三十里較易設防大甲以北新竹一帶海口紛歧直至宜蘭兵船皆能近泊至遠不過三五里基隆滬尾兩口雖能停泊兵輪尙多山險如有水雷大礮設防尙可爲功至新竹一帶沿海平沙後隴中港三號兵船皆能出入地勢平衍全恃兵營殊難着手然以視澎湖猶較勝焉澎湖彈丸孤立臣派提督吳宏洛察看情形據稱其地不生草木沙石迷漫片土難求四面驚濤無能設險惟港內天然船塢最宜停泊兵輪臣到台一年縱觀全局澎湖一島非獨全台門戶實亦南北洋關鍵要區守台必先守澎保南北洋

亦須以澎廈爲堯鑰澎廈駐泊兵輪設防嚴密敵船無能停泊萬不敢懸軍深入自蹈危機此澎廈設防實關全局非僅爲台灣計也姑就澎湖而論若云設防要當不惜重資認真舉辦縱兵船一時難集陸兵不過三千必須多購大礮堅築礮臺製辦水雷聚薪屯粟計買礮築台諸費約需五十萬金非一二年不能竣事若漫圖敷衍不如不防既節數營兵餉之需亦免臨事覆軍之累進退遲速伏候 聖裁此防務之不容緩者也

一台灣軍政急宜講求也查台灣軍務久號廢弛湘淮各軍已成弩末欲挽積習杜虛糜非講求操練不可卽演習洋操非認真數月步法不能整齊手法焉能嫻熟將官點名責令小操一次則頂替之弊可除近來各營多用後門槍礮尤非勤練不爲功倘令槍碼不明則遠近高低茫無準的是有槍與無槍同矣且槍之精者折機磨擦奧竅深微雨濕沾潮銹霉輒損重價購之隨意棄之苟

有人心能無慨惜此器械之不容漠視者也更有難者台灣烟瘴之地勇丁多牛病烟兵滑將貪寬則玩而不振釐奸剔弊嚴則去而之他臣時欲改絃更張嚴定營規堅明約束事煩日劇未易猝圖現同沈應奎陳鳴志詳酌裁留數營除鎮標練兵不計外擬留三十五營台南合澎湖十五營台北合宜蘭十五營中路新竹嘉彰擬派五營稍資鎮攝論勢則台北爲重要論地則台南爲綿長當此百端締造區區營數力已難支然較往時一道歲糜百萬僅守台南餉項無增全局已爲一振此軍政之不容緩者也

一全台賦稅急宜清理也查台灣田產甲於東南一年兩熟淡水一縣每年額徵錢糧銀僅七百八十餘兩官庄穀纔九千餘石宜蘭一縣錢穀無徵其餘各縣糧稅亦寡通計全台鹽茶百貨稅釐歲入銀壹百零數萬兩將來整頓各項稅釐剔除中飽歲可百二十萬核以台澎三十五營之餉歲需百二十萬乃適

相資惟輪船經費一切雜支並須添設製造局歲需銀約百五十萬所虧實多若能將各縣賦稅一律清查以台灣之入供台灣之需尙可有盈無絀惟清賦一事要在得人臣不諳吏治昧於理財時與沈應奎商量辦理之法必先清查戶口再謀次第舉行恐須一二年方可以收實效此清賦之不容緩者也

一全台生番急宜招撫也查台灣番族從前多在外山客民愈多日侵月削擠歸山內種類滋繁邇來亦知耕種爲生各相統屬平日往來山外居民亦頗相安惟土匪成羣聚集番民交界之處搶劫居民或侵番族田廬或誑番民財貨爭端一起械鬪不休奸民被殺則訴冤於官官輒興師勦辦番族被冤則無官可訴類多集衆復仇番禍一興殺掠生番者轉得置身事外而生番殺掠多係良民將恐積怨日深終至民番俱斃不謀招撫必致陝甘回亂之憂卽以防務論臺疆千里防海又須防番萬一外寇猝臨陰結番民使生內亂腹心之害何

以禦之誠三番歸化內亂無虞外患雖來尙可驅之禦侮既可減防節餉又可伐內山之木以裕餉源此撫番之不容者也查設防練兵三端皆可及時舉辦惟撫番須待三者辦成之後方可議行其次設電購輪造橋修路以通南北之郵理屯興墾開礦取材以興自然之利臣智識庸篤難勝艱鉅禦敵既無方略辦事又乏精誠每念時局艱難不獲報稱萬一徬徨中夜慙疚萬端惟有殫竭愚忱勉圖職守雖日疾萬分沉重殘驅苟可支持不敢片刻稍休尤不敢自安緘默除俟台南北各營撤定後再將選留兵將分紮地方另行續奏外謹擬台澎善後諸大端馳陳 聖鑒

按清賦條自言不諳吏治昧於理財時商沈應奎以求辦理之法推賢讓能非古大臣不能與此此其所以成大功也 陳澹然識

覆陳撫番清賦情形摺

光緒十四年十二月十六日台北府發

光緒十四年十二月十三日承准軍機大臣字寄光緒十四年十一月十一日奉 上諭有人奏疆 臣不勝職任據實糾參一摺據稱劉銘傳於撫番清丈徒事舖張致有坤南激變之事並任用非人漫視民瘼以致奸民土匪乘機作亂官激民變確有明徵用人辦事顛預竭蹶各節又片奏彰化各處因科派單費一鄉盡逃台南尤甚及投効函招各員委署鳳山等缺變通補署未免偏私各等語劉銘傳自簡任台灣巡撫以來辦事尙爲得力惟恐操之過急任用或不得人措置不無失當以致民心未協激成近日番變叅摺所陳均不爲無因著卽鈔寄劉銘傳閱看該撫當仰體朝廷開誠訓誡示以謗書之意於摺內所陳平心省察據實覆奏一面情釐正賦禁革規費並嚴查貪吏從重懲辦勿稍瞻徇至片奏台省缺員應請揀發一節並著該撫酌覈具奏將此諭令知之欽此仰見 聖恩寬大開誠訓誡信任不疑 臣何人斯承茲 眷遇拜誦之下感激

涕零臣一介武夫渥荷破格 殊恩畀以封疆重任涓埃未報惶悚滋深惟蒞
台以來慘淡經營不辭勞怨區區愚誠妄冀孤島自強固七省海疆鎖鑰仰副
朝廷慎重海防至意抑亦微臣經營海表之初心台灣之撫番也言者謂番
丁歸化宜有以善其後乃十五六萬之衆未聞馭之何人處之何地何以籌其
生計何以馴其性情不知撫番者就而撫之非遷而撫之也台灣平埔民地居
四高山番地居其六番社錯處各有家室各有田廬耕鑿自安何須處之以地
且地多曠土番人自墾外尙招民墾概未升科何待籌其生計各社本有頭目
曰社長按社之大小月給糧餉鈐束番丁從前沿山墾民被殺歲常千數百人
近則絕無僅有番性雖獷而舐犢之愛轉越恆情乃擇強大之社飭令社長送
子入學與之衣食教以語言俾令粗識字義大科坎撫墾局所收番童已二百
人乃父若母時來探望莫不鼓舞歡欣啓番童之顛蒙卽以資衆番之觀感其

餘撫墾十餘局均飭一律仿行力籌教養台灣撫番久矣從前番民仇殺官莫誰何遂至紛爭無已徒以氣質難馴只可潛移未容強致此則陰陽氣化之偏雖聖人有不能驟奪者言者又謂犒賞不資保獎優異不免糜濫邀功不知開道撫番事皆艱鉅以經費言之前江督沈葆楨創議舉行奏請每年開撫經費銀二十萬兩由閩協台臣到任閩省每年只協軍餉銀四十四萬兩並無另協開撫經費現在統計全台各局經費各社番日口糧及番童學塾歲銷不足十萬兩較之從前撫番多而用費少奏銷可稽以保獎言之各營分佈後山數年來戰亡病故自提鎮至千把不下百餘兵勇死者二千餘均經奏報有案除臣先後三次親入內山勦撫叛番外各將士年年苦戰擇其尤爲出力者隨時保獎一二人或十餘人三年之久收撫生番十餘萬闢地數百里綜計請獎不滿五十人保案可稽此撫番之實在情形也台灣之清丈也言者謂由報升科旋

有埤南激變之事彰化等處如果官民相安何忽遍地皆賊官激民變確有明徵不知埤南本皆番變非起自民呂家望著名強社犬羊反覆乃事之常奸匪張兆暉等以外籍遊民乘機搶劫番地本無清丈兆暉等又無尺寸田園無論委員有無勒索兆暉等斷非被索之人於清丈何與台灣民情浮動強悍異常嘉彰尤甚從前搶鬪巨案無日不聞臣蒞任後嚴拏著匪百數十立置重典搶鬪之風稍戢所謂嘉義新彰交界匪徒究其蹤跡無非乘亂竊發搶劫民財其人無業無糧又於清丈何與惟彰化逆匪圍城謂因清賦激變不爲無因但係紳激民變非激自官臣已將逆紳施家珍等挾仇謀逆等情具奏在案如果官激民變宜乎合縣皆變矣何以抗糧只鹿港一堡會盟圍城又只鹿港附近數十村莊其餘各堡匪特無變如田產最多之紳士道員林朝棟尙且力解城圍不遺餘力然此或謂臣委用不能不仰助官軍郎中蔡占崙彰化第一巨富也

幫同解散脅從拏匪首蔡方正法世職洪磐安訓導楊春華等亦各帶練助剿豈清丈獨苛於鹿港一隅耶言者又謂委員實未丈量不過意爲科派單內賦額官可輕重富者幾罄其家彰化一鄉盡逃台南尤甚是以升科經久之規加爲官吏勒派之罪不知清丈圖冊可憑原契可驗非將分數坵段壞則戶名逐一清查單不能填賦何由定若謂隨意科派轉瞬上下忙例限綦嚴縱能欺飾於目前豈能彌縫於日後十三年十月臣已片陳各屬田畝溢額概免究追由藩司發給丈單爲執業之據仿照江蘇等省酌收丈費每畝不及二百文以償經費各屬清丈給單業將竣事不料嘉義鳳山兩縣貽誤事機先據清賦局司道詳請二縣先徵新糧緩收丈費又值本年夏秋台地穀遭蟲毀臣卽奏明丈費一律緩收已繳者准抵新糧以昭公允丈費微末就令照舊抽收何至罄富民家產卽尋常小戶亦何至棄田而逃既謂一鄉盡逃何又聚數千衆圍攻縣

城脅令縣官焚燒文冊若謂台南尤甚台北單糧收數最多追呼更急何又不肯逃亡清丈田畝本未易言台灣民情尤爲難辦自隸版圖田賦從未清理台南糧賦皆沿鄭氏成規上則田每甲徵供粟至八石八斗每石折收洋銀二圓其餘徵粟徵銀參差不一兵屯民畝輕重懸殊南北新闢田園有大租隘租番租香燈租通事口糧無非土豪私納之名目此次一律清丈仿照同安下沙則升科計上則田每甲僅完銀四圓零於台南固大爲輕減卽台北亦有減無增其大租等項初由紳士認墾收租毫無資本名爲代完正供其實並無完納數十年來官不清查輾轉紛紜竟成世業臣猶恐此次就田問賦業戶完糧大租無着飭令台北府縣商同紳士折中定議就大租酌扣四成貼業戶完糧餘仍照納業戶既免向隅之弊更無虧累之虞大租應完正供無從推託以故紳民鼓舞上下翕然綜計全年賦額溢出四十萬而民不勞豈有他哉減重賦之糧

受惠者咸存餘粟徵無糧之地執業者永杜爭端此清丈之實在情形也若云請款臣到台卽遭法亂庫局一空購礮買鎗日不暇給曾蒙戶部撥銀六十萬此外未嘗乞求卽閩省歲協四十四萬且奏請五年爲限限滿卽無協濟分文往者閩省濟台八十萬養兵纜及數千未聞舉辦何事今閩歲少濟三十六萬養兵幾二萬人開山撫番修築礮台辦理清丈建造城衙廟宇安設水陸電線建製造局買鎗礮購機器造鐵路置輪船前後相衡是否虛糜無待微臣白白若云用人臣以武職忝任危疆未嫻吏治用人難知人尤難惟是有功立賞有罪立罰不懷成見不徇偏私而已臣之所用如羅建祥李嘉棠吳元翰陳燦皆嘗稱薦其才一旦同時獲咎不能因人多而減去之亦不能因埤南彰化滋事之後而諱飾之倘所劾者謂任用非人所保者謂邀功欺飾必且旁皇瞻顧冀逆人言後將何以用人何以辦事所陳各節有無虛僞天下自有公評臺灣一

海外孤島耳自改設行省以來用項較前倍繁協餉較前轉絀若坐安簡陋何以自強若拘守例章何以自保舉凡撫墾以廣幅員清丈以裕供賦整頓釐稅裁汰陋規臣所以竭力圖維任勞任怨者無非就地籌款爲國家建遠大之謨成效既彰後便不必仰資鄰省顧利之所在人有同情苟有裨於公家卽不能無損於私橐謗書所自臣固逆知其然徒以區區血性苟利於國死生以之自問無慙謠詠抑何能恤天下大事言易行難當局苦衷安能求諒於局外幸荷聖明開誠訓誡不敢不詳悉上陳除台省缺員應否揀發另片具奏外理合遵旨據實覆陳伏惟聖鑒

光緒十五年二月十二日奉 硃批覽奏均悉覆陳各節均屬明晰敘述現辦情形亦尙覈實該撫嗣後務當實力圖功虛心集益固不必顧恤浮言亦不可固執成見慎終如始用副委任勉之欽此

臺灣暫難改省摺 光緒十一年十月二十七日

十月十九日准兵部咨九月初五日欽奉 慈禧皇太后懿旨醇親王奕環等奏稱台灣要區宜有大員駐紮台灣爲南洋門戶關係緊要自應因時變通以資控制著將福建巡撫改爲台灣巡撫常川駐紮福建巡撫卽著閩浙總督兼管一切改設事宜該督撫詳籌奏辦欽此 臣查台灣一島孤懸海外爲南洋門戶要樞誠如 聖諭關係緊要自應因時變通改設巡撫以資控制惟 微臣到臺年餘情形稍悉此中奧曲不得不瀝陳於 聖主之前臺灣所出財賦較之貴州新疆則有餘惟沿海八縣之地番居其六民居其四重洋遠隔倚傍一空猝有難端全恃閩疆爲根本聲氣聯絡痛癢相關以助孤危之境上年法人之亂督 臣楊昌濬未到之時何璟罷官之際前藩司沈葆靖尙能力籌接濟以救艱危誠以本省受兵義難辭却卽沿海州縣文報往來尙通聲氣亦以地歸本

省不敢膜視其間若改設臺灣巡撫與閩省劃界分疆卽督臣顧全大局一視同人司道以下畛域分明勢必不相關顧卽以餉論以後仍須閩省照常接濟方能養兵辦防現在籌餉艱難除不得不用之費萬難減省以誤要需其稍可緩減者卽須力求樽節惟視事之緩急輕重次第分籌臣前陳善後摺以辦防練兵清賦撫番爲急圖現既臣詔設臺灣巡撫必先漸撫生番清除內患擴疆招墾廣布耕民方足自成一省臣查台番與雲貴苗民甘肅番回迥異台番不相統屬各社所佔膏腴之地高山宜茶平地宜穀一旦教之耕種皆成富區從前撫番虛糜鉅款皆由舉辦未能認真一撫就降遂若無事臺南降番甚衆仇殺依然聲氣仍歸隔絕以臣度之若認真招撫示以恩威五年之間全台生番計可盡行歸化然後再籌分省土地既廣財賦自充庶可無勞內地刻下外辦防務內撫生番鉅款難籌時形竭蹶一經改設巡撫省城必建彰化縣北適中

之地前撫臣岑毓英察勘形勢昭然核計建造城垣衙署廟宇之需又非百萬不可臣目疾沉重業經奏乞假歸如蒙 恩准無論何人接替若外辦防務內辦清賦撫番又造城垣衙署萬端草創縱使經費有著亦恐才力難支但臺灣重地經醇親王等統籌全局冀保海疆自應派大員駐紮似可仿照江寧江蘇規制添設藩司一員巡撫以臺灣爲行臺一切規模無須更動全臺兵政更治由巡撫主持內地由總督兼管如此分而不分不合而合一俟全番歸化再行改省以重巖疆既可寬此數年從容籌辦目下又可節省鉅款騰出資財撫番設防先其所急此臣審度事勢擬從緩設巡撫之大略也如蒙 採擇應請 飭令王大臣等公同議奏以期萬全至臺灣防務要需業經片請籌撥借存洋款核計設防餉項惟仗閩省協籌應請 旨飭令將軍古尼音布督臣楊昌濬自十二年正月起月由廈門海關協濟餉銀三萬兩每年協濟銀三十六萬俟

三五年後臺事有成或減或停再行核議是否有當伏候 聖裁

奉光緒十一年十二月十二日 上諭據劉銘傳奏籌度臺灣情形暫難改省
又據楊昌濬奏籌議台灣改設事宜請添設藩司各一摺台灣爲南洋門戶業
經欽奉 懿旨將福建巡撫改爲臺灣巡撫劉銘傳所稱從緩改設著毋庸議
楊昌濬所奏添設台北道不如添設藩司爲因地制宜起見自可准行惟此次
該督所奏尙係大概情形所有一切應辦事宜均未籌商定妥台灣雖設行省
必須福建聯成一氣如甘肅新疆之制庶可內外相維著楊昌濬劉銘傳詳細
會商奏明辦理欽此

洋商子口半稅應聲明約章劃清界限摺 光緒十四年三月初三日台北府發

本年二月二十七日准北洋大臣李鴻章電開總理各國事務衙門奏奉 諭
旨台灣爲通商口岸洋商向不抽釐既據該使臣等屢次據約陳請著將抽收

洋商釐金一事卽行停止至該省應如何徵收落地稅釐另行設法辦理欽此
伏查台灣停止船貨釐金改抽百貨釐金經臣於光緒十三年四月間附片陳
明在案開辦以來華商照章完釐凡洋商入內地買土貨領有三聯單者完納
子口半稅如未領三聯單者飭令補完內地稅釐均照約章辦理數目持平各
商稱便間有無恥華商串通洋人不領單亦不完釐希圖偷漏經臣嚴飭局卡
委員設法抽收奸商計無可施慙息各使臣屢向總理衙門言及台灣係通商
口岸非比內地洋商不應領單亦不能完釐中國徵收洋釐係屬違約等語由
北洋大臣李鴻章轉電前來該使臣等所謂台灣係通商口岸者殆指英國條
約十一款內開台灣府城口岸准其買賣而言夫僅准其買賣原不能遽作爲通
商口岸今卽略予通融府城口岸爲通商口岸亦不過濱海一隅之地凡府城以
以外之地皆屬內地既入內地卽應領單倘不領單卽與華商無異應照華商

一律完釐又所謂不應領照不應完釐者係指就通商口岸購買上貨而言夫購買未經完釐之土貨照約本宜補完內地稅釐今卽稍示通融于通商口岸不令完釐此外非通商口岸卽應領單完半稅不完半稅則應完釐又所謂徵收洋釐係屬違約者蓋知我徵收子口稅本照約章原無不合而故創此洋釐名目爲抵制之謀據台灣滬尾口稅務司三次來商並持送總稅務司赫德條議各款有華船洋船進出口半稅由新關並徵諒各公使可以允訂之說當以事關大局未便輕許其言然同此口岸同此半稅何以在我僅收其一尙覺其難在彼兼收其二轉形其易此中狡譎已在 聖鑒之中 臣亦何庸置辯顧 臣所竊慮者台灣土貨以糖與茶爲大宗茶在台北商家包辦釐金相安已久台南之糖有洋人發本交華人代辦者有華商詭託洋商購買者互相影射眞僞莫明 臣旣欽遵 訓示專收落地稅釐自應增設局卡堵截歧途洋商無利

可牟未必不別生詭計况洋人於公文字句往往斷章取義惟利是圖此次恭
繹 諭旨於體恤洋商之中仍寓聲明約章之意明白曉暢誤會何由特恐洋
人得步進步以爲既云台灣係通商口岸卽不能專指府城一處爲詞既僅云
洋商應完正稅卽不能再以子口半稅爲詞從此入內地概不領單出口概不
完子口稅將來華商勢必盡冒洋商厘金皆歸烏有臺地事煩費鉅若再失鉅
款何以自存除將赫德條議抄呈總理各國事務衙門外應請 旨飭下總理
各國事務衙門照會各使臣將府城口岸通商暨內地子口半稅二事聲敘明白
以示限制而絕覬覦國計幸甚台防幸甚

光緒十四年三月二十二日奉 硃批該衙門知道片併發欽此

再正繕摺間准北洋大臣李鴻章轉達總理衙門電開凡通商之處無論是城
是鎮皆爲口岸抽華商釐金原與洋商無涉至領聯單納半稅係指往內地販

土貨而言所謂內地者離約內指明口岸外皆是也伏查英約內載台灣府城
口係指府城所屬之港口卽洋商貿易之安平口府城與安平口陸路相距八
里其停船運貨之處且遠至十餘里卽如潮州之汕頭口登州之芝罘口雖均
隸府城約內與台灣同款列作府城口未聞潮登府城皆爲口岸若謂通商之
處無論城鎮皆爲口岸則嘗考約章而辨之矣英約載廣州五處領事等官准
居城邑而通商則指明港口又美約載各港口市鎮居住貿易一語市卽他約
內所指之市埠與城不同此外未見城鎮作口岸明文不識總理衙門是否另
有所本臣所以亟亟辯明者台南以糖爲大宗糖廓多半逼近府城若非就府
城堵截此外無可扼要之區且洋商買糖率係上年預發本資交華商代辦一
旦將府城籠作通商口岸則土貨出處洋商必謂已經入手華厘何自而徵臣
初非欲於府城抽收洋商之半稅實爲顧全土貨出處之華釐况英約內明明

載定府城口據定口字立言洋商亦不能違約置辯謹附片上陳

光緒十四年三月二十二日奉 硃批覽欽此


台勇長夫不能再裁摺

光緒十三年十月准戶部咨稱本部籌議河工賑需用款一摺奉 旨覽奏均悉裁撤長夫暨鹽商捐輸當商匯號交銀三條著照所請行欽此自本年十一月初一起無論沿海沿邊各營長夫全行裁撤每月節省餉銀限於年內迅速奏報騰出銀數專備河工等因咨行到台除原單所指鹽商當商等項台灣向無此商查各營長夫一項當軍營廢弛不堪之際經前大學士臣曾國藩創立湘軍營制苦心擘畫特恐各營以勇作夫不事操練力除積弊不能不多給長夫卽外國輜重工程各隊也嗣後准軍遵照舊制歷今二十餘年雖不能精勁如前外貌尙稱觀美賴有長夫一項未致空勇廢操若全行裁減將來各營勢

必以勇代夫軍政何堪設想若謂目前無事豈特夫可裁卽勇亦可裁惟兵可百年不用不可一日無兵泰西各國講武厲軍日強月盛精神注於造器國用絀於養兵環伺中朝尤堪悚懼我朝近年籌辦海防方以整頓戎行爲急務似未便於軍營搜茲微款使貪將惰卒得以藉口廢弛一有兵端雖加百倍亦不足償所失惟當此黃河決口費用支絀之時部臣百計搜羅誠非得已以臣管見可裁冗費如河海漕糧各省驛站若能變通辦理每年可節數百萬金利國便民有益無損似較勝於搜求微末無補度支惟更革舊章能否破除成例愚臣草昧未敢妄陳已將詳細情形函達大學士臣閻敬銘請其酌辦如能採擇諒可據情入告以抒宵旰之憂至臣部各軍三十五營兵勇十一年十月己片奏每營裁減長夫八十名數年以來修築沿海礮臺兼以剿撫生番不時征調與內地軍營不事工作無所征調情勢迥不相同長夫一項已經裁


減萬難再減謹據實覆陳 聖鑒

光緒十三年十二月初十日奉 硃批戶部知道欽此



卷二勘誤表

頁數	行數	字數	誤	正	脫	衍
一	十八	二十三	中	各		
六	十一	十八	若	者		
十八	七	十	同	固		
十八	十八	十六	拾	槍		
二十	一	七	莞	筦		
廿一	十三	十六下			緩	
廿一	十三	廿三下			清賦	
廿二	九	十一	情	清		
廿三	三	十七	資	貲		
廿七	五	廿九	更	吏		



劉壯肅公奏議 保臺畧

卷三

法事赴臺摺

恭報自津起程日期並遵

旨會商情形摺

光緒十年閏五月十六日天津發

竊臣於閏五月初四日奉

命督辦台防十二日請

訓仰蒙

聖謨垂念海

疆險要

訓諭周詳

陛辭後束裝就道十四日馳抵天津現值法兵日急亟

應迅蒞台臺猥當畿輔戒嚴舊部銘軍勢難分撥江甯唐定奎八營亦接曾國
荃電函不克遠離廣東吳宏洛五營情勢亦難分調頗聞台灣駐防之兵數雖
二萬操練不力器械不精必待選將嚴操方能禦侮事機促迫斷難倉猝圖功
連日會商北洋大臣李鴻章深慮微臣臨難渡台孤身無助既不克妥籌防務
且恐難控台軍商令記名提督劉盛休所部十營內選派教陸操者百人教礮
隊者三十人教水雷者四人都計一百三十四人並派銘軍舊將提督王貴揚

等十餘員給帶毛瑟後門槍三千桿配齊子彈並請南洋大臣曾國荃由上海
機器局籌撥前門礮十尊另飭道員龔照瑗由上海製造局籌撥後門小礮二
十尊水雷數十具併此數者勉爲目前基隆一口之防此外仍當由臣速購礮
槍以期分布現將各種礮槍子彈一律配齊定於本月十八日乘輪南下到台
後應如何布置再行奏聞再臣奉命督辦台灣事務奏疏公牘應行鈐用
關防以昭信守謹刊就木質關防一顆其文曰巡撫銜督辦台灣事務前直隸
提督關防卽於閏五月十六日在津開用理合陳明抑臣更有請者方今法勢
鴟張微臣至台自以設防練軍爲急澎湖基隆各礮台聞皆不能合度急須次
第改脩槍礮尤須早辦雖臨渴掘井究勝亡羊補牢此次路經上海擬選妥實
礮廠訂購口徑一尺內外礮數十尊後門槍數千桿併計改脩礮台之費統需
銀四十萬兩現值海防急迫之時固應速籌舉辦卽海疆事定亦未可視爲緩

圖應懇 飭下閩浙總督 臣何璟撫 臣張兆棟於應解臺餉之外由藩庫關局道庫迅撥銀四十萬兩歸 臣速辦以濟急需其槍礮價銀修台費經事竣再行據實報銷事關台事安危伏求 聖鑒

閏五月十八日奉 上諭劉銘傳奏現值海防吃緊之時此次路經上海擬訂購槍礮澎湖等處礮台須次第改修請飭撥銀兩等語著何璟張兆棟迅卽籌撥銀十四萬兩解交劉銘傳俾資應用至礮台應否改築必須詳細查勘著劉銘傳於到台後查明確實情形會商何璟等妥慎籌辦將此由五百里各諭令知之欽此

恭報到台日期並籌辦台北防務摺 光緒十年六月初四日臺北府發

竊 臣前抵天津當將自津啓程日期具報在案拜摺後卽乘輪南下二十四日行抵基隆當卽登岸查勘礮台形勢周歷數日於二十八日移駐台北府城擬

再往滬尾察看形勢相機布置竊維台灣孤懸海外爲南北洋關鍵礦產實多外族因而僥伺綜計全台防務台南以澎湖爲鎖鑰台北以基隆爲咽喉澎湖一島獨嶼孤懸皆非兵船不能扼守歷經閩省派輪船四隻永保琛航兩船專住台北裝煤載貨萬年青伏波兩船專備台南調遣往來現在四船俱赴閩滬尙未回防不獨與閩晉音問不通卽台南北亦聲氣隔絕近值南風水漲台南輪船不能泊岸防務暫可稍鬆海上一有戰爭香港日本皆以公法所關不能濟敵船煤炭惟基隆煤礦久爲彼族覬覦以故聲言攻取且口門外狹船塢天成不慮風濤膠攔彷彿燕台其地舊有礮台勢居低下且在口門以內不能遠擊敵船現已詳察地勢在外海口門扼要岸鱗墩社寮兩山對峙之區各築礮台一座別建護營一座以遏敵船進口之路尙令統領慶祥等營福甯鎮總兵曹志忠面授規模撥支款項於二十八日卽令督勇興工惟一材一料類皆取

購廈門現無輪船過海望洋束手萬難迅速告成滬尾海口距台北府三十里中外通商輪船易入其次蘇澳等口船亦易通一俟購礮到台均須次第設防以期嚴密此臣現抵台北急籌防守之情形也至全台物產餉源所繫實以茶鹽樟腦爲大宗鹽釐各局台北較多台南陸路則阻大溪水程則須泛海公牘往返動逾旬時自係鞭長莫及臣擬俟防務稍布規模卽將煤礦鹽釐詳查整覈與地方自有之利養全台防守之兵各營月餉亦須總覈分明力祛糜濫查全台防軍共四十營臺北祇存署福建陸路提督孫開華所部三營曹志忠所部六營而止臺南現無大患多至三十一營南北緩急懸殊輕重尤須安置臣舊部章高元武毅兩營現經飭調北來作爲護隊其餘尙須審擇將領徐整戎規固非一時所能猝辦臺北統將孫開華器宇軒昂精明強幹曹志忠性情樸實穩慎過人該提鎮等於器械操練雖少講求要皆久著霆軍飽經戰陣臣連

日接談簡器練兵之法類皆鼓舞歡欣如能不畏艱險於兵事切實講求皆不負國家干城之選臣以駑駘仰蒙天恩畀以重任既不敢因循粉飾亦不敢急切圖功惟當殫竭微誠圖報萬一仰副聖主綏保危疆之至意

光緒十年六月十二日奉 上諭現派曾國荃等在滬與法使議約該使無理要求婪索巨款萬難允許雖經美國照約出爲調處成否尙不可知亟須豫備戰守况法艦現聚閩口彼族詭計多端伺隙攻瑕均未可定沿海各省防務喫緊該大臣將軍督撫等不得因有調處之說稍涉疏懈仍當振刷精神懷遠疊次諭旨極力籌備堅持必戰之心勿存游移之見庶不至因循貽誤致干咎戾將此由六百里各密諭知之欽此

請飭南洋遣回四輪片

再台灣孤懸海外一舉一動皆非兵艦不行且澎湖一島地處要衝尤非兵船

不能設守現往來台南北之船永保琛航在台北專裝煤貨萬年清伏波兩兵輪專住台南年久行遲斷難應敵查船政局素有澄慶登瀛洲靖遠開濟四船均經撥赴兩江目前台防需船較他處爲倍急兩江設守應用兵船祇有江陰吳淞兩處其次皆無事兵船各船往來不過供差之用而管駕水手久居滬上華麗之地不居船內懼涉風濤游惰已成習慣不獨虛糜餉項且致貽誚外人現在南洋新購鋼快二船已到合之舊輪爲用已敷如能將澄慶等四船遣回台灣臣與張佩綸隨時督練察看管駕賢否長令梭巡海面嘗試風濤非祇有裨防務且於師船一道切實講求尤爲擴張海軍之地應請 飭下署兩江督臣曾國荃迅飭該兵輪卽行回台以後餉需經費當由閩台籌給閩防旣固南洋亦可稍減海防經費之資伏求 聖鑒

按張佩綸時以翰林學士署副都御史會辦閩防故篇內及之不一月閩防

大敗兵船廿艘無一存矣

軍機大臣奉 旨疊據曾國荃陳寶琛電報此時撥船赴閩適以餌敵且江南防務亦殊吃緊已准其暫緩調撥矣欽此

按曾公時任南洋陳則爲會辦也

敵陷基隆砲台我軍復破敵營獲勝摺

六月十六日臺北府發

竊 臣前將抵台日期並勘基隆砲台恭摺陳報在案前月二十五日卽有法人兵船一艘灣泊基隆詢所由來答以遊巡海口 臣卽密飭各軍嚴行戒備督促海口社寮砲台日夜築脩惟運料無船萬端束手當卽飛函閩省請將永保琛航兩官船撥台應急奈閩口音信隔絕兼旬由滬運礮赴台之商輪又久遲不到自本月朔時有法兵船巡泊基隆一半日卽去而前次所到之法船一艘仍泊不行當以和戰未定未便衅自我開適伏波兵船自臺南載新調提督章高

元毅軍勇五百甫到基隆閩省復調伏波裝澎湖兩營以去台兵益寡輪艦一空當飭章高元紮近基隆礮台藉資輔助提督蘇得勝佐之其自上海運砲之委員游學詩因中國各輪憚於南下初九日始雇德商萬利輪船十二日始來滬尾維時臣正赴滬尾督令孫開華所部趕造礮台見軍裝運到卽令將雷礮仍由萬利船運布基隆及到基隆法兵酋堅阻不令卸載德船不能久候仍回滬尾口門臣方回至淡水城正擬改船裝運忽於十四日續來法兵船四艘直逼基隆其兵酋李士卑斯遣告蘇得勝曹志忠據稱和議不成限期已屆隨帶戰書告示定於翌晨攻擊礮臺諸將一面嚴防一面飛報臣於十五日黎明接信當以基隆礮臺本無可恃前摺業經奏明當卽親馳督戰行至半途礮聲震地趨行速至法人已於辰刻開礮攻臺營官姜鴻勝督礮還攻臺上祇存洋礮五尊礮臺僅有當門一面敵山旁擊礮卽不能旁攻章高元蘇得勝各帶百餘

人潛伏礮臺牆外溝中敵礮猛攻不息自辰至午血戰不休竟毀礮臺前壁火藥房亦被敵轟毀章高元蘇得勝密令姜鴻勝率軍退出傷亡弁勇六十餘人礮臺既毀我不能支法亦未踞此礮臺被毀之情形也臣憤法人之輕我也非誘之陸戰不足以折彼兇鋒趕將海濱難守各營飭移後山以避敵礮曹志忠營雖近海中隔小山仍令照常嚴守一面激勵各軍堅籌血戰誓挫凶威十六日卯刻法兵四五百人半在曹志忠營北山上築營餘二百人直薄曹志忠之壘仍用輪船炸礮助攻自卯至午槍礮不息曹志忠一面飭守本營親督王三星等率隊二百人出戰臣卽令章高元蘇得勝率隊百餘人襲其東復派已革遊擊鄧長安率親軍小隊六十人繞擊其西曹志忠見兩路夾攻士氣益壯法見我軍之夾攻也連轟巨礮以敵之槍戰逾時我軍所持後膛槍皆能命中擊倒山巔擁轟之法酋二人與山下法兵頭一人敵軍大潰我軍一鼓登山當破

敵營奪獲洋槍數十桿帳房十餘架並獲其二燾斬首一級探報法兵傷亡百餘人逐北至船邊始返我軍傷亡纔數人二燾者皆國徽尤爲萬國行軍所大恥此法犯基隆陸戰獲勝之情形也伏念基隆礮臺不固礮位無多彼族久經竊議今突以五船相犯實瞰我軍船砲俱無睥睨乘危妄思竊踞今幸仰荷天威將士用命有此血戰稍挫兇鋒實足以抒激憤惟當逐北抵船之際海口若有兵輪首尾夾攻敵船皆爲我有失此機會慨惜如何法人自入中國以來未經此敗勢豈能甘必將增兵增船一雪斯恥我軍兵單器乏何以禦之合無仰懇 天恩俯念海外孤軍事機萬急 飛勅南北洋大臣暨閩省督撫速撥能戰兵輪十隻擇將來臺助戰無蹈各安畝土坐令 微臣 獨陷危機曷勝急切待 命之至所有此次尤爲出力之統領霆慶等軍記名提督福建福寧鎮總兵曹志忠親駐海濱孤軍突戰且於砲臺攻倒後鼓勵將士毀挫敵營其功實

非尋常可比可否籲懇 天恩賞穿黃馬褂以示優獎統領武毅軍記名提督章高元記名提督蘇得勝平日認真操練臨敵尤能奮不顧身助守砲臺保護守臺弁兵全行退出未甚傷夷擬懇 天恩遇有海疆總兵缺出卽行 簡放並請 賞換清字勇號總兵銜儘先副將王三星擬請以總兵 記名簡放並請 賞給清字勇號已革遊擊鄧長安擬請開復原官用示鼓勵其餘文武立功將士可否擇尤保勵出自 逾格鴻慈

光緒十年七月初二日內閣奉 上諭劉銘傳奏臺北基隆砲臺爲敵攻陷我軍復踏毀敵營獲勝情形一摺法國兵船駛至臺北基隆口岸於六月十五日疊開巨砲將該處砲臺擊毀十六日法兵上岸直撲營壘經劉銘傳及總兵曹志忠等督軍迎擊獲勝敵兵潰敗劉銘傳調度有方深堪嘉尙著交部從優議敘尤爲出力之記名提督福建福甯鎮總兵曹志忠著賞穿黃馬褂提督章高

元蘇得勝均著遇有海疆總兵缺出卽行簡放章高元並賞換年昌阿巴圖魯名號蘇得勝並賞換西林巴圖魯名號副將王三星著以總兵記名簡放並賞給額騰依巴圖魯名號巴革遊擊鄧長安著開復原官其餘立功將士及出力文武員弁准其擇尤彙請獎勵欽奉 慈禧端佑康頤昭豫莊誠皇太后懿旨著於內帑節省項下發去銀三千兩賞給此次出力兵勇著劉銘傳查明尤爲奮勇者傳旨賞給欽此至基隆砲臺前據劉銘傳奏修築未能合法本不足恃此次失事員弁著免其置議嗣後倘有守禦不力以致挫失情事定當按照軍律從嚴懲辦決不寬貸所有傷亡弁勇卽著查明請卹另片奏解運軍械辦糧轉餉各員懇請獎勵等語基隆通判梁純夫著賞換花翎縣丞游學詩著以知縣補用鹽大使錢壽益著免補本班以知縣仍留原省歸候補班前補用遊擊孫安邦著以參將補用並賞加副將銜巴革道員裕庚著准其留營効力又片

奏道員朱守謨等懇請留營等語記名道朱守謨郎中羅廷玉均著准其留營効力該部知道欽此

請將曹志忠移紮山後並拆移煤礦機器片

再臣自滬渡臺之日正事機緊急之時隨帶親兵百餘人文武員弁十餘人猝臨強敵內地音信不通臺兵素無紀律恩信未孚諸務無從措手惟有宣示朝廷威德激厲將士苦戰以保危疆惟敵人船堅砲利若再增兵增船曹志忠所守正營中營離海過近難支敵砲擬令移紮後山以保兵銳其八斗煤礦已派擢勝營官楊洪彪督拆機器移至山後並將煤礦房屋一併燒毀以絕敵人窺伺之心謹附片具奏

再正繕摺間接據基隆稅務司幫辦英人鮑琅榮函稱法樂提督意甚殷勤欲邀臣赴彼船面商事件臣以體制有關未便前往惟彼族既以禮來當約該稅

務司於十八日已刻在基隆相晤詢問該酋所商何事再行馳 奏謹抄該稅

務司原函恭呈 御覽伏乞 聖鑒

法擬調陸兵來攻臺北片 七月二十八日

再臺北軍情自七月初九法船出閩後卽以三艘近泊基隆勢極猖獗掛旗索戰連日不休七月初十一兩日敵兵開礮猛攻我勇憑山爲障開礮還擊屢中其船彼礮反無所施其毒彼勞我逸敵頗傷亡然後退泊口外滬尾海口離基隆八十里該處僅孫開華三營復經李彤恩添募土勇一營兵單力薄危急萬分彼族不得志於基隆十四二十等日復窺滬尾當經孫開華李彤恩趕將滬尾前備堵口石船接連沈塞法船屢到探視口門卽行駛去 臣於本月十九日親至滬尾添派礮勇百人稍加布置卽日仍返基隆現基隆口門仍泊二船未動閩口駛出兵船不知何往聲言調陸兵四千來攻基隆臺島孤懸兵單援

絕前奉 諭旨飭撥江陰援兵劉朝祐等四營頃接曾國荃電復謂設法僱船可載一營先渡北洋所撥三營尙待覓船八月以後臺南浪湧漸平更形吃緊臺島千里在在堪虞憂急既深不知所措惟有就現在防兵竭力支持以待援應除大概情形均經隨電總理衙門外謹將近日軍情附片密陳

本年十月十九日奉到原摺後開 軍機大臣奉旨覽奏已悉前有旨令南洋閩粵速籌援應著劉銘傳就現有防兵嚴密布置力籌戰守並將軍情隨時迅速電奏欽此

法船併犯臺北基隆俱危移保後路摺

十年八月十五臺北府發

竊臣前將法人擬調陸攻擾臺北各情於七月二十八日片陳在案拜摺後敵人日以一兩船攔泊滬尾口門遇船卽搜以絕援應商船畏阻音問不道馳摺無從萬分焦灼八月初二日颶風大雨之中上海所僱匯利萬利兩船載江陰

劉朝祐勇六百人駛到趕用剝船接卸百餘人而風勢緊急兩船皆避風入海
匯利仍裝原勇折回上海萬利僅裝五十人於次日回臺卸兵甫畢敵已上船
搜查見無軍裝始去當將前摺由萬利賈赴上海轉呈初九日龔照瑗所僱華
安輪船裝勇三百人甫來滬口遇敵迫回初十日由新竹上岸至今未到基隆
其危迫難至如此三法船停泊基隆日以巨礮轟擊十二日復有八船突至並
前泊共十一船兵勢益盛十三日黎明敵兵千人自口外西山登岸恪靖營營
官畢長和各帶百餘人接戰往復衝盪血戰兩時敵復自山巔杪擊章高元陳
永隆等退出山口血戰抵持直至酉刻敵更猛撲我軍復經陳永隆等擊退陣
斬一酋我勇傷亡逾百自六月既望以來將士血戰兩月日在炎瘴溽濕之中
病者十居八九八營之衆能戰不過千人曹志忠章高元蘇得勝等身自博戰
誓死不撓正當全力相持之際忽報滬尾敵船五艘直犯口門滬臺新造尙未

完工僅能安礮三尊保護沈船塞口敵礮如雨孫開華劉朝祐督飭張邦才等用礮還攻礮臺新壘泥沙不能堅固被礮卽毀陣亡礮勇十餘人張邦才負傷亦重飛書告急基隆臣以基隆萬分危迫滬尾又被急攻基隆無兵可分滬尾又當基隆後路離府城只三十里僅恃一線之口商船聲息稍通軍裝糧餉盡在府城滬口除沈船外臺脆兵單萬無足恃倘根本一失前軍不戰自潰必至全局瓦解莫可挽回不得不先其所急移師後路藉保府城乃夜率曹志忠章高元各營自基隆趕回淡水立派曹志忠章高元蘇得勝共率奮勇數百人馳救滬尾軍裝隊伍搬運無遺劉朝祐所部百餘人原助孫開華守滬敵船連攻兩日孫開華劉朝祐伏軍海岸屢遏敵鋒曹志忠既退現抵滬營敵艦無增或可暫支危局臣惟有勉循傷病力守危疆急迫情形想邀聖鑒伏念臣以疲病之卒當破閩之師兩月孤危情見勢詘兵單援絕坐困較然敵人自破閩江

聲言必攻臺北稔知我軍勢蹙全力環攻兵力過單智勇俱困微臣憐士卒之瘡痍慮全軍之覆滅僅能拔之出險先顧本根不能力保基隆若何能追亟應請旨將臣從重治罪以示國威惟法既全力注臺淡水新城尙未完工無險可守臺危累卵旦夕難知伏求聖明迅施方畧以救陸危無任激切待命之至

軍機大臣奉旨覽奏均悉臺防萬緊朝廷殊深焦慮昨又諭南北洋大臣派撥兵輪援應劉銘傳素有謀畧務當勉力籌防聯絡紳民出奇制勝挫彼兇鋒以保臺灣全局所請治罪之處著加恩寬免欽此

敵攻滬尾血戰獲勝摺十年八月二十四日台北府發

竊臣前將法船分攻滬拔隊援守等情馳報在案自是以來我軍嚴防滬尾不料十六日法人又到三船通計八艘巨礮日擊滬尾砲臺守兵茫無駐足孫開

華章高元劉朝祐等晝夜率軍分伏海濱林莽風餐露宿不敢少休二十日清晨敵船忽散孫開華決其勢必登岸親督右營官龔占鼐伏假港中營官李定明伏油車別令後營官范惠意爲後應章高元劉朝祐各率營官朱煥明等伏北臺山後防襲我臺李彤恩所募土勇張李成一營伏北路山間部署粗定敵礮轟數百響煙塵漲天炸彈如雨復以小輪分道駁兵千人猝登海岸攻撲礮臺孫開華見敵兵旣逼立率李定明范惠意分途截擊章高元等自北路迎戰敵兵各執利鎗自辰至午槍聲不絕屢挫復進鏖戰不衰我軍拔短兵擊殺張李成領隊襲之孫開華斬執旗法酋奪旗銳入我軍見敵旗被獲士氣益張斬馘二十五級內有兵酋二人槍斃三百餘人敵乃大潰我軍直追至海岸敵兵溺海者更七八十人敵船急護敗兵開礮亂擊自傷小輪一隻並遺格林礮一尊我軍俱獲以歸是役也提臣孫開華中後兩營首犯敵衝鏖戰最久陣亡哨

官三員傷亡勇丁百餘人其餘各營弁勇俱有傷亡戰後孫開華舉戰勝各情具報前來臣查此次敵兵猛撲滬口蓄銳猝登志在必克當敵划送兵上崖各划皆開入海中自斷歸路以決死戰我軍自基臺被毀無礮還攻全賴軍士赤手短兵誓死不退雖槍礮如雨士氣益奮決無前竟能斬將搴旗遏其凶焰滬尾英人登山觀戰拍手狂呼無不頌孫開華之奮勇絕倫餽食物以鳴歡舞伏念各將士忍饑裹創野宿山隈當呻吟疲病之餘處絕險孤危之地奮身血戰以弱摧強實屬異常勞苦所有統領擢勝等營署福建陸路提督記名提督漳州鎮總兵孫開華身先士卒忠勇善戰危局獨支厥功尤偉該提督歷著戰績已蒙 恩賞穿黃馬褂並 賞給清字勇號現署福建陸路提督官職較崇微臣未敢擅請可否破格以獎戰功之處恭候 聖裁記名提督綽羅泰巴圖魯龔占鼐陷陣衝鋒殺敵最衆可否 賞穿黃馬褂以示優殊提督銜記名總兵

健勇巴圖魯李定明記名提督朱煥明二員均擬請 交軍機處存記遇有總兵缺出先行請 旨簡放李定明擬請 賞換清字勇號並以提督 記名副將銜閩浙補用遊擊范惠意儘先遊擊孔光治二員均擬請免補遊擊參將以副將留於閩浙儘先補用並加總兵銜范惠意仍擬請 賞給清字勇號儘先副將畢長和陳永隆二員擬請以總兵 記名簡放記名總兵梁秉成擬請 賞給巴圖魯勇號並加提督銜藍翎儘先都司滬尾營守備蕭定邦擬請以遊擊儘先補用並 賞換花翎五品軍功張李成擬請以守備儘先補用並 賞戴花翎並加都司銜軍功陳振泰黃國添蔡國樑三弁均擬請以千總儘先拔補並 賞給五品藍翎江蘇候補從九品劉恕擬請免補從九縣丞以知縣留閩補用以示鼓勵之處出自 逾格鴻慈其餘出力員弁應請彙入前次保案擇尤請獎陣亡弁勇亦俟查明彙 奏請卹

再此次非常惡戰海關英人皆歎噴無已將士風餐露宿艱苦萬端孫開華軍尤多出力所請獎勵不免稍慢惟當此餉窮援絕惟恃重獎以勵人心不能不稍從其厚故敢照原請上聞未能遽加刪減可否仰懇天恩矜念海外孤軍血戰之艱俯賜俞允以收士卒奮勉圖功之效無任惶悚之至至章高元前於基隆獲勝案已邀獎勵劉朝祐係臣姪孫均未敢隨摺上請合併陳明

光緒十年九月二十日軍機大臣奉 上諭劉銘傳奏法軍攻撲滬尾官軍接仗獲勝情形一摺法船分泊臺北滬尾等處八月二十日法兵猛撲上岸提督孫開華督軍分路迎擊提督章高元等亦帶隊進剿法兵挫而復進者數次我軍短兵相接孫開華率隊直前陣斬持旗法將一名並奪其旂斃敵約三百名敵勢不支紛紛潰散其退至海邊爭渡覆溺者無算在事尤爲出力各員自應優予獎勵著福建陸路提督記名提督漳州鎮總兵孫開華身先士卒忠勇善

戰深堪嘉尙加恩賞給騎都尉世職並賞給白玉領管一支白玉搬指一個白玉柄小刀一把火鏟一把大荷包一對小荷包兩個以示優獎提督章高元據奏基隆案內已邀恩獎總兵劉朝祐係該撫姪孫均未奏請獎勵該提督等均著戰績自應一體加恩章高元劉朝祐著各賞給白玉領管二支白玉搬指一個白玉柄小刀一把大荷包一對小荷包兩個章高元並交部從優議敘劉朝祐並賞加提督銜提督龔占鼇衝鋒陷陣協著戰功著賞穿黃馬褂總兵李定明提督未煥明均著交軍機處存記遇有總兵缺出先行請旨簡放李定明並以提督記名並賞給博德恩巴圖魯名號遊擊范惠意孔光治均著免補遊擊參將以副將留於閩省歸前充補用並賞加總兵銜范惠意並賞給額騰依巴圖魯名號副將畢長和陳水隆均著以總兵記名簡放總兵梁秉成著賞給克勇巴圖魯名號並賞加提督銜滬尾營守備蕭定邦著以遊擊儘先補用并賞

戴花翎賞加都司銜陳振泰黃國添蔡國樑均著以千總儘先拔補并賞給五品藍翎從九品劉恕著免補從九品縣丞以知縣留於福建補用欽奉 慈禧端佑康頤昭豫莊誠皇太后懿旨著發去帑銀一萬兩賞給此次出力兵勇著劉銘傳查明尤爲奮勇者傳旨賞給欽此該撫務當激勵將士同心禦侮共奏膚功渥膺懋賞餘著照所請辦理該部知道欽此

密陳臺壘危迫援餉俱窮片

再台島萬分危迫已於前摺并電報瀝陳現在滬尾之捷仰託 天威稍摧敵燄惟營臺俱爲礮毀軍士無立足之區露宿抵防暫救目前危急彼族大隊俱集於斯基隆四山皆築鐵營勢非得全台不止我軍苦戰傷病死亡器械藥丸無能爲繼前者南洋裝兵竭盡無窮之力三次僅到六百人萬分險阻頃上海忽有華安輪船在海被劫之謠各船皆不敢再裝兵械海天寥廓接濟已窮官

紳堅請招土勇數千以輔官兵不足烏合之衆器械毫無安能禦敵現在餉需益絀台南道庫據台灣道報稱僅敷目前請咨閩省速爲援濟尙未知能撥若干如何轉運台北所存不足十萬以台北出入之數計之不過僅支一月台北稅釐因軍事日危毫無所獲過此以往呼籲無門尤堪悚懼從前基隆旣失滬口一綫商船猶可往來藉得稍通消息此後商船日絕音信難通台南潮勢將平統將無能一戰敵船若攻台南則四路斷絕南北洋之船又不能遠來台地坐而受困援救伊誰臣一身不足惜將使全臺千萬生靈盡罹塗炭能不寒心况敵人踞此更將橫擾南洋大局何堪設想臣受恩深重何敢一字虛飾上瀆宸聰徒以援濟俱窮勢且坐而待斃情危勢迫不得不冒死哀陳敢乞宸謨廣施方略以中原全力救此危量無任激切待命之至附片密陳伏求

聖鑒

按此足見當時情狀之危非公安能保此絕地厥後十一月奏陳台紳捐資募勇自言當時竭蹶萬分已無生望始知公鐵路疏兵餉出自朝廷督撫不能牽制所見爲獨遠也 陳澹然識

軍機大臣奉 旨覽奏已悉現諭令南北洋大臣調撥兵輪尅日前往援剿並令楊昌濬將兵餉軍火妥籌接濟該撫務當激勵將士聯絡紳民妥籌戰守迅復基隆毋稍鬆勁欽此

臺紳捐資募勇屢戰獲勝並各軍分守情形摺 十年十一月初九日台北府發

竊臣屢奉 諭旨垂念台島孤危 飭令勸集義團協力助戰當卽宣示 德音懸賞激勵俾令敵愾同仇紳民感沐 皇仁竭力從事自敵踞基隆附近之暖暖深澳四脚亭鱧魚坑六堵七堵八堵等處地皆相接始則派夫修壘不從則侵掠隨之暖暖隘口石梯嶺烏嘴峯一帶逼近基隆九弓山敵營兵屢犯暖

暖練董武舉王廷理周玉謙等捐資募勇三百人與深澳等處各董練丁扼守每處或數十百人憑險堵禦臣恐民練力薄當飭曹志忠派營勇三百人屯紮暖暖助之戰守並發款飭王廷理等增募土勇三百人撥發洋槍參用土槍以備風雨九月二十日後法攻暖暖三日周玉謙等嚴守山隘挫之斃法兵十數人並斃其三畫兵酋一人土勇亦傷亡十數人練勇見山險可恃保守益壯不時宵入敵卡斬首以歸臣亦立即給賞以示鼓勵十月二十五日黎明敵衆百餘人突自九弓山分撲烏嘴峯營卡練丁悉力抗拒勢且不支適各處營勇練丁俱至救應槍傷敵衆十餘人奪獲紅旗一面敵始敗退彰化紳士郎中林朝棟生長將家急公好義聞狀獨備糧餉兩月募勇五百人助剿臣大喜急撥軍械令赴暖暖共圍守禦新竹紳士郎中林汝梅亦籌款兩月募練勇二百人協守新竹其地離海纔八里海口紛歧當台南北關鍵初僅遊擊張得貴台土練

勇五百人不敷防布屢請增兵莫能分撥今南防較緩已檄劉璈酌撥一營前來協守滬尾南岸觀音山一帶僅總兵柳泰和楚勇一營甚爲吃重曾令添募土勇八百名祇可聊爲聲助地勢綿長無險可據其地離府城纔十餘里尤爲可懼法自滬尾敗後憤恨益甚時購奸探察看水雷多寡安置某所聲言兵到必水陸俱攻經孫開華拿獲奸探五人訊明正法冬來水淺敵且多集小輪船以待大兵臣已令就海口添設浮樁八百個以備不虞陸路亦經孫開華章高元督脩暗穴安設地雷惟該處地形窪下營台輒爲船礮所摧八月以來兵皆露處入春水漲更難措置基隆之達滬尾以五堵爲要隘曹志忠所部現紮五堵並添募土勇千人分駐六堵大武崙一帶皆與基隆接壤蘇得勝新募土勇千人駐防水返脚以資策應以兵數言除宜蘭土勇千人外台北通計一萬三千人惟敵聚我分彼此莫能援救且老勇死傷過衆精銳無多土兵器械不精

操練未熟况兵多餉重匱缺則譁潰乘之十月以前將士病危敵勢猖獗餉盡
援絕土寇紛乘臣竭蹶萬分已無生望幸荷天恩屢飭各疆臣多方援濟
十月初直隸督臣李鴻章閩浙督臣楊昌濬各派廈紳葉文瀾兌銀通信復經
兩江督臣曾國荃令道員龔照瑗雇輪載送淮勇五百人並由民船解到黎意
槍一千桿兩廣督臣張之洞雇輪由澎湖接濟餉銀三萬兩暨火藥等項台北
軍勢差得生機惟本月初二日安南降人並法船舌人密報法在安南運兵且
至堅囑嚴防敵踞基隆陸兵多病三次共增一千五百人分守七營依山傍海
倘能趁敵兵未到內地運增勁旅三千人防守方能有濟否則法兵齊到支柱
實難昨已電商張之洞請將臣舊部吳宏洛五營抽調渡台張之洞接濟餉項
軍裝不遺餘力或可允副所求要非大隊兵船護運殊難卽達法人以兵艦縱
橫海外以我之兵輪與之海上爭鋒固非可恃乘間護運勢尙可爲已電請楊

昌濬速趁敵兵未到之先台南巡船尙少迅調勁旅渡台免成後着臣當督各軍相機防剿以待援師惟基隆山勢奇險敵以兵艦護營仰而攻之徒傷精銳顯圖進取勢更艱危謹密選敢死之徒懸以重賞使之夜襲邊營法人器利守堅得手尙難逆料惟盼援兵早渡兵力稍充方免瞻前顧後台北府城爲糧械本根重地前僅土勇二百人臣謹調劉朝祐率所部並江陰新到勇八百人聊資守禦所幸土匪已平地方安定軍民輯睦差堪仰慰宸懷除捐練紳民彙案請獎外謹將練丁獲勝及各軍防守待援各情馳陳聖鑒軍機大臣奉旨覽奏均悉台北紳民捐資助防禦敵獲勝實屬急公好義著劉銘傳查明奏請優獎仍激勵團勇會合官軍迅克基隆同膺懋賞欽此密陳餉絀請令閩督早籌並法人封口劫殺商船片再據曹志忠報稱二十三日夜法兵五百餘人分兩路自深澳坑月眉山潛襲

我軍當經屢得勝探知早爲準備曹志忠督飭各營分頭堵擊並飛告劉朝祐林朝棟率隊往援法兵直撲濠外拔梅椿我軍槍礮迭轟戰至五鼓法兵死傷過多始行潰退自是以來法人日夜迭攻該處風雨連綿急須製造油衣以便戰守現已飭作速製衣三千件趕赴前敵分用惟臺地產衣素少海封既久百物時虧苦難速辦前因軍餉奇絀臣等商之各營月餉暫計四十日一關有餉再行補發以便騰挪值此戰事方殷百貨奇貴軍無足餉困苦尤深且聞湘軍王詩正援臺之勇增給口糧吳鴻源所部均頒足餉現在援兵日集用度益繁前因暖溪孤危飭令林朝棟並粵派總兵徐贊彪各增土勇一營爲助加以淮軍續到數營臺南北月各需餉銀十一萬兩據劉璈稟請截留津廣協銀數萬支發臺南北軍餉不過勉支明年二月深慮竭蹶必賴早籌應請臣飭下督臣楊昌濬趕籌大批餉銀或解或兌均交沈應奎收儲統籌支發以免譁噪之憂

伏求 聖鑒

再正繕摺間據報滬尾法船又添三艘基滬兩口共十三船新竹縣官紳且報稱敵船至新竹諸港日事游巡逢船劫搜見人擊殺內地商船偶至輒爲礮箭毀傷有舟人潛遁入台據稱有軍裝二船並爲敵劫船來何處詢訪無從又據英商言英兵輪攜來書信法人皆令露封此後安能再賈台信似此情形內信略通又將梗塞且敵船日伺海口屢見軍裝登岸故示截搜更須慎之又慎臣已密電南北洋閩省倘資餉械勿用民船免資強敵惟盼兵輪護解援兵早至庶可力解重圍免致孤軍覆沒此後台軍情狀仍當轉電南北洋閩省由總署代陳伏求 聖鑒

覆陳封口後兵危餉缺勸紳捐助各情片

台灣自法船封口文報不通奏牘無從遞送屢將危急情形電乞總署代奏電

文皆託英商且重價僱人出民船潛渡能達與否茫不可知焦灼如焚生還已絕適初五日廈商附民船偷渡來台始奉九月初八十一十二三次電寄 諭旨仰荷 聖慈逾格垂念臺危 溫諭疊頒 諄飭各疆臣悉力救援謀通消息奉 詔涕泣莫知所云 臣處此萬分危迫之中一息尙存終當死守待援仰答 鴻慈於萬一惟廈兌北洋閩省餉銀至今無船未能東渡當派福建候補知縣鄭建中設法於台北華洋各商貼息籌兌期濟艱危台北紳士三品卿銜林維源認捐洋二十萬元屢請寬期分繳 臣已遵 旨力催本年可繳十萬元繳清卽當奏獎林維源早渡廈門其友同知劉壽鏗陰相勸助 臣並傳 旨知照劉壽鏗隨辦來台惟台北商店現銀無多不敷兌用商令函致林維源借資籌濟林維源重洋遠隔信息不通能否遵行尙難遙度 臣始渡台隨員甚少凡在台官紳有可用者無不廣致禮羅彰化紳士郎中林朝棟好義急公新竹紳

士郎中林汝梅任事勇往二紳皆有才識物望所歸當令林朝棟帶練助防臺北林汝梅帶練至新竹協防其餘紳士知府陳霞林等皆令設局辦團以期聯絡官民一氣上下翕然可紓 厯注惟法圍基隆分船四面環臺梭巡遇有民船卽行搜劫昨英國兵船到口所帶廈門文牘已被截回現據基隆探稱新至小輪七隻將攻滬尾口門情勢益岌雇人賈信貌作行商乘船夜渡信縫衣底冀避劫搜奏摺體嚴未能照繕謹稿送督臣乞代繕呈遲速浮沈尤難預決軍中情狀仍由電達南北洋閩省轉電總署代陳惟冀仰仗 天威援兵早至救全台將士生民於垂死解微臣籲 天乞命之危情不勝痛切哀鳴之至 軍機大臣奉 旨覽奏均悉林維源業經降旨優獎自當感激圖報此外台紳並著該撫善爲激勵補助兵力共奏膚功至南北洋閩粵籌濟兵械均已電催速辦矣欽此

台北極危請飭速調勁兵援救摺 十年十一月二十二日台北府發

竊臣於十一月初九日將台北防剿情形恭摺具陳在案十月二十日電寄諭旨南北洋援台兵輪尅日進發法人必圖抵禦不能專顧封口正可乘此機會另僱商輪運載兵械伺隙抵台著曾國荃彭玉麟張之洞速即電商各撥得力數營僱定洋輪於七船赴閩之日相機潛渡此次兵輪前進首在牽制敵船以鬆台圍滬粵兩處及時設法僱船運助實爲救台第一要策該督等務當速辦與左宗棠等互通消息以應事機長沙現有備調八營南洋如能酌撥劉銘傳舊部援台卽速調湘中八營填紮馬祖澳法船二艘倘能設法掃蕩可挫敵燄並著酌量辦理劉銘傳亦應激勵兵勇迅復基隆不得懦怯株守致敵滋擾等因欽此仰見 聖主垂念台危無微不至查台灣自六月十五日基隆開戰以來至今半載僅江陰數次調到淮軍一千三百人雖募土勇五千器械不精

難當大敵滬尾海口尤關臺北安危通計淮楚七營土勇三營基隆一路僅曹志忠所部六營其餘蘇得勝林朝棟等土勇五營分紮暖暖六堵一帶九月十四日三鼓曹志忠率隊欲趨獅頭嶺襲取九芎坑敵營山高路險爲敵所知甫至山下敵卽礮傷四十餘人曹志忠見敵有嚴備收隊退回臣堅令穩紮五堵扼水陸要衝勿輕進以傷精銳用兵之道攻堅最難仰攻尤險基隆山勢險峻道路崎嶇敵營傍海依山兵輪環護明攻尤難曹志忠所部傷病之後精銳不過千餘倘再傷亡淡水以東更難支柱且攻堅必須巨礮今礮槍彈藥存者無多用盡更難禦敵臣屢函諸將三令五申堅止圖功輕進若爲基隆一隅失臺北大局微特獲罪更重且慮挽救無從法兵遠涉重洋利在速戰曠日久彼更難支我軍惟有固守待援相機進取此臣因海島孤懸兵單器乏接濟爲難期保危局不敢孟浪進攻基隆之所由來也左宗棠與督臣楊昌濬先後到閩督

臣於濟餉一事竭力籌維猥因海道不通援兵難渡左宗棠據劉璈之稟奏攻基隆實未知臺北兵單之苦據法船譯人歐姓二十日密報法兵四千來臺爲安南截留十五日孤拔親赴安南調兵十九日有英商二船爲之運糧基隆似有大兵速至現在基滬水陸四千餘人兵輪十六隻小輪七隻等情臣前接該譯人密報法人添兵卽疊次電請督臣速派勁旅三千乘台南現無法船尙可登岸至今未接回信今疊蒙 恩詔飭兩江兩廣督臣撥臣舊部渡台值此軍情萬緊惟有仰懇 天恩迅飭兩江督臣曾國荃將江陰未來一營並廈門淮勇二百速卽運台自台南登岸並請 飭兩廣督臣張之洞迅調吳宏洛所部五營來台倘吳宏洛未能速來卽請 飭令左宗棠楊昌濬迅撥楚軍三千歸孫開華節制以救孤危

軍機大臣奉 旨覽奏已悉法人久踞基隆亟應迅圖進取若云攻堅爲難何

以竟被彼族攻據該撫務當竭力設法聯絡土勇出奇制勝尅期攻復毋得稍存退阻貽誤事機所請飭吳宏洛五營赴台已諭令張之洞籌撥矣欽此

密招敵探仍留敵中通信片

再臣疊奉 密諭飭將被脅越人設法招徠臣即行遵辦本月初一日暖暖土

勇拿獲越探陳番漚一名解至府城臣即溫言撫慰賞給番銀囑令仍還基隆

密招諸探旋來越探十餘人並撫慰之陳番漚密言法船中越兩國翻譯五人暨本地漢奸五十餘人均願投誠自効惟越人作工營內防守甚嚴未能俱逸

臣見諸探既願來歸正可置之敵中以通聲息若令全出翻隔敵情現已密諭諸人密探以報遇機進取內應官軍亦散黨伐謀之一道也

軍機大臣奉 旨知道了所有投誠人等該撫務當妥爲駕馭所稱留敵中以通消息尤當加意慎重毋爲所紿致墮狡謀欽此

再臣前將法營添兵情形於十一月二十二日恭摺奏報在案旋據林朝棟報稱二十四日法兵百餘人在大牛埔一帶察勘地形與營勇接戰互有傷亡旋即退去二十五日清晨九弓坑紗帽嶺各路敵營同時開礮轟擊我營林朝棟度其必來撲犯當飭營官蘇樹森團總王廷理等嚴隊待之分飭各營官團總嚴守諸隘果有法兵千人由獅球嶺鳥嘴峯石梯嶺大水窟四路環攻持戰逾時即經周玉謙等擊退惟紅衣悍敵五百餘人猛撲林朝棟所駐之大牛埔大水窟一路鋒銳異常林朝棟伏槍以待俟其逼營即行轟擊敵屢却輒前槍如雨發基隆山上諸敵壘亦開放炸礮助攻我勇以逸待勞堅持不退曹志忠馳兵援救愈戰愈勵自辰至戌血戰不休勇兵傷亡百餘人陣斃三畫五畫兵各一人始行敗退夜半復來搶尸又經幫帶林朝昌率勇擊斃數人斬殺七級奪獲洋槍衣帽多件我勇亦死傷十餘人二十六日以後敵守不前惟船兵以

大礮遙擊等情臣查十一月中旬法人增兵千餘敵焰方張窺探大水窟一帶山勢稍平銳意必克林朝棟督勇力戰一日夜敵兵死傷狼籍實足以挫其兇鋒林朝棟爲殉難福建提督林文察之子忠盡之裔久孚物望今復自籌資餉帶勇五百人經臣派駐暖暖統率各團土勇甫臨大敵卽能督戰有功實屬忠義勇敢其餘武舉王廷理周玉謙劉廷玉陳維樂等皆捐資募勇數月來苦守血戰竟挫敵鋒亟應奏請恩施以昭激勸兵部候補郎中林朝棟擬請賞加道銜並賞戴花翎候選員外郎蘇樹森擬請賞加四品頂戴餘俟查明奏獎以勵紳民

軍機大臣奉旨林朝棟等均著照所請獎勵餘依議該部知道欽此

法攻暖暖月眉山連日獲勝並現在戰守情形摺

十年十二月廿四日台北府發

竊臣等前將法人添兵並十一月二十五日暖暖接仗各情形於十二月初三

日片陳在案法自十一月底至十二月初旬陸續增兵二千自上月二十五以後日尋爭戰本月初五日以兵百餘探路於暖暖附近之大武崙經團勇擊退曹志忠見其地兵單難守卽撥王三星陳士貴兩營前往助防初十日清晨法兵千餘分攻大水窟圓窗嶺別船載兵四百自八斗上岸抄襲深澳坑後路以備夾攻該處僅有守隘民團寡不敵衆一時俱潰敵遂進至暖暖對河之月眉山林朝棟與桂占彪等分途截擊營官張仁貴率勇二百衝入山下竹林中拒戰竟日勇寡被圍巨雨昏宵竟夕幾殆十一日清晨林朝棟馳往援救對敵方殷適曹志忠所部營官廖得勝葉友勝亦各帶楚勇三百人奮力夾攻敵兵稍退張仁貴始出重圍喘息未安敵又增兵千餘前來接戰以百人奪踞月眉山分犯大水窟圓窗嶺一帶月眉山綿亘數里山勢最高敵據其巔暖暖大水窟各營不攻且潰廖得勝張仁貴等奮力仰攻槍斃山上敵兵十數人血戰一日

始奪踞其巔其分犯大水窟之兵亦經林朝棟擊退圓窗嶺僅有桂占彪楚兵一哨蘇樹森土勇一營兵單險甚敵攻時蘇得勝命營官鄧長安以上勇三百合練兵百餘人助之血戰敵三路蹙之自己至酉大雨淋漓夜戰莫能息曹志忠聞報慮其孤危二十日黎明親赴督戰直至十三日逾午槍斃兵酋敵始敗退里許仍伏月眉山圓窗嶺山下不歸我軍堅守月眉山頂互相槍擊十五日曹志忠見敵不退築壘月眉山待戰敵亦築壘山下槍聲始息自兩軍血戰五日夕大雨不休將士冒雨忍饑日不交睫徧身霑溼凍餒堪憐曹志忠林朝棟皆跣足督戰泥淖中險絕憂勞言之淚下是役也我軍死者九十餘人傷者百餘人敵乃死傷三百餘人并陣斃三畫七畫兵酋各一人十六夜曹志忠林朝棟乘敵壘未成會商攻襲曹志忠親率廖得勝鄧長安等四路往攻已得其首壘基隆敵全隊死爭血戰至黎明始收隊回營各死傷數十人二十日敵兵四

百復犯大武崙營官陳士貴林則榮率隊奮擊敵死傷二十餘人始退查敵自增兵前進冒雨血戰連日夕不休幸賴曹志忠林朝棟督兵血戰力保月眉山得支危局惟敵兵日益基岸已四千開山運礮轟擊我營殊難抵禦臣已令曹志忠趕就大水窟至月眉山一帶十餘里開造深溝巨洞暫避敵礮惟戰久疲勞苦無後繼且自月眉前敵以至暖暖而達六七堵橫亘大武崙周迴三十餘里險隘十餘所皆須嚴密禦防地闊兵單顧此失彼前因暖暖戰急曹志忠蘇得勝所部盡已前驅敵若乘虛則歸途悉絕當飭駐守臺北府劉朝祐所部准勇千人分赴暖暖六堵間協戰楊金龍楚軍兩營自彰化移駐關渡修築礮臺吳鴻源新軍接防彰化並擬令抽撥兩營來臺北助剿此實無可調撥不得不免強騰挪此守兵之近狀也頃接左宗棠等電知南北洋兵艦初三日自滬啓行計當抵閩楊岳斌程文炳已到閩粵當係候輪東渡左宗棠所派王詩正一

軍已抵澎湖李鴻章所派聶士成淮勇八百五十人得報十三日已自卑南登岸臣已飛飭趕程北來惟卑南去臺北一千三百餘里道路難行非一月不到山海迢阻實用憂勞此援兵之近狀也義中營營官張仁貴本宜蘭巨盜曹志忠開其壯勇設法招致選帶精壯一百人屢告奮勇夜襲敵營路滑山高兩攻未獲該營官異常憤懣每戰輒先登此次血戰陣亡實堪憫惜應請 旨將軍功張仁貴照守備陣亡優卹其陣亡哨官副將銜湖南參將秦正福請照副將優卹都司銜守備孔得勝請照都司優卹以慰忠魂所有尤爲出力之將官廖得勝柱占彪等容彙案請獎謹具摺以 聞

軍機大臣奉

十一年二月初七日

旨覽奏已悉著該撫懷遵疊次電寄諭旨

辦理張仁貴等均著照所請分別從優議卹尤爲出力之廖得勝柱占彪等准其彙案請獎該部知道欽此

法攻月眉山大水窟一帶衆寡不敵各營退守河南摺

十一年二月初二臺北府發

竊臣等前於十年十二月二十四日將法人添兵接仗並王詩正等援兵渡臺未至各情馳報在案王詩正所部於正月十五日馳抵臺北聶士成所部及陳鳴志新募土勇亦於十六十七等日到防當即趕湊軍械撥濟餉需王詩正統帶恪靖五營於十八日即赴前敵臣銘傳擬將聶士成陳鳴志兩軍餉械料理就緒帶同續發而前敵飛報十八日法人添兵大至以四艦濟兵自八斗登岸猝襲月眉山曹志忠劉朝祐共派七百人堅守戲臺山堵戰終朝飛書告急蘇得勝土勇兩營防守六堵已派一營分守竹枝藪隘卡僅贖五百人聞信馳援十九日清晨敵兵二千自枕頭山竹篙山龍潭堵三道進逼曹志忠所統楚軍六營既以兩營分紮大武崙又以三百守戲臺山於時僅率一千四百人分守月眉山深澳坑長牆十七里兵單地闊敵逕犯之曹志忠與蘇得勝揮兵抵禦

敵見其兵寡突以千兵自深澳坑抄襲牆背將戲臺軍截斷我軍腹背受敵蘇得勝所部營官梁善明中槍陣亡鄧長安亦被重創曹志忠勇丁死傷益多不能抵禦乃退守一山以待法兵既襲長牆遂攻破月眉山頭卡並以炸礮夾擊深澳坑新築長牆雨久多坍塌營官蕭清福禦敵受傷守下兵勇僅百餘人當時潰退法遂直犯月眉山巔廖得勝之兵勇皆爲曹志忠率去逆戰守壘纔百人適劉朝祐率勇三百人合力拒守血戰經時敵已匝月眉三面劉朝祐廖得勝因勇丁死傷甚多乃退至山下合曹志忠蘇得勝暫壁新煤廠以待援師當是時林朝棟據大水窟蘇樹森據四脚亭尙堅持未敗十九日夜臣銘傳聞前敵敗狀大懼六堵空虛敵自猛頭嶺攔截我軍則暖暖諸軍皆無歸路當夜卽率聶士成所部四百人馳赴六堵策應前軍十八日王詩正至五堵聞報翌日卽派威良兩營疾赴六堵救援因至暖暖必過敵壘白日不便行走二十日夜

王詩正率兵潛進臣令合曹志忠先據暖暖夾河爲營保大水窟後路堅約二十一日夜親至暖暖商度機宜敵兵既集月眉山巔日以巨礮轟擊林朝棟蘇樹森壘勢甚危岌王詩未至暖暖之先二十日逾午威良兩軍乘間攻襲月眉山尾威營營官劉見榮良營營官易玉林皆依山蛇進敵數十人抵死拒之剛營自山後繞至敵退至山腰遂奪月眉山尾一卡王詩正當令威良剛等四營分屯卡後二十一日黎明會合曹志忠進攻月眉山巔敵已集基隆水陸全軍以待王詩正向前猛攻哨官胡少亭羅國旺等屢次奮進敵礮如雨兩弁皆中礮陣亡哨官李經青龍春芳奪回兩屍亦各受重創剛營營官申道發殿軍死戰傷足始退敵既敗我月眉軍三道逼進王詩正曹志忠率各營血戰抵拒敵分兩道一自月眉山襲暖暖之前一自烏嘴峯襲大水窟之後包圍我師兩軍前後受敵乃退河南於是大水窟四脚亭亦三面受敵朝棟劉朝祐抵拒長牆

敵兵救出蘇樹森土勇合同奪圍而出西路烏嘴峯團勇俱潰莫能支是夕王
 詩正曹志忠始退還五堵是役也自卯至申我軍靡不誓死血戰奈敵勢過衆
 槍礮過精無能相敵林朝棟劉朝祐兩軍死傷尤多聞敵亦傷亡四百餘人自
 十九日以來每戰敵輒以悍卒更番牆進前死後繼屍棄不收實爲歷戰以來
 所僅見二十日臣抵六堵見前敵敗退痛憤莫可如何現河北要區悉爲敵踞
 我軍悉退河南王詩正一軍屯五堵曹志忠一軍屯六堵小坑林朝棟兩營屯
 小坑前之草蘭尖山頂暖暖紳董王廷理等屯暖暖街後河臣親督聶士成蘇
 得勝劉朝祐屯駐六堵間以扼臺北孔道惟各軍敗後兵銳已傷刻難遽振更
 慮敵兵乘勢分窺滬尾謀襲府城臣開華已督飭滬防各軍築塹掘濠扼滬河
 嚴備以待此十八日至二十一日暖暖戰退及退軍布置之情狀也頃據生擒
 法兵色博供稱十七日孤拔帶兵千人返基隆一意攻犯臺北三十日敵兵數

百自暖暖造橋以濟白揚琛土勇開槍擊退臣銘傳防守中路令曹志忠林朝棟防守南路王詩正防守北路均於陰雨之中趕築營壘今中南兩營皆已紮定惟北路王詩正一軍初到形勢未詳尙須察看始克定營臣懼敵自獅頭嶺直犯河北據山設礮則六堵各營勢且危急現已令蘇樹森以土勇往守趙水坑桂占彪張仁照帶勇三百人屯紮港孜該處逼近獅頭嶺下猶恐兵力過單復令蘇得勝以一營移守河北陳鳴志親將土勇千人與蘇得勝營相輔防守火炭坑馬陵坑一帶營壘尙未築成曹志忠所部六營自上年六月至今傷亡過衆屢修營壘疲苦異常軍額多缺現令裁併二營以節餉需統計六堵一帶兵數雖有萬人槍械未精不能當敵臣銘傳稍知敵勢嚴防浪戰懼損軍鋒故相持半載法兵未多幸無挫失今敵兵驟至我軍衆寡既殊槍矛尤鈍以此致敗情勢昭然目前固守堅持或可勉支危局惟餉項奇絀槍彈無多王詩正陳

鳴志所部渡臺先由臺南借銀二萬兩復由臺北支銀二萬六千兩月需軍米二千石吳鴻源所部四營原議廣東濟餉敵封海口兌解阻艱仍由臺發現在餉需臺南業已告罄臺北僅支一月實無可籌臣銘傳現駐前軍徒深焦灼合計全臺月餉需銀三十萬一旦告竭潰裂堪危仰懇天恩如何設法救濟立賜施行無任急迫待命之至再此次月眉山大水窟一帶未經退守之先曹志忠兵單不敷分布屢乞增兵臣銘傳無兵以應此次退守實以兵單地闊堵陳殊難非戰守不力之故其營官總兵銜副將龍惠南葉友勝二員不能力戰業已撤去營官應請革職留營效力以示懲戒所有力戰陣亡之記名提督梁善明升用提督總兵胡少亭二員均請敕部照提督陣亡例從優議卹參將銜遊擊陳玉堂花翎遊擊陳得升二員均請照參將陣亡例從優議卹花翎都司王先仁請照遊擊陣亡例從優議卹花翎都司銜守備羅國旺藍翎守備鄒


繼圓均請照都司陣亡例從優議卹守備銜千總吳子元請照守備陣亡例從優議卹六品軍功高春和李國斌二弁均請照千總陣亡例從優議卹以慰忠魂

軍機大臣奉 旨覽奏均悉現在法已議和停戰著劉銘傳等督飭各軍穩紮嚴守以備不虞所需餉項卽與左宗棠楊昌濬等商濟用副將龍惠南葉友勝均著革職留營效力陣亡之提督梁善明等均著照所請分別從優議卹該部知道欽此

卷三勘誤表

廿三	廿二	十九	十二	十二	十	十	八	二	二	頁數
八	四	九	十七	十二	十五	十	二十	六	二	行數
三	八九	廿七下	十七	二十	廿七	九下	九下	三四	廿五六	字數
柱	二十		協	領	署			十四	費經	誤
桂	十二		卓	翎	署			四十	經費	正
		持				尾	兵			脫
										衍
				廿六	廿四	廿四	廿四	廿四	廿四	頁數
				七	廿二	十四	十四	九	四	行數
				一	廿一下	九下	二下	十二	廿三	字數
				陳				猛	木	誤
				德				獅	卡	正
					林	正	營			脫
										衍

劉壯肅公奏議卷三勘誤表



劉壯肅公奏議 撫番畧

卷四

法定治臺摺

劉撫滋事生番現經歸化摺 光緒十一年十月二十九日台北府發

竊據彰化新竹交界罩蘭莊地方生員詹景星等聯名數十莊稟稱莊地逼近番巢出入居民時遭慘殺歷年既久指數無從以近事計之自上年八月至今年九月一歲間被割去男女頭顱二十八級槍斃四人不堪擾虐懇請派營堵剿並據道員林朝棟詳同前情又據淡水縣屈尺莊董事劉夙夜等稟稱淡屬拳山堡大溪一帶迫近內山生番出沒無常前有墾民自備資斧募勇守隘近因經費不給隘勇遣散番遂不時出山耕作居民橫遭殺戮計本年正月至今被殺男婦十二人本月十九日復殺二人居民相率移避田園盡荒懇請派兵剿撫以衛民生等情前來 臣查屈尺莊在淡水東南離城只三十里該處生番

八社男婦不過八百餘人總目馬來號稱驚桀曾經前撫臣岑毓英招撫未成
此次臣派令劉朝祐於本月十七日帶領親兵百人會同近莊紳士候選縣丞
李秉鈞訓導劉廷玉先往屈尺察看地勢番情隨飭譯人入山勸諭馬來就撫
否則定於二十日派兵攻剿馬來聞臣効治副將潘高陞謂其不袒官民以虐
番也則大喜十九日親至屈尺莊求撫所有八社番丁皆願雉髮歸化臣復令
淡水縣知縣李嘉棠馳赴屈莊會同劉朝祐妥爲收撫議定規章十條每社頭
目派爲社丁月給勇糧其總目馬來月給口糧銀六兩按月親至淡水縣署領
取藉通聲氣八社頭目各選子弟一人至城讀書生番地界各歸各業不許軍
民侵佔現已陸續來營雉髮矣將來八社歸化之後其附近南路生番再能招
撫遂可逕達宜蘭不虞橫隔帷內山番地自三月至九月烟瘴過重不利用兵
卽臺地土人亦不敢久住臣現飭劉朝祐督帶張李成土勇一營趁此隆冬造

橋開路先通馬來八社徐圖入山相機辦理但求成效不計近功此淡水東南生番歸化之情形也查罩蘭莊爲新彰交界僻地距後壠海口三十餘里東南一帶全係生番新設埔裏社繞在生番之後中隔百餘里該地番社較多人亦悍甚時出殺人滋事臣因道員林朝棟家居隣近熟悉番情當同面商剿撫之策該道性情豪俠不避艱苦力任其難議將所部土勇千人撥留一半駐防新竹後壠兩處海口該道自帶一營駐紮罩蘭莊并派新竹紳士道員林汝梅會同前往相機勦撫如有戰事卽令駐防彰化總兵柳泰和楚勇三營出隊助勦先令譯人入社勸導如肯就撫卽無須用兵別檄副將周鳴聲帶練兵一營屯紮埔裏社周鳴聲率兵到防林朝棟甫經撥隊據周鳴聲十月初三日稟報該營自到埔裏社後見生番出山殺人因令譯人前往勸諭旋據沙里興等七社頭目開具男女清冊九百八十餘人至營乞撫請薙髮爲民等情請示前來臣

查生番爲虐不難招撫要在招撫之後聲氣不相隔絕地方官撫馭得宜教之耕耘使饒衣食方可無虞反覆不致虛擲餉需已令周鳴聲會同埔裏社通判加意撫綏壹是章程卽照馬來八社辦理查臺灣向有撫番經費由臺灣道在屯租項下撥給如將來番撫日多用費日鉅臣擬將屯兵一項酌量裁減以濟實用卽可無須另籌經費除俟林朝棟所部勦撫如何再行續奏外謹將生番滋事經派兵勦撫現已歸化各緣由繕摺具陳

勦撫生番歸化請獎官紳摺 十二年四月十八日台北府發

竊臣於光緒十一年十月二十九日會同署提臣孫開華奏陳生番滋事派營勦撫並歸化情形一摺奉 旨覽奏撫番情形已悉著督飭官紳次第妥爲開導遇事持平辦理以期日久相安餘依議行欽此等因仰見 聖恩浩蕩訓示周詳莫名欽佩方馬來八社之就撫也臣卽飭劉朝祐開山關石碇路百餘里

白馬來通至宜蘭上年十二月已一律竣工馬來就撫之後極奉約束惟淡水東南大科嶽三角湧新竹境之鹽菜甕一帶生番仍出殺居民疊經該處紳民請兵防勦臣查鹽菜甕大科嶽離城六七十里三角湧離城三十五里鉅城皆邇烏可任番殺掠以苦吾民自應勦撫以安民命惟大科嶽一帶久號悍強屢次招撫皆不聽命該處紳士武舉黃希文與福建典史陸陳謙稟請願自備糧餉各率土勇數十人前爲鄉導臣於本年正月十三日派令劉朝祐率所部四營復令駐防滬尾張廣居一營各出八成隊伍開赴大科嶽相機勦撫旋據劉朝祐稟稱十五日率隊進紮頭寮卽有大科嶽東北十三社番日馬來猶力等來營乞撫當令燠髮給予衣袴惟東南竹頭角貓裏翁等社獨集衆番共謀抵禦十三日劉朝祐進兵南雅生番百餘人方守隘口因今提督唐仁元等迎敵並令營官尤福聚張廣居分左右夾擊番卽大奔劉朝祐當飭諸營駐紮南雅

與番社隔河而軍適值連日大雨河水陡漲各營莫前乃用礮遙擊竹頭角以震懾之五社大懼諸番日泅水乞降而貓裏翁八社抗拒如故屢經陸陳謙黃希文各選譯人反覆開導不肯就撫劉朝祐擬俟開霽渡河忽染瘴氣吐瀉交作病甚沉重臣聞報急於二月初三日親至大科坎督剿適署臺灣鎮章高元來見初四日臣乃督同唐仁元尤福聚趙宗連等三營過河由東路入令章高元督同張廣居黃宗河兩營由西路入陸陳謙黃希文各率土勇二十人前驅道是夜二鼓番日流明姑篤率番百餘人前來劫營當經唐仁元率隊擊敗初五日兩軍除道並集貓裏翁社踞山開礮各社懼而奔逃臣復令竹頭角番日勸令來降可無禍患初六日貓裏翁各社頭目乃至營乞降流明姑篤素性兇悍殺人獨多懼不敢出乃邀集馬武督諸社自鹽菜甕乞降初臣到大科坎時已別章新竹縣知縣方祖蔭會同遊擊袁紹從都司張李成各率所部一營馳

赴鹽菜壘乘勢招撫及是貓裏翁番社勢蹙乞降所有三角湧鹽菜壘南連大湖六十餘社咸悚懼輸誠一律就撫諸番既定乃於初九日馳還府城以黃宗河土勇一營駐防南雅別令唐仁元代統劉朝祐一軍修造石營以圖久駐內山煙瘴夏令尤甚臣慮將士久淹生病特檄唐仁元歸防休息忽接三角湧並屈尸各局紳先後稟報三角湧附近之紫微坑於本月中旬不知何處生番殺害六人屈尺馬來境內亦殺害兩人查據降番馬來瓦丹帶麼等稱紫微坑所殺六人係竹家山生番屈尺所殺兩人係加九岸生番並能指出名字懇兵剿撫且願爲鄉導免其再來伺殺等語臣當飭唐仁元自三角湧進兵該處山路絕險約五十餘里至竹家山又五十餘里加九岸地近宜蘭距台北府城一百五十餘里萬山壁立番社獨多鳥道蠶叢茫無人徑唐仁元督驅兵勇踰越險阻並令紳士陳玖英率領民夫幫同開導十餘日始抵竹家山番目舌

擺鶴等率同八社男女千餘人及白鴨尾社總番日馬來瓦絲蕊石撫老社番
目有千撫礪等率衆乞降乃開道抵加九岸番日馬來詩徽等聞大兵深入亦
率九社番日么詣挪咱等懇隨降番馬來帶同乞撫二番既順臣始飭唐仁元
整隊歸防此北路冬夏以來開山剿撫之情形也中路林朝棟駐兵罩蘭據報
十月十七日附近之榮社兇番出哨銃殺民夫劉阿古等數人並率番衆數百
人截斷水源修築銃櫃以圖抗拒林朝棟於十一月初二日飭令哨官蘇益元
莊啓川等潛入東勢角繞出武榮社之後自督本營直逼武榮社開礮轟擊蘇
益元等繞至東勢角上新莊武榮社暨老屋峨社諸番日均懾懼乞降內有強
悍之司馬限馬那邦等十餘社亦先後就撫尙有帶日未蘆翁等二十餘社處
萬山之中路絕艱險自度大軍難入屨負抵禦臣見林朝棟兵力過單當檄駐
防彰化柳泰和一軍出隊助剿柳泰和到後卽會同林朝棟飭降番眉熟麻風

馳往勸諭番目油格自恃盤踞於危崖邃谷之間不肯就撫並阻扼蘇魯馬那邦二社來降惟該社小頭目蘇筆祿率番丁三十餘人來營乞撫林朝棟復諭蘇筆祿開導油格十一月三十日蘇筆祿率番目善阿月到營稟報油格畏軍威逃遁巢穴已墟其餘鄰社俱願就撫亦即先後來營薙髮所有罩蘭一帶番社全行就撫十二月初六日林朝棟又據新竹之大湖地方莊民金協和等稟稱該莊與番毗鄰疊遭酷虐十一月初九日兇番四十餘人突燬枋藁莊民宅鎗傷三人越一日復燬三义莊宅又五日夜半火劫八雁莊又三日攻劫枋藁急求官軍防剿等情林朝棟當同柳泰和自罩蘭關道四十里以達大湖西通後壠廿六日林朝棟等稟稱師行至大坪方開道築營大湖近地卽有蘇武落社番到營就撫已令營官林機會率勇二百合蘇武番目招撫大湖十三日下樓八卦力大木淮諸社番復來營乞撫二月初三日林朝棟柳泰和復申報兩

軍已紮大湖築營於田寮當有北港下樓仔等七社番相率歸順內有大南勢小南勢及武城菓諸番強鷲不肯受撫當飭老屋峨社副日眉熟往諭未幾武城菓打撈淮席兩社番均詣營雞髮遂命打撈淮席爲鄉導招撫餘社初六日打撈淮席率出流明卑乃薄伏諸社來營雞髮大湖之大南勢番衆悉歸惟小南勢雪博學油叭蓋諸社未下林朝棟柳泰和乃率所部伐木開道七寮山置礮山巔遙擊其社是夜風雨昏黑雪博學屢率番衆前來劫營殺斃開路民夫五人經林朝棟柳泰和率隊擊敗雪博學棄巢以遁十六日副日瓦丹率男婦乞降大湖一帶番社畢下林朝棟復令營弁合降番遠探至玉山無一番社遂派都司鄭有勤率勇自大湖北入獅潭南浦一帶招撫諸社與鹽菜甕相接所有彰新兩縣前山番社一律歸化此中路冬夏以來開山剿撫之情形也南路自土匪橫行嘉義道路不通臣飭署臺灣鎮章高元專壁嘉防任剿土匪由該

鎮撥派副將周鳴聲率練兵一營屯紮埔裏社招撫諸番社疊據周鳴聲及埔裏社通判林桂芬先後稟報自冬至夏該處東至後山花蓮港西抵罩蘭諸番社經遣派舌人逐社開導就撫者凡六十餘社未煩一兵又據駐紮後山統領副將張兆連稟稱該軍分防恒春埤南花蓮港一帶地亘數百里自奉檄撫番開導諸酋先後就撫一百七十二社均經薙髮歸順其在深山未降番社尙多稟請派兵嘉義開道直達埤南兩面夾撫且稱此路開通達埤南纔五六日程可免自恆春盤繞數百里臣考地圖見其所議極是遂於二月二十八日檄飭駐防安平記名提督楊金龍署臺灣鎮章高元兩軍各出七成隊伍於三月初旬自嘉義進兵先期經嘉義知縣羅建祥令墾戶葉陽春馳赴前山大南勢諸番勸諭歸化羅建祥又親往招撫所有上下八社社長阿巴里等一千七百餘人咸薙髮歸化章高元楊金龍於三月十八日由後大埔開道設橋梁招撫未

降番社并用降番二十人作爲鄉導惟師行過雁裏溪八潼關等處實屬險阻入夏之後溪漲輒經旬不落八潼既過兩軍方可與張兆連所部聯絡臣已諭飭該統領等步步穩慎妥商辦理不求近功此南路冬夏以來開山剿撫之情形也臣查臺灣生番橫互南北七百餘里盡佔腹心之地犬牙錯處無一不與民地爲隣歲殺居民至千餘人之多匪盜藉番地以爲巢聚搶劫土豪藉防番以歛費養勇抗官官令不行民糧紛擾絕海瘴厲之鄉官如傳舍相率苟安生番殺人視如未覩臣忝膺斯土謬領重兵紳民訴番兇虐民生不聊安忍漠焉忽置綜覽全臺形勢如人之一身生番橫互胸腹四肢血脈不通呼吸不靈百病叢作當此強隣迭伺一島孤懸內患不除何由禦外故前船政大臣沈葆楨創議開山撫番識量宏遠駐臺未久遽任兩江臣渡臺以來卽奏請以辦防清賦撫番爲急務辦防清賦尙易舉行惟剿撫諸番官紳輒多疑憚或謂番情

反覆叛服無常或謂山險難通告歲無日且歷年開山撫番虛糜鉅款久無實效覆轍何爲臣與前貴州藩司沈應奎道員林朝棟力排衆論一意經營所恃不增一兵不增一餉縱無成效抑復何傷今幸仰賴天威牛歲之間招撫四百餘社薙頭歸化逾七萬人前山舊墾田地二萬畝畏番棄置灌莽塞途現已重新墾熟既可開疆設縣爲國家久大之謀又可建營分屯杜民番仇殺之禍所裨於臺灣全局實大且深所賸後山生番居處零落約計不過十萬人現在夏氣炎蒸內山瘴氣過重將士多病未便興師臣已檄飭於四月底俱回防營休息秋冬之際再行分路入山查光緒元年沈葆楨派兵剿服獅頭等社日見將士勞苦地入窮荒請將員弁官紳給獎前督臣何璟派令署提臣孫開華臺灣鎮吳光亮攻剿後山各番將士亦請優獎俱蒙恩准施行臣於檄調諸將開山之際卽三令五申不准誑殺焚擄捏報戰功實有戰功或異常勞績方

准請獎惟林朝棟劉朝祐兩軍自冬至夏披荆斬棘鑿石開山顛踣於懸崖煙瘴之中屢戰於風雨昏茫之際艱危萬狀勞苦功高提督劉朝祐因病假歸無庸給獎選用道世襲騎都尉林朝棟頭品頂戴升用提督陝甘遇缺簡放總兵柳泰和始終勤奮艱苦異常均請 賞給勇號林朝棟並請 賞加三品銜記名簡放總兵彪勇巴圖魯唐仁元擬請以提督 交軍機處記名遇總兵缺出先行請 旨簡放記名提督輯勇巴圖魯尤聚福擬請 賞給一品封典兩江補用叅將張廣居擬請免補叅將以副將仍留原省儘先補用福建候補典史陸陳謙擬請以縣丞仍留福建補用武舉黃希文擬請以守備補用六品軍功陳玖英擬請 賞給五品藍翎其餘出力將士擬俟全番一律歸化再行擇尤請 獎

光緒十二年五月初八日奉 上諭劉銘傳奏各路生番歸化請將開山剿撫

尤爲出力官紳懇恩給獎一摺上年冬間臺灣生番滋事經劉銘傳督飭官軍分路剿辦並派員赴各社反覆開導該番等懾於兵威率衆就撫現已招撫四百餘社歸化七萬餘人辦理尙爲妥速劉銘傳調度有方深堪嘉尙劉朝祐章高元隨同辦理剿撫事宜頗資得力該二員均著交部徒優議敘其餘出力員弁官紳不無微勞足錄自應量予獎勵道員林朝棟著賞給勁勇巴圖魯名號並加三品銜總兵柳泰和著賞給健勇巴圖魯名號唐仁元著以提督交軍機處記名並遇有總兵缺出先行請旨簡放提督尤福聚著賞給一品封典參將張廣居著免補參將以副將仍留原省儘先補用典史陸陳謙著以縣丞仍留福建補用武舉黃希文著以守備補用軍功陳玖英著賞給五品藍翎另片奏前藩司沈應奎贊助撫番籌畫經費異賞出力請逾格恩施等語沈應奎著賞還原銜花翎餘著照所議辦理該部知道欽此

督兵剿中路叛番並就近巡閱地方摺 十二年九月初二日台北府發

竊臣到臺以來業經兩至澎湖一赴臺南惟中路彰化一帶地方未暇巡閱本擬俟秋後大甲溪水平再行前往七月初十日據道員林朝棟稟稱六月二十二日彰屬罩蘭莊墾丁在途突被蘇社兇番殺死四人燬園藪二座請兵剿辦臣當批飭林朝棟往諭該社交兇懲辦如敢抗違卽會同柳泰和各督所部相機勦辦去後旋據林朝棟柳泰和會稟該社不惟抗不交兇且勾結馬那邦等六社同背官軍繳還歸化旗以示決絕並聚衆馬那邦山戕殺採煎樟腦居民八月十一日林朝棟柳泰和率軍抵罩蘭之大隙山踰二嶺卽爲馬那邦社蘇魯等社在其東南剿辦蘇魯必先由馬那邦社經過林朝棟白山上逼攻柳泰和自山下以進馬那悍甚力拒官軍林朝棟等督兵擊退抵其巢穴燒燬番屋二十餘間十三日林朝棟等分三路環勦馬那邦社其酋分途迎敵衆至千餘

伏林箐扼其隘要林朝棟等分兵前後夾擊傷斃兇番十數人餘衆始遁是日棟字營勇陣亡者六人并槍傷哨長林榮枝同日又據東勢角稟報分駐埋鶴坪之棟字營後哨於十二日被兇番二百餘人攻圍甚岌自辰至午槍斃番衆十餘人始行退去哨勇死者三人十五日林朝棟柳泰和飭諸勇伐木造橋進攻蘇魯社該番埋伏深林開槍拒敵春字營勇陣亡二人棟字營勇死傷十餘人經併力奮擊蘇魯山外番社悉被攻燬各番乃退聚山中當接戰時後路大隙山運糧勇夫十餘人復被截殺柳泰和督兵回擊始行退走是日移駐大隙山以顧後路糧道二十日林朝棟亦移紮大坪以規蘇魯內社同日探知生番潛襲後路伏兵待之及午番衆果出劫運夫春字副營管帶李惟義率部前驅與林朝棟前後夾擊槍斃生番二十餘人敗走而去林朝棟柳泰和會稟兩軍分防山海各要隘地段長遠調攻番境軍不及千兵力過單不敷剿辦請增調

營勇以竟全功 臣查蘇魯馬那邦各社生番素稱凶悍與罩蘭民庶仇殺頻年
經林朝棟招撫歸誠仍相仇殺犬羊反覆良不足言乃於大兵進山查辦之初
輒敢勾結各社番公然抗拒殺傷官兵頑梗不靈殊難理喻若徒懷以柔德烏
足以儆其凶頑且中南北三路降番數萬歸化不久未盡誠輸蘇魯叛番不加
嚴剿風聲所播繼叛必多番事何由大定此次嚴示兵威妥籌勦撫不獨已降
之番不敢生心再叛未降之衆亦易就我範圍 臣於本月初三日自臺北啓行
檄飭駐防澎湖提督吳宏洛四營駐防滬尾提督朱煥明三營暫停礮臺工作
各帶六成隊伍乘輪至鹿港後壠兩處登岸馳赴罩蘭聽候調遣一俟剿撫事
竣 臣卽由彰化新竹沿山一帶查閱地勢審定將來建省分治之區仰副 國
家經畫巖疆之至意

軍機大臣奉 旨覽奏已悉該番反覆無常聚衆抵抗自宜示以兵威卽著該

撫督飭各統領相機進兵妥爲剿撫務令各番知懼知感傾忱向化欽此

督兵剿撫中北兩路生番請獎官紳摺 十二年十一月十一日台北府發

竊臣於九月初二日曾將中路生番滋事督兵往剿各情具奏在案十月十九日遞回原摺恭奉 諭旨覽奏已悉該番反覆無常聚衆坑抵自宜示以兵威

卽著該撫督飭各統領相機進兵妥爲剿撫務令各番知懼知感傾忱向化欽此仰見 廟謨宏遠指示周詳於德威並用之中寓剿撫兼施之意跪誦之下

欽佩莫名 臣於九月初十日行抵彰化之罩蘭提督吳宏洛澎湖四營提督朱換明滬尾三營各帶六成隊伍乘輪登岸林朝棟所帶土勇駐大隙山巔逼近番社後路隔絕糧道不通勢甚危迫 臣於十三日先帶親兵百人至大坪一帶察勘地勢查由罩蘭至蘇魯諸社三十餘里高山峻嶺柳泰和所開之路紮營於深林茂草之中地勢低窪兇番日事抄劫先後被殺勇夫七八十人平日營

伍廢池督隊不力當予撤退另派記名提督李定明接統其軍改由甕子肚開路至大隙山頂十七日朱煥明會同林朝棟添僱民夫開通山道臣於十五日移紮大坪十六日令吳宏洛率部進紮白布棚山頂由房裡溪邊前進十七日臣由大坪進紮大隙山攀藤附葛踰嶺數重牛係徒壁懸崖林深箐密伏番暗鎗狙擊均經各營擊退是日林朝棟朱煥明亦各率所部進紮溪底直逼蘇魯馬那邦兩社之中臣到大隙山後見山勢險峻糧運奇艱兇番日劫後路急須開通房裏溪徑道以便運糧當夜飛飭吳宏洛由白布棚繞溪而進並飭兼理彰化縣蔡嘉穀挑選屯丁民夫開路搭橋復飭化番老屋峨社番目白眉峯爲鄉導調李定明新統春字三營隨臣下山十八日由大隙山移紮溪邊吳宏洛親帶小隊自溪底渡河鳧水而進蘇魯番見官軍逼近隔溪開槍擊傷兵勇數人林朝棟李定明當卽出隊鳧水過溪攻擊蘇魯番該社番狡甚緊扼山口修

築石卡徧布竹籤併力死拒林朝棟率勇由左而入李定明自山邊進攻該番鎗法精嚴發必命中兩軍傷亡五十餘人奮勇直前連破雪山坑番卡二座李定明面中三創時已曠黑乃飭收軍十九日臣移紮老屋峨山巔令朱煥明於蘇魯對面山巔築營安砲二十日飭朱煥明林朝棟各派勇百人攜沙袋進紮雪山坑以扼武榮社救援蘇魯之路二十二日令各軍分三路進攻蘇魯社春字副營營官李惟義先率三營攻番石壘吳宏洛一軍由溪東堵擊馬那邦等社援師林朝棟自雪山坑堵擊武榮社援衆蘇魯番恃有石壘死拒不休我軍自山頭迭施炸砲轟擊番卡李惟義率軍鼓勇而上立破蘇魯社石營奪獲刀槍多件燒燬番屋數處各番越嶺而逃馬那邦武榮等社屢致死來援經吳宏洛林朝棟兩軍擊退營勇傷亡四十餘人陣亡哨官一員蘇魯既克番衆無家乃聚屯於出火山其山三面陟絕惟後路可登該處爲司馬限等七社出入要

道諸番壘石死拒必攻破此山絕七社之聲援方克制其死命查武榮司馬限等七社悍番不足七百人餘皆附近各社裹糧暗助臣當飭化番白眉峯召近地大小南勢十餘社番長至營剴切曉諭賜以酒食不准幫助叛番各番長皆指天自誓願奉約束司馬限等社勢益孤單惟死守出火山不敢攻劫後路二十五日吳宏洛軍至卽令會同林朝棟自東凍山繞出火山後襲之黎明時吳宏洛乘霧以進連破凍山巔番卡二處林朝棟下山攻破一碉隨卽滾營前紮二十九日連破碉卡七所齊抵出火山口諸番就山腰壘石爲長墻一道兩面深林茂草處處埋伏吳宏洛林朝棟各率所部仰攻三日死傷弁勇百餘人該番負嵎死拒未能攻破十月初二日臣派李惟義等開路逼山腰分其兵勢復調署臺灣鎮總兵章高元三營自彰化集集街前來助剿初三日吳宏洛林朝棟帕首當先誓以必克猛攻出火山腰長墻用炸礮火箭燒殺林內伏番諸勇

乘勢一鼓而登斃番甚衆餘皆滾崖而逃臣登山觀其山狀類馬鞍約長五里吳宏洛等奪據東巔番復死守西面中隔深澗惟山脊一線可通番築石礮五座復圖死拒吳宏洛白山脊鼓勇馳進林朝棟亦白山邊並進初五日李定明又裏瘡督戰進攻山腰三軍會合於初六日破礮三座造橋涉深澗羣番猶聚山頂死守石營初七日章高元率副將萬國本一營並礮軍先到初八日自西面合攻萬國本等砂礮二座遂將出火山三面合圍初九日章高元所部全到乃令吳宏洛等四面環攻營官鍾玉鏞率隊先登槍傷陣亡自辰至午弁勇受竹籤傷者百餘人該番死守不退鎮海營營官提督萬本華率奮勇六十人蛇伏深林密草中瞰竹籤稀處進逼石墻舞纛大呼各勇皆踰墻競入槍斃兇番百餘人出火山石營立拔初十日蘇魯等七社番長哭求化番白眉峯代爲乞降臣見兵威已立當卽允許十二日七社番長到營誓天歸化不敢再背天

朝誓畢仍泣言居民欺虐情狀官抑不伸發憤報仇竟罹此禍臣念民番皆朝廷赤子既經悔過心實惻然當將覃蘭撫舉委員撤換另派熟悉番情者代之清結民番積欠以息紛爭並令林朝棟劃明地界謹遵聖諭務令各番知懼知感免致再肇兵端仰副朝廷一視同仁之至意臣於十三日振旅返覃蘭令章高元還集集街仍闢後山水尾之道當臣赴中路時有北路未降生番白阿歪等社屢出殺掠八月間連殺防勇二十一人經內閣侍讀學士臣林維源咨報前來臣乃於十五日自覃蘭起行令吳宏洛朱煥明分送傷勇回防所選帶精銳並萬國本一營隨臣於十八日返大崙坎與林維源籌剿白阿歪諸社先期檄調基隆防軍三營令道員方策勛統帶以淡水銘軍三營以提督唐仁元統帶進紮南雅義興一帶唐仁元至義興後積勞病沒適提督劉朝祐病愈來臺卽令仍統其軍相機進討疊據方策勛劉朝祐稟稱白阿歪等社地險

山深十餘里深溪懸崖一縷羊腸攀藤乃上該番堆石山巔聚衆設守一夫當道萬衆趨起林維源密購竹頭角化番爲嚮導又募得加飛社番丁前驅引路逾山數重直抵白阿歪社後自南雅修路五十里以達官軍束馬懸車盡係崇山峻嶺二十日臣始得坦懷銳入當派吳宏洛總統前敵各軍並屯軍土勇由加飛開路臣督帶朱煥明萬國本自竹頭角關道以往仍令劉朝祐由義興開路白阿歪社長馬來詩昧大集十六社生番巖壁加九岸前山吳宏洛鑿石開山二十九日直逼白阿歪山後番衆駭然馬來詩昧懼甚稱病不出令副日攜衆詣吳宏洛乞降吳宏洛因馬來詩昧未到不許其降三十日令朱煥明萬國本兩營並陸陳謙所部土勇三百人進逼白阿歪社臣於三十日亦至白阿歪山馬來詩昧率妻子出降並攜卓家山等十七社同來乞撫臣念馬來詩昧兩月之間以害民勇二十餘人面數其罪擬正典刑該酋長俯首流涕諸酋亦代

爲乞恩乃囚禁軍中令乞化番爲保狀方准邀免旋據義興社長來結保誓不殺人乃赦之所有淡宜交界未降諸番二十餘社一律歸化臣於初三日收隊至大崙嶽初五日回抵臺北此臣督軍剿服中北兩路生番之情形也查生番情勢不難於撫降而難於感化林維源辦事忠實然諾無欺北路撫墾設防皆其承辦以後誠信昭著番情自可翕然南路已由署臺灣道陳鳴志會同副將張兆連陶茂森續行招撫後山鳳山一百七十餘社未化者稀中路則林朝棟令都司鄭有勤續招獅潭五指山生番四十餘社宜蘭之番本年四月臣已令道員方策勳會同蘇得勝剿服溪頭三十餘社同時復令提督王貴揚副將袁紹從剿服新竹境之南河二十餘社此外未降生番知名者僅新竹內山京孩兒數十社貓裏埤塘三十餘社餘則小弱無害治安臣惟督飭諸將不求近功以期漸歸圍範惟此次攻剿中路叛番林朝棟被困旬日堅守不退吳宏洛等

苦攻惡戰履險如夷開路轉運各員歷盡奇艱不辭危難除督隊不力營伍廢弛提督柳泰和另片奏參外提督吳宏洛有謀能戰動合機宜擬請 賞穿黃馬褂三品銜道員林朝棟擬請 賞給二品頂戴提督李定明擬請 賞給頭品頂戴提督朱煥明萬本華均擬請 賞給正一品封典兩江補用副將萬國本擬請以總兵 記名簡放並 賞給勇號候選縣丞洪熙候選縣丞祥集擬請以知縣不論雙單月歸部選用揀選知縣郭名昌擬請仍以知縣歸部選用並同知銜兼理彰化縣知縣福建候補通判蔡嘉穀請候補缺後以同知用已保福建候補巡檢陸陳謙附貢生梁成枏均請以縣丞歸福建候補軍功劉加輝請以千總補用並請 賞給守備銜候選巡檢蔡煥章請 賞戴藍翎所有陣亡營官副將鍾玉鏞總兵銜副將劉煦都司李春山守備劉復盛千總陳賢卿向斌廷把總林相均請交部從優議卹其餘出力將士可否由 臣彙案請

獎以示鼓勵而明賞罰出自 逾格鴻施

按番酋番來詩昧連殺二十一人既降不殺儒者議之然生番未化豈能律以平民武侯七擒孟獲卒赦使歸英雄作用固有非可以常度測者是乃所謂大畧歟 陳澹然記

光緒十二年十二月十二日內閣奉 上諭劉銘傳奏督兵剿服中北兩路生番請將出力員弁獎勵一摺覽奏均悉臺灣中路叛番經劉銘傳於本年九月間督率各軍開路搭橋節節進剿先後將各番社攻破所有蘇魯等七社均已悔罪乞降旋經該撫商同林維源進剿北路叛番示以兵威白阿歪等處生番二十餘社亦均歸化劉銘傳籌辦剿撫深合機宜著交部從優議叙在事員弁奮勉出力亦應量予獎勵提督吳宏洛著賞穿黃馬褂道員林朝棟著賞給二品頂戴提督李定明著賞給頭品頂戴朱煥明等均著賞給正一品封典副

將萬國本著以總兵記名簡放並賞給壯勇巴圖魯名號縣丞洪熙等均著以知縣不論雙單月歸部選用知縣郭名昌著仍以知縣歸部選並加同知銜通判蔡嘉穀著俟補缺後以同知用已保巡檢陸陳謙等均著以縣丞歸福建候補軍功劉加輝著以千總補用並賞給守備銜巡檢蔡煥章著賞戴藍翎陣亡之副將鍾玉鏞劉煦章都司李春山守備劉復盛千總陳賢卿向斌廷把總林相均著交部從優議卹餘著照所議辦理該部知道欽此

各路生番歸化請獎員紳摺

十三年四月初四日

竊臣於光緒十二年夏秋剿撫南北社番先後奏明在案旋據署臺灣道陳鳴志副將張兆連稟稱後山番社未撫尙多跽伏萬山之中北抵蘇澳歧菜南至埤南恆春綿亘數百里若由後山水尾適中之地與前山彰化除道成梁聲氣聯絡先撫後山中路其餘當聞風向化無俟招徠否則招撫雖多聲氣終隔

勞費雖重馴服仍艱當檄署臺灣鎮總兵章高元統帶礮軍練勇民夫自彰化集集街鑿山而東張兆連白水尾鑿山而西兩面刻期並開孔道章高元率勇自拔埔社開至丹社嶺造路一百二十二里張兆連白水尾開至丹社嶺造路六十里均係崇山峻嶺峭壁深谿該鎮等自冬至春鑿崖伐木一律告竣張兆連開山時軍聲震岩谷諸番社已憚威懾服因命營官黃定國先撫水尾南北川丁仔老等二十四社番丁四千餘人悉雉髮歸化就立社長以鈴束之頒發憲書設立條教使奉正朔次由花蓮港至歧萊沿山一帶他良等十二社番丁二千餘人亦悉招撫諸番既定僅有毘連歧萊之大魯閣木瓜諸社番恃衆抗拒張兆連因大魯閣社爲北路最強之番若能懾服則鄰社自易招撫乃親帥三營駐紮山口聲言開礮攻勦該社長廉畫溢等果大懼乞降鄰近大馬鞍大吧壘等五十三社亦均乞降雉髮共得衆一萬五千餘人此後山北路由水尾

至花蓮港諸番歸化之情形也北路既定張兆連復會同埤南同知歐陽駿移軍向埤南平埔一帶內山招撫南路之番以呂家旺爲強族嘗以地大番衆雄視一隅聞諸番雉髮出而阻止各社因而觀望張兆連歐陽駿當令通事前往勸諭一面耀兵山下呂家旺番長下海盈見官軍逼近勢在必剽聚謀數日始合鄰番二十六社雉髮歸命並有八桵南等十三社亦聞風以歸統共番丁一萬三千餘人後山自恆春鳳山兩縣皆層巒疊嶂而番社獨多鳳山之番以三條崙爲大支恆春之番以牡丹灣爲大支張兆連既平呂家旺諸社威振窮荒遂督同鳳山都司藍鳳春營官林維源分道入山中招撫三條崙等十五社牡丹灣等二十二社中心等四十二社復令黃定國畢寶印招撫大蘭打臘打南等十一社該處地極幽邃諸番皆伏居山頂寒苦異常於是自呂家旺至大蘭凡一百二十九社番丁三萬五千餘人皆已雉髮歸順此後山南路埤南恆鳳

諸番歸化之情形也鳳屬前山尙有未撫番社臣上年檄飭副將陶茂森率兵自牛欄棍內口招撫沙摩溪等六社復自豬門招撫柏葉等十八社自萬全招撫糞箕等四社統計二十八社番衆一萬二千餘人均薙髮以歸其連近臺灣嘉義兩縣內山未降者經署臺灣道陳鳴志檄飭鎮標中軍易豫俊招撫大喃等二十四社番丁四千三百餘人又派遊擊劉智坤續撫大武等四社番丁四百餘人章高元由彰化水底蔡通路至埔裏社沿山又招撫北港萬霧等五大社眉毛納吻吻等四十四小社共番丁九千餘人又由拔埔社通路至牡丹社沿路招撫卓大意東等六十一社番丁八千餘人中路嘉彰之交經斗六門縣丞陳世烈於雲林坪設局招撫沿山郡番十六社蠻番丹番樟脚等四十四社番丁五千餘人均先後薙髮歸順新竹前山番諸上年雖歸化而內山石加碌京孩兒等百餘社猶然兇悍降番墾民日見戕殺番民屢乞兵往勦臣乃飭道

員林朝棟帥兵千人往前剿撫林朝棟以正營敵石加碌南路別令營官鄭有勤攻其北路各率化番以爲嚮導開路七十里石碌哇西等二十二社見官兵深入畏威乞降並導京孩兒等二十四社亦薙髮歸順此前山各路續行開山撫番之情形也查臺灣番種繁多處處與民仇殺自上年九月臣督大軍剿撫前山中北兩路數月間後山各路凡二百一十八社番丁五萬餘人咸奉約以歸前山各軍亦續撫二百六十餘社薙髮者三萬八千餘人水尾蓮港東勢角雲林可墾田園數十萬畝此皆朝廷威德遠播遐荒使深山幽谷穴居野處之倫響化歸仁化獠狃而登衽席實非微臣之愚始願所能及此惟招撫愈多經費愈大今捐輸既截費絀異常乃飭各軍仍回防所籌畫設官分治以圖久安財用稍充再行續撫庶幾全臺番屬盡入幃幟仰副聖朝覆幬無疆之盛治查前後山將士自開山撫番以來披荆斬棘奔走於窮谷深崖之地寢饋於

蠻煙瘴雨之鄉寒暑再更艱危萬狀不能不擇尤獎勵以勸方來所有尤爲出力總兵銜補用副將張兆連補用副將協勇巴圖魯陶茂森均擬請以總兵記名簡放守備鄭有勤擬請以都司儘先補用並賞加遊擊銜其餘在事出力員弁可否由臣彙案請獎出自逾格鴻慈

光緒十三年閏四月十六日奉 上諭劉銘傳奏臺灣各路生番歸化并開山招撫情形請將出力將領獎勵一摺臺灣前後山各路生番於上年十月經劉銘傳劄委將領開通道路設法招撫數月之間後山南北兩路生番二百十八社番丁五萬餘人前山各路生番二百六十餘社番丁三萬八千餘人均各次第歸化可墾田園數十萬畝辦理尙爲妥速劉銘傳督率有方深堪嘉尙副將張兆連陶茂森均著以總兵記名簡放守備鄭有勤著以都司儘先補用並賞加遊擊銜其餘在事出力員弁准其彙案請獎毋稍冒濫餘著照所議辦理該

部知道欽此

中北兩路化番滋事派兵剿復摺 十三年十一月初一日

竊臣於光緒十三年閏四月初四日曾將招撫各路生番歸化情形奏明在案本年五六月間臺灣內外山疫癘大作守隘勇丁避疫山外山番被疫尤重其俗殺人禳災疊據統帶北路土勇都司鄭有勤稟報大崙坎鹽菜甕三角湧化番恆出殺人查而詰之皆推爲未化生番久乃訪知尖石社番長流明孩容實率其子戕殺居民楊阿樹等四人當經擒護訊認不諱復查有竹頭角社丁有干老敏兄弟戕殺土勇林籠一人大埧怡磨社戕目瓦丹有老番殺伐木匠三人均經該都司先後拿獲訊明正法七月初三日又據三角湧撫墾委員候補典史謝文藻稟報該處土民王阿房等四人入山伐木被番戕殺旋又戕殺防勇三人飭勇入社索其兇番竟取所殺頭顱高懸社門以示威武勇目吳得祿

與之理論該番復並舌人防勇共計十人一併戕殺勾結整樂插角等七社背撫抗官時暑深瘴結臣未敢遽令師行乃商請太常少卿林維源親至大料坎檄防勇仍紮山內查明殺人番社惟大坵獨多該社去淡水城六十餘里民地環之自恃路險山深抗兇不予八月二十四日暑氣稍退乃令提督李定明以四營隨林維源就近剿辦二十六日林維源令守備陶麟徵先剿近地褒懂社毀其屋廬九月初一日李定明白紫微坑剿大坵西面進壁牛角坑大坵七社番合謀抗戰自午至戌鎗斃兇番多名燒毀番社十餘所傷勇二十餘人番始敗退李定明白西路滾營進紮番衆併力而西林維源復令陶麟徵合副將李桂成自東南踰山二十餘里徑搗大坵番巢初三日陶麟徵李桂成潛至外插角襲攻大坵番由西路還旅抗拒弁勇死傷十餘人番力不敵七社相率遁去李定明令所有番社悉行焚毀初五日大坵七社總番日天月舌率諸目乞降

陶麟徵悉送交林維源議撫旋准林維源與臣函商大坵七社歸化逾年今殺掠無已據番日言彼衆無屬不能相安請徙諸山外另墾農入山彼此交通庶幾可治臣查大坵七社番丁男女不及千人其地週圍數十里土壤肥腴以民墾之二三年後卽可以墾租給七社口糧目前必由官籌資給食經函商數次乃定議收撫分飭各營回防此北路剿平滋事化番之情形也又據中路營務處道員林朝棟稟報五月二十二日初裡冷番社潛殺墾民二人翌日白茆社番復殺墾民一人獲犯送至臺北經臣訊明正法該兩社人衆勢強聞兇犯正法卽聲言背撫八月十一日復殺佃民防勇八人林朝棟請調駐防彰化提督朱煥明所統武毅軍前來助剿林朝棟於八月十五日進攻白茆社奪踞山頂該社同裏冷等兩社兇番五百餘人自黎明血戰至日落不休經我軍槍斃兇番十餘人始行敗退林朝棟滾營前進於二十日夜襲破裏冷社戰竟日火其

房屋多所二十一日朱煥明率隊會合林朝棟壁其隘口諸番死戰抵拒二十三日黎明兇番三百餘人圍攻林朝棟營壁當經林朝棟朱煥明分路接戰斃番二十餘人奪獲槍械多件幫帶營官遊擊張國理奮勇爭先中槍陣亡自八月十五日至九月初一日無日不戰我軍死亡三十餘人番死尤多勢窮力竭乃悔罪乞降九月二十五日林朝棟議明該兩社地界有殺傷案件惟該番日是問埋石誓天乃准收撫拔隊回防此中路剿撫之情形也臣查生番野性難馴殺人爲樂招撫後仍出殺人一經拿辦卽行背叛若不嚴加勦辦烏足以儆兇殘此次中北諸番剿撫尙爲妥速林朝棟李定明朱煥明余應璜等軍擬由臣分別記獎都司銜守備陶麟徵冒險猛進有勇有謀擬請免補都司以遊擊儘先補用並請 賞加勇號遊擊張國理力戰陣亡請 交部從優議卹以勵戎行

光緒十三年十二月初十日奉 硃批陶麟徵著免補都司以遊擊儘先補用
並賞給捷勇巴圖魯名號張國理著照陣亡例從優議卹餘依議該部知道欽
此

埤南叛番圍攻廳治派兵解圍摺 十四年七月十六日台北府發

竊臣於光緒十四年六月二十九日接據統領後山鎮海後軍總兵張兆連署
埤南同知陳燦會稟埤南附近呂家望社素稱強悍役使鄰近百數十里內之
各番社號曰番王前已就降仍出殺劫上年戕殺射馬干社番兩人抗犯不交
今年五月哈水社番負米歸社復被劫殺當經索犯訊明正法六月二十五日
該社忽勾結埤南轄境大莊諸化番七百餘人焚劫大莊民宅除寄居之粵人
外概被殺戮並戕殺分防營彈壓營弁暨委員雷福海等率黨趨埤南焚殺數
十里圍攻廳治並偪攻張兆連軍壘張兆連所部凡三營分防六百里留駐埤

南不及三百人番變猝至疾馳報臺灣鎮道乞援一面躬備戰守叛番衆至四千餘人圍攻埤南鎮焚殺男婦百餘人全臺大震埤南僻在後山由陸路至臺北府城一千三百餘里非兵艦莫能援救其時臺北輪船皆差遣他出勢甚危岌延至十日威定一輪始回卽令提督李定明以三營並礮隊急行開往臺灣鎮總兵萬國本駐臺南差近得報後卽命兩營與總兵陶茂森派隊自陸路疾驅十四日萬國本自將中營鼓輪前往遙見叛番環攻張兆連軍壘卽飭幫帶曾喜照連放炸礮率勇登岸張兆連見援兵已至亦開壁出戰李定明諸營續至內外轟擊番衆大奔重圍始解臣查呂家望夙號番王人衆丁強外降內抗因前山初撫勢未盡馴屢飭張兆連暫爾羈縻與民休息此次殺斃哈水社番社長交兇殊出意料之外一旦勾結大莊化番圍攻廳治戕殺委員蓄叛已非一日事起倉猝張兆連所部不及三百人卒能與同知陳燦苦守十七晝夜

水米俱窮堅忍不搖力支危局萬國本慷慨當鋒率先殺賊李定明一軍續至合擊解圍臣現添派澎湖鎮總兵吳宏洛率帶所部二千四百人會同萬國本李定明張兆連嚴行剿辦以儆兇頑另檄臺灣道派員會同陳燦撫恤難民免致失所除將各軍剿辦詳細情形再行續奏外謹將埤南叛番滋事並籌辦大略情形恭摺具陳

光緒十四年八月初五日奉 硃批覽奏均悉仍著飭令派出各員分別妥爲剿撫以靖地方欽此

攻克後山叛番並北路獲勝請獎官紳摺十四年九月初二日台北府發

竊照埤南呂家望叛番勾結大莊一帶化番圍攻廳治經臣派兵結圍並電請北洋兩兵輪助剿均已奏明在案查呂家望社在埤南之南週圍十餘里與大巴兩社相依左以邦邦社爲犄角室廬鱗櫛竹樹週遮距大莊九十里埤南解

圍後臣飭諸統將查明分別剿撫各番社爭先歸命莫敢抗違獨呂家望恣睢不服逼脅鄰社幫同拒守該社竹圍累匝圍外長濠列塹塞布竹籤石牆高砌丈餘路徑往來徧置荆榛地窟七月二十二日萬國本李定明張兆連三路進攻番黨恃險守拒各軍斫進竹圍兩道死傷四十餘人二十五日移屯近逼萬國本李定明各以三營分列左右張兆連堅守埤南後路保護兩軍糧械並斷大莊援番是夕該番撲李定明軍當經擊敗斬番首一級奪獲槍械多件八月初一日傍晚萬國本施放火箭焚毀番宅數百間合李定明進蹙該社而邦邦社兇番復蜂擁撲救兩軍開槍競擊斃番七人越番礮二座社內槍發如雨我軍傷亡六十餘人大莊諸番迭次來援張兆連令營勇沿溪截擊使不敢前初四日澎湖鎮總兵吳宏洛全軍至埤南與張兆連馳赴前敵察看地勢諸番潛伏竹林開槍狙擊吳宏洛險爲所傷當卽擊退北洋水師總兵丁汝昌率帶致

遠靖遠兩兵輪於七月二十五日抵臺臣卽令分赴臺南北運送軍火既念呂家望地踞後山形勢險絕我軍非襲取後山駐軍山頂用礮攻擊不能取勝乃命丁汝昌攜快礮四尊赴陸軍幫同猛擊該社石壁堅甚竹樹深翳逕道茫如惟西路邦邦社有路可通已經設番築有五礮扼逕嚴守丁汝昌吳宏洛會議先攻邦邦社絕其黨援斬除林竹將各營一律紮定八月十四日丁汝昌施放巨礮各軍分路奪礮急登番衆伏槍竹林發必命中軍士死傷甚衆未能逼進是夕吳宏洛會商各營各就所部挑選奮勇三百人懸以重賞十五日昧爽指定頭卡攻擊丁汝昌取快礮驟轟聲震陵谷各軍鼓勇疾馳甫及礮邊番衆猝出死拒鏖戰逾時我軍雖有死傷毫無退志卒將頭卡攻破斃番數十人乘勢奪礮五座遂克邦邦社番衆二千餘家俱遁入呂家望社以避其鋒邦邦社既克大軍直躡後山萬國本進壁山巔李定明進壁山半吳宏洛進壁山麓將士

蒙霜露宿寒林毫無怨懟要隘既得我軍居高臨下番勢窮蹙莫知所爲十六日李定明命勇士衝鋒萬國本丁汝昌分率槍礮隊自山邊抄襲吳宏洛督後隊接應兩軍血戰槍礮震天我軍攻破西門而入番衆畢奔石壁竹林皆成絕地死者數百人遂拔呂家望社於是大巴兩社爭出乞降此官軍攻克呂家望社之情形也方呂家望未克之時大莊叛番既畏官軍不敢援救則思由礮石閣水尾一帶北攻花蓮港以掣我師臣密飭都司王廷楷李得勝率帶礮隊馳赴花蓮港嚴密防守時奸民陳宗獻聚黨二百餘人搶劫水尾撫墾局潛至花蓮港煽惑諸社經李得勝捕獲正法八月初四日大莊叛番千餘人逕奪鯉魚山勢甚猖獗李得勝選派番勇乘夜迎剿殺斃叛番十餘人始行遁走二十六日番復迫脇礮石閣一帶化番二千餘人自荳蘭薄薄飽干各社直攻花蓮港小營王廷楷發巨礮擊中番隊李得勝乘勢出擊番遂大奔花蓮港總理陳得

義率同化番抄擊其後南勢諸化番亦出追剿以助官軍生擒番目二人斬馘三十一級此大莊叛番兩犯花蓮港官軍獲勝之情形也臣查呂家望番社盤莊後山最稱強大糾合大莊叛番圍攻廳治戕殺官吏官軍剿捕尙敢負隅大踞叛番兩攻北路幸得南勢花蓮港諸番助剿立挫兇鋒呂家望經各軍苦戰十餘日弁勇死傷至三百餘人始行攻克實足以伸國威而儆兇頑所有在事各將弁不無微勞足錄其尤爲出力之記名提督直隸天津鎮總兵丁汝昌記名提督福建澎湖鎮總兵吳宏洛均擬請賞給頭品頂戴福建臺灣鎮總兵萬國本記名總兵張兆連均擬請以提督記名簡放張兆連並請賞加勇號記名提督李定明擬請賞穿黃馬褂管帶致遠兵輪總兵銜副將勤勇巴圖魯鄧世昌擬請以總兵記名簡放並加提督銜管帶靖遠兵輪遊擊捷勇巴圖魯葉祖圭擬請以參將儘先補用並加副將銜補用副將固勇

巴圖魯李萬有擬請以總兵記名簡放副將銜參將協勇巴圖魯龍斌概副將銜參將徐學仁均擬請以副將儘先補用並加總兵銜補用遊擊澎湖都司林文和擬請免補遊擊以參將在任候補並加副將銜遊擊銜都司劉思盛花翎都司藍鳳春都司萬國標李宗瑜李得勝王廷楷均擬請以遊擊儘先補用並加副將銜候選縣丞孫滉擬請免選本班以知縣不論雙單月前先選用外委畢寶印擬請免補千把以守備儘先補用已革副將鄧炳南擬請開復原官其餘將士可否由臣彙案請獎出自逾格鴻施陣亡將弁勇丁容臣查明請卹現飭各軍稍息再勦大莊各社并飭地方官妥辦善後事宜埤南難民已發銀五千兩交張兆連會同地方官確查撫恤差以仰慰宸廑

九月二十六日奉 上諭劉銘傳奏官軍攻克番社迭次獲勝請將出力人員獎勵一摺福建臺灣埤南廳呂家望社叛番勾結大莊等處番匪膽敢抗拒官

軍傷斃弁勇並圍廳治實屬愍不畏法經劉銘傳檄飭將弁分路攻擊復調派輪船運兵協剿當將呂家望番社攻克殲斃兇番數百名並將大莊等處番匪先後擊散斬馘甚多辦理尙爲得手在事出力人員自應量予獎勵總兵丁汝昌吳宏洛均著賞加頭品頂戴萬國本張兆連均著以提督記名簡放張兆連並賞給勝勇巴圖魯名號提督李定明著賞穿黃馬褂副將鄧世昌著以總兵記名簡放並加提督銜遊擊葉祖圭著以參將儘先補用並加副將銜副將李萬有著以總兵記名簡放參將龍斌概等著以副將儘先補用並加總兵銜都司林文和著免補遊擊以參將在任候補並加副將銜劉思盛等均著以遊擊儘先補用並加副將銜縣丞孫渥著免選本班以知縣不論雙單月前先選用外委畢寶印著免補千總把總以守備儘先補用已革副將鄧炳南著開復原官餘出力各員弁並著彙案核實請獎毋許冒濫陣亡將弁勇丁准其查明請

卹仍著該撫督飭各軍將大莊各社分別剿撫以清地方餘著照所議辦理該部知道欽此

全臺生番歸化匪首就擒請獎官紳摺 十五年二月十三日

竊自後山呂家望叛番造亂剿後投誠大莊各番亦成就撫飭拿匪首劉添汪等懲辦各情形經 臣等先後奏報在案茲據統帶鎮海後軍提督張兆連署臺東直隸州知州吳本杰稟稱呂家望就撫後查明該社副社長康車哪起意抗官當飭緝送到營訊明正法惟大莊匪首劉添汪等未獲即派都司黃定國等赴大莊設法誘拿張兆連復率兵親巡其地劉添汪等恐怖出降攜黨二百餘人匿槍刀爲備張兆連知其狡詐首令民番返莊社隨即擒獲劉添汪等四人研訊據供稱去年夏間有鹿港施阿蠻售買火藥勾結徒黨約會該逆在後山起事俟官軍赴剿施阿蠻乘間破前山諸城得有財帛約與平分謀定而呂家

望之亂作遂並攻埤南廳殺害委員供認不諱當卽就地正法全臺番社南路略馴先後就降尙無反覆獨呂家望大莊諸社地險丁強負隅圖抗匪徒劉添汪等乘機勾結遂犯城池今逆首就誅諸番咸服此南路就撫之情形也中路埔裏社廳所轄數十社惟北港萬霧等社素稱強悍歸化後通判吳本杰飭每社選精壯數人入營補勇以期牽制旋因酗酒滋事畏罪逃去肆殺如初吳本杰令墾民設卡遏之一歲之間該番出劫十數次皆經吳本杰督勇擊敗復嚴禁食鹽火藥入山番衆困迫屢次乞撫吳本杰調任台東據北路協副將林福喜現署埔裏社通判李春榮稟報北港萬霧四社長攜帶男女三百餘人到廳乞撫意頗肫誠仍願送番丁隸營勇送子弟讀書自應准予招撫此外林朝棟所撫近埔罩蘭三十餘社久已相安不復滋事此中路就撫之情形也北路自大壩社剿辦後經臣銘傳飭令防軍開山扼隘臣維源招集墾民將荒地一律

墾闢民番亦漸相安惟樹木繞食納諸番仍屢出劫殺經統帶台北隘勇都司鄭有勤督率隘勇化番分道剿辦並牒請宜蘭防軍扼紮林望眼社以爲聲援復飭營官劉朝帶簡選精兵攻入樹木繞社開礮轟擊該番抗拒受傷而遁鄭有勤復進剿食納社並查有已降之竹加山諸番亦隨同出掠復令營官呂賢億林建庸分投攻剿兩社俱質子以降鄭有勤又見衣卯碧霞山哪阿諸社尙未就撫亦乘勢克之時屆暑瘴兵勇病疫乃撤隊回防休息外尙有宜蘭縣轄之內溪頭四社新竹縣轄之大也甘等十餘社屢出殺人臣於上年冬間分飭鄭有勤與總兵陳羅前往剿撫據鄭有勤稟報其地道遠山深糧運艱阻商派撫墾委員陸陳謙駐馬武都社以接濟軍食十一月鄭有勤進屯六蕃社督令林建庸攻剿木樹仁社劉朝帶攻剿內馬裏旺達都懶社諸營冒霧宵征佔紮南社對面山頂縱礮轟擊達都懶爲大也甘等社第一門戶該番死力拒守經

鄭有勤督率諸營四圍環擊始行敗逃我軍遂佔馬來社山頂已見大也甘各社形勢內有也爲細妹一社控扼要隘其番掘溝斷路徧插竹籤紅衫佩鈴鶴立待戰劉朝帶察看地形險絕未可逕攻稟請鄭有勤飛飭林建庸自大也甘後路抄襲並令顧金魁率軍接應十六夜大霧劉朝帶挑選精勇化番掩旗息鼓遴派番目爲導潛出也爲細妹社之旁襲其不備所過皆鳥道羊腸自古不通人跡狂風驟雨士卒蛇行挽臂攀藤魚貫而上天明繞出馬來社直入也爲細妹腹地旗鼓大作奮力猛擊番衆猝未及防紛紛竄走焚毀番屋數十間斃番十餘人奪獲鏢槍百數十具是夕哨官徐耀基亦攻奪大也甘社與劉朝帶會合顧金魁亦攻破京孩兒南兩社鄭有勤飭令諸營各踞所破番社嚴設防守禦止焚殺番衆畏甚遂約同打馬等十三社送子乞降繳土槍百餘桿維時竹角英等兩社觀望未降劉朝帶移師向之數日亦送子求撫所有新竹內山

京孩兒以東二十社悉平鄭有勤稟請收隊臣當檄令就近移師會同統帶鎮海中軍前營總兵陳羅剿撫內溪頭四社據陳羅稟報十二月進逼牛鬪山募外溪化番造橋除道直趨下墨社攻剿內溪諸番棄社逃遁斬首四級營官陳錫常抄襲大馬龍社後截殺十二人營官曾友成追斬拜阿暖社番首六級兩路斃番數十人焚毀番屋三十餘所適值大雪糧匱乃振旅而還行抵外溪頭埤蘭社口伏番數百縱槍鏢斷我師陳錫常中槍陣亡軍士死者十三人遊擊王廷楷聞信急援番始退還守牛鬪山鄭有勤會剿之師自大也甘拔隊分屯樹木繞竹加山營官劉朝帶林建庸由加拿鶴社開路直入內溪扼其隘要獲得外溪傷番十餘人訊稱宜蘭官軍進剿殘殺內外溪八社一空而避非敢劫殺官軍等語十二月二十一日外溪頭四社番日央託化番帶赴鄭有勤營中哭訴陳羅因浮橋冲失疑爲該番折毀陷害官軍殺戮化番六人衆番不服因

槍斃營官兵勇十餘人非敢背叛請招撫內溪四社番以贖其罪並繳所獲槍
礮多件鄒有勤隨將番日送至台北經臣銘傳察明情實急將陳羅撤罷於是
內溪四社番俱送子爲質并毘連後山之拾高搖等十四社亦相率以降此北
路就撫之情形也伏查臺灣生番各分氣類嗜殺則同從前逐隘嚴防地皆荒
棄已開之士轉屬虎狼盜賊之鄉前船政大臣沈葆楨創議開撫十餘年纔得
埤南恒春一廳一縣自嘉義迤北綿延數百里番社多未及降歲殺墾民數百
人爲政教所不及臣銘傳當法事解嚴察勘全臺情勢番山腴地多荒民番日
相仇殺官置不問實非政體所宜且既設行省不能不闢土分治緝匪安良斷
非撫番不可乃於光緒十一年十月奏明開辦數年以來各軍出險入幽不避
瘴癘鋒鏑將士死亡數千人仰賴天威生番一律就撫雖氣質驟難變化惟
當示以威信有犯必懲一面教養番童開其知識臣維源廣招墾戶務使聲氣

相洽情志相通庶可轉移故俗除將新舊歸化番社人數地址詳細繪圖續行呈送軍機處外所有在事人員不無微勞足錄其尤爲出力之北路副將林福喜請以總兵記名簡放花翎遊擊銜留閩儘先補用都司鄭有勤花翎遊擊銜都司劉朝帶均擬請免補參遊以副將儘先補用並請 賞給勇號都司黃定國擬請免補都司以遊擊儘先補用澎湖水師右營千總林勝標藍翎千總林建庸五品藍翎陳玖英均擬請以守備留閩儘先補用並 賞戴花翎同知銜福建試用通判王維叙擬請開復原官原銜並免繳捐復銀兩福建候補縣丞陸陳謙擬請免補本班以知縣仍留原省補用至歷年剿撫諸將並各局撫舉委員均屬不避艱險曾經臣銘傳奏明俟全臺生番一律歸化彙請 恩施可否擇尤彙同剿辦呂家望各番並歷次剿撫各案一併奏請 獎勵以昭激勸出自 逾格鴻施

光緒十五年三月初五日奉 上諭卞寶第劉銘傳林維源奏全臺生番一律歸化逆首就擒請將出力人員獎勵各摺片臺灣各路呂家望等番社負隅梗化經劉銘傳督率官軍剿撫兼施將逆首劉添汪等拿獲懲辦現在全臺生番一律歸化仍著該撫等將撫番開墾事宜妥爲辦理以靖疆圉所有尤爲出力之副將林福喜著以總兵記名簡放都司鄭有勤等均著免補參將遊擊以副將儘先補用鄭有勤並賞給強勇巴圖魯名號劉朝帶並賞給奮勇巴圖魯名號都司黃定國著免補都司以遊擊儘先補用千總林勝標等均著以守備留於福建儘先補用並賞戴花翎己革通判王維敘著開復原官原銜並免繳開復銀兩縣丞陸陳謙著免補本班以知縣仍留原省補用其歷年剿撫各軍出力員弁並各局撫舉委員准其擇尤彙保毋許冒濫另片奏彰化嘉義紳士保衛鄉里緝匪弭患懇請獎敘等語郎中蔡占熬著賞加道銜主事林啓東著賞

加五品銜該二員均賞戴花翎以示鼓勵該部知道欽此

副將開山戰沒摺十五年九月二十四日

竊據統帶宜蘭防勇副將劉朝帶稟稱蘇澳花蓮港一路光緒初年經提督羅大春自海邊築礮漸進大兵既退旋復荒蕪今社番撫定請由山內逐漸開修直達花蓮港以免迂繞臣見其深明地利當卽批飭相機辦理九月初五日據宜蘭軍管帶王廷楷稟報九月初一日劉朝帶督弁勇五百人入山開路距蘇澳五十餘里之光立嶺地方將隊伍紮該嶺東西兩面其地去老狗社尙二十餘里蔓草荒山四無人迹劉朝帶分隊跋山另遣差員黃德昌攜帶化番二十餘人前往探路營官曾友成率勇一百五十人正在嶺西開路不虞黃德昌甫過山嶺忽有伏番無數槍如雨發黃德昌與隨從二十餘人均被戕害該兇番乘勢圍殺曾友成開路勇夫劉朝帶督率弁勇開槍接戰番圍過衆竟與營官

曾友成等弁勇二百數十人一並陣亡王廷楷相離較遠救援不及等情前來
聞悲歎不已自來番性嗜殺每至秋際八九月間名曰做享專事殺人今劉
朝帶所開之地僅老狗社與加九岸番毘連加九岸仇殺居民緝兇未獲諸社
竟敢潛伏路左殺害官弁二百餘人豺狼之性怙惡不悛實屬異常悖虐臣得
報後另委總兵滕國春接統所部嚴飭各營防禦以衛墾民確查出草兇番究
歸何社派車嚴勦以儆兇頑伏查副將劉朝帶忠勇性成敢於任事連歲入山
勦撫奪隘戮渠戰功卓著及統所部駐防宜蘭其地夙多匪類分結黨徒一日
西皮一日福祿不時械鬪擾害閭閻劉朝帶到防後疊獲渠魁兩黨爲之斂跡
閭閻安堵愛戴尤深一旦督軍開山恃勇深入陣亡山僻骸骨無存宜蘭紳民
輒爲流涕可否仰懇 天恩准照總兵陣亡例從優議卹其餘陣亡之副將銜
參將黃德昌都司曾友成李勝鍾孫得勝守備滕國順千總陳嗣錦劉如意曾

民立張雲祥把總任承恩劉學疆王維城許海龍陳新華林漢卿丁元泰張言誠外委黃品芳張德坤王占魁暨勇丁通事等共二百七十三人並懇飭部分別優卹以慰忠魂其救援不及之營官副將銜遊擊王廷楷副將顧金魁雖重山間隔聞報已遲究屬救援不力應請革職留効以勵軍威

光緒十五年十月二十日奉 上諭劉銘傳奏副將進山開路中伏陣亡懇恩優卹一摺據稱九月初間副將劉朝帶因番社撫定進山開路猝遇兇番伏路戕害等語全臺生番前據該撫奏稱一律歸化何以宜蘭各社輒復逞其兇狡設伏戕害當時辦撫未能盡善已可概見此次戕害官弁至二百餘人之多若不大加懲創恐受撫各社聞風效尤後患更不可勝言著劉銘傳督飭現派之員查明叛番確係何社嚴行剿辦以儆兇頑所有已撫未叛各社應如何通路鎮撫之處尤應妥慎籌辦切勿輕率從事是爲至要副將劉朝帶著照總兵陣

亡例從優議卹參將黃德昌都司曾友成李勝鍾孫得勝守備滕國順千總陳嗣錦劉如意曾民立張雲祥把總任承恩劉學疆王維誠許海龍陳新華林漢卿丁元泰張言誠外委黃品芳張德坤王占魁及勇丁通事等共二百七十二名均著分別從優議卹遊擊王廷楷副將顧金魁救應不力著一併革職留營効力該部知道將此由五百里諭令知之欽此

剿辦臺北內山番社獲兇正法移駐宜蘭摺

十六年正月二十五日

竊上年九月宜蘭伏番狙殺統兵官劉朝帶等二百餘人經臣奏報在案當飭確查出草兇番派軍剿辦並飭沿山隘勇嚴密防範旋據大崙坎撫墾總局稟稱加九岸遷出十七社總番日有敏阿歪於九月間突挈妻子返故地陰結卓家山樹木繞諸社連殺隘勇四十餘人內山墾民懼而思徙統帶臺北隘勇營遊擊鄭有勤亦稟稱隘多勇寡不敷防禦請益募土勇千人以資分布各等情

經臣批准暫招千人嚴密防禦俟剿辦後卽行裁撤一面檄調各軍挑選七成隊伍齊集臺北前往剿辦時因久雨未行臣復念軍多而地險非得賢統將不足以蒞其功因澎湖鎮總兵吳宏洛忠勇謀畧動合機宜乃令總統諸軍爲特將於十一月十六日進剿宜蘭據吳宏洛稟報該鎮所部四營與建甯鎮總兵蘇得勝四營提督李定明三營處州鎮總兵竇如田兩營長驅十三日同抵外加輝飭隘勇營官陳玖英進壁內加輝以當前敵加九岸兇番就溪邊設礮抵抗經陳玖英擊退毀礮過溪驟中槍傷陣亡勇丁二人該處山高路險林密草深中隔大溪數道吳宏洛商同蘇得勝李定明等分段芟除草木開道建橋設立礮卡步步緊進十二月十四日大軍至白阿山有敏阿歪率悍番二百餘人拚死抗拒吳宏洛飭將炸礮火箭乘勢雜攻挑選奮勇奪番礮三處卽攻毀白阿歪社卽踞山頂建築礮臺四面環擊十七日攻破校椅欄社諸番目紛至

乞降吳宏洛諭縛送總番長有敏阿歪及兇殺各等番到營後再議收撫諸番
日遲疑不決吳宏洛復與李定明分剽卓家山樹木繞兩社同於二十二日攻
破各番怖甚二十三日始將有敏阿倭帶麼孤欲有千打籠馬來得麼等縛獻
官軍乞降稟由臣批准收撫並將有敏阿歪等訊明正法以昭炯戒當查統帶
隘勇營遊擊鄭有勤臨戰不力卽予撤換以總兵陳羅統其軍就白阿歪山上
添築礮臺逐地設礮以備屯守並咨請幫辦開墾事務臣林維源廣招墾民籌
借官本舉所有曠地盡行開闢庶幾日久番少民多不期自化內山轉輸艱險
各軍於正月初三日陸續撤回臺北府城此剽辦加九岸叛番之情形也臣查
臺北番社大山自宜蘭南趨西面統名加九岸東面統名南澳加九岸既經剽
辦暫可畏威惟南澳絕險未示以兵敢殺統兵大員亟應嚴剿以除殘虐仍飭
吳宏洛總統諸將於正月十八日聯旆以東惟山深路險糧運奇艱地勢番情

尤難洞悉二十六日臣復乘輪親往面授機宜仰副聖廷顧念巖疆至意

勦平南澳番社請分別賞罰摺十六年閏二月初七日台北府城發

竊臣前因臺北社番滋事派兵先將加九岸剿平正兇伏法親督各軍剿辦宜蘭於正月二十五日奏報在案臣拜摺後於二十七日至宜蘭之蘇澳其地至南澳五十里諸社更入南澳山三十餘里山高路險必自蘇澳鑿山開道方可進攻澎湖鎮總兵吳宏洛總統各軍馳抵蘇澳督同宜蘭防軍統帶副將傅德柯進駐東澳臣飭澳紳都司陳輝煌募土勇三百人作為嚮導合同處州鎮總兵竇如田銘字三營自東澳而前另飭提督李定明定字三營建甯鎮總兵蘇得勝健字三營自海乘輪逕抵南澳李定明至南澳後築營闢道以利軍行二月初三日吳宏洛督各軍至南澳會商李定明等分道前驅以竇如田三營防其後吳宏洛督宏健各營自南澳山巔以進李定明傅德柯兩軍自溪底以進

初六日傅德柯至末都納社山口番衆扼險抵拒吳宏洛由山巔抄過社後番當棄卡逃遁傅德柯乘勢襲入末都納社焚其屋廬遂進攻搭壁罕五社番衆恃險死拒初九日吳宏洛督軍至搭壁罕山巔縱礮旁擊番懼乃奔傅德柯督勇毀燬焚其社陣斃十餘人我軍亦死傷勇丁六人奪獲珠衣槍標糧械甚多該五社爲南澳第一巨社於是火番宅二百餘所諸番號泣莫敢擾十二日至老狗外五社番已自火其宅相率逃遁其地兩山峭立絕壑巉巖湖石嵯峨僅通一線傅德柯四顧旁皇徧覓無路十三日鼓勇直進突出兇番二十餘人縱槍猝擊傅德柯與哨官劉秀顏同時陣亡及至前軍回救番已無蹤吳宏洛自武搭山巔徑由高山趨向西北抄過內老狗社後與溪底諸營隔絕二十餘里音問不通山險無路可下吳宏洛見礮能及社乃飭勇丁斬除林莽以備礮攻突有悍番數百蜂擁而前死戰不退營官許恩銘鄭運泰等督勇迎敵自辰至

西鑿戰一日番衆死傷如積始行敗歸我軍亦死傷三十餘人當吳宏洛冒險前進臣絕慮之是日親登武搭山巔察看形勢吳宏洛頭卡已過武搭山二十里武搭而西山勢聳絕天日不開番屋晨星漫無村落詢諸土勇據稱老狗內四社散居山谷無土可耕今末都納十八社男婦數千人盡避官軍走匿深谷進而攻之路險不能驟入而徒傷兵銳惟番多食寡每夜出乞糧大軍若截其隘而絕之可以不戰而下臣飛飭吳宏洛毋奪隘下山猛攻折銳速擇要害伏設地雷將西北各卡撤回武搭山南開路通溪底軍以便運糧取水二十五日吳宏洛稟報地雷已伏十三具是日撤卡陽退各番喜譟追逐觸發地雷轟斃兇番二十餘人寂然而返自此不敢出山吳宏洛於二十八日密令寶如田簡死士三百人仍自武搭山隘誘番出山別令宏健兩營選奮勇三百人伏武搭山下伺番出戰由後截擊寶如田軍入山番不出敵因舉隘內番宅悉行焚毀

番衆大懼號哭乞降吳宏洛使舌人問狀泣稱糧食已盡饑餓且死懼觸地雷不敢出山今實窮蹙求恩收撫乃命於閏二月初一日自至宜蘭撫墾局乞撫及期番目九人跪帳下泣供居廬已被焚毀精壯亦死傷二百餘人乞免縛兇徒情願送子爲質臣當令回社將上年所奪劉朝帶槍械二百餘具一一獻還各送番童入義塾讀書許以收撫旋飭各軍陸續回防傅德柯陣亡後以副將劉仁柏統所部三營並徙沿山隘勇進紮十里嚴密設防招民速墾布署嚴定臣查統帶定字三營記名提督李定明上年加九岸之役已緩滯不前今南澳復令與傅德柯偕進傅德柯冒險前驅彼軍統領營官俱不出隊僅令幫帶官率勇百人佇立以觀傅德柯陣亡前敵槍聲未絕彼軍乃急退若無事然滑詐虛糜非嚴懲不足以肅軍令除撤去統帶另委總兵汪東昇暫行代理外應請 旨將記名提督李定明褫去黃

楫撤銷勇號革職以都司降補該軍右營營官總兵銜副將龍斌概氣滑言浮請卽行革職所有尤爲出力之記名提督澎湖鎮總兵吳宏洛自上年冬總統各軍剿辦加九岸南澳各番開山伐木破敵攻堅遇事身先不避艱險實屬勞苦異常擬懇 天恩從優賞賚已保提督銜浙江處州鎮總兵竄如田請以提督 記名簡放已保參將銜遊擊趙有才已保遊擊鄭運泰均擬請以參將儘先補用並 賞加副將銜已保千總柯壬貴陳德馨均請以守備補用并賞戴花翎其力戰陣亡總帶鎮海中軍等營閩浙補用副將傅德柯請照總兵例從優儀卹已保副將銜參將李晴峯副將銜參將劉秀顏守備熊文標并請一併 交部從優議卹以慰忠魂

卷四勘誤表

八	六	四	四	四	四	三	三	一	一	頁數
四	十九	二十	十二	九	五	廿二	十八	廿一	十七	行數
廿二	十八	廿一	十九	十六 _下	二	三	一上	十二	十二	字數
徒	互	日未	導		尸	章		帷	莊	誤
從	互	目禾	道		尺	檄		惟	尺	正
				至			關			脫
										衍
十四	十四	十二	十二	十一	十	十	九	九	八	頁數
十三	四	二十	六	廿一	十五	八	十五	一	十	行數
五	七	廿七	八	二	二十	一	廿三 四	一上	十六	字數
番	換	以	砂	暑	徒	換	誠輸		賞	誤
馬	換	合	破	署	陡	換	輸誠		常	正
								潛		脫
										衍

劉壯肅公奏議

卷四勘誤表

一

130-2

卅一	卅一	廿四	廿三	廿三	廿二	廿一	十九	十九	十八	十六	頁數
十八	十	十四	四	三	四	九	十一	二	四	廿一	行數
廿三	廿八	十	一	一	十三	廿六	廿五 下	廿一 下	廿四 五	十八 九	字數
響	虛	攜	踞	莊	設	結			山香	番諸	誤
嚮	虐	擒	莊	踞	該	解			番混	諸番	正
							接	召			脫
											衍
										卅三	頁數
										十二	行數
										一 上	字數
											誤
											正
										馬	脫
											衍

劉壯肅公議奏 設防略

卷五

遵籌澎湖防請飭部撥款摺

竊臣承准軍機大臣字寄光緒十一年十月十九日奉旨將福建巡撫改為臺灣巡撫一切改設事宜令該督撫詳籌議奏台南北地輿袤延甚遠以形勢而論台北各海口尤為緊要原議臺灣道一員遠駐南台深慮難以兼顧且巡撫常川駐紮一切錢穀刑名事宜必須分員管理各專責成否則於台灣道之外添設台北道一員著楊昌濬劉銘傳悉心會商妥議具奏澎湖為由聞赴台要隘扼紮勁旅認真操練方足以資緩急該處地方若由台灣巡撫管轄控制自更得宜並著詳細議奏其餘未盡事宜該督撫如有所見務當明晰敷陳以備採擇欽此遵旨寄信前來等因到臣除台北道如何添設另行籌議會奏外當即咨商督臣楊昌濬澎湖防務如何籌辦將才難得能否由閩省布

置旋准楊昌濬咨覆湖澎防務仍歸台灣籌辦等因臣查澎湖一島特立孤懸不獨左右閩台亦南北洋緊要關鍵誠如聖慮必須扼紮勁旅認真操練方足以資緩急其地媽宮港口船塢天然如內泊兵輪外築礮台布置得宜尙堪固守惟地皆沙石修築砲台黃土皆須由別島購裝需費較鉅且練兵購器築臺等事若無健將操法嚴明通曉外洋槍砲守禦仍恐難資查有記名提督吳宏洛素守吳淞海口砲台嗣在廣東歷辦海防十一年六月經臣派往澎湖察勘所論水陸險要明切無遺宏洛隨臣日久曉暢戎機臨敵身先驍勇敢戰講求操練深悉外洋火器精微若令駐守澎湖督軍布署必能措理裕如惟其人弟兄俱沒母老多病年近八旬上年七月假歸合肥原籍省親疊求終養情詞懇切令人惻然臣勉以移孝作忠專弁函招募勇來台相助現在署提臣孫開華奉旨開去幫辦一差仍回提督署任所部楚勇一千八百人二月底卽行

內渡臣令吳宏洛仍招所部將弁選募淮北勇丁一千八百人尅日來台辦理
澎防以固海疆重地惟辦防必先購砲否則雖有堅台勁旅亦屬虛名上年十
月臣曾附奏請撥洋款一百萬兩現准部議洋款僅剩六十萬已撥歸海軍衙
門劉銘傳所請動撥百萬兩一節應無庸議惟現在海防雖撤澎湖防務仍應
竭力經營爲未雨綢繆之計該撫親勘形勢籌畫固甚周詳督撫有兼理糧餉
之責一切布置當量入爲出爲久遠之圖毋使半途匱乏致隳前功台灣富庶
之區非新疆可比從前辦理不得其人入款肆其侵吞出款滋爲冒濫以致入
不敷出竭蹶異常今既改設巡撫則一切政令皆所專持應請飭下該撫臣竭
力整頓務將從前弊政概絕根株總期收款涓滴歸公用款絲毫無濫量入爲
出每年樽節若干另款存儲集有成數再將澎湖及各處砲臺次第興建以期
款足應用事無中止等因查洋款僅存六十萬兩已歸海軍衙門臣處無從請

撥惟台灣一島久爲外人所窺 朝廷視爲重地改設巡撫無非保固巖疆 臣
忝膺斯土恨不能倍日經營誠如部議從前辦理不得其人入款侵吞出款冒
濫往事已不可追今須百廢俱興事事草創如開山招墾建省設官皆目前急
務均非巨款不行 臣前奏請暫緩分畧亦慮經費無着惟辦防以禦外侮撫番
以清內患清賦以裕餉需此三事均爲急不可緩 臣現竭力經營期於必濟查
前兩江督 臣沈葆楨前福建撫 臣丁日昌等先後於台灣撫番開山一事動需
數十萬每剿一社調兵十餘營 臣於撫番重務未增一餉一兵惟與沈應奎陳
鳴志嚴裁冗費收劉璈冒濫之餘清查隘租奪土豪侵漁之利慘澹經營兵不
血刃全台生番已撫十分之三將來愈撫愈多雖經費難資尙可就地籌畫惟
辦防一事尤爲台灣最重最急之需上年法兵退後 臣卽飭各員趕造基滬礮
台並與洋商議購三十一尊後門巨礮始據上海洋行開價八十餘萬兩嗣經

滬尾領事並稅務司電商英砲廠往返磋磨減至六十五萬現經旗昌包辦復減三萬有奇並將砲位運至台灣不支運費花洋不折又可減銀十萬兩急須定議給價方今法事粗安臣何爲汲汲至此誠慮疆場之事瞬息萬端必有備乃可言戰必能戰乃可言和泰西各國慎固邦交不輕言戰而精圖戰備旦夕不遑無不儼臨大敵故能保持歐局邊圉無驚若外患稍定忘戰諱兵猝有難端何以自保此微臣中夜旁皇不能自己者也今部議飭臣量入爲出每年樽節另款存儲俟集有成數再將各砲台次第興築在部臣因餉需支絀不得已請置緩圖查全台每年入款從前只九十餘萬現經臣逐處清釐約增銀洋十餘萬防軍三十五營月餉並輪船製造各費每年需銀百五十餘萬此次督臣楊昌濬到台議由閩省每年協銀二十四萬仍由閩關協濟銀二十萬合計不足百五十萬勉支全台兵餉雜款安能樽節盈餘 朝廷之設海軍購買兵

船原爲慎固海防起見澎湖當南北洋關鍵閩台要樞凡有心時事者無不以該處設防至重且急若不及時辦防一有兵爭倉皇束手前車覆轍能不寒心即使經費有資該處台工浩大非兩年不能完工若俟樽節存儲舉辦更將何日事關軍國大計臣若畏難苟安就此徘徊諉宕將海疆第一要隘棄等石田微特外國垂涎觀此更將睥睨一旦外人襲踞台何以存台若不存萬里海疆豈能安枕臣深憂大局正自無可如何適督臣楊昌濬察勘澎湖形勢到台臣往會商三日督臣老於軍務洞悉戎機深以澎防爲急明知閩餉奇絀然一片公忠懇摯慨允回省力籌惟臣購砲辦防急需銀八十萬兩閩籌有着尙可次第撥資否則惟有仰懇 天恩飭部另籌撥給以濟要需無任急切待 命之至

三月二十四日 軍機大臣奉 旨戶部速議具奏欽此

再臣恭奉 上諭澎湖爲由閩赴台要隘扼紮勁旅認真操練方足以資緩急該處地方若由台灣巡撫管轄控制自更得宜並著詳細議奏其餘未盡事宜該督撫如有所見務當明晰敷陳以備採擇欽此仰見 聖慮周詳虛懷下問欽佩莫名 臣查澎湖本設副將一員從前防務歸廳協會辦海疆有事既請命於鎮道復受制於通判牽掣既多安能有濟若歸統兵將領辦理副將既成虛設主客恐難相安現當海上多事之秋今昔情形迥異澎處閩台樞紐似非特設重鎮不足以保危疆督 臣楊昌濬久歷戎行與 臣不謀而合據云擬將澎湖副將與海壇鎮對調各就現時兵弁畧爲變通不增額兵尙不至多所勞費將來海上有事聲援隔絕之際稍可自持防務雖歸 臣籌辦仍歸督 臣管轄所需糧餉軍火有事必須閩臺共濟不分畛域方足以保孤危如蒙採納請 飭下楊昌濬妥議具陳

光緒十二年三月二十四日奉 上諭劉銘傳奏澎湖爲閩台門戶非特設重鎮不足以資守禦楊昌濬與該撫意見相同擬將澎湖副將與海壇鎮對調仍歸總督管轄等語卽著楊昌濬劉銘傳會同籌議具奏閩臺防務關係緊要該督等商辦一切務當和衷共濟不分畛域力顧大局上年諭令該督等會議臺灣改設各事宜並着一併妥速議奏毋稍遲延欽此

覆陳臺灣出入款項懇飭速籌的欵以便分省設防摺

十二年十月二十日

竊臣准戶部咨本部議覆閩浙總督兼福建巡撫臣楊昌濬奏台事需款甚急籌撥維艱一摺光緒十二年七月十一日具奏奉 旨依議欽此鈔錄原奏飛咨前來臣查部臣祇計入款不問出款應將全台出入各款一併澈查現據總理糧台前貴州藩司沈應奎署台灣道陳鳴志開具出入清單臣查鹽煤洋藥茶腦釐金四項已經臣釐剔弊端奏明有案謹再由清單內分款註明毋庸贅

廣部議台灣常例入款如人丁餉稅歲徵十萬三千餘兩等語臣查有常例入款卽有常例出款各省皆然人丁餉稅除各縣額編存留支給各款外餘由福建藩司覈飭湊撥台灣額營兵餉歷年奏銷報部有案勢難截其常支指爲辦防經費部議又以台灣額徵供粟十九萬八千餘石雖未明指可作辦防之用意謂尙有此款當可辦防臣查額徵供粟關給全台額營兵米近年裁兵案內截存未經募補兵穀遵照 奏案變價年僅二萬餘兩暫撥辦防若行省設定添設標兵仍須撥還支放兵米以上二端向由福建藩司照例收發臣處無案可稽惟據南北兩府開報其餘有無入款須飭藩司清查至臣本年 奏請抽收百貨釐金清丈田畝甫經舉辦釐金一項已奏明抵撥電線價銀清賦竣事需時雖有增加誠如部議亦在五七年後此尤情勢之皎然者部議又稱上年海防捐輸計收銀三十餘萬兩查此款係台灣被圍時先向紳商捐借以應急

需解嚴後始行補獎部臣按册稽銀指爲現在入款不知事後補獎款早無存自上年六月至本年四月閩省絲毫未曾協濟全臺裁勇四十餘營補發欠餉辦理善後東挪西湊支絀萬分上年十月臣因兵餉不濟恐有譁潰之虞不得已奏請 敕由廈海關按月協銀三萬兩其時未與督臣晤面尙未遽提閩省協餉本年春初督臣親至台北目覩支絀情形力維大局允由閩省每年濟銀二十四萬兩仍將廈海關協餉二十萬按季撥歸台灣差免竭蹶部議又稱台灣防務須照廣東南沙州防務辦法十年爲期既毋勞驟籌鉅款而防務亦無貽誤等語臣以廣東南南沙州能保十年無事設籌防務尙可從容台灣孤懸海外屏障東南久爲外人所窺伺當法人圍攻之際 兩宮宵旰憂勞其時內外臣工無不以台灣無備爲恨解嚴後欽奉電 旨敕由英德兩國購造鋼甲快船四隻專備台澎需費二百餘萬兩並設行省竭力經營仰見 朝廷不靳

鉅款慎重海防中外臣民無不同聲感頌臣忝膺斯土恨不能倍日經營保固海疆門戶前車不遠後患方長曷敢視爲緩圖致資強敵從前沿海辦防修一礮台需費至數十萬兩臣於澎湖基隆滬尾安平旗后五口購砲築台僅請款銀八十萬兩自春至冬閩請部籌部推閩撥空文往返未見分文轉眼礮價到期洋人催索臣將何以應之購礮無償轉成交涉恐將貽累 朝廷無任急切待 命之至又部議督臣奏請籌撥五關協餉每年三十六萬兩各海關無款可解徒託空言等語查此款專爲分省經費台灣奉 旨特開行省修建城池衙署分治設官餉需甚鉅卽無論分省與否分治萬不能延臣已察勘形勢全臺急須添設廳縣七處卽土城草署所費亦需數十萬金部議以本地之財供本地之用無庸台灣協濟內地亦無庸內地協濟台灣督臣奏稱是可期諸異日難以行諸目前實爲精確不磨之論譬如人在幼年全賴父兄教養成立後

方能自給身家沈葆楨前奏台灣氣局未成如商人買物農民墾荒不費資本於目前何能收利於異日若以空言分省部不撥款閩不協銀是棄台灣非重之也臣才庸力薄蚊負滋慚草昧經綸本非所任前奏請暫緩分省亦慮經費難籌現在閩省視爲已撥之局錙銖必較台灣縱守未分之例情勢已殊將來是分是合朝廷自有權衡惟以無米之炊處危疑之地徒擁虛名勢成孤注不特無補海防且恐坐隳東南大局臣賦性愚戇遇事不敢欺蒙謹將全台款目詳列清單據實瀝陳伏維 慈鑒

按此單移附理財略中

十一月十三日軍機大臣奉 旨所陳籌辦台澎防務並購砲價值需款甚急均係實在情形著戶部速議籌撥有著的款卽行具欽奏此
籌借洋款購砲台借台還片

再臣籌辦澎湖防並購砲價值急需銀八十萬兩與督臣先後奏請 飭部籌撥
現准部議於閩省創辦糖廠開採鉛鑛課稅撥解以濟要需等因臣查閩省並
無創辦糖廠之事鉛鑛集股未成亦未與辦部臣以故大學士左宗棠之空言
指爲實用自係帑項支絀暫假挪延惟澎湖奉 旨飭辦疊經奏明購礮築台
非敢專擅前借海軍洋款二十萬抵撥穆圖善兵餉不能不作速籌還明年正
月又須給礮價銀二十萬兩餘俟礮位到齊均須給付購礮原爲辨防澎湖辦
防急需款二十萬金萬難遲緩若再請部籌撥勢必延宕無期屢與督臣楊昌
濬返覆函商擬由閩台各借洋款四十萬約以週年六釐起息三年後閩歸閩
還台歸台還以濟緊急如蒙 恩准請 旨飭令督臣楊昌濬速行籌借銀四
十萬兩以二十萬撥還海軍以二十萬給付明春礮價臣與台北中外商人議
定允借銀四十萬何時動支再行起息伏乞 聖鑒

軍機大臣奉 旨覽欽此

請撥兵商各輪船片 十一年五月

再臺灣善後需款浩繁臺灣道劉璈曾稟請左宗棠由借洋款內撥銀壹百萬兩辦理善後經 臣電乞總署請 旨飭令左宗棠將劉璈所請百萬撥歸全台辦理善後想邀 聖鑒惟善後以辦防爲第一要務台灣面面皆海 臣等察看各口及往來通信斷非輪船不行澎湖基隆滬尾三海口均須長泊快兵船一隻將來修造礮台運辦各料尤須裝貨船二隻滬尾尙存萬年青輪船一隻費重行緩年久無用應請 飭令南北洋分撥快船三隻福建船政速撥貨船二隻到台備用如蒙 俞充所撥兵商船到台之後其餉項如何發給請 飭南北洋船政議奏定章以便遵行

光緒十一年五月二十六日奉 上諭楊岳斌等奏籌辦臺灣防務澎湖基隆

滬尾三海口均須長泊快兵船一隻修造礮臺運辦各料須裝貨船二隻到台備用等語臺灣所需各船能否照數撥往著李鴻章曾國荃裴蔭森奏明辦理至各船到臺之後餉項如何發給並着妥議具奏欽此

購買輪船片

十三年五月

再台灣於上年五月法人解嚴之後遣撤兵勇運載軍裝萬年青伏波兩輪船尙未修成無船應用旋由新授上海道龔照瑗在上海暫雇威斯麥輪船運載每月船價洋幣千四百餘元九月杪威斯麥船辭去復經照瑗覓購威利輪船價三萬八千兩臣因威利輪於法兵封口之際屢次冒險運兵運餉來臺載重行速何以出賣價值如此之廉恐有朽壞欺朦之處當飭照瑗與其立約先給價銀二萬兩先用十個月如果船底船身毫無損壞方能清價成交否則原船仍行退還月給租洋千三百元現計威利來台應差十月船料尙堅運載頗爲

得力應照原議留作臺灣商船除將價銀給清外謹附片陳奏

添購輪船片 十三年五月

再台北本有伏波威利萬年青輪船三艘運載木料磚瓦辦理礮台城署各工
另有海鏡兵船專供澎湖差遣自萬年青碰沈後伏波水缸損壞於二月駛赴
馬尾船廠修換台北僅威利一船不敷差遣現在基隆滬尾並台南安旗澎湖
等處礮台正在工程繁急之時載運需船待料停工所糜甚鉅適有德國會刺
輪船一艘因船主急圖返國在香港減價出售當即派員勘驗駕駛來台勘得
船長一百七十尺機器船身甫用六年均屬堅固需價銀二萬六千餘兩雖較
威利短二十餘尺而船身稍闊較購威利價值尤廉起錨起貨機器俱全運載
料件尤爲便捷當經山打士洋行說合價銀仍由捐輸項下撥給命名威定以
應急需擬俟伏波修竣及外洋所購電線輪船到台之後再由 臣酌照原價撥

歸商務局應用公項既無虛糜藉可暫資差遣除將船圖馬力月支薪糧造冊咨送海軍總理兩衙門並戶部查照外謹附片具陳

請撥兵船並請同購魚雷船專備臺急片

十四年七月

再臺北距埤南旱道一千三百餘里山水阻隔跋涉奇艱輪船只須兩日臣於初五日接到警報當即電請北洋大臣李鴻章速派快船兩隻來台助援至今未到查光緒十一年法防定後恭奉 特旨由英德購造鐵甲快船四隻專備台澎防務等因欽此上年船成回國聞經海軍衙門奏歸北洋訓練臣因台灣經費支絀既無養船之資又乏管駕之材猥以臺境粗安未便廣請此次埤南變起倉猝若得臺南北各有兵船一隻立時馳往不獨張兆連不致受困且免埤南數百家焚殺之傷今新購鐵甲快船既歸北洋訓練惟有仰懇 天恩俯念臺灣孤懸海外非船不行 飭令海軍衙門酌撥次等稍快兵船兩隻由臣

再購大小魚雷船數隻專備臺澎防患巡口之用以免臨事倉皇無從措手如蒙 恩准應請 飭下海軍衙門一併核議施行

光緒十四年八月初五日奉 硃批該衙門議奏欽此

變售舊輪船以資新購摺 十五年十一月二十六日

竊臺灣四面皆海往來險阻斷非輪船不行自萬年青威利威定等船先後沉失惟恃飛捷伏波海鏡三船飛捷專修水線全賴伏波海鏡差遣運輸此二船均由船政局製造逾二十年屢修屢壞除逐年小修外隔年即須大修現據管駕都司林文和稟稱伏波龍骨軟弱首尾倒垂現當冬令風浪拍天不能駕駛且船身朽敝修理尤難 臣已將公費裁撤海鏡雖尙勉行海上朽敝實同擬俟來年澎湖城工告竣一併裁撤僅剩飛捷一船尙須修理水線不敷差遣運輸查臺灣商務局經 臣招股購製二快船一名駕時一名斯美船身各長二百五

十英尺純爲鋼質製成每點鐘能行十五六諾裝兵運貨便捷異常每船價銀十八萬兩自知府李彤恩病故後商務經理乏人現由臣商同各商將兩船併爲官輪仍作商輪照舊搭客載貨所收水脚資銀卽抵兩船經費台中官物卽可運載無俟另籌養船之資兩船價銀三十六萬兩經臣飭令善後局於海防經費項下陸續籌還以清商款查伏波海鏡兩船每月公費薪糧并修理用煤等項各支銀二千五六百兩每年併計兩船需費銀六萬餘兩卽以此項按年抵還駕時斯美船價六年卽可償清如此一轉移間公家毫無所虧六年之後既得堅快之船又省養船之費於台灣海防不無裨益除呈報海軍衙門暨咨戶部船政外謹請 飭部立案

光緒十六年正月初五日奉 硃批著照所請該衙門知道欽此

購造小船片

十三年二月

再准兵部咨覈覆補報臺灣購買南通北達前美如川小輪船四號均應照章補奏立案以便核銷等因查臺灣各口內淺外深風湧不時大號輪船不能近岸光緒十年法防案內曾赴香港製造南通北達前美小輪三號分撥澎湖安平滬尾各海口輯捕運輸兼通文報南通長十丈北達長七丈前美長七丈後因不敷遣用續赴香港輪機廠定造小輪船名曰如川船長七丈五尺十一年冬派弁駕駛出洋在南北一帶海口遣用後因分設省會修造砲台工程浩大裝運物料四輪不敷又雇洋匠自造駁船一號計長七十尺載物七百石可抵澎湖廈門等處駁運砲械安置水雷極稱穩捷又因台灣海口河道多淤非挖泥船不能疏洗又經定置挖泥機器船一號以上二船均已到台配齊弁役月支各費均照小機輪船應支之數覈支業經造冊送部奉准飭查理合補行奏咨立案

購辦水陸電線摺 十二年八月二十八日

竊臺灣一島孤懸海外往來文報屢阻風濤每至而月兼旬不通音信水陸電線實爲目前萬不可緩之急圖查同治十年船政大臣沈葆楨奏設立台地水陸電報會同上海大東北公司議明價值已定合同葆楨調任兩江議遂中止臣於上年法兵解嚴之後即思竭力經營固慮經費難籌亦因水線價昂非考實精微不敢孟浪從事今自春至秋洋商多來台承辦臣因旱線損壞易修水線損傷無船不能修理中國只大東北公司修理電線輪船一隻若照葆楨議歸彼修理較易爲謀特派知府李彤恩馳赴上海與該公司面議據開由廈門至澎湖以達安平水程約五百里索價銀十五萬五千兩包修三年需費銀三萬兩以後遇有損斷彼輪修理日需銀五百兩與葆楨原定畧同須交現銀爲據彤恩因價鉅置之會同試用道張鴻祿諮訪各洋行令其各開價值約同各

洋商一併來台面臣然修理無船水線萬不能辦據瑞生洋行條陳自造鋼壳四鐵葉輪船一隻由外洋裝線運至中國並自購修理機器一副船身長三百二十英尺闊三十二英尺可以安礮六尊俟電線安妥後平時可以載貨裝兵巡緝洋面電線損斷即可自修一舉而數善備以免大東北公司居奇臣私籌熟商臺灣四面皆海舉動需船多一船即得一船之用當令洋商各開實價擇廉成交怡和泰來瑞生三行開價較廉電線價銀十萬兩輪船價銀九萬兩修理電線機器價銀一萬兩測量機器一副三局電報機器並包運包放工價包險等費共銀二萬兩總共價銀二十二萬兩臺費奇絀鉅款難籌當議三年歸還即可成議他兩行皆不肯承惟怡和可辦當飭張鴻祿李彤恩與其詳議條款先給定銀四萬兩餘分三年歸清不給利息現據李彤恩等詳送條款合同并船圖電式前來臣查沈葆楨前立合同由安平至澎湖再由澎湖至廈門議

價洋二十一萬二千九百餘元合銀數計之須十五萬三千二百餘兩道里相同惟所議頭等電線近岸重八噸者八十五里餘皆重一噸三分此次所訂電線議定頭等近岸重十噸者一百里餘皆重至二噸不獨價值便宜線料亦大相徑庭且查瓊州水程不足六十里據大東北公司開送從前包辦海線價銀二萬餘兩若以臺灣綫價比較更屬廉平至添購修理電線輪船一項按照合同所開機器馬力價亦不昂臣於經費萬分支絀之中勉辦急需之具若不切實籌算給價或多微特不能節省且將見笑洋人旱線由基隆滬尾合至淡水由淡水至臺灣府城往來兩道議定八百里除木料之外餘皆由泰來承辦共價三萬兩訂於明年正月安設水線定於明年六月安設臣尤慮者安設水線費款至十萬金一旦有事或被敵人割斷不獨無裨緩急且將虛擲鉅金殊爲可惜今自造一船可以自行取撈便益甚大惟此項經費無著臣同沈應奎反

復籌議只有百貨釐金項下可以撥支但本年六月甫經開辦每月收數銀不足四千兩三年之內能否相償尙無把握臺地安設電報於茶商最爲得益形恩現與商人議定如三年內釐金收數不敷電價由商捐助除將合同船圖咨送海軍并總理各國事務衙門外謹具摺以陳

軍機大臣奉 旨該衙門知道欽此

臺灣水陸電線告成援案請獎摺 十四年五月初五

竊臺灣購辦水陸電線經 臣於十二年八月 奏明在案嗣因海線取道廈門海程不便改由臺北滬尾達福州之川石海程較多五六十里復經勘議加購水線價銀五千兩因地居海外需用中外物料不能按限運齊十三年三月甫將基隆滬尾合至臺北兩綫動工八月怡和洋行承辦水綫裝由飛捷水線輪船到臺經 臣委員驗收隨即駕駛勘量海道將川石至滬尾水線安安福臺兩

省先行通報續至澎湖放線抵臺南之安平口維時陸路均已勘明於十一月間由臺南接辦陸線取道彰化迤邐而北十四年二月初一日與臺北之基隆滬尾兩線接通臣以閩臺海面暗礁過多台南北山徑崎嶇溪流橫截線條線桿均須格外堅牢復飭原辦委員往返周巡妥爲安插現自開報之後一律完固通行統計水陸設線一千四百餘里分設川石滬尾澎湖安平水線房四所除台南安平旗后原設報局三處外添設澎湖彰化台北滬尾基隆報局五處一切材料機器水線輪船木桿工程勘路轉運局員經費薪洋匠資共銀二十八萬七千兩除怡和原訂線價分三年歸還尙有十二萬兩未付外原奏動撥百貨釐金一款自光緒十二年六月至十三年六月已據報解銀六萬七千九百餘兩其餘暫由海防經費中挪墊業飭承辦委員速將用款數目分晰開單並取水陸巡護修理暨各報局支銷經費章程詳咨立案仍俟線價付清並釐

金銀兩解足三年綜稽贏絀再行報銷此台灣水陸電線竣工之大略也臣查電報關繫海防交涉重務各省辦理各員蒙恩准照異常勞績給予獎勵在案此次臺灣安設電報事同一律而水線海底孤懸尤難措手各員督治匠役出沒驚濤駭浪之中既無虛糜又無損失工程穩固較之河工搶險情勢更屬艱危今海外孤懸之地一旦與內地息息相通所裨於海疆甚巨臣忝司疆寄安敢沒其勤勞所有在事尤爲出力人員三品銜浙江補用知府李彤恩擬請以道員仍留原省補用東河掣省補用知府丁達意擬請以道員仍歸山東河南掣省補用提舉銜候選通判劉竺保擬請以直隸州知州不論雙單月儘先選用儘先選用縣丞俞書祥擬請以知縣不論雙單月儘先選用指分福建試用從九品林清漪擬請以縣丞不論雙單月選用其餘出力弁勇可否由臣擇尤請給外獎以示鼓勵之處出自逾格鴻慈

光緒十四年五月二十六日奉 硃批吏部議奏欽此

請撥援台洋款百萬趕速辦防片

再臣前奏陳台灣善後摺內因澎湖設防關係重大請 旨定奪原摺留中至今未敢議辦曾往台南澎湖一帶察勘形勢細閱澎湖地方必須實力辦防方能保固南洋門戶惟一島孤懸四方受敵必須多購後膛精利大礮方能設防否則雖築礮臺亦不能守九月間曾託淡水英領事稅務司電詢英國阿姆斯脫郎礮廠礮價旋據單開較上海洋行已減二成實價礮身較長 臣令再減一成尙未定局統計澎湖基隆滬尾安平旗后五海口至少須添購大礮三十餘尊價約需銀六十餘萬兩電報一項萬不能無水線須自廈門達澎湖臺南再設桿線達至臺北其次尙有製造槍子機器局用大小輪船等款皆防務萬不可少之急需准兩廣督臣張之洞咨開已代購製造四色槍子機器一副仍須

添購製造礮子機器臺灣各庫絲忽無存將來一切經營約須銀百萬兩臣前奏臺灣現存餉項捐輸共存銀百萬內外以辦防務所欠無多始意添礮若干以後從容再辦及至澎湖親閱地形統籌全局設防卽須先購大礮否則雖有名將亦將徒喚奈何台餉自五月來內地毫無協濟台南北關稅釐金六月至今凡五月僅收銀三十餘萬兩合之前存之款共約一百三十餘萬數月之內全台遣散各營補支欠餉及基隆澎湖賑卹要需暨前陝甘督臣楊岳斌裁勇恩糧并留台各軍月餉現據沈應奎單開糧臺所存現銀暨捐輸未繳之款通只六十餘萬現銀僅敷年內軍餉其餘捐輸將來可抵各海口修築礮臺之用尙短買礮設電添購機器等款別無可籌查上年已故大學士左宗棠籌借洋款四百萬本指撥臺實計協濟臺軍不足五十萬兩閩用多寡臣莫由知其餘奉旨存儲以備海軍支應惟有仰懇天恩俯念臺疆緊要防務急需飭撥

一百萬兩以便刻日辦防早收實效無任迫切待 命之至

軍機大臣奉 旨覽欽此

請飭部定外洋購料章程摺 十四年二月二十五日

竊臣於光緒十三年十一月初九日附奏台北購辦機器料件及洋槍藥彈等項照章聲請立案接准戶部咨開查明定購年月日期報部核辦嗣後如有定購外洋軍火器械等項務須遵照部章先期奏報聽候海軍衙門暨戶部核定不得擅自購買等因查外洋各項機器軍火價值無常定議成交屆期即須兌價到期不兌失信遠人動成交涉且恐經手人員濫買糜費在部 臣體國公忠原屬慎持庫款故定章於未經定議之先報候核准所以杜冒濫而絕弊端自應遵照辦理惟台灣孤懸海外緩急須聽輪船之便海防工程關係緊要舉凡銅鐵物料及軍火製造之需往往取辦臨時多寡既難預計若動須奏咨辦理

往返數月必致停工待料耗費轉多查外洋器械工料繁多原非一致果爲船
礮重大器械成製需時貲費鉅萬貨須審辦價待考論固宜先事聲明請 旨
定議若機器局每月需用料件修築礮台需用鐵水泥及修製槍礮零件機器
類皆隨時添補數既未能預定購又未可後時必須便輪往來始能載運定議
後動逾年歲方能到台且台當新創之初百事皆無定制現在經費支絀平時
無力購存臨用急需大都緩難濟急如俟咨部與海軍衙門議准必至貽誤要
工竊意購款過鉅或非急需自應遵照部章 奏咨聽核至隨時需用之件款
項無多可否仰懇 飭部准令隨時由 臣 一面定購一面咨部立案庶用款不
致無稽而於製造海防各工亦無罣碍除飭軍械所機器局查明未奉新章以
前所購外洋軍火物料聲明年月日期速行補報以後定購船砲器械鉅款仍
應先期奏咨聽候核定以協部章

光緒三十四年三月十五日奉 硃批該衙門議奏欽此
採購機器模片等件銀錢數目附奏片

再台北設立機器局製造槍砲子彈應需機器模子銅片各料件先後委員分
投採購其已經購運到台機器模子銅片各料件及添購洋槍藥彈連同船價
行用保險各項或以洋圓合銀或以英磅合銀或以規圓合銀均經據實折合
共計銀八萬四千一百一十二兩六錢八分零二毫山善後局請照部章詳請
奏咨以符定案謹附片具陳

光緒十三年十二月初十日奉 硃批該衙門知道欽此

擬購水雷礮藥附請核議片 十四年九月

再前准部咨定購外洋軍火等項務須先期奏咨聽候海軍衙門戶部核定等
因業經遵辦在案查海防利器水雷與礮台相資爲用台灣各口分建礮台漸

次就緒非先儲備沉雷磁雷各種預籌分布以護砲台倘有事端必至緩難濟
急當飭機器局委員東河候補知府丁達意查開式價核計必須購雷二百差
能分布各台經費過虧一時未能籌備現經酌減擬先購沉雷六十磁雷二十
配齊雷線及應用各機加以保險運輸約須銀二萬兩又軍火內需用洋硝黃
火藥亦屬急切待用之需并擬撙節購辦合計保險運輸等項約須銀萬兩自
應遵照新章先行奏咨核准俾得分別採購以實軍儲應請 旨飭海軍衙門
暨戶部核議

光緒十四年九月十九日奉 硃批該衙門議奏欽此

買礮到防立案片 十五年五月

再查臺灣辦理防務基隆滬尾旗后澎湖各處建造礮台購辦大礮 臣於光緒
十二年三月 奏辦澎防請款案內陳明旋與英商怡和洋行議購阿馬士莊

新式後腔鋼礮三十一尊隨配礮彈架具等件包運到台通計裝箱上船水脚保險行規共規平銀六十萬兩三期付給訂立合同咨呈海軍衙門暨總理各國事務衙門轉行出使英國大臣派員查驗嗣准該大臣劉瑞芬派驗咨復到臣又經咨呈總理各國事務暨海軍衙門各在案臣於各海口應安礮位先行酌度形勢分別配支並因澎湖起礮碼頭難於築造復與英商議定另造屯船二隻包起上岸加給規平銀五千兩茲據英商於光緒十四年六月間至本年二月底已將所辦礮位陸續運台一律起岸由各防軍驗收礮價規平銀六十六萬兩業經給付其起礮費銀五千兩一并給清除將起礮合同分咨查照並各礮起上砲台工竣後再行辦理報銷外謹附片陳請 飭部立案

光緒十五年六月初七日奉 硃批該衙門知道欽此

英國購砲請獎監辦參贊片

十五年五月

再查臺灣定購大砲三十一尊洋商爭來承辦議價自八十餘萬兩減至六十四萬兩已由美商旗昌洋行議辦英商怡和願減價銀四萬兩訂價規平銀六十萬兩包運上岸香港洋報並日本報各洋商俱稱價過廉平必將虧折將來辦到必難與合同相符經臣函致出使英國大臣劉瑞芬派委參贊知府李經方隨時查驗經方以事關重大不時親赴礮廠查勘並僱熟習礮工妥實洋人駐廠監視迨各礮造成劉瑞芬另派隨員驗試均與合同相符臣查李經方才具明敏西學精通素爲西人推服此次經理台灣礮位洋商虧折甚多各礮工程毫無減料運台交付亦無異言皆李經方一人之力其僱人監視及往返電商報費墊用二千餘金不肯開報現在礮位全數運台臣復加勘驗製造精利體質堅剛洵爲海防利器李經方不辭勞費臣未敢沒其微勞可否仰懇天恩酌予獎勵之處出自 逾格鴻施

光緒十五年六月初七日奉 硃批李經方著交部議敘欽此

奏報造成機器局軍械所并未成大機器廠摺

再查台灣先後購買後腔洋槍萬餘桿各種彈子不自仿造子盡則槍皆廢棄且孤懸海外有事運濟艱難機器局廠工程雖較繁重爲善後計不能不設法急籌光緒十一年由兩廣督臣張之洞代購製造槍彈機器一副經臣飭令記名提督劉朝幹在台北府城北門外購買民田積方三千八百九十丈七尺八寸契價銀一千六百八十兩八錢一分七釐並飭朝幹砌築基址分赴內地採辦木料督造機器局廠自十一年六月興工至十二年二月訖工建成正側各屋並小機器廠一百一十七間通計築墻浚井砌路開溝填河需工料銀二萬三百二兩五錢台北軍械無處存儲卽就偏西地方建造軍械所七十三間需工料銀萬六千三百七十二兩七錢八分尙有製造各種礮彈大機器廠汽爐

房打鐵房工程較大未能同時並舉續經興造尙未蒞工本擬俟全局造齊一律奏報茲奉部行已竣工程限期造銷機器局軍械所既經造成應將用過工料銀數先行截清奏咨立案彙案造冊報銷其未竣工之大機器廠另歸後案辦理以清界限

光緒十四年六月十二日奉 硃批該部知道欽此

修造礮台并槍礮廠急需外機器物料片

再查台灣辦理海防購礮築台經 臣 奏明在案各口自十二年正月興工分築礮台惟安平舊台尙可修葺應用其餘基隆滬尾澎湖等處皆擇地另造新台旗后本有礮台一座後在大坪山添築一座本年春夏各軍陳報濠溝兵房並外圍均已完工因礮位未到子墻寬窄高低須視礮架部位方能定築澎湖築台四座基隆滬尾各二座因地勢土鬆沙濕非重用外洋鐵水泥層累堅築

不能勝巨礮震力各兵房俱仿外洋圖形已用鐵水泥三萬六千桶現在澎湖運到大礮十七尊其餘卽由上海續運據礮臺監工洋人鮑恩士並礮廠派來總兵聞德詳勘各臺均能合度惟子牆砲基亟須鐵水泥逐層封築方可堅凝計澎湖基隆滬尾安平旗后五海口共造砲台十座計需鐵水泥二十萬桶查鐵水泥價銀每桶二兩九錢需款太鉅當飭委員會同洋人覆勘其子牆不當敵礮之處改用土牆外用鐵水泥敷面礮基亦多用石子與鐵水泥參合以期減省反覆籌議至少尙須十二萬桶方克悉臻完固查各省購辦外洋軍器須由海軍衙門戶部核議方准動支此鐵水泥除兵房已用三萬六千桶尙在未奉新章以前初因台工需用尙多擬俟一併奏報現已飭局詳請補咨立案外現在修築子牆安設礮位急須添購鐵水泥十二萬桶相應請 旨飭下海軍衙門戶部核准俾得早行購運以竣台工又台灣建有大礮子槍子各廠亟須

購辦鋼鐵暨機器焦煤等項用資製造若自上海香港零星採買價值過昂外洋價既廉平物亦較勝據機器局總辦東河補用知府丁達意開單請購前來臣細加查核皆係製造急需應請旨飭令一併核准以利製造而裕軍儲

光緒十四年七月初八日奉 硃批該衙門議奏欽此

擬修鐵路創辦商務摺 十三年三月二十日

竊據商務委員已革道員張鴻祿候補知府李彤恩等稟稱奉委招致南洋各島貿易閩人來台合辦商務以興地方當即專函往招現有南洋新嘉坡西貢等島閩商陳新泰王廣餘等復信僉稱俱願回籍合辦台灣商務革道等現已集股訂購輪船二隻先行開辦惟台灣一島孤懸海外當此分省伊始極宜講求生聚以廣招徠現在貿易未開內山貨物難以出運非造鐵路不足以繁興商務鼓舞新機查安平旗后兩口海湧沙飛自春徂秋船難近泊滬尾一口日

形淤淺輪船候潮出入耽誤時機只基隆一口無須候潮泊船較便因距淡水旱道六十里運貨殊難中外各商不得已往來滬尾若能就基隆開修車路以達台南不獨全台商務繁興且於海防所裨甚大現在公款支絀革道等議集商股承修約需工銀百萬兩將來卽於鐵路取償不動公款擬具章程數條陳請核辦等因臣查台灣一島孤立海中現在建省設防截然爲南洋屏蔽必須開濬利源使經費不難自給南北防勇徵調可以靈通方能永保巖疆自成一省現在清賦造台安置水陸電報本年內外均可次第告竣惟鐵路一事臣深知其利賴無疆徒以經費躊躇未敢猝圖舉辦現據委員等稟請由商人承修於公款無關出入將來坐收厚利實於台灣大局裨助匪淺考鐵路之利便於驛遞墾商不計外目前大利有三請爲我 皇太后 皇上陳之台灣四面皆海除後山無須辦防外其餘防不勝防基隆安旗四口現已購礮築台可資守

禦其餘新竹彰化一帶海口分歧萬難遍布軍隊概行設守臣已於奏辦台灣善後摺內陳明如遇海疆有事敵船以早隊猝登隔絕南北聲氣內外夾擊危迫將不忍言若修鐵路既成調兵極便何處有警瞬息長驅不慮敵兵斷我中路此有裨於海防者一台灣既經分省須由中路建設省城方可控制南北查彰化橋孜圖地方曾經前撫臣岑毓英察看地形議籌建省臣上年秋復親察勘地勢寬平氣局開展襟山帶海控制全台實堪建立省會惟地近內山不通水道不獨建築衙署廟宇運料艱難且恐建城之後商賈寂寥雖有省垣民居稀落若修車路貨物立見殷繁建造各工更多節省此有裨於建立省城者二台北至台南六百里中隔大溪三道春夏之交山水瀰漫行人絕無能往來大甲房裏兩溪歲必淹斃數十人急須造橋以便行旅查大甲房裏曾文三溪大者寬至十里其次小溪二十餘道或寬百餘丈大甲溪經前任撫臣岑毓英督

修石坝以阻漫流並永修橋已費洋元三十餘萬數月溪流冲刷今已無存臣現由上游窄處議修統計大小溪橋工必需銀三十餘萬兩今該商等承辦車路此項橋工二十餘處一律興修火車巨利暫不必言公家先省橋工銀數十萬兩此有裨於台灣工程者三伏念鐵路爲國家血脈富強至計舍此莫由臣於光緒六年曾經條陳具奏其時風氣未開舉朝疑議書生謀國從古類然可勝太息現在開平成效聿彰舉國羣疑觀此無難盡釋且台灣與內地情形迥殊紳商多涉外洋深明鐵路大利商民既多樂赴紳士決無異辭如蒙俯准開辦所裨於台灣大局實非淺鮮臣無任惶悚侍 命之至謹將商立章程恭呈御覽伏乞 聖鑒施行

清單

一基隆至台灣府城擬修車路六百餘里所有鋼質鐵路並火車客車貨車以

及一路橋樑統歸商人承辦議定工本價銀一百萬兩分七年歸還利息按照週年六釐每年歸還數目俟辦成後核量鐵路脚價進款數目再行定議

一台北至台南沿途所過地方土沃民富應用鐵路地基若由商買民間勢必居奇所有地價請由官發其修築工價由商自給

一基隆至淡水貓裏街至大甲中隔山嶺數重台灣人工過貴必須由官派勇幫同工作以期迅速

一車路所用枕木爲數過多現在商船訂購未到須請先派官輪代運免算水脚

一車路造成之後由官督辦由商經理鐵路火車一切用度皆歸商人自行開支所收脚價官收九成償還鐵路本利商得一成並於搭客另收票費一成以作鐵路用度除火車應用收票司事人等由官發給薪水外其餘不能支

銷公費

一鐵路經過城池街鎮如須停車之處由官修造車房所有站房碼頭均由商自行修造

一此項鐵路現雖商人承辦將來卽作官物所用鋼鐵條每碼須三十六磅沿途橫橋樑必須工堅料實由官派員督同修造

一此項鐵路計需工本銀一百萬兩內有鋼條火車鐵橋等項約需銀六十餘萬兩商人或在德廠或在英廠訂購其價亦須分年歸還如奉 旨准辦再與該廠議立合同由官驗明蓋印以後由商自行歸還官不過問如商人另做別項生意另借洋款不能以鐵路作抵

再臣查鐵路之利不獨目前有裨於海防建省橋工三事將來更可添大宗入款充海防經費要需台灣地狹內山未開萬不能如內地商利之厚商等所籌

本利請以七年歸還似可有盈無絀惟經理必須得人若無廉實大員查察會計將來商人以多報少任意侵牟不獨無利可餘且恐七年難清路本查台北府城市面日盛內山番地土曠人稀閩廣窮民爭願遠來開墾徒以輪船過貴無力渡台若商務辦理日增卽就商局輪船往來香港廈門之便運載墾民渡台由官薄給船費十數年後全台均成沃壤社番土匪永無內變之憂近年內地招商集股騙折過多商股不無疑慮查內閣學士臣林維源端謹忠誠久爲商人欽信自奉 旨回籍幫辦台北撫墾以來不獨撫墾一力辦成卽清賦抽釐均資臂助其於理財一道心計尤精如蒙 朝廷主持俯准台灣造路可否仰懇 天恩飭令學士臣林維源督辦台灣鐵路商務仍兼辦台北撫墾事宜凡遇鐵路商務 准由該學士專摺奏陳以收實濟出自 逾格鴻慈

再台灣擬修鐵路創辦商務曾經臣附片奏請內閣侍讀學士臣林維源督辦

因該學士取與不苟將來車路脚價期於涓滴歸公不虞中飽連日據林維源面稱所辦台北沿山墾務新開田園俱定於本年秋冬清丈逐段分界以便將來陸續升科宜蘭現有舊墾爭產械鬪卽宜前往督同官紳清丈地方寬闊一時不能告竣商務墾務彼此不能兼顧商請奏銷鐵路商務差使以免遺誤等情臣查林維源所辦台北墾務亟須清丈宜蘭八里沙地方本年三月經林維源督同官紳議開河道該處可墾田園數萬畝全係平陽膏腴之地新墾舊墾爭佔地界不時械鬪亟須林維源前往督同官紳清丈分界免滋事端所稱兩處不能兼顧亦係實情鐵路商務現經海軍衙門議准奉懿旨依議欽此咨行欽遵前來據商務委員稟稱現由英德兩廠先行訂購鐵路鋼條三百三十里鐵橋二道火車客車七十具定於年內辦齊股分銀兩陸續招集所欠無多先由基隆造至彰化再行接續前進工程浩大必須二三年後方能完工

並請派選用道員楊宗瀚總辦鐵路商務以順商情等因臣查楊宗瀚以知縣於同治元年投効大學士李鴻章軍營歷保河南補用道報捐海防儘先選用其辦事精實器局宏深每以中國之大不能富強爲恨經臣函招來臺總辦商務實稱其選惟稟稱輪選到班理應赴部投供合無仰懇天恩俯念台灣分省伊始事事興創佐理需才飭部註冊准將鹽運使銜新班先選用道楊宗瀚留於台灣差次遇缺卽選俟選缺後再行送部引見至鐵路抽收脚價爲期尙早現由外洋開來鐵路脚價章程簡當詳明絲毫不能舞弊屆時再由臣妥籌辦理

光緒十三年五月二十日奉 硃批著照所請該衙門知道欽此

臺路改歸官辦摺 十四年十月十六日


竊照臺灣興造鐵路前經海軍衙門議准奏奉 懿旨依議欽此遵經飭據商

務委員訂由英德兩廠購辦鐵路鋼條三百三十里大小鐵橋十一道火車客車七十具先自基隆造至淡水再行接續前進由臣改派道員楊宗瀚總辦議定地價車房碼頭歸官承辦并撥兵勇代工 奏明在案當時勘定臺南北六百餘里除地價車房碼頭土工外估價銀一百萬兩惟淡水至基隆山河夾雜須挖山洞九十餘丈大小橋樑百二十餘座穿山渡水挖高填低工程浩大各軍修築礮臺剿番剿匪無暇代修均由商局僱夫與辦現將基隆六十里修造平坦鋪成鐵條三十里年外可以完工共計夫價橋梁已費銀十九萬兩查李彤恩等招集商股一百萬其時創議皆以鐵路利厚兩月間招股七十萬金現銀三十餘萬復經各商議購快船兩隻價銀三十六萬兩以輔鐵路之不足自工師到後細勘工程統計土工需銀三十餘萬兩營兵無暇代修各商觀望經李彤恩稟請由臣挪用陸續借支銀二十萬兩所有鐵條火車鐵橋均經臣議

立合同由外洋購辦分年歸還本年頭批已給銀十萬兩李彤恩勇於任事商民信服擬俟基隆六十里最大工程告竣後再行招集股分不料李彤恩於九月病故楊宗瀚因病假歸經臣委員督修據各商稟請歸官自辦已繳現銀三十餘萬願留快船兩隻作抵等情臣查台灣鐵路辦成不獨利商便民且關海防大局故臣費盡經營創議與辦今商股既觀望不前承辦委員或死或病若聽其中止不獨已費公款無可歸還且購到鐵條鐵橋木料火車棄置尤爲可惜臣飭工師詳細勘估究需若干據稱通盤核算基隆至彰化每里核銀三千兩彰化至臺南每里核銀二千五百兩計地價土工車房碼頭四項需銀六十餘萬兩核之原估百萬數目相符較之開平鐵路工倍價廉現在基隆至淡水山路六十里不日完工其餘除大甲溪之外別無大工耗費臣擬儘購到鐵條辦至彰化再行量力以籌惟經費難支臣同藩司邵友濂籌商至再惟有自本

年秋季以後閩省每年協濟銀四十四萬兩至十七年春季止尙存未解銀一百零四萬兩此項本擬節存備充建造省城經費現省工尙堪稍緩路工在急非一時所可驟成擬請暫挪先修鐵路俟竣工後卽將所收脚價歸還成本再籌建城分治官項既有着落商股有快船取利亦不受虧將來不獨有裨海防卽建省工程有鐵路運料竣工既速省費亦多伏求 聖鑒

光緒十四年十一月初六日奉 硃批著照所請該衙門知道欽此



卷五勘誤表


十三	十三	十	六	四	四	三	三	二	一	頁數
七	二	十五	廿一	十六	六	二十	十五	十	二	行數
廿三	十三	七	廿一	十五	五	三	廿二	四		字數
薪洋匠	池	輯	欽奏	母	雖	資	疆	樽	誤低 二格	誤
洋匠薪	迤	緝	奏欽	母	難	給	疆	樽		正
										脫
										衍

		廿四	廿二	二十	二十	十九	十八	十八	十五	頁數
		五	五	二十	二十	八	十七	三	八	行數
		十二	三	廿四	廿一	十四	十一	十	廿二	字數
		樑			淵			腔	糜	誤
		梁			漲			腔	糜	正
				斷		項	購			脫
			橫							衍

劉壯肅公奏議

卷五勘誤表

一



劉壯肅公奏議 建省畧

卷六

陳請銷假到閩會商分省協款情形摺

十二年五月初七日

竊臣於正月二十四日因日疾 奏請續假兩月奉准給假在案遵卽加意調

攝入夏以後紅腫漸銷障翳退稍四月二十二日遂赴福州省城會同督臣楊

昌濬籌商分省諸務督臣力籌大局深念脣齒相依雖分猶合亟應仰遵 聖

訓務令內外相維不分畛域閩省有指臂之助臺灣無孤注之憂庶可聯成一

氣督臣已飭閩臺司道會議分省各條臣到閩復同詳細妥籌稍爲增減由督

臣主稿奏陳臣卽於二十八日馳回臺北府城臺灣現在整頓海防撫番招墾

百廢待舉經費支絀萬分從前閩省歲資臺餉六十萬積欠至三百餘萬之多

自上年五月至今毫無協濟臺用虧竭中外昭然全臺防軍經臣奏定三十五

營練軍營三營每年餉需約須銀一百二十萬兩加之養船製造員弁薪水各

官津貼一切雜支統需銀一百五十餘萬兩現在外辦防務內撫生番營勇既無可裁餘款更難酌減全臺歲入僅一百萬兩內外自奉 詔改行省後時與督_臣往復函商請將閩餉照常協濟另請鄰省籌濟分省要需督_臣因閩用太繁未能多協議由釐金項下每年協銀二十四萬兩閩海關照舊協銀二十萬兩另行會奏請 敕粵海江海浙海九江江漢五關每年協銀三十六萬兩在督_臣固已心疲力竭無可再籌以_臣計之閩省海關釐金共協銀四十四萬兩合之臺灣歲入勉可供給臺灣軍餉雜支其餘辦防撫番開墾分治建造省城衙署廟壇在在均需鉅款縱蒙五關歲協銀三十六萬仍係杯水車薪_臣惟隨事撙節分別緩急後先斷不敢敷衍苟安上負 聖主慎固海疆之至意惟臺灣孤懸海外現在各庫羅掘一空議者謂須稍有存儲以備緩急_臣日覩時艱餉源支絀現正經繪草昧斷難儲集盈餘所慮海上風濤茫無定局公文往返

動輒需時軍餉一虧萬夫譁潰惟有仰懇 敕下署福州將軍古尼音布督臣楊昌濬自本年起將議定歲協銀四十四萬兩按季先期撥給由臣派船領運俾免稽延庶幾分省設防得以漸籌部署

光緒十二年五月二十六日奉 上諭劉銘傳奏臺灣經費現與督臣議由福建釐金項下每年協濟二十四萬兩閩海關照舊協銀二十萬兩請飭先期撥給等語臺灣需餉孔急自應豫爲籌撥著古尼音布楊昌濬自本年起將議定每年協濟臺灣餉銀四十四萬兩按先期撥給以應要需餘俟楊昌濬會奏到時再降諭旨將此由四百里各諭令知之欽此

遵議臺灣建省事宜摺十二年六月十三日

竊照光緒十一年九月初五日奉 慈禧端佑康頤昭豫莊誠皇太后懿旨醇親王奕譞等遵籌海防善後事宜摺內奏稱臺灣要區宜有大員駐紮等語臺

灣爲南洋門戶關係緊要自應因時變通以資控制著將福建巡撫改爲臺灣
巡撫常川駐紮福建巡撫事卽著閩浙總督兼管所有一切改設事宜該督撫
詳細籌議奏明辦理欽此又於十一年十月十九日奉 上諭臺南北地與袤
延甚遠以形勢而論臺北各海口尤爲緊要原設臺灣道一員遠駐臺南深慮
難以兼顧且巡撫常川駐紮一切錢穀刑名事宜必須分員管理各專責成應
否於臺灣道之外添設臺北道一員著楊昌濬劉銘傳悉心會商妥議具奏等
因欽此欽遵經 臣等各將籌度情形先後復奏十一年十二月十二日奉 上
諭楊昌濬所奏添設臺北道不如添藩司係爲因地制宜起見自可准行臺灣
雖設行省必須與福建聯成一氣如甘肅新疆之制庶可內外相維著詳細會
商奏明辦理復於十二年三月二十四日奉 上諭劉銘傳奏澎湖爲閩臺門
戶非特設重鎮不足以資守禦楊昌濬與該撫意見相同擬將澎湖副將與海

壇鎮對調仍歸總督 臣轄等語卽著楊昌濬劉銘傳會同籌議具奏閩臺防務
關繫緊要該督等商 一切務當和衷共濟不分畛域力顧大局上年諭令該
督等會議臺灣改設各事宜並著一併妥速議奏毋稍遲延等因欽此仰見
皇太后 皇上垂念海疆諄諄訓誡之至意 臣等忝膺重寄目擊時艱何敢不
竭力籌維和衷商榷以期事歸盡善仰慰 宸廑除往返函牘不計外 臣昌濬
於二月間渡台 臣銘傳四月間復渡詳細面商查台灣爲南洋門戶七省藩籬
奉 旨改設巡撫外資控制內杜覬覦實爲保固海疆至計惟沿海僅數縣之
地其餘番地尙歸化外氣局未成海外孤懸與新疆情勢迥異閩臺本爲一省
今雖分疆劃界仍須脣齒相依方可以資臂助誠應遵 旨內外相維不分畛
域乃能相與有成茲就省局司道及署臺灣道陳鳴志總理糧臺前貴州藩司
沈應奎等議條陳詳加酌核謹繕清單恭呈 御覽方今整飭海防百廢待舉

加之改設行省經費浩繁如澎湖一島爲閩臺門戶往來咽喉購砲築臺急需銀八十萬兩迭經臣等奏請 敕部指撥此外製械設電添官分治招墾撫番在在均關緊要前車可鑒安能再事因循至建立省城衙署壇廟各巨工雖不妨稍從緩辦然既分省亦不能不次第接籌台地防軍裁撤外尙存三十五營分布沿海周回二千餘里勢難再減海外餉需缺乏卽有譁潰之虞臣等悉心籌畫擬由閩海關每年照舊協銀二十萬兩經臣銘傳咨請署福州將軍古尼音布嗣後由廈關徑撥解台至閩省各庫無論如何每年協銀二十四萬兩陸續籌解並請 旨敕下粵海江海浙海九江江漢五關每年協濟銀三十六萬兩共成八十萬兩以五年爲期統計閩省庫閩海關所協四十四萬合之臺地歲入百萬兩專應防軍月餉之需五關每歲各協銀七萬餘兩集腋相資尙屬輕而易舉臺疆得此鉅款庶不致盡託空言惟仍懇 朝廷寬以歲時容臣銘

傳分別緩急重輕次 不舉辦經費支絀固不能急切圖成竭力經營又烏敢遷延坐誤現已奏明清理出賦並隨地隨時力求整頓變私爲公如三五年後能照部議以臺地之財供臺地之用卽當奏請停止協款一切改設事宜單內或未經駭載容 臣等續行妥議奏咨用副 國家經畫海疆之至意

一台灣奉 旨改設行省必須與福建聯成一氣如甘肅新疆之制庶可內外相維等因查新疆新設巡撫關防內稱甘肅新疆巡撫台灣本隸福建巡撫應照新疆名曰福建台灣巡撫凡司道以下各官考核大計閩省由總督主政台灣由巡撫主政照舊會銜巡撫一切賞罰之權仍巡撫自主庶可聯成一氣內外相維不致明分畛域又陝甘總督關防內有兼管甘肅巡撫字樣閩浙總督關防應否添鑄兼管福建巡撫字樣恭候 欽裁

一學政向歸台灣道兼理光緒元年曾有議歸巡撫明文現應查照前議由道

將學政關防文卷呈送巡撫管理文武鄉闈按照安徽赴江南彙考之例仍歸福建應試中額亦仍舊例將來生聚日繁文風日盛再行酌核增加奏明辦理一旗后滬尾兩海關向歸將軍管理近年稅項所徵均經撥充台餉現台灣既設行省兩關均隸臺疆可否援照浙江之制改歸巡撫監督應請 敕下福州將軍奏辦

一澎湖爲閩臺門戶須設重鎮以固要區擬將澎湖副將與海壇鎮對調如蒙 兪允應飭先行互調以重海防一切事宜另行奏辦

一新疆以迪化州爲省垣城署無須建造台灣改設行省必須以彰化中路爲省垣方可南北兼顧另造城池衙署需費浩繁一時萬難猝辦所有官制暫仍舊章將來添設廳縣改派營防再行奏辦

一福建巡撫既已改歸臺灣所有撫一標左右兩營卽須移歸臺省惟省垣未

定安置無從以後遇有空名無須募補暫留閩省仍歸總督兼管兵餉亦由閩支發俟台灣巡撫移住中路再行調歸台灣不願移者聽

一台灣改省之後應遵 旨添設藩司一員綜核錢糧兵馬整頓廳縣各官並設布庫大使一員兼經歷事所有建造衙署添設印官百端草創將來須仿照新疆章程奉 旨後再行會同請 簡

一台灣道向兼按察使銜一切刑名由道審轉其驛傳事務亦由道兼治添設司獄一員毋庸另設臬使惟會典職官有按司獄府司獄無道司獄應以候補按司獄府司獄輪流借補

一臺灣鹽務場產不足半由內地運售名曰唐鹽內地長泰南靖等縣澳引額定例撥歸臺灣代銷所徵正溢課釐雖留臺撥充防費尙有抵解各款歸內地鹽務雜支每屆奏銷由福建鹽法道彙核造報各省鹽場引地多行外省閩台

鹽務分辦窒礙殊多應請仍照舊章辦理

一台灣各縣地輿太廣最大如彰化嘉義淡水新竹四縣亟須添官分治統計四縣按周圍百里爲城約可分出四五廳縣將來彰化即可改駐首府另設首縣爲臺灣縣將臺灣縣改爲安平縣應俟添設藩司再行酌辦

一台灣煙瘴之地內地官吏渡台咸視爲畏途向章曾補台灣府廳縣佐雜等缺如回內地卽屬調簡放稍有才智者不肯渡台今擬仿照新疆章程凡到台灣實任如逾三年著有勞績准回內地不計繁簡均須調補優缺芟除調簡舊章無缺當差酌委優差一次惟必得本管官切實考語以免濫邀兩省如有停委撤差之員督撫互咨均不委用以杜鑽營

一臺灣生番歸化已多日漸開闢急須分治添官若照部章廳縣佐雜各員均須循例補署臺灣民番雜處人地苟不相宜萬難遷就恐釀事端僅用合例人

員又未必盡能得力擬請 旨飭部聲明臺灣新設省治暫行不論資格俾得人地相宜俟全臺生番歸化一律分治設官再請循照部章以求實效

一番地日開必添營汛查新疆添設總兵副將參遊千把等官甚多台灣情勢既殊須俟盡撫生番全局方能酌定目前但能隨時察奪具奏或添或改以節餉需

一台灣改設巡撫本擬仿照江蘇分蘇分甯成案於各班人員到省積有三員掣籤一次以兩員分閩一員渡台惟全臺現僅兩府八縣缺分無多若照三分掣一來台必無位置擬俟全台生番歸化一律設官再行照辦目前需員差遣或由司申送或由撫調咨暫難定數免致分發人員到省積滯向隅

一台灣改設巡撫台灣鎮總兵應銷去掛印字樣與新調澎湖鎮總兵統歸巡撫節制

一撫轅原設經制書吏十二名各有清書幫書今福建巡撫事歸總督兼治擬留經制書吏六人酌用幫清各書留督署辦公尙有經制書吏六人酌帶幫清各書赴臺供役撫轅檔案造冊登開關涉閩者逕留督轅關涉台者送台備考臺灣郡縣添改撤裁摺 十三年八月十七日

竊臣等於光緒十二年六月十三日會奏臺灣改設事宜摺內聲明彰化等縣地輿太廣亟須分治設官奉 旨該部議奏欽此旋准部咨議令酌度情形奏明辦理等因伏查臺灣疆域南北相距七百餘里東西近者二百餘里遠或三四百里崇山大溪鉤聯高下從前所治不過山前迤南一線故僅設三縣而有餘厥後榛莽日開故屢增廳治而猶不足光緒元年沈葆楨請設臺北府縣以固北門又將同知移治埤南以顧後山一路全臺官制粗有規模然彼時局勢未開擇要舉行實非一勞永逸之計 臣等公同商酌竊謂建置之法形勢爲先

制治之方均平爲要臺疆治法視內地爲獨難各縣幅員反較多於內地如彰化嘉義鳳山新竹淡水等縣縱橫多至二三百里鞭長莫及治化何由且防務爲治臺要領轄竟太廣則耳目難周控制太寬則聲氣多阻至山後中北兩路延袤三四百里僅區五段分設碉堡並無專駐治理之員前實後虛亦難遙制現當改設伊始百廢且興若非量予變通何以定責成而垂久遠臣銘傳上年九月親赴中路督勦叛番沿途察勘地勢並據各地方官將境內山河阨塞道里田園繪圖貼說呈送前來又據撫番清賦各員將撫墾地方分條續報謹就山前後全局通籌有應添設者有應改設者有應裁撤者查彰化橋孜圖地方山環水複中開平原氣象宏開又當全臺適中之地擬照前撫臣岑毓英原議建立省城分彰化東北之境設首府曰臺灣府附郭首縣曰臺灣縣將原有之臺灣府縣改爲臺南府安平縣嘉義之東彰化南自濁水溪始石圭溪止截長

補短方長約百餘里擬添設一縣曰雲林縣新竹苗栗街一帶扼內山之衝東連大湖沿山新墾荒地甚多擬分新竹西南各境添設一縣曰苗栗縣合原有之彰化縣及埔裏社通判四縣一廳均隸臺灣府屬其鹿港同知一缺應卽撤裁淡水之北東抵三貂嶺番社紛歧距城過遠基隆爲臺北第一門戶通商建埠交涉紛繁現值開採煤鑛修造鐵路商民麇集尤賴撫綏擬分淡水東北四保之地撥歸基隆廳管轄將原設通判改爲撫民理事同知以重事權此前路添改之大略也後山形勢北以蘇澳爲總隘南以卑南爲要區控扼中權厥惟水尾其地與擬設之雲林縣東西相直聲氣未通現開山路百八十餘里由丹社嶺集集街徑達彰化將來省城建立中路前後脈絡呼吸相通實爲臺東瑣鑰擬添設直隸州知州一員曰臺東直隸州左界宜蘭右界恆春計長五百里寬三四十里十餘里不等統歸該州管轄仍隸於臺灣兵備道其卑南廳舊擬

改設直隸州同知一員水尾迤北爲花蓮港所墾熟田約數千畝其外海口水深數丈稽查商舶彈壓民番擬請添設直隸州判一員常川駐紮均隸臺東直隸州此後路添改之大畧也謹案臺灣土疆賦役日增月廣與舊時羈縻僑置情勢迥殊因地制宜似難再緩况年來生番歸化犴榛之性初就範圍尤須分道拊循藉收實效輯遐牖邇在在需員臣等身在局中既不敢遇事紛更以紊典章之舊亦不敢因陋就簡以失富庶之基損益酌中期歸妥協如蒙俞允擬先委員署任主辦畫界分疆並請飭部分別換鑄關防印信先行頒發俾昭信守俟全臺勘定再將四至冊圖並何項缺分詳細奏咨請旨定奪至教職暨沿山沿隘佐雜武弁並屯地等官應添應改亦擬於郡縣設定後分飭各員就近體察詳請奏咨其餘未盡事宜統俟陸續會商隨時具奏辦理

光緒十三年九月初八日奉硃批該部議奏欽此

臺灣水師員缺並武職補署章程摺 十三年十月十三日

查臺灣綠營額設水陸十八營水師七營陸路十一營共額兵一萬四千餘人自同治八年前督臣左宗棠奏准裁兵加餉後存兵七千七百餘人光緒三年前撫臣丁日昌復請汰弱留強暫停募補截至光緒八年經臺灣鎮總兵吳光亮續裁實存兵數四千五百餘人年支餉銀十七萬餘兩聲明如有革故隨時募補統計水陸現存兵額內水師七營分隸澎湖安平各協原定船艦久廢無存台澎孤懸海外今昔懸殊非兵輪無能戰守此項經制水師械船卽存亦豈能當巨礮况所存兵力均經選入練兵徒有虛名茫無實籍與陸師營汛皆等具文兵丁積習惰弛安能應敵將領或老年疲病嗜好太深或久入官場習氣過重偶遇練兵出隊皆另求管帶勉示虛威補署人員更多功滑遇有槍劫重案事前既無稟報事後亦不緝捕惟事匿盜庇娼抽收賭費若不變通整頓何

以肅戎政而保巖疆臣等因時制宜詳加商酌除澎湖水師兩營兵丁暫照原章俟總兵吳宏洛接任後再議整頓外其餘安平滬尾噶瑪蘭水師五營久無船械未便任其廢弛擬請改爲陸路仍隸原營並請將安平副將移駐後山水尾該處已經臣等奏請改爲臺東直隸州安平副將擬請改爲臺東協請將北路副將移駐埔裏社均作爲陸路題補之缺所轄營汛北路副將可仍舊章臺東協須另行因地籌設水尾爲台東新建之地埔裏社爲南北交錯之區毗連生番形勢扼要既可控制窮荒又可免添營汛庶幾籌防節餉免蹈虛文惟設營防於新闢之地民番雜處必須將弁得人查台灣水陸馬步兵丁每名月餉及加給成餉兵丁米練餉均在三兩二三錢練兵出防每月又加銀一兩二錢統計四兩五錢較勇糧尤重若一兵不得一兵之用安事贅疣自非遴選將才萬難挽回積習惟有就現在軍營官弁並投効武職之中或年壯力強未沾惡

習或戰爭奮勇辦事勤勞擬請由臣等按月考試如五槍能命中三四者卽分別奏咨留標以後考列在前准其補署論槍法之高下不論資格之淺深庶鑽營之弊不禁可除疲老之將不遺自去於例章不無破格於營伍差可振興事關水陸營制員缺更定移調並各項武職人員酌留補署章程相應請旨飭部寬以例章准予變通辦理俾挽積習而免虛糜如蒙俞允再由臣等認真挑選查取留臺各將并履歷考試例等後奏咨備案

光緒十三年十一月十七日奉 硃批兵部議奏欽此

移設陸路副將酌撥營伍摺 十四年四月十五日

竊准兵部咨議覆台灣武職改設員缺一摺奉 旨依議欽此鈔錄原奏內稱所請安平水師副將移紮後山水尾暨安平以下水師各營均改陸路應毋庸議至台東應如何設官控制准在附近水陸營抽撥布置等因准此查台灣洋

面遼闊港汊紛歧緝捕巡防動關緊要部議以經制水師各缺未便全改陸營原爲汎防起見至安平水師副將昔年建設原屬要區惟念海防情勢今昔遠殊而台東控扼後山議設武職大員尤難遷就臣等往返函商安平僅距台南府城數里台灣總兵兼轄水陸駐紮府城足堪照顧海口副將一缺無船無兵久成虛設台東爲後山扼要之區非參遊所能鎮壓就近營汎無可撥移現當餉項支絀又未便輕議添設徒糜餉需若以安平水師副將大員改爲台東陸路副將所屬中右兩營都司等官隨同移撥其左營遊擊現駐鹿港將來中路有撫標兩營不虞單弱應將鹿港遊擊作爲安平水師營遊擊隸台灣鎮管轄卽將台灣鎮屬之恆春遊擊改隸台東仍使鎮協兩標各還原營之數似此量爲布置餉項毫無增旣於新設地方得資實濟而於水陸營制亦屬相符相應請旨飭部議行以資統攝

光緒十四年五月初六日奉 硃批兵部議奏欽此

按安平去臺南府城僅數里鎮將既兼水陸副將又無船無兵紙上空名贅
疣何用改爲後山副將自屬萬全部臣堅持舊制至死不移此與明季兵樞
何異文臣徒持例本不出國門可笑尤可病也 陳澹然識

臺北建造衙署廟宇動用地價銀兩立案摺 十五年七月初七日

竊查台北自光緒初年分設郡治僅將城垣文廟試院府署陸續粗成其餘地
方工程因民力難籌多未興辦 臣於光緒十年奉 命渡台當駐臺北府城淡
水縣署其時城內盡屬水田不特屋宇無多並無輿馬可通之路所居縣署半
係草房將佐幕僚僅堪容膝戰事既定逼處殊難乃令淡水縣勘購民田按方
給價砌築橫直官道一面招商造鋪闐闐漸興嗣議籌辦分省中路省會一時
驟難猝辦撫藩大吏各局員紳不能不先造辦公之地且臺北地踞上游海口

形勢極重將來或須添設道員或巡撫隨時分駐亦不能無公廨以便居留乃擇城西北隅勘建巡撫行署並親兵營房附左近造藩司行署及銀庫局所淡水改廳爲縣舊治現爲新竹縣所居因復造淡水縣并艋舺營參將各官衙署海外商民頗重神廟如關帝天后風神龍神各廟敬祀尤多均經造修告歲統計臺地近年貨釐鹽茶等項涓滴歸公已無外銷之款此等工款平時原可責令紳富籌捐惟現當清賦升科既未便踵襲陋規按田科派且臺北修造城工并法防捐助民力已勞地方亦形竭蹶再四籌畫惟有將各工物料地價銀兩據實開單恭呈 御覽仰懇 飭部立案准令作正報銷以昭核實

光緒十五年八月初三日奉 硃批該部知道單併發欽此

新設郡縣興造城署工程立案摺 十六年閏二月十六日

竊據署台灣布政使沈應奎台灣道唐景崧等詳稱台灣分省以中路彰化橋

改圖地方爲省會添設首府曰台灣府首縣曰台灣縣割嘉義彰化轄地就林
圯埔設雲林縣分新竹轄地就苗栗縣改埔裏社爲撫民廳均經分徵錢糧劃
清地界遴員署理先後彙詳奏咨議准各案自臺近年籌辦海防築台購礮剝
撫社番清丈田畝興辦鐵路購買輪船庫儲早經罄竭全台歲入及閩省關年
撥餉需均經支款抵用應辦分治建城一切目前本無力舉行惟郡縣旣設各
工可緩而城垣保障攸關衙署監獄爲辦公羈禁之所未可緩圖除澎湖城垣
衙署已經興修後山台東人民稀少尙難興辦外其台灣省城並雲林苗栗兩
縣城似宜陸續興修查台灣山溪祇生卵石所需杉木石條等料皆須內地采
輸中路港汊不通輪船且風浪無常卽商船亦惟夏秋往來不能長年運載原
勘省城基址周圍十一里有奇若遽起造磚城石城經費浩繁一時萬難籌集
曾由道員林朝棟會同縣令黃承乙籌議就地搬運卵石掘地填基先築土城

一面開掘城濠牆外徧栽刺竹八方四隅應建城樓礮台水關閘垣一併用磚
雲林苗栗兩縣工程較小亦可仿行以資捍衛從前台南府城卽係土築續於
乾隆間始建磚城至各縣衙監獄並令先修其知府武營及院司各衙俟經費
的籌再行分年續建此外廟祠試院由府縣邀商紳富先儘民捐如果捐款難
籌再行籌助辦理似此因陋就簡草創開基縱使撙節萬分經始安能無備查
台灣清賦之後錢糧較之舊額現有盈餘擬請自光緒十六年起卽由錢糧分
年提撥以台灣自有之財辦台灣之事核與戶部奏案亦屬相符應請奏咨准
予興辦至前奉部行以修建工程應先專案估報定限造銷原應遵辦惟台灣
中路不通水道非俟料件運到核價通籌無從預決當此經費支絀惟有力戒
員紳認真撙節斷不敢稍任虛糜若循例估工必致妄估浮開以防不給從前
修建恆春縣城經費二十萬現在倒塌不堪萬一監工紳吏執此計工更恐無

從核實應請奏寬定例准歸彙案造銷必較恆春有減無增破除虛冒等情詳請奏咨立案 臣查台灣建立省城添設郡縣一應城垣衙署工程重大需費浩繁前於鐵路改歸官辦案內曾請俟鐵路工竣再行辦理省城工役現經該處官紳籌議先築土城就地運用卵石爲基外栽刺竹僅用磚石建築城門礮台水關閘埧較之全城純用磚石所省實多自應及時興辦該司道等請就錢糧項下自十六年起分年提撥將省會及雲林苗栗兩縣城垣衙署次第造修以台灣自有之財辦台灣之事亦與分治原議相符應懇 恩准飭部立案並准暫寬例章彙案造報以歸簡易而杜虛糜伏惟 聖鑒

光緒十六年三月二十七日奉 硃批著照所請該部知道欽此

澎湖建城立案片 十五年五月

再澎湖一島爲閩台咽喉實屬海防最要之地四面蒞海形勢散漫無險可守

光緒十一年法船退後臣同前督臣楊昌濬會籌防務相度其間昌濬卽有建城之議澎地紳民亦屢稟請建城垣臣令澎湖鎮總兵吳宏洛詳細察勘定於媽宮地方憑海築城聯絡礮台以資捍衛稟請於上年八月興工除飭取周圍高厚丈尺確造估冊咨部立案外僅會同督臣卞寶第附片具陳

光緒十五年六月初七日奉 硃批該部知道欽此

請建沈葆楨吳贊誠專祠摺十五年三月十二日

竊據台灣各屬紳士中書施士浩郎中蔡占鼇主事蔡壽星道員林朝棟等連名呈稱台灣生番頑梗戕害生靈久爲地方大患現蒙勦撫兼施社番一律歸化大啓榛狉聿新墾闢民番樂業內外相安感今日之蒙庥溯從前之創始伏思故兩江總督前督辦台灣海防大臣沈葆楨於同治十三年光緒元年兩次渡台創議開山撫番督兵籌辦拓出埤南一廳恆春一縣改設台北一府控制

撫馭番事始有規模厥後兼署福建巡撫船政大臣吳贊誠亦兩次渡台光緒三年接辦防務布置安撫事宜周歷番區自恆春埤南花蓮港以達宜蘭不上千里觸染瘴癘與疾出山規畫方新病根已重復於光緒四年親督漳州鎮總兵孫開華台灣鎮總兵吳光亮剿辦後山番社由岐來沿海地繞回台北感動舊疾請假就醫江南未幾病沒其爲 國盡瘁勤事忘身與沈葆楨後先輝映沈葆楨已蒙 特恩准於立功省分建立專祠均各遵 旨籌建台灣現經分省同屬立功地方祀典闕如應請一律遵建至吳贊誠雖係在籍病故究其受病之由實因督剿社番觸染瘴癘所致台疆紳庶歌泣不衰茲當撫番事竣理合呈懇一併奏請於台灣建立專祠以抒遺愛並准幫辦全台開墾撫番事務太常寺少卿 臣林維源咨請前來 臣查台灣周環一島生番不靖久患民生沈葆楨督辦台防創籌開撫奠安心腹治內實爲攘外之宏謨吳贊誠承其規畫

勤事忘身不避瘴癘督剿番社開闢道途若非該大臣等忠心實力開基於前
臣何能於三四年間舉台番社一律撫清竟使輸誠歸化今台地紳民追思功
德感慕出於至誠應懇 天恩准將沈葆楨吳贊誠並於台灣建立專祠由地
方官春秋致祭以彰蓋績而順輿情吳贊誠可否 加恩並 准予宣付史館
立傳出自 逾格鴻施

光緒十五年三月三十日奉 硃批該部議奏欽此

請建林文察專祠摺 十六年八月二十九日

竊據台灣各屬紳士中書施士浩主事蔡壽星道員林維濂及舉人貢生等七
十五名呈稱故提督林文察由軍功於咸豐年間轉戰浙閩兩省功績卓著
洊任福建福甯鎮總兵同治二年署理福建陸路提督辦理臺灣軍務事平內
渡三年十一月於漳州剿賊陣亡奉 旨照提督例優卹給銀祭葬 加贈太

子少保銜 予諡剛愨並給騎都尉兼一等雲騎尉世職交翰林院立傳入祀
京師本籍及陣亡地方昭忠祠光緒四年奏准於漳州府城捐建專祠十五
年恭逢 歸政盛典蒙 恩賜祭一壇仰見 朝廷錄節報功有加無己之至
意伏查林文察原籍彰化縣台灣分省改隸台灣縣治方同治二年台灣之告
警也逆匪戴萬生乘內地髮賊之亂陷踞彰化縣城巨股林慈成等各據要隘
鷓張蔓延三百餘里南北間阻不通林文察督率勁旅渡台克復彰化城池擒
獲諸叛賊正法肅清臺境地方始獲安全設非當時迅奏膚功全臺豈堪設想
紳等追懷舊德歷久彌新茲當臺灣分省之初僉願鳩資就省城捐建專祠懇
奏列入祀典春秋由官致祭等情前來 臣查林文察懋著勳勞見危授命仰邀
贈卹備極優隆上年恭逢 歸政盛典復蒙 賜祭具見 聖恩眷注迥越
尋常當其督兵渡台剿除逆亂全台弭定功績昭彰該紳士等追感舊恩情詞

懇摯應懇 天恩俯念林文察功在桑梓准於本籍台灣省城建立專祠由官春秋致祭以彰忠盡而順輿清伏乞 聖鑒

光緒十六年十月初一日奉 硃批著照所請該衙門知道欽此

請卹戰死將士建昭忠祠摺 十一年七月二十八日

竊基滬之役戰守經年死傷實衆經 臣等疊次隨摺聲請 賜卹在案現由各營陸續查報死事員弁一千六百餘人查台灣一隅地勢孤危煙瘴惡厲軍士當疲病之餘戰守一年之久或殺敵致果臨陣捐軀或傷重殞身或積勞病故均屬戮力疆場歿於王事重泉齋志海國羈魂碧血青燐傷心慘目迹其忠烈實足哀矜生旣莫邀 懋賞之榮死宜共沐 褒崇之典理合分別陣亡及積勞病故員弁銜名開具清單除勇丁另册咨部外合無仰懇 天恩一併交部從優議卹並請 准於臺北府城建立淮楚昭忠祠一所將基滬經年戰守以

死勤事各員弁列祀祠中官爲致祭以彰忠藎而肅觀瞻如蒙 俞允其列祀員名建祠經費再由 臣等妥籌以彰 聖明激善褒忠之至意

軍機大臣奉 旨彭沛霖等均著照所請從優議卹餘依議該部知道單併發欽此

臺設西學堂招選生徒延聘西師立案摺 十四年六月初四日

竊惟中外通商互准研學文藝自 京師設立同文館招選滿漢子弟延請西師天津上海福建廣東仿造槍礮船械之地無兼設學堂風氣日開人才蔚起海防洋務利賴良多臺灣爲海疆衝要之區通商籌防動關交涉祇以一隅孤陋各國語言文字輒未知所講求 臣初到台繙譯取才內地重洋遙隔要挾多端月薪至百餘金尙非精通西學因思聘延教習就地育才初擬官紳捐集微資造就一二良才以資任用詎一時聞風興起膠庠俊秀接踵而來不得不開

設學堂以廣 朝廷教育人才之意先後甄錄年輕質美之士二十餘人延訂英國人布茂林爲教習生童酌給膏火釐定課程並派漢教習二人於西學餘閒兼課中國經史文字既使內外通貫亦以嫻其禮法不致盡蹈外洋習氣致墮偏諛日以已午未申四時專心西學早晚則由漢教習督課國文遇西國星期課試論策每季委員會同洋教習考校一次別其差等分行獎戒或有不堪造就者隨時撤退補更計自光緒十三年三月起迄今已逾一年規模粗立臣督親加攷察所習語言文字均有成效可觀擬漸進以圖算測量製造之學冀各學生砥礪研磨日臻有用而臺地現辦機器製造煤鑛鐵路將來亦不患任使無才本年復添學生十餘人洋教習一員月支修廩洋幣三百五十元漢教習二員月各支修廩洋幣五十元共合庫銀三百二十四兩諸生由附生考入者月給銀八兩由文童考入者月給銀五兩七錢幼童月給銀三兩八錢其學

生座具及隨時應用外洋圖籍等項據實開支約計修膏雜費年需銀七千餘兩現在鹽務項下動支將來必須建造學堂以資棲宿應用經費俟工竣後再行造銷應懇 飭部先行立案

光緒十四年六月二十日奉 硃批該衙門知道欽此

覆陳臺省初分各局驟難裁併摺 十五年二月十三日

竊准戶部咨光緒十五年十一月十五日內閣奉 上諭國家綜核度支必先嚴除冗濫從前各省辦理軍務創立支應採辦轉運等局本屬一時權宜不能視爲常例迨軍務敕定又以善後爲名凡事之應隸藩司者分設各局名目衆多鹽務則督銷分銷局卡林立大率以候補道員爲總辦而會辦隨辦各員其數不可勝計所有專管之藩運兩司轉以循例畫諾爲了事又如清訟保甲捕盜等事本係臬司專責亦皆另設一局授權委員論公事則推諉轉多論庫款

則虛糜甚鉅至船政機器各局原爲當務之急而局用開支尤屬弊竇而塞漏卮前於光緒十一年八月二十二日欽奉 懿旨各省設立各局種種名目濫支濫應無非瞻徇情面爲位置閒員地步飭令大加裁汰定議復奏仰見 聖慈誥誡嚴明各該省雖經遵議奏明量爲裁減總未能將煩費認真除革近年以來冗員愈多浮費愈甚著各直省將軍督撫破除情面將所有各局通行查核或刪減或歸併其有必不能裁者卽將按月經費限定數目不准任意增添自接奉此旨後勒限三個月將議定限留各局開單奏報並將各局經費每月若干咨報戶部存案該部於每年報銷冊內逐一查對毋任稍有含混理財與用人相輔而行實爲圖治之大端各將軍督撫身膺重寄務當振刷精神切實經理不得狃於積習敷衍塞責將此通諭知之欽此咨行到 臣當經欽遵轉行將各局切實裁減其實不能裁各局月需經費若干開報核辦去後茲據臺灣

布政使沈應奎會同臺灣道兼按察使銜唐景崧詳稱查臺灣海外孤懸自建
行省辦理撫墾百廢待興分設各局有堪裁併者均已隨時裁汰現存之善後
稅釐機器軍裝文報通商官醫郵政電報以及各路撫墾各局察看情形均屬
驟難裁併台灣初設行省百端草創本與他省情勢迥不相同經費按月尙難
限定惟有核實支銷隨時察看各局如有可裁卽當裁併以節糜費具詳前來
臣查臺灣甫經建省尙未竣工草昧初開萬端待舉經營締造用款浩繁部
前議以臺灣本地之財供本地之用當此庫藏奇絀臣方仰屋興嗟尙何敢位
置閒員增添繁費此中情狀久在 聖明洞鑒之中况分省之始各局月支經
費增減無常殊難定限惟有恪遵 諭旨督同司道切實經釐隨時節省如有
可裁之局並卽破除情面隨時裁撤斷不敢稍涉因循以期仰副 聖主節慎
帑藏至意

恭報南北考試完竣摺 十五年五月二十一日

竊臣兼管臺灣學政本年舉行歲試已將前赴臺南起程日期奏報在案隨於四月初一日乘飛捷輪船起程次日至澎湖查看礮台工役旋抵台南府城開考二十二日考竣二十三日駛還臺北先將巡撫衙門積案清釐三十日開考臺北各屬五月二十一日考竣俱經嚴密關防秉公衡校兩棚所試併計文童四千餘人武童六百餘人均各取進如額本年恭遇 恩科除考列等第生員以歲作科外仍各隨棚錄取遺才屆時一併送闈鄉試 臣查各屬文風臺南以彰化安平爲上嘉義鳳山次之臺北以淡水爲上新竹宜蘭次之武風大畧相等所有場規士習均甚安詳惟於台北查獲鎗替一人卽發提調官枷責示懲並扣除失察廩生淡水縣有年逾八十之文童二人文理尙平篤志不倦經 臣仰體 皇仁賞給頂戴爲耄年稽古之榮當堂發落各生諭令勵學敦行用副

聖朝樂育裁成之至意抑臣尙有請者臺地向分閩粵二籍考試各童閩八粵二番籍雖係土著應考無多自開辦招墾撫番閩粵墾民招徠踵至番民涵濡德化知識寢開近年以來文風蒸蒸日上盛原定學額不敷登進之資現在府縣分治應請酌增學額以宏作育而勵人才容臣另行奏辦

增設府縣請定學額摺


十六年閏二月初七日

竊查光緒四年台北新設府治文武學額接准部議臺灣府現改臺南府額進文童閩籍十八名澎湖二名加廣九名粵籍五名加廣一名安平鳳山嘉義三縣各取十七名彰化縣取進十八名臺北府額進文童閩籍十三名粵籍五名加廣一名淡水新竹宜蘭三縣各進六名武學臺南府額進閩籍十六名加廣九名粵籍二名加廣一名安平鳳山嘉義三縣各進十四名彰化縣取進十一名臺北府額進七名粵籍二名加廣一名淡水新竹宜蘭三縣各進四名遵辦

在案茲台灣改設行省在彰化橋孜圖地方建立省城添設臺灣縣爲首府臺灣縣爲首縣就嘉義彰化劃界添設雲林縣就新竹劃界添設苗栗縣與埔裏社廳均隸臺灣府屬新設府縣文武學額自應分別議加並據澎湖廳及臺北府屬各生童稟請加額飭據各府分案議詳臣查臺灣自隸版圖涵濡聖澤二百餘年土地日增人文日盛各屬應試文童多至逾千少亦數百三府屬粵童數亦加增不少於內地大中等學從前臺南府屬所定學額尙不懸殊北府屬額已過少臺中蔚萃人文冠於南北且臺灣府縣爲省會首學尤與外府縣不同彰化嘉義新竹三縣轄地雖分幅員猶廣自清丈後賦額加增統計全臺溢出數倍現當分省伊始供賦既清學校鼓勵人才不能不亟爲籌議澎湖廳近年應試人數亦已倍增恆春縣爲後山新闢之區文額現尙無多仍附鳳山考試請將臺南府學應撥彰化縣文童三人改撥澎湖廳二恆春一彰化縣另

歸臺灣府學撥取臺南府學廣額九人內額四人撥歸臺灣府學外其餘正廣額數及安平鳳山嘉義三縣學額數悉仍前淡水附在府城基隆廳附淡水考試應請改爲大學新竹宜蘭兩縣作爲中學臺北府各屬進額既加府學請加三額埔裏社廳附新設臺灣縣考試臺灣彰化兩縣均爲大學雲林縣爲中學苗栗縣籍閩粵各居其半粵籍歸府學取進閩童較少定爲小學臺灣府照內地府學取進二十人並照舊設臺灣府原定成案另設粵籍九人凡各縣取進文童均照大中小核計其應試武童台南人數較多台北府屬仍照舊額無庸議增臺灣府學除由台南府分廣閩籍三名外請定十二名粵籍四名所屬各縣分別酌定名額均自本屆科試新額辦理至選拔貢額府學向定二人州縣學各一名前奉部行學校人數如逾百人前期一二年請設拔額現距丁酉拔科尙遠屆時何學人數足額再行奏請選拔又優貢一項現在分省已成擬請

定爲二額自辛卯科舉行以期仰副 朝廷作育人才至意
光緒十六年三月十七日奉 硃批禮部議奏欽此



卷六勘誤表

七	七	七	七	七	七	五	三	二	一	頁數
廿二	二十	十八	十一	五	三	十七	六	七	四	行數
十六	三十	二十	十八下	九	七	十	十四下	十四下	十二三	字數
卑	瑣	卑		且	竟	放			退稍	誤
埤	鎖	埤		具	境	故			稍退	正
			之				閩	季		脫
										衍

十四	十一	十一	十	十	九	九	八	八	七	頁數
九	十四	二	十五	十	十七	九	廿一	四	廿二	行數
七	十六下	十八	十九	八下	十四	七	廿四	廿八	廿九下	字數
提			病		例		功	糜		誤
署			痛		列		巧	糜		正
	任			益					治	脫
		左				丁				衍

劉壯肅公奏議

卷六勘誤表

一

一

			十九	十九	十九	十七	十七	十七	十五	頁數
			十二	六	一	二	一	一	六	行數
			十七	廿八	廿六	一	廿八廿九	廿五	二十	字數
			額		縣			屬	編	誤
			除		府			多	編	正
				臺						批
						厄	而塞漏			衍

劉壯肅公奏議 清賦畧

卷七

量田清賦申明賞罰摺 十二年四月二十八日

竊查臺灣糧課自入版圖以來循鄭氏舊規每丁歲徵銀四錢八分六釐乾隆元年欽奉 恩諭臺灣丁糧著照內地例中減則每丁征銀二錢以紓民力歲征銀三千七百六十餘兩逮十二年乃議勻入田園征收番衆所耕概不完賦仍照舊就丁納糧道光間通計全臺墾熟田園三萬八千一百餘甲又三千六百二十一頃五十餘畝穀種折地一千四百三十餘畝年征粟二十萬五千六百餘石餘租番銀一萬八千七百餘元至今數十年墾熟田園較前已多數倍統計全臺額征銀八萬五千七百四十六兩洋銀一萬八千六百六十九元穀十九萬八千五十七石久無報丈升科我 朝輕徭薄賦亙古所無於台灣尤厚雍乾之間屢奉 恩諭臺灣賦稅不准議加其時海宇澄清昇平無事 朝

劉壯肅公奏議

卷七

一

廷視台灣一島無足重輕現在海上多事台灣爲海疆險要之區奉 詔改爲
行省事繁費巨今昔懸殊 臣忝膺斯土目覩時艱值此財用坐贖之際百廢待
舉之時不能不就地籌畫期於三五年後以台地自有之財供台地經常之用
庶可自成一省永保巖疆况節次欽奉 諭旨開源節流今田園賦稅率土輸
將乃司農歲入之常經 列代保邦之大法舍而不計徒乞鄰疆雖舌敝唇焦
緩急終不可恃 臣渡台以來細訪民間賦稅較之內地未見減輕不勝驚愕久
之察所由來皆係紳民包攬如某處有田可墾先由墾首遞稟承包然後分給
墾戶墾首但呈一稟不費一錢成熟後墾首每歲抽租一成名曰大租又有屯
租隘租諸名不可枚舉究之正供糧課毫無續報升科如台北淡水田園三百
餘里僅征糧一萬三千餘石私升隱匿不可勝窮 臣現由內地選調廳縣佐雜
三十餘人分派南北各縣由各縣選派正紳數人先行會查保甲就戶問糧一

俟戶畝查明再行逐田清丈委派台灣府程起鶚台北府雷其達各設清賦總局督率推行至於賦稅重輕應俟丈後再請 飭部覈議惟台灣民風強悍一言不合拔刃相仇聚衆挾官視爲常事或言林爽文之變實因升科逼迫遂起戈矛委員查賦下鄉輒多畏葸且萬山叢雜道路崎嶇若非勤實耐勞之員協同正紳清查明確不特無裨實濟且恐歲事無期再四思維不得不嚴定賞罰以求成效如各縣官吏員紳清查妥速辦理認真可否由 臣請照異常勞績從優奏 獎以示鼓勵倘有賄託隱瞞或畏難延誤甚或需索擾民卽行叅革庶期上下鼓舞實力奉行爲 朝廷經久之謀除地方吞欺之弊便民裕 國莫大乎斯是否可行伏祈 聖鑒

光緒十二年五月初八日軍機大臣奉 旨覽奏已悉卽著督飭派出各員紳認真辦理出力人員准照異常勞績奏獎倘有賄託隱匿畏難延誤情事卽着

嚴行參革該部知道欽此

整頓屯田摺 十三年八月初二日

竊_臣等查乾隆五十三年前大學士_臣福康安以台地林爽文之亂番目潘明慈等隨剿有功事平議選番丁四千設屯十二所就其社長授以千把外委土職十八員按丁按地蠲免賦糧每丁自一甲至一甲三四分不等屯弁遞加共授番地五千六百九十餘甲此外復撥民間溢額田園三千七百三十餘甲每年徵收租穀四萬一千二百六十餘石每石折徵銀一元又九芎林租穀折銀八十元共折徵番銀四萬一千三百四十一元有奇此項租折番銀專充屯兵弁丁俸餉是爲屯租每丁年支銀洋八元外委支銀洋六十元把總支銀洋八十元千總支銀洋一百元每年支額餉番銀洋三萬三千二百四十元其租地散隸台南北各縣由縣徵收分解中南兩路理番兩廳歲於二八月間由台灣

道委員會廳放領又年支隘丁口糧佃首辛工銀二千一百餘元其餘留爲屯費以備旱潦之需此昔年設屯授地徵租支餉章程也迄今百餘年來屯租則徵不足額屯餉則減半放支歷年既多不獨屯丁疲瘵殘弱甚且有名無實半由廳書屯弁冒領瓜分若一旦革裁此輩視爲世業夫豈能甘臣等熟思審計非設法整理改絃更張萬不能收實效查番屯授地之初名爲獎功實資捍禦內山番衆故選壯丁屯傍內山蠲其供賦導令墾荒其慮至爲周密今則事殊時異生番多化拓地日深所設屯營已居腹內所授埔地久爲膏腴且番地雖免完供而向有番餉番租各名目私征之數視民田下沙則例殆有過之而其典賣漢民則雖業數更主猶名番地倖免正供甚至狼狽爲奸竟以糧田納番租而冒番業現當查辦全臺田賦無問民番寸土皆關賦役必須一律丈量方免影射該屯丁撫養百年均係 朝廷赤子無論屯田番地皆宜切實丈量歸

入清賦案內分別升科將各屯編籍爲民俾令各執各業庶幾民番一體畛域
皆忘既作其力農守分之心並示以踐土食毛之義伏查屯田原撥之數屢遭
兵燹檔案無存由縣催徵但知歲額責成佃首完納并不知田在何所戶租幾
何由是佃棍以多稼而納薄租以磽确而更沃產竊佔盜賣上下相蒙率以水
冲沙壓倒報而例蠲之以故積欠歲增與餉口細欲清其源非改租爲賦不可
况租者一時之權宜賦者萬年之經制現既一律清丈另立圖冊照則升科所
有屯餉仍於此款改徵提存支放於租例不無加減於餉額仍守成規番丁編
屯以來世食額餉田無賦糧拊循可謂周至宜乎家給人足遠勝平民乃富庶
未覘貧蹙滋甚蓋番性不善居積不事貿遷惟以墾獵爲生計卽有田園亦招
漢民承佃輾轉轉因而覬覦始抗其租繼據其產番丁失業轉死甚多至其
屯餉歲入本微復以屯租闕額減半放支屯弁吏胥從中尅扣爲數更屬無多

地日削而聚族日繁餉愈微而治生愈拙番丁疾苦控訴莫由臣等查屯丁世沐皇恩佐平臺亂習居烟瘴好勇耐勞誠能訓練有方實較綠營遠勝擬將全台番丁認真裁汰仍留原額四千酌裁土勇就其原餉每年按屯抽調分扼山內生番半年一換每名行糧按月加給番銀四元屯弁照營哨酌加輪流接替均以到防之日起支其管帶哨弁卽飭屯弁分轄所屬以免他省弁目語言不通別選熟悉番情將官統帶以便操練步伐教習營規其未經出防之丁均歸臺灣鎮統屬由各縣營管帶以補綠營兵丁之不足以後屯營坐餉每年仍給八元統歸臺灣鎮支發出防行糧歸統將發給以期兵歸實用餉不虛糜於撫馭屯番之中仿寓兵於農之制似於屯丁供賦兩有所裨至此項番屯地畝舊額是否相符改收正供若干應俟歸入全臺清賦案內分別覈辦

光緒十三年八月二十日奉 硃批著照所請該部知道欽此

臺畝清丈將竣擬仿同安下沙定賦摺 十三年九月二十四日

竊_臣於十二年四月十八日具奏臺灣丈量田畝一摺奉 旨覽奏已悉卽著督飭派出各員紳認真辦理等因欽此_臣遵飭府縣並在事員紳認真丈量每縣或分十餘班多至二十餘班不等嚴定賞罰不許曠延稍有玩違均經撤革以期妥速告竣現據淡水臺灣嘉義彰化等縣先後稟報丈竣經_臣飭令清賦總局布政使邵友濂道員陳鳴志督同南北兩府會商定賦升科刪除各項名目每畝征銀若干以杜將來浮收之弊務期有利於國無損於民茲據邵友濂等詳稱台灣自隸版圖田園未經清丈供賦輕重南北懸殊如台灣鳳山嘉義三縣所征供粟皆沿鄭氏原租賦征極重續闢之彰化淡水噶瑪蘭各廳縣均照同安下沙則折征供粟賦額較輕統計全額無多歷辦冊銷有案自道光初年報升之後續墾田園羣相欺隱又有隘租番租各名目吞匿影射均未報升

此次清丈將竣台俗田園論甲約有四十餘萬甲之多比原額溢加數倍惟舊
征新額向無鱗冊可分若照舊開征重輕不一小民苦累輕減何由自非通籌
全局另訂賦章不可據臺灣臺北兩府詳察會覆擬將現丈田園無論新舊悉
照同安下沙成例分則配征化甲爲畝以一甲作十一畝仿條鞭辦法刪去浮
征等名凡地丁糧耗等款併入正供並化穀價折征提充正賦每十一畝上田
征銀二兩四錢六分零中田征銀二兩零下田征銀一兩六錢六分零上園視
中田中園視下田其下園及下下之田土至瘠薄照下田核減二成下下園照
下下田遞減此外沿山沿海及墾荒未熟各田園暫予剔存未歸額數從緩升
科先後核定賦則分飭各屬填造圖冊備案等情會詳請 奏前來 臣查臺灣
建治之初賦額無幾至今休養生息墾闢倍增一歲再收地方漸臻富庶現在
設立行省風氣已開今昔情形迥異全臺賦則似應劃一以免不均承糧老業

本沿鄭例失之過重自應均平續墾升科改照同安下沙則折配供粟各縣輕重相懸田復新舊莫辨加以官產番地屯田隘租等項名目繁多無從究詰臣熟思審計方今籌防建置需款孔殷財用大端本以正供爲首賦亂如此非清釐劃一不足以除積弊卽不能裕正供臣於上年 奏明清丈無論新舊田業但係久經成熟均予一體升科以田畝之瘠腴爲賦則之增減田有高下賦無重輕核實持平輿情允翕茲幸仰奉 宸謨官吏員紳辦理尙爲精核不日告竣該司道等所擬賦則化甲爲畝每十一畝上田徵銀二兩四錢六分零中下等田照則遞減內一半係原徵每甲下沙則銀數一半化折徵穀價提入正供既未更張舊制亦非新加於民並仿條鞭辦法舉丁糧正耗一併刪繁就簡以便鄉愚易知易從胥吏無所朘削統計全臺糧賦每年正供數僅十八萬現丈田園溢出數倍每年約可收正供銀七十萬內外查照全臺各縣最輕之賦尙

屬有減無增歷查臺灣田園素多隱匿從未丈量此次一律丈清是以定則雖輕徵數較鉅民生 國計裨益實多其未入額征各地畝收成既寡謂緩升科既據該司道等詳稱前情案關賦則大計敬繕清單請 旨飭部核議以便頒示地方使知賦則輕減雖升科無難完納臺民嗜義必將踴躍輸將 臣更有請者查銀糧正供之外向有補水平餘各省情勢既殊卽一省之中各縣仍多互異若不明定章程共相法守地方官任意加派民累何堪台居海外從前 恩詔迭頒不能加賦現在改設行省部議以台灣之財供臺灣之用 臣不得已力排衆議清丈田園每歲正供可得七十萬內外以視廣西川貴正額實多實非 微 臣始願所及以後若有私加浮收等弊不獨負 朝廷撫綏海外島民之意且恐激出事端 臣與藩司邵友濂等再三籌議寧爲怨府不累小民惟有據實直陳予以限制臺地通用番銀今賦則改照內地應需紋銀補水每兩隨收一

錢外擬酌定平餘銀一錢五分爲升科各縣辦公之用其不能升科之恆春臺東埔裏社各缺仍須外籌津貼以免官虧臣見內地浮收病民期於力除積弊恐與部章未合不得不縷晰陳明伏求 訓示

光緒十三年十月十二日奉 硃批戶部速議具奏單併發欽此

再自臺灣清賦以來各屬田園溢逾畝額民間管業新舊混淆或有田無契或田與畝乖若由各縣逐家查契對冊按圖不無紛擾應於丈竣後一律由藩司換發丈單以後如有出賣換業等情再令稅契過戶庶目前官便升科民資執手開辦至今各縣所派員紳帶同弓丈書吏逐堡丈量薪水夫馬工食等項悉由各縣並善後局暫行墊給不准索取民間一餐一錢閱時年餘經費支銷已不下二十萬皆由別款隨挪此後各縣分班復丈造冊繪圖刊單印票需費孔多臺灣現在各款絲毫皆抵正開銷此項清丈經費無從籌畫查內地江蘇等

省從前舉辦清丈丈費就田抽收臺灣擬仿照辦理每中則田一甲不分新舊發給新單時由業戶先繳丈費洋二元上則酌加五角下則遞減五角上中田園無多以每甲十一畝計算每畝不及二百文在業戶所出無多既免新舊稅之繁復免田畝不符之弊官民兩便裨益實多臣前奏辦臺灣鐵路所有車房地價用款曾經 奏明由官發給業經海軍衙門議准施行荷蒙 俞允在案此項經費尤鉅本年七月准戶部咨查在何款項下動支等因臣正無籌畫將來惟就所抽丈費項下除撥還清賦經費外其餘撥歸鐵路地價車房等項或多或少應俟收齊實數再同支銷數目另行分別歸案造銷謹附片陳 奏

光緒十三年十一月十七日奉 硃批該衙門知道欽此

陳報臺灣啓徵新賦日期請獎各員紳摺 十四年六月十九日

竊照臺灣辦理清丈改定賦則丈竣給單接辦升科所有上下忙例限勻徵分

數請緩扣計經臣先後 奏咨在案查台地田園從未清丈向無鱗冊可稽此次按戶核給大單填名坵段甲數等則戶名卽爲造冊升科根據疊飭各屬趕緊給單接辦升科數月以來臺北將次竣事惟臺南田園太廣戶口畸零事極繁瑣每屬自數萬甲至十餘萬甲丈單雖趕緊填給勢非一時可以告竣若待全臺丈單給清本年斷難啓徵新賦必致有誤正供現經通飭各屬趁民間五月收穫之後於六月十六日一律啓徵上忙其給單未清之處一面給單一面開徵並行不悖下忙卽定於十月接徵先准部咨自光緒十五年起經徵督徵例限處分綦嚴均照內地辦理十四年分雖免核扣其上下忙奏報暨頒發徵信冊仍應舉辦等因查臺地田園尙未大定實難稽核考成而本屆啟徵既已逾期現惟督飭各屬儘力催徵仍俟下忙及奏銷屆期據實造報免計分數至徵信冊爲杜中飽起見臺地舉辦升科編戶造冊正在澈底清釐應請俟賦額

大定後照章辦理全台現已啓徵新賦所有在事出力員紳應否彙案請獎據清丈總局布政使邵友濂候補道陳鳴志等具詳前來臣查內地歷辦清丈不過一州一邑尙有圖籍可循往往時閱數年尙難獲覩成效台灣自隸版圖二百餘年此次舉辦清丈事事草創全省袤延千餘里未及兩年業經蒞事隱匿者揭報開墾者升科盈溢田糧計逾舊額不下四十萬兩民間供賦反比從前減輕固皆仰賴朝廷威德民情踴躍亦係在事官紳實心實力櫛風沐雨不避瘴癘以冀成功而總局司道並府廳縣官竭慮殫心不辭勞怨鉤積妥速規畫精詳洵能下裕民生上裨國計已於清丈之始經臣奏奉諭旨准照異常勞績給獎現已啓徵新糧所有尤爲出力之臺灣布政使邵友濂擬請賞加頭品頂戴開復貴州布政使沈應奎二品銜臺灣道兼按察使銜唐景崧均擬請交部從優議敘布政使銜留閩遇缺題奏道陳鳴志擬請賞給三代

一品封典臺灣府知府程起鶚臺北府知府雷其達均擬請以道員在任候補
並加鹽運使銜現署埔裏社通判鹽運使銜候補知府吳本杰擬請俟知府補
缺後以道員在任候補現署彰化縣知縣補用同知候補通判李嘉棠擬請以
同知直隸州知州留閩歸候補班前補用本任臺灣縣知縣在任候補同知沈
受謙擬請開缺以同知直隸州知州留閩補用補用知府候補同知現任淡水
縣知縣汪興禕擬請俟歸知府班後加鹽運使銜並先 賞換知府頂戴五品
銜本任埔裏社通判現署新竹縣知縣方祖蔭擬請以同知直隸州知州在任
候補試用布經歷補缺後以通判用管元善擬請以通判仍留閩省補用並加
同知銜以上十二員相應仰懇 天恩俯賜先行給獎以昭信賞而示鼓勵其
餘在事出力員弁紳士可否容 臣 俟給單竣事後彙案續行請獎出自 逾格

鴻慈

再幫辦臺北撫墾事務三品卿銜太常寺少卿林維源在籍幫辦撫墾極重公義此次開辦清賦給單升科事事皆其倡助所有屯租番租大小租名目參差俱由林維源會同司道分別釐定民間稱便上下翕然在林維源深受 恩施力圖報稱豈有他求然地方清丈大舉賴其倡導贊襄不辭嫌怨應否奏請

獎勵之處據清賦總局布政使邵友濂等具詳前來 臣查全臺清丈之始官紳中設難詞阻撓大計林維源田園較多不避嫌怨身先倡導遇事出力民情因之踴躍未及兩年全功已竟雖其意存圖報不敢仰邀議叙 臣未便壅於 上聞應如何 加恩之處出自 聖主鴻施

光緒十四年七月初八日奉 上諭劉銘傳奏台灣啓徵新賦請將尤爲出力人員先行獎勵一摺台灣各屬地畝舉辦清丈事屬創始經劉銘傳督率官紳核實丈量改定賦則全台袤延千餘里未及兩年一律大竣升科田糧計逾舊

額不下四十萬兩民樂輸將新賦現已啟徵辦理甚爲妥速在事出力各員實屬著有微勞自應量予獎敘台灣布政使邵友濂著賞加頭品頂戴開復布政使沈應奎台灣道唐景崧均著交部從優議敘道員陳鳴志著賞給三代一品封典台灣府知府雷其達均著以道員在任候補並加鹽運使銜署埔裏社通判候補知府吳本杰著俟補知府後以道員在任候補署彰化縣候補通判李嘉棠著以同知直隸州知州留於福建歸候補班前補用台灣縣知縣在任候補同知沈受謙著開缺以同知直隸州知州留於福建歸候補班前補用補用知府淡水縣知縣汪興禕著俟過知府班後加鹽運使銜並先換知府頂戴埔裏社通判方祖蔭著以同知直隸州知州在任候補試用布經歷管元善著以通判仍留福建補用並加同知銜餘著照所議辦理附片奏三品卿銜太常寺少卿林維源於清丈升科事宜倡首襄助不避嫌怨民間稱便克竟全功請旨

嘉獎等語林維源著賞加二品頂戴該部知道欽此

再合地田畝嘉義鳳山兩縣地方遼闊均在十萬甲左右戶口繁碎鳳山縣官或故或病更替相因所派清丈人員閒有未盡核實之處現經總局司道另委妥員抽查復丈一律清釐其給單造冊情形較之各屬尤爲遲緩但勘丈已定以後有單冊可據本年內外或可歲功查布政使邵友濂才長心細自上年八月到任臣卽以清賦事務專任責成經理措施有條不紊故能迅速啓徵惟編戶造冊立法伊始非一時所能竣事邵友濂情形已熟若得寬假歲月方能悉心經理克竟全功可否仰懇 天恩俯准一二年間免其更動方於新設省會初辦賦額不致功虧一簣惟新賦甫經開徵目前分治在卽應將添設各廳縣分造城垣並須籌建省城工程經始需用浩繁庫局一空措施無力本年東羅西掘接濟尤難前經督臣楊昌濬與臣議定 奏准每年閩省協銀二十四萬

兩並由閩海關照舊每年協銀二十萬兩計已照數協助三年原議以五年爲期楊昌濬去閩有日相應請 旨飭下新任福州將軍 臣希元督 臣卞寶第查照前案仍舊協解五年以符原議而資接濟理合附陳

光緒十四年七月初八日奉 旨留中欽此

埔裏廳暨恆春縣田園減等升科請立案摺 十四年七月初八日

竊照臺灣埔裏社廳暨恆春縣二屬均爲光緒初年新闢之境非傍山乏水卽近海多風土壤瘠磽收成減薄據該廳縣稟請減等升科經 臣飭據清賦總局司道查議請將埔裏社廳田園照同安下沙則遞減一等升科上田科中則中田科下則下田照下則核減二成上園視中園依次遞減勻丁糧米概免配徵其恆春縣田園瘠薄視埔裏社尤甚亦照下沙則減等升科並免耗羨配徵及勻丁糧米會同布政使邵友濂核詳 奏咨立案 臣查台灣新闢地方沿海沿

山土壤磽薄埔裏社田園既非嘉義彰化等屬可比恆春又較埔裏社爲差若後山臺東州一帶原爲番社榛棘之區尤不逮前山遠甚雖已一律清丈而糧生於地不能不量爲變通茲當升科伊始該司道所請埔裏社廳暨恆春縣兩屬減成辦理委係實情業經批飭遵照並令查明後山台東直隸州田園能否援照減則另行詳辦再行奏陳

光緒十四年八月初五日奉 硃批戶部知道欽此

全台清丈給單未竣請展奏銷限期摺 十五年六月初十

竊台省清丈報竣後改定賦則按辦驗契給單暫難徵收新賦光緒十四年上下忙勻徵分數經 臣 奏咨暫免核計嗣因給單需時十四年新糧亟須啟徵

復經通飭各屬於是年六月一律啓徵上忙其單未給清之處一面給單一面徵糧亦經會 奏在案茲查台北各屬單雖給竣台灣之雲林縣由彰化縣劃

撥四堡劃歸未久甫經給單三成嘉義鳳山兩縣因原丈未能核實而田園獨多現辦覆丈隨時給單亦至四五成其餘各屬約有七成因上年給單時彰化縣土匪滋事該處業戶不無觀望遷移雖經撲滅不過旬時給單不無遲緩且大小租番租屯租隘租官莊各名目瑣碎異常或有地段畸零土壤瘠薄難以照則升田必須另行分別辦理又或析產未定典賣不清民間自有糾葛皆須逐一清釐凡此爲難情形必須稍假時日據清賦局司道詳請展限奏銷臣查清丈田園本非易辦內地歷辦清丈雖僅一州一縣往往數年尙未告成今舉全台各屬一律清丈升科祛除百餘年包攬隱欺之積弊若非台南嘉義鳳山延誤彰化叛紳抗阻竟可一律完竣實爲臣始願所不及台北給單俱已竣事新糧亦徵收報解八成惟贖台南之嘉義鳳山兩屬查其田園至十餘萬甲或七八萬甲之多自署藩司沈應奎接任以來辦理日有起色但以後所贖零星

尾數多屬糾葛不清辦理較前尤難措手該司道所請係屬實情惟光緒十四年錢糧 奏銷已屆卽將現辦覆丈之嘉義鳳山二縣別出另辦其餘台灣安平彰化雲林各縣亦尙未悉數給清糧額不能遽定萬不能按限 奏銷 臣於上年 奏報開徵之日本已壓遲一忙此時各屬完糧尤非內地無事州縣得以率由舊章按時徵解可比情形既異辦理卽應變通裨不致草率從事應懇准將全台光緒十四年奏銷展限六個月自奉 旨之日起扣庶不致草率從公亦不致漫無限制實於公事有裨現經咨部并飭該司道等嚴督各屬將丈單迅速給竣趕緊徵糧報解暨將糧額核定造冊呈送詳咨接續造報 奏銷倘有何縣再事泄延卽行嚴參示懲

光緒十五年六月三十日奉 硃批著照所請該部知道欽此

全台清丈給單完竣覈定額徵摺 十五年十二月十九

竊臣於光緒十二年四月 奏明將全臺田畝概行丈量是年七八月先後開辦十三年九月酌議上中下下下田園賦則並隨徵補水平餘 奏奉部覆照准並行令將各州縣計有某則田園若干應徵糧銀若干造冊送部備案嗣以所丈田園盈溢甚多新舊莫辦清丈後按戶填給丈單俾官便升科民資執業其埔裏社廳恆春縣均屬後山新闢之地奉准減等升科臺東州能否援照減則另行覈辦續因奏限迫屆而臺地民番租業糾葛異常及原丈地段內有土壤瘠薄難以照則升科必須另行分別以免民累於請展奏期案內陳明奉旨允准各在案茲據各屬遵限將丈單一律給竣計基隆安平鳳山嘉義彰化淡水新竹宜蘭一廳七縣除官莊田園租業另行 奏咨外共民業田園四十二萬五千二百四十一甲零年徵銀五十萬九千四百九十兩有零以光緒十四年啓徵又埔裏社廳田園二千四百九十八甲零年徵銀一千三百五十

一兩恆春縣徵銀四千二百六十九甲零年徵銀二千一百二十七兩零以光緒十五年啓徵並造圖冊前來查全臺舊額人丁餉稅銀八千九百三兩零供粟一十九萬七千一百三十四石零耗穀九百二十三石零照臺章折價銀十一萬八千八百三十四兩零餘租折價銀一萬三千四百四十一兩官莊銀二萬八千五百二十七兩零耗羨銀一萬三千六百六十一兩零統共年徵銀十八萬三千三百六十六兩零自道光以來墾不報升坍不請豁年徵銀數逐漸短虧光緒二年臺北設郡舉辦淡水噶瑪蘭兩屬清賦地止一隅時閱十載辦理迄鮮成功此次全臺一律清丈覈給丈單五六月間本可竣事依限 奏銷乃以嘉義等屬原辦草率不得不添委分投復丈抽查清釐期歸至當更有土壤瘠薄難以照則升科之沙田園大率在沿山沿海沿溪一帶各屬皆有飭由給單員紳調查契價租息另行定等科徵臺北民業向有以一二三分等者亦

卽編爲一二三等凡一等沙田每甲徵銀一兩六分五釐二等徵銀七錢四分六釐三等徵銀五錢三分三釐一二等沙園視二三等沙田三等沙園每甲徵銀三錢二分彰化以南沙四分平次下三等每甲徵銀自七錢七分至五錢五分沙園亦分三等自四錢山分至二錢二分比較平安下等輕則有贏無虧似此稍舒民力旣免棄地逃糧之慮並廣招徠續墾之謀其墾荒未熟田園仍照原奏別出從緩升科自十二年秋閒開辦清丈起接續辦理給單至現在一律報竣止時僅三載通臺得竟全功年額徵銀五十一萬二千九百六十九兩零隨徵補水平餘銀十二萬八千二百四十二兩零加以官莊租額銀二萬八千餘兩全年共銀六十七萬餘兩覈與初奏約計之數大致相苻比較舊額溢出銀四十八萬八千餘兩除補水平餘銀十二萬八千二百四十二兩外實計正額溢出銀三十六萬餘兩十四年徵收已有成數應卽 奏咨作爲定額至新

設之臺灣雲林苗栗三縣係就彰化嘉義新竹三縣轄地劃分十五年設立已齊各歸各界徵辦所劃堡甲徵額另再由司開摺詳咨立案台地內山溪溜激沖沿海風沙捲壓田園坍漲木自無常已飭各廳縣隨時稽查遇有坍漲分別升除並將未墾者招墾墾熟者續升隨時辦清不得仍蹈故轍總期地無隱匿之糧民無虛完之累善持厥後以垂經久良規除將丈量給單先後兩次經費及在事出力員紳另行造銷請獎外據署臺灣布政使沈應奎會同辦理清賦總局前署台灣道陳鳴志詳送圖冊呈請 奏咨並聲明澎湖一廳孤懸荒島地皆斥鹵祇能栽種雜糧年徵地糧等銀一百三兩零仍循其舊免予更張等情前來 臣覆核無異謹將圖冊咨送戶部查照辦理具摺以聞

光緒十六年三月二十八日差弁遞回原摺奉 硃批戶部知道欽此

全臺清丈給單用款造銷摺 十六年六月初一

竊臣於光緒十二年 奏准舉辦清丈全臺田畝凡官紳書役薪資悉由糧臺墊給不准索取民間時閱年餘支銷經費已不下二十萬無款再挪十三年 奏明仿照江蘇等省辦法就田酌收丈費續因十四年各屬收成減色察看糧費並徵民力未逮復經 奏請緩收丈費已收者准抵新糧所需經費即在新糧劃用並聲明埔裡社恆春兩屬丈費業已收竣未便再行扣抵應自光緒十五年接辦升科經先後奉 旨准行在案計自光緒十二年七月間開辦起至十五年十二月底止各屬先行清丈繼辦給單並由總局選派委員分投抽丈覆核丈單繪造圖冊以爲徵糧之據所需經費雖無成案可循然皆力求撙節據各廳縣造報冊銷全案共用銀三十五萬一千二百四十兩零內除埔裡社恆春兩屬單費銀六千九百三兩零外實支用庫平銀三十四萬四千三百三十七兩零委係實用實銷查無冒濫應懇 敕部准在光緒十四十五兩年

錢糧項下照銷以清款目

光緒十六年七月初五日奉 硃批戶部議奏欽此

釐定全臺官莊田園租額摺 十五 十二月十九

竊查康熙年間臺地各屬養佃墾成官莊田園九千七百六十五甲零或徵租粟每石折銀四錢或徵青白糖芝蔴塏餉各項折價不同又給資建置糖廍蔗車牛磨七百八十一張每張折徵銀五兩六錢共年額徵銀二萬八千五百二十七兩零此係官租不歸民業歷年專款 奏銷自嘉慶以後墾不報升坍不請豁以致徵數漸虧此次全臺普行清丈先將民田丈竣升科接續清釐官莊歷年久遠原設糖廍蔗車牛磨均已倒塌無存魚塏亦經沖沒惟田園現丈共計一萬五千三百五十二甲三分四釐六毫四絲八忽五微二纖較舊額已贏皆係各佃就官莊界內自行續墾經此番丈後沖塌者應行除扣續墾者覈實

科租查從前租則徵收租粟青白糖等項每甲折銀一二錢起至十兩不等輕重懸殊究係如何分配年久檔案無存佃民本多苦累且續增田園皆由各佃自墾以成非曩時官養給種可比新墾舊墾界址混淆莫從指辨自應將租額重爲釐定刪除各名目一律徵租以杜役胥高下其手現議上則田每甲徵租穀五石中田四石五斗下田四石下下田三石五斗上園視中田中下園各遞減五斗下下園徵穀三石統計台灣彰化安平鳳山嘉義五縣年共徵穀五萬六千九十五石二斗一升五合七勺四抄二撮每石按照臺章折銀六錢年額共銀三萬三千六百五十七兩一錢三分免徵平耗自十五年起照新章辦理較之舊額多徵銀五千餘兩其十四年清釐尙未竣事各屬間有按照舊章徵完銀兩儘數另冊 奏銷據署臺灣布政使沈應奎造冊詳請 奏咨前來 臣覆覈無異謹將原冊咨送戶部查照

光緒十六年三月二十八日差弁遞回原摺奉 硃批戶部知道欽此

臺灣清賦全功告成彙請獎敘員紳摺 十五年五月初十

竊臺灣自光緒十二年辦理清賦經 臣具奏欽奉 諭旨卽著督飭派出各員

紳認真辦理出力人員准照異常勞績奏獎該部知道等因欽此自十四年六

月啓徵新糧由 臣將尤爲出力人員先行奏請獎勵其餘在事官紳員弁聲明

俟給單竣事續行請獎欽奉 上諭著照所議辦理等因欽此並准吏部議奏

飭令妥速丈清地畝俟丈單事竣卽將徵收確數詳細奏咨報部再行彙獎等

因當經核定田糧年額徵數造冊分別 奏咨在案查內地辦理清丈一州一

邑皆有圖冊可循往往年久尙難獲效臺灣此次自十二年秋間辦清丈核給

丈單其嘉義鳳山各屬初丈未清另委復丈一體按戶給單隱匿者揭報開墾

者升科截至十五年十二月一律造具圖冊 奏咨報竣計舊額人丁稅餉供

粟餘租官莊耗羨年共徵銀十八萬三千三百六十兩現定糧額年徵銀五十一萬二千九百六十九兩隨徵補水平餘銀加以官莊租額共銀六十七萬四千四百六十八兩有奇比較舊額溢出銀四十九萬一千五百二兩光緒十四年徵收數目業經遵照展限奏銷其任事不力者均經臣隨時奏參所有始終在事出力員紳不無微勞足錄飭據臺灣臺南臺北三府取具各員紳履歷開列清冊由署布政使沈應奎臺灣道兼按察使銜唐景崧核明詳請 奏獎前來臣查臺灣海疆重地自奉 旨改立行省事巨費繁一島孤懸緩急莫恃非地方自有之利無以應變而處常綜計全台一州二廳十一縣廣袤千餘里各屬鄉堡田甲糧額按戶核查鎖屑繁重時僅三載獲竟全功歲增鉅款裕 國家經久之用定海疆長治之規固由 聖德湛深民情踴躍而在事官紳員弁實心實力實屬著有微勞仰蒙 恩旨准照異常勞績給獎自應及時甄叙以

勸方來除將出力稍次各員核實刪減由臣酌給外獎頂戴外所有分派各屬清丈田畝科算錢糧核給丈單繪造圖冊尤爲出力之同知潘成清參將陳同泰等一百九十七人遵旨按照異常勞績獎其辦理丈田給單稽核案冊出力之道員林汝梅世職沈文熊等一百九十七人仍照尋常具考不敢稍涉冒濫沾恩敬繕清單恭呈御覽

光緒十六年六月初七日奉 硃批該部議奏單二件併發欽此

臺灣清賦全功告竣再將請獎詳細開單摺 十六年十月二十三

竊准吏部咨文選司案呈臺灣清賦全功告竣出力各員請獎應令核刪遵旨覆奏一摺光緒十六年八月十四日具奏奉旨依議欽此粘連原奏知照到臺伏查清丈一事內地一州一邑往往舉辦多年尙無成效臺灣廣袤千餘里自入版圖未經查丈舊徵糧額十八萬三千餘兩不足供地方之需歲賴閩餉

八十萬自奉 旨改立行省海疆重要經費尤繁 臣始於光緒十二年間 奏請清丈田園爲經久自立之計臺地舊無圖冊民間各管各業糾纏瑣屑毋如亂絲今三年之間丈田給單繪圖造冊一律完竣本年 奏銷十五年新糧各屬徵收均至七八成以上從此糧額大定正供有盈籌撫籌防緩急可恃此實仰蒙 恩諭准其獎叙均照異常得使人材鼓舞羣策羣力聚精會神方克臻此自全功告竣開列各員分別請獎茲准吏部議覆飭令核刪不得逾前奏內地三十餘人每縣紳士數人之數在部 臣慎重名器自有精心而 微 臣身任封疆亦何敢以 國家逾格之榮市恩僚屬 臣前奏各縣選派紳士數人核計現保單內紳士不過七八十人並無逾溢至內地三十餘人係指調取而言臺灣原有人員自應就地委用其餘投効員弁類皆熟悉地方情形正宜趨事赴功豈可轉予棄置且原奏所稱先行編查保甲就戶問糧一俟田畝查明再行逐

戶清丈等語尙係舉辦之始先行編查情形若至逐戶清丈之時原奏業經聲明設立清賦總局督率辦理全臺一州二廳十一縣清丈之後繼以抽查復丈科算糧額核給丈單繪圖造冊豈數十人所能竟此全功臣督率司道詳核所保同知潘成清等十二員係屬派辦總局兼令隨時分赴各屬復丈抽查主事吳鴻藻參將陳同泰等四十八員派辦臺灣府屬清賦等事知州竄以筠遊擊楊泗洪等七十二員派辦臺南府屬及臺東州清賦等事縣丞湯紹斌遊擊蕭大綸等六十員派辦臺北府屬清賦等事以上文武共一百九十二員均係盡心竭力手胼足胝晝夜辛勤始終在事他如道員林汝梅世職沈文熊等一百九十四員分派總局及各局隨同辦理所著勞績亦皆切實不虛委無冒濫既有勞績足錄卽應獎叙不遺若使甄別稍偏何足以昭激勸至其任事之優次先已分別等差不敢概邀異獎其餘出力稍次員弁已經核刪酌給外獎據台

灣布政使沈應奎臺灣道兼按察使銜唐景崧將前保各員派辦各事詳細開單具詳前來應懇 天恩俯念海外清賦迅速成功正供盈溢撫防大計皆有實款可期准將在事出力各員仍照原保給獎以示鼓勵而免向隅

光緒十六年十一月十七日奉 硃批該部議奏單二件併發欽此

卷七勘誤表

十二	九	八	七	七	七	六	六	三	三	頁數
十六	十五	七	二十	十三	十三	十九	二	十六	十六	行數
四	七下	廿七	十二三	九	六	一	廿七	四	十六	字數
田		積	田園	名	大	手	謂	倒	與	誤
科		稽	賦額	明	丈	業	請	例	額	正
	程起 北府知府									脫
										衍
十四	十三	十三	十三	十三	十三	十二	十二	十二	十一	頁數
十七	二十	十五	十五	十四	一	二十	十五	五	十九	行數
七下	廿四	二十	十一	十一	六七	十八	十二	廿二	十七	字數
	符	平	山	四	徵銀	業	辦	裨	攪	誤
	符	同	四	田	田園	額	辨	俾	攪	正
均										脫
										衍

劉壯肅公奏議

卷七勘誤表

一

一

						十七	十六	十六	十六	十四	頁數
						三	二十	十二	九	二十	行數
						十七	十二	廿	廿五	七八	字數
						下	鎖		間	報冊	誤
							項		開	冊	正
						請		六			脫
											衍

劉壯肅公奏議 理財略

卷八

調何維楷辦礦片 十年

再臺北基隆煤礦自沈葆楨開辦以來籌畫經營規模宏遠原冀擴開風氣爲國家富強之謨詎閱時未久流弊已深臣到基隆後接見礦局提調楊崇銓礦務學生張金生俱言煤務虧折甚多不肯明言數目自京滬以及基隆局外之人皆言每月煤局虧折本銀八千內外當委記名道朱守謨潛往查勘並飭提調楊崇銓將光緒九年正月至本年三月該局所用經費以及出售煤價節開具報續據先後送呈月報覈計用度與銷售煤價均屬有盈無絀不知虧折何由現飭將開辦以來歷年帳目全數查出提至臺北府城詳細覈算以清積弊惟以後必須明幹大員督率切實經營方期有利無弊查有河南候補道何維楷精明幹練辦事勤能精於會計曾經開辦磁州煤礦熟悉情形若以辦理

基隆礦煤必能日見起色該道現在天津可否請 旨飭下北洋大臣李鴻章轉飭來臺接辦以期整頓實於礦務有裨

按何維楷未至台因此片足見礦事原起存之

奸商吞匿釐金道員通同作弊請撤任委署查辦摺 十一年五月十三日

竊查台灣釐稅以進口洋藥爲大宗自前台澎道張夢元於光緒六年招商包辦劉璈抵任後仍令商包上年係歸董事陳郁堂包辦自九月後以法人封口爲名照常徵收絲毫不解今春三月經前貴州藩司沈應奎由糧臺委員查出中路鹿港等口隱匿釐金四萬六千餘兩稟請查追該商始知事露始報稱臺南徵收一萬五千餘兩聊爲飾辯狡謀吞匿情罪昭然疊經 臣札提陳郁堂來轅訊究竟敢抗延不到臺灣道劉璈督辦稅釐上年秋冬餉項萬分支絀宜如何籌畫搜查顧持危局乃任該商吞匿巨款至六萬餘兩之多事前既爲隱庇

事後更加徇縱臺餉奇絀上勞 聖主憂勤各疆 臣百方籌濟不遺餘力劉璈身在局中何以膜視上年十一月底稟報臺南餉竭潰散堪虞截留臺北協餉五萬兩商吞巨款若罔聞知本年三月底該道會同沈應奎稟請全臺洋藥釐金每年加徵十萬元仍由陳郁堂包辦 臣批該商侵吞隱射業經札提來轅應候訊辦確查再行核議該道硬行抗辦若無事然竟於四月初一日詳報加徵仍由該商承辦 臣疊次訪查洋藥茶腦釐金均多吞匿稅務爲餉糈所關豈容絲毫侵蝕該道於奉批後猶復具詳爲商人迴護顯係通同作弊侵沒餉需 臣已檄令撤任聽候查辦所遺臺澎道員缺應卽委員署理龔照瑗正在結算製造局並上海購買軍械各帳尙難到臺查有江蘇候補道陳鳴志練達精明深通營務持躬廉潔守正不阿堪以署理現經 臣飭令陳鳴志將所部恪靖土勇兩營妥爲遣撤該道卽赴臺南接署道篆除將劉璈貪污狡詐劣蹟多端另摺

奏參外一面催提奸商陳郁堂到案研訊有無通同作弊情形謹馳驛具奏
光緒十一年五月二十六日軍機大臣奉 旨劉璈著卽撤任聽候查辦餘依
議該部知道欽此

再台灣釐金煤務自劉璈到任後煤務每年開銷經費十萬餘兩釐金於正稅
之外勒索私費洋藥項下三萬元茶腦項下一萬元經 臣據實奏參仰蒙 特
派刑部尙書錫珍等到台逐款查 奏 臣應毋庸再瀆查錫珍等原奏內稱以
後煤務或歸商辦或歸官辦總期經費不致虛糜有裨船政官輪應用由 臣體
察情形妥議籌辦等因查基隆存煤前據局員算明開報應存估價銀十六萬
餘兩訊據供稱堆存過久日曬雨浹煤塊碎裂官煤化成粉炭均歸烏有賬目
支離事隔數年無從澈底查究惟楊崇銓稱於十年六月法人竄擾基隆時被
匪搶失現銀五千兩制錢一千餘串當時並未呈報地方官勘明立案十一年

法人退後經臣飭派營務處道員方策勳訊據基隆煤井工頭蔡添進供稱十年六月法擾基隆楊崇銓早將家眷行囊字畫等物悉數搬移尙有何銀被搶等語復經檄飭楊崇銓將被搶何證明白稟呈旋據稟稱當六月十五法擾基隆官民盡徙局內銀錢因係公款不敢妄搬不料是夜數百人持械到局卽將銀錢搶盡等語察覈所稟均屬子虛毫無證據顯係乘機捏報希圖匿吞平日辦礦濫支弊端百出若澈底查究自開局以來經手作弊人員辦不勝辦既經錫珍等查覆奏結自應毋庸究追惟乘機捏報被搶銀兩必須勒令賠繳以重公項至釐務包商陳郁堂僅認交過劉璈署內私費銀二萬五千元與該商股夥陳悅周單開不合經臣復委沈應奎傳提陳悅周暨前辦董事王青雲等續呈親供以所付臺灣道衙門包釐規費銀三萬三千元鄭建中稟繳茶腦私費銀一萬三千兩均交與己革知縣張映景轉交劉璈內署查收有縣丞王棟眼

見作證詢據王棟僅認知情並未眼見過付現計洋藥釐金包期屆滿陳郁堂係罪應擬杖之人自應另由殷商包辦茶腦釐金現據包商林協和承辦每年照舊認繳洋銀十三萬七千元本年增繳三千元臣批令將劉璈所收私費銀一萬三千兩併繳銀洋二萬元合成十六萬元洋藥釐金已據包商黃瑞階陳弼臣等具稟仍照上屆包價扣閏勻分十二個月捐銀四十萬七千元按月徵解由糧臺沈應奎議准具詳經臣飭令將前交劉璈私費洋三萬元一併照繳以充公用包商黃瑞階等情願照數加繳通年認繳洋四十三萬七千元取具認保各結由沈應奎覈明詳覆定案基隆煤務現由商人張學熙稟認開辦查船政購買基隆煤價官炭每百石給洋二十四元茲據張學熙稟稱每官炭百石減去四元只領價洋二十元自承辦之後無須由官籌墊經費煤務歲支經費銀十萬餘兩即可概行裁省仍俟該商辦有成效再行酌議抽釐此台灣釐

金煤務現在辦理之情形也惟查前辦釐金煤務各委員朋比侵吞貪劣不職若不擇尤參處不足以儆方來前釐金提調已革知縣張映景於查辦時自知劣蹟避逸無蹤應請永不叙用釐金委員縣丞王棟雖稱交納劉璈私費並未到場眼見究係知情已據報捐卹番衣袴二千件該縣丞業已丁艱擬請姑寬免究候補知縣楊崇銓經辦煤務任意支銷復乘亂捏報搶失銀錢六千餘兩雖據承認賠繳一味遷延搪塞實屬貪狡異常應請卽行革職仍由臣勒限追繳以重帑項而肅官方

軍機大臣奉 旨著照所請該部知道欽此

改百貨釐金片

再臺灣厘金只收洋藥茶腦二項同治四年經已故臺灣道丁日健開辦船貨厘金無論何項貨物每百石抽收洋銀二元四角較之內地厘金不稍輕減查

歷年全臺各口收數每年僅二萬餘元新竹屬又有抽分名目臺南復有大小斛船區別征收法令紛歧辦理不能劃一且聽委員開報多寡無稽侵吞益甚臣因撫番經費無出飭令沈應奎陳鳴志整頓釐金現據詳議將船貨釐金自本年四月初一日停止改收百貨釐金發給三聯票按成本百元抽釐五元只收出口不許重收進口貨物除洋藥一項照舊抽收外其餘百貨以及陸路販運概不抽釐米穀概行免釐不准收取惟臺南以糖爲大宗向來糖商藉口洋本不肯完釐臣現飭陳鳴志督同通商委員按約爭籌或完子口半稅或照內地一體抽釐以示公允而求實濟謹附片具陳

軍機大臣奉 旨該衙門知道欽此

遵籌全臺捐款片 十一年

再 臣 欽奉十年八月 電旨臺北各軍糧餉軍火款項短少先向紳商暫借解

到卽還成功後奏請優獎均卽徧行曉諭等因欽此當卽恭錄札飭台澎道劉
璈妥速籌辦十一月初旬據劉璈申復已議全臺捐銀二百萬兩俟開口之日
卽行止捐經左宗棠楊昌濬暨臣先後批令減辦一百萬以期實效詎劉璈行
事空言抗不遵辦亦無一字稟陳本年正月臣派前貴州藩司沈應奎總辦全
臺糧餉會同劉璈籌辦捐輸住紮彰化沈應奎委催各縣舉辦劉璈置之不問
各縣陽奉陰違俱不肯認真籌辦惟台灣縣知縣沈受謙首先勸捐報捐銀一
萬兩嗣後各縣始陸續籌捐除淡水借用銀票未辦捐輸其餘台鳳嘉彰新宜
六縣共籌捐洋五十四萬元直至三月初一日停戰通商始據劉璈申復籌捐
一百萬兩台南紳民均以劉璈議定開口後停止繳捐各懷觀望台灣縣知縣
沈受謙已繳捐洋三萬五千餘元彰化縣地方殷富經沈應奎督同縣令蔡麟
祥分催已繳洋五萬六千餘元其餘各縣或繳一二萬不等若照劉璈所議開

口後應卽停捐惟捐戶難齊慷慨者先行呈繳慳吝者觀望徘徊如卽行止捐不繳則已繳之款仍須全數發還方昭公允臣商之臺北各紳據稱全台合捐洋六七十萬元爲數不多尙可勉相籌措查地方善後需款方殷全臺已捐洋五十餘萬元合之淡水一縣可捐二十萬元共洋七十餘萬元於善後不無裨助加之五月以後由督辦福建軍務大學士左宗棠續解洋款銀五十萬兩若捐輸一律收齊統計南北共存銀一百萬兩內外合全臺秋冬進款辦理台灣澎湖各口礮臺并添礮給餉所欠當不甚多須俟辦有端倪約欠若干再行具奏現飭沈應奎委員分赴各縣一律催收捐項收齊後擬先給予各捐戶實收隨後核較部章分別實官翎支虛銜封典彙案奏咨給予獎敘以示鼓勵而助餉需

軍機大臣奉 旨戶部知道欽此

宜蘭縣勒捐革職片

再台灣餉項支絀曾奉 特旨捐借以濟危軍 臣當飭道府廳縣妥爲勸辦不得勒索苛派以失人心據宜蘭縣殷戶周家芳稟稱縣令王家駒派令捐洋八千元周家芳自願捐募土勇二百人帶赴基隆助剿自備口糧四個月需餉銀六千元外復認補繳捐洋二千元卽按該縣原派之捐亦無不合宜蘭縣知縣王家駒不問助剿勇費仍勒令捐繳洋八千元疊據周家芳稟控以伊兄周家祥被該縣拘押並有縱差凌辱等情當經 臣批令該縣將周家祥開釋仍令補繳二千元以歸原派之捐該縣始則延不稟復繼謂周家芳募勇助防基隆越桑梓之鄉舍近圖遠請撤去所募勇丁照補捐款周家祥依舊管押抗不釋放查本年正月底正基隆法人猖獗之時周家芳不避艱險自備餉需率勇助剿認紮前敵可謂勇敢急公該令獨肆摧殘殊難索解經 臣飭委訪查據稱周家

祥在押尙無縱凌情事惟該縣辦捐所派本地貢生楊德英幫同辦理諸多不公各捐戶或因徇情而減或因私賄而除並未一律照章辦理查宜蘭縣王家駒奉辦捐事宜如何勸諭樂輸乃聽任劣紳任意增減且據委員訪查該令謂周家芳捐勇助剿基隆非剿宜蘭本縣所捐勇餉不准抵銷仍令勒繳八千元之款奉批後仍行抗押周家祥不放實係剛愎任情意圖苛勒應請 旨將宜蘭縣知縣王家駒卽行革職以肅官方

軍機大臣奉 旨王家駒著卽行革職該部知道欽此

臺捐減成片

再接准督 臣鈔咨戶部議覆覆准開臺灣防剿經費捐輸一案所有京外實官及三班分先分間儘先各項均以例定十成上兌不准以錢米軍械折收等因奉 旨依議欽此仰見 朝廷俯念臺餉支絀暫廣招徠之路以濟急迫之需

莫名欽感臣於接奉部章後謹卽行知糧臺暨臺灣道遵照部章妥爲勸辦旋據官紳稟稱部章十成收捐原爲慎重名器時艱孔亟自應竭力勸籌惟臺灣自封口後茶糖百貨概不能出口行銷商販已多歇業卽各屬力田殷戶亦皆因倡辦團練招募勇丁捐墊甚鉅現辦全臺捐借雖皆志切輸將實苦力量拮据萬難收集惟冀捐獎稍優人情欣動辦理或易爲謀卽有指項捐納員生亦冀捐數少從酌減庶可聞風興起廣示招徠現因按十成照收爲數過鉅不免觀望徘徊懇請奏予變通俾易從事等情臣伏查臺灣餉需緊要久在聖明洞鑒之中現在雖經閩省天津及廣東各處力籌接濟而援師大集需餉愈繁加以被圍日久百物奇騰尤非趕爲設籌不足以資輾轉既蒙恩施逾格准開臺捐惟期實濟餉需庶幾上副宸厪下支危局今自奉章開局全臺各處尙無報捐之人該官紳所稱捐款過昂未能踴躍悉心體察委屬實情再四

思維與其無裨實餉僅存輸納之名莫若據實上陳稍乞變通之策查錢米軍械折捐等事流弊滋多誠如部臣所議不敢更張今擬於萬不得已之中爲酌中權宜之請合無仰懇 天恩俯念臺餉萬分緊迫台地民力拮据非內地尋常捐輸可比 敕部詳加覈議於定例十成數內減四五成以廣招徠如蒙 俞允_臣仍當嚴飭局員覈實照收不准暗行折減并遵照部章滿限半年卽行停止以杜弊端再現在臺灣海道梗阻轉運艱難各省濟銀皆由匯兌不能起運現銀凡紳民習賈服官遠居內地一聞捐信雖輸將有願而路梗莫通僅恃臺南北一隅所收實恐無幾捐事既多棘手捐生亦未免向隅自應分投勸辦以期集腋除福建本省奉部章後已由省城善後局辦理外其餘天津上海廣東各口岸均擬派員設局勸導如有收數并可隨時匯兌來臺以免阻滯合並

陳明

軍機大臣奉 旨戶部速議具奏欽此

林維源允捐巨款請獎京秩片

再據台北紳士三品卿銜候選道林維源稟稱台北軍情緊急餉項奇艱屢奉勸諭仰蒙電 旨優獎伏思維源世受 國恩何敢坐視第業無商賈產祇蓄畚歲入各租略支家用自光緒三年獨捐五十萬元歷年又有大甲溪工台北城工并各處賑捐等項近又分助各莊練勇所費不貲力盡筋疲萬不能再捐鉅款然當此海氛日亟軍餉不支環顧台疆勢誠岌岌爰以萬不容已之心作無中生有之計奔走廈粵極力籌挪報効洋銀二十萬元以助餉需懇乞原情據奏務求 朝廷垂念屢捐鉅資家貲漸落 飭下地方官吏後免再捐一面呈立限結先繳十萬元明年六月一律繳清仍先捐月米三千石折價計銀暫資兵食等情並據候選同知劉壽鏗稱據該紳來函所捐款項不敢屢邀 優

獎求改京職自効等語臣查該紳屢捐巨資迭奉諭旨諄勸臣初次接奉電旨卽經剴切勸商嗣經奉旨飭查該紳銜職並總辦台北團練借餉事宜皆經轉行遵照當臣八月間基隆退兵滬尾開仗軍情岌岌餉項一空實已朝不謀夕屢飭劉壽鏗商勸捐助維源深明大義允捐二十萬元並先繳十萬元以濟急需在該紳屢捐巨款家計原不如前今以全臺危迫隔海籌擲竭力勉輸實屬急公好義跡其原稟委實無虛決非尋常捐輸軍餉可比該紳前於光緒三年捐款已蒙恩賞卿銜此次請用京職之處臣未敢擅行擬請可否仰懇天恩俯念台灣餉絀兵危之際該紳急公報効之忱特予破格恩施以昭激勸並可否將求免續捐之處一體加恩曲允用示矜全伏求聖鑒至同知劉壽鏗臣已遵旨飭令隨營辦理一切應俟續行出力另案請獎合併陳明

軍機大臣奉 旨林維源已明降諭旨以四五品京堂候補餘依議欽此

撤留勇營綜計款目請撥餉需摺 十一年十月二十五日

竊臣於本年七月初八日欽奉 上諭現在海防善後用項浩繁必須通盤籌畫覈實經理方足以裕度支而舒國困各該省關每年所入之款究竟實有若干其常年例需及現在添支防勇局卡餉需薪水各款實在費用若干此後常年可以裁減歸併節省之款若干著各該將軍督撫監督等切實覈計逐款分晰開單限於奉旨一月內詳細奏報毋得稍涉含混藉詞延緩欽此等因由戶部咨照到 臣又於十月初四日接准軍機大臣字寄光緒十一年九月初九日欽奉 慈禧端佑康頤昭豫莊誠皇太后懿旨內開前有旨令該將軍督撫裁減兵勇以節餉需訓諭諄諄至爲明切此次復令王大臣等參酌衆議體察情形期於必可施行籌定辦法現在經理海防善後需款甚鉅籌餉甚難必須將

糜費之款痛加刪節各該將軍督撫受國厚恩務當仰體朝廷宵旰焦勞綢繆未雨之意懷遵迭次諭旨破除成見切實辦理一面將如何裁減及每年所節餉銀若干詳晰具奏將此由五百里各諭令知之欽此遵 旨寄信前來 臣查臺灣自上年六月至本年三月皆係用兵之際營勇增減不時餉需亦無定數從前每年入款僅關稅鹽務釐金不滿百萬劉璈隨意支銷如鹽務每年連成本得洋五十萬零四千餘圓開支至二十四萬餘圓之巨除津貼鹽本外所贖歸公僅十萬餘圓釐金久經商包復開支銀九萬餘兩各局名目繁多員薪漫無限制竟有佐雜每月領薪水銀百餘兩者其餘兼差乾俸種種浮糜不可枚舉 臣於陳鳴志接署後卽飭次第裁減撤勇併局所有全臺鹽務臺北以沈應奎兼辦臺南歸陳鳴志兼辦不另設局均令力革弊端但積習已深非一時所能驟挽全台上年新招防勇自本年三月起業經次第撤裁惟曹志忠所部四

營帶赴福甯鎮任所駐防由督臣楊昌濬斟酌裁留臣奏陳善後摺已聲明全臺除練兵二營外擬留三十五營臺南派記名提督楊金龍統帶楚軍四營并安平礮勇三哨駐防府城兼防安平海口記名提督方春發統帶楚軍三營并礮勇兩哨駐防鳳山兼防旗后海口副將張兆連統帶楚軍二營土勇一營分防埤南後山一帶署臺灣鎮總兵章高元統帶礮勇一營練兵兩營分防嘉義埔裏社一帶總兵柳泰和統帶楚軍三營分防彰化鹿港一帶道員林朝棟統帶土勇二營分防新竹後壠一帶記名提督劉朝祐統帶淮軍三營土勇一營并親兵礮隊兩哨駐防臺北府城建甯鎮總兵蘇得勝統帶淮軍三營駐防基隆已革總兵剪炳南統帶楚軍一營土勇一營駐防宜蘭蘇澳海口一帶記名提督王貴揚統帶淮軍四營同署提臣孫開華所部楚軍三營土勇一營并親兵三哨駐防滬尾將來此兩軍內擬派一軍駐防澎湖此外悉數裁撤全臺入

款前摺已詳綜計關稅鹽務釐金年可得銀一百零數萬兩除去開支能充餉者不過九十餘萬兩將來剔除積弊覈實歸公歲可增銀十餘萬兩目前尙難抵用統計每年入款不足一百二十萬計尙不敷支給留營餉需統計每年出款至少亦需一百五十餘萬兩計尙短銀三十餘萬兩查劉璈到任四年每年用款皆在百萬以外十年法防起事全臺始養兵四十營以前只十餘營閩省每年協銀尙二十萬兩臣現酌定全臺養兵三十五營各海口礮臺認真設防必須閩省每月協濟銀三萬兩合之全臺入款歲得一百五十餘萬金卽無意外之需已屬毫無寬展現據沈應奎開報糧台存餉合捐輸應繳全數收齊計共存銀六十餘萬兩而捐款自劉璈出示海口一開無須再繳各捐戶觀望至今臣因捐事有勸無勒未便嚴催僅令官紳等曉諭勸繳計糧台現存銀只三十萬僅支本年冬三月之餉應懇 天恩飭令署將軍古尼音布督臣楊昌濬

自十二年正月起按月協濟台灣海防經費銀三萬兩以濟急需臣因日疾難支已於九月二十五日奏懇假歸調理儻蒙恩准假歸尙非一時卽能交卸軍餉要需刻不容緩不得不豫爲之謀謹將裁撤勇營并覈計全台款目一併恭呈御覽

軍機大臣奉旨戶部議奏單片併發欽此

劃一統費長夫草價並卹病亡將士片

再查湘淮統兵官月支統費曾經已故大學士曾國藩刊定營章統三千人者月給統費銀一百三十兩台灣漫無限制冒濫實多從前鎮道統兵皆月支統費銀四百兩其餘不論所統兵數隨意開支至少月支二三百兩經臣批令減裁臺灣百物昂貴與內地情勢不同統兵大員因應稍資體恤但須嚴定限制方足以昭平允而杜虛糜現定每統千人月給統費銀一百兩多一營者添統

費銀五十兩以此類推又臺灣楚軍每營用長夫一百九十二人淮軍每營長夫一百八十人多寡不齊均資口實亦經臣於本年九月底一律裁減不論淮楚每營給發夫價一百人此外淮軍素有柴草費銀一百六十兩均於本年十月改令與楚軍一律發支惟臺灣煙瘴之鄉營哨官弁幫辦文武員弁歿於軍營者尤衆旅櫬不能還里紛乞川資實堪憫惻若不量加賙卹坐令暴屍海外甚非朝廷矜憫戰士之心臣仍照故江督沈葆楨舊章營官病亡卹銀三百兩哨官一百兩其次幫辦委員提鎮給銀一百兩都守以上給銀五十兩以下給銀三十兩文員州縣以上給銀一百兩佐雜給銀五十兩除咨明戶部外謹

附片具陳

軍機大臣奉 旨戶部知道欽此

行軍用款截清立案以憑覈銷摺 十二年八月二十六日

竊光緒十年法人違約攻犯臺灣欽奉電 旨極力籌防嚴行戒備法兵登岸
應如何出奇設伏以期必勝並如何懸賞激勵使軍士奮勇之處均著便宜行
事不爲遙制又欽奉 諭旨飭調外省援軍協濟餉銀軍火覓雇商船不惜重
貲設法解運來臺接濟如兵勇未能立時起程卽就地募勇亦可應用各等因
欽此欽遵 臣伏查臺灣孤懸海外口岸繁多當 臣奉 命馳抵臺北法兵卽旋
踵而來兵勇疲殘礮臺頽敝港門未塞水師無船外洋槍礮水雷毫無備置全
台危迫草木皆兵仰賴 廟謨深遠特假便宜 微 臣敬謹遵循差幸勉支危局
當法船之迸集也基隆礮臺既爲敵毀 臣深見敵人船堅礮利巨礮環布鐵船
非避船礮縱得基隆終難拒守不得不退居滬尾添築礮臺另築土牆深挖濠
濶隔山堅守以老敵師隔山則巨礮不克移攻登岸則堅船已歸無用非若死
守基隆彼長我短勝算無可自操也滬營既定復購外洋槍礮水雷浮椿分投

密布一面沈船載石填塞口門然後堅保滬防擁護台北府城固全根本兵力不足除由內地添募外急募台民精悍者佐之基滬血戰生死須臾非賞巨金安能得人死力一切部署皆非鉅款不行迨法兵既撤田園久荒窮島子黎瘡痍慘目又不能不優加撫卹固結人心計自光緒十年六月起至十一年六月止一歲之間萬端奇耗統茲全局胥屬糧台當以大學士左宗棠特檄前貴州布政使沈應奎冒險東來臣久識其才遂令總司其事當時法船禁海援絕餉窮事機危急間不容髮獨賴沈應奎力任憂勞不辭嫌怨破除積習裁革浮糜萬計搜羅藉撐險難而軍情瞬息萬變設奇購間飛渡乞援事所必需亦不能靳小費而危大局一切添兵購械填口築臺以及事平之後裁遺留防區分賞卹諸大端均經臣隨時奏明有案此外或因例章不全先經酌給並經沈應奎於各員到臺造報一律查照例章刪減扣追收回歸款今軍事粗定已飭將

全臺各款綜覈彙開冊成另行 奏報惟 臣細閱部定新章募一軍購一械築一臺調一員一切收支皆須事前 奏咨立案兵勇另遣名餉季冊軍火另造各營存用總冊以便覈銷自應遵照辦理顧當行軍之際呼吸安危戰守蒼皇豈暇紛紜紀載且臺澎之地南北中前後五路延袤幾二千里危急之秋人多事雜安能一一上陳况自法船禁海電摺難通數月之間無復再生之望又安能一一陳 奏上達 天庭惟部章立案原爲杜絕侵欺查故大學士曾國藩克金陵後奏稱行軍過久用款過多碍難遵照部章造報應請准令實用實銷奉 旨允行在案 臣此次行軍未久而奇險百倍前人照部新章實難造報合無仰懇 天恩俯念臺灣遠隔重洋復被禁海行軍籌防顯分二事緩急懸殊 敕部准將行軍一歲之間查照收支款目各單先行立案俟銷冊到部以便覈銷截清此項此外自十一年七月朔以後歸入防軍再照新章辦理謹據實

奏陳

軍機大臣奉 旨著照所請該部知道單片併發欽此

造銷法防軍需摺 十二年十一月十六日

竊照同治三年七月間欽奉 上諭本年七月起一應軍需凡有例可循者務當遵例支發力求樽節其例所不及有應酌量變通者亦須先行奏咨備案等因欽此嗣准戶部咨行本部議奏軍需善後報銷內外辦法一摺內開光緒九年正月以後各省軍需善後無論何省何物概令一律造冊報銷不准再有明單等語於光緒八年十月十五日具奏本日奉 旨依議欽此通行遵辦查臺灣四面環海七省屏藩久爲島族所覬覦法人自恃船堅礮利違約稱兵臣於光緒十年五月間奉 命渡臺督辦軍務其時基隆已泊敵船數艘臺南之安平旗后各口均有法船游弋窺伺陸營單薄水師無船槍械未齊海口未塞軍

情萬分緊急仰蒙 聖主睿慮周詳飭令南北洋閩粵各省調撥援軍籌協餉銀軍火俾臣得効犬馬之力專事經營塞口沉雷築臺安礮會督各軍團死守基滬血戰經年仰賴 天威被族未能逞志十一年四月復修盟好軍始解嚴臣卽札飭糧台將收支各款以光緒十年六月起至十一年六月止彙截一案確核造銷並將支用各款查照新章應行立案者經臣彙 奏在案茲據總辦糧臺前貴州藩司沈應奎詳稱督同委員書吏調齊臺南北各營屬請銷各冊詳細勾稽核與台灣從前支給原案及奉部准銷各款相符者分別核准其餘原案不符及奉部核刪者概行駁追收回原款計光緒十年六月起至十一年六月底止防守軍需報銷舊管接收光緒十年閏五月底存銀四十六萬四千三百零八兩有奇新收各省關協餉並台灣關稅鹽課貨釐捐輸平餘等銀款三百六十四萬七千八十三兩有奇管收共銀四百一十一萬一千三百九十二

兩有奇開給淮軍援臺弁勇光緒九年以前欠餉銀六千八百三十三兩有奇應歸淮軍光緒十年報銷又給楚湘淮各軍弁勇新糧隨營長夫工食水勇礮勇輪船弁勇屯丁隘勇鹽糧隨營員弁水陸練兵新糧公費未成軍以前小口糧并撤勇行糧教習礮匠醫生工食將士安家行裝陣亡卹賞養傷掩埋購雇輪船價脚要站書夫工食填塞口港修建礮臺兵房各工購買外洋軍火製造旗械火藥及一應雜支共銀三百九十一萬二千八百二十九兩有奇分晰造冊具詳請奏前來 臣所設糧臺與行署近在咫尺無論支給何款悉皆親自裁度當輕費支絀之時籌餉難於籌兵何敢稍任虛濫雖有無例可循之資給曾無未經核實之開支相應 奏懇 天恩俯念臺灣行軍與籌防迥異 敕部全數准銷以清款項至兵退後賑卹基澎灾黎等款銀四萬九千一百一十七兩有奇並請先行開除遵照部章另行造報以收準支計尙存銀十四萬二千

六百十一兩容俟另歸十一年六月以後善後案內列造報除將總細清冊咨送戶兵工三部核銷外謹開具四柱清單恭呈 御覽

軍機大臣奉 旨該部知道單併發欽此

謹將臺灣全年各項出入款目謹繕清單恭呈

御覽

計開

一部查每月煤價一萬二千餘元每年應得銀十萬數千兩現在經費如何開支煤斤如何銷售煤價如何作收

查臺地煤務自法人竄擾基隆煤井燬傷無從採取所有官輪取用皆係收買民煤現擬鳩集股金官商合辦甫購機器尙未開工無利可計惟較前月省經費銀八千兩

一部查鹽務經 欽差查辦奏稱除津貼成本外收銀亦在十三萬兩內外折
合十七八萬元運費成本實應扣除若干委員中飽如何查禁

查鹽務收款本無定憑須視海市之旺衰成本之貴賤近來惟光緒四年銷數
爲最旺全年可餘番銀十七萬餘元以後漸歸減少至劉璈任內濫薦乾修
自提滷耗所餘公項不過十二三萬元上年法人圍臺運鹽遂絕沿海私曬
太多竟短銷九萬餘石本年經 臣釐剔陋規畫歸公款分局委員改歸司事
以節虛糜全年多得盈餘銀五萬餘元以補短銷之數以後如能禁絕私曬
方可盈餘

一部查洋藥釐金臺南北每年正課六八番四十四萬元另繳三萬元歸劉璈
私費現在商人如何包辦私收如何查禁歸公

查洋藥前屆全年連閩包商六八番三十四萬元自上年四月加征六八番十

萬元合共四十四萬元本屆包商黃瑞階等承辦照前數扣閏應勻分四十四萬七千元經臣飭將私送劉墩規費三萬元併歸公款統計全年扣閏認繳包價六八番四十三萬七千元以六八折番銀二十九萬七千一百六十兩一部查茶腦釐金全年認繳六八番十三萬七千元並另繳一萬五千元歸劉墩私收現在仍否包辦並私收款項如何查禁歸公

查茶腦並船貨釐金前屆包商陳郁堂全年認繳六八番十三萬七千元本屆林協和承辦願加三千元全年認繳十四萬元並私送劉墩規費一萬三千兩經臣飭令該商加繳二萬元作為正課統計全年認繳六八番銀十六萬元以六八折共番銀十萬零八千八百兩

再查本年四月初一日起船貨釐金一項奏請免征收百貨出口釐金所包船貨釐金全年應扣除數千元百貨釐金現甫開辦難預定數以現收數月而

論全年除支銷局用一切經費外約可多收銀三四萬兩須俟一年期滿方可綜核實數

一 本年四月起奉准閩省全年協餉銀二十四萬兩

一 本年五月起由廈關全年撥解洋稅四成二十萬兩

一 滬尾基隆兩口海關每年撥解稅銀約三十一萬兩

一 安平旗后兩口海關每年撥解稅銀約十四五萬兩

查上年四口關稅歲約收銀四十五萬兩

統計全臺除正供入款不計外以上各款歲約共入銀一百四十餘萬兩

一 全台三十五營月餉全年計需銀一百十三萬二百一十兩六錢

查前件共計三十五營每營除 奏定新章減去長夫八十名每大建月餉銀

二千六百五十二兩二錢小建月餉銀二千五百七十兩四錢六分又遵照

部定新章每營每大建月給柴草銀八十一兩小建月給柴草銀七十八兩
三錢以全年勻核計之共應前數

一 全台各軍統領官統費長夫全年計需銀一萬三千七百四十兩

查前件各軍統費遵照部定新章統至二千人以上者月給銀一百兩夫十名
全台三十五營計統領官九員按章勻攤每營月應支統費銀二十五兩三
十五營年應支銀一萬五百兩又長夫九十名年應支銀三千二百四十兩
統計共支前數

一 各營洋礮洋槍水雷各教習薪水全年約需銀八千餘兩

一 各營三節犒賞全年約需銀三千七百餘兩

一 左右翼練兵二營月餉並加給行糧長夫全年約需銀二萬五千三百餘兩

台防舊章

按以下出款甚多因文煩簡去而存其大者如此庶後人追想台事得考

其崖略云 陳澹然記

擬撤糧台設善後局仍留沈應奎經理片 十三年四月

再臣准戶部咨開本部具奏核明臺灣出入款目一摺光緒十二年十二月二十五日奉 旨依議欽此內開台灣糧台經費並護台勇丁歲需銀八千三百餘兩該撫設立糧台未據專案奏報惟從前督辦軍務自不能不設立糧台現在軍務雖平而行省尙未議定所有收支款項自應仍歸糧台經理應准暫緩裁撤惟該糧台員勇若干薪糧作何支給未經奏咨應俟銷案到時再由臣部比照成案辦理至將來設定行省之後一切收支款項即可由新設藩司辦理屆時應將糧台裁撤每年可省銀八千三百餘兩等因查台灣設立糧臺經臣會同提臣孫開華於十年十二月二十四日附片具奏在案現在定議分省藩

司邵友濂將次到台據辦理糧臺前貴州藩司沈應奎稟請於本年閏四月底截止遵撤糧臺以後收支欸目卽歸藩司經理請假內渡就醫臣伏查沈應奎辦理糧台一切善後釐金鹽務工程籌防清賦諸大端俱未另開總局雖每年經費八千三百餘兩若照內地各省一事另開一局節省殊多現在藩司邵友濂尙無渡台之期卽使到台台灣新設省分不獨書吏全無亦無辦公住所臣渡台數年因經費支絀非地方至急至要之務不敢浪用一錢所住淡水縣署牛係草房近來辦防清賦撫番悉賴捐輸支給現在捐輸停止分省之後設官分治需款尤煩臣實無所措手擬俟藩司邵友濂到任後將糧台裁撤仿照福建設立善後總局諸務方有會歸所有釐金鹽務並三十五營軍餉仍飭沈應奎會同辦理以免紛歧

光緒十三年閏四月十五日奉 硃批戶部知道欽此

接收台地兩海關片 十三年十月

再查前准吏部咨開福建台灣改設行省會奏一摺奉 旨依議欽此計粘單內開台灣旗后滬尾兩海關收稅事宜應改歸巡撫就近監督以一事權嗣後該撫務宜選派廉幹妥員實心經理等因當經咨行遵照在案現准署福州將軍臣古尼音布咨稱本年八月十四日爲洋稅第一百八結屆滿之期自八月十五日第一百九結起所有滬尾打狗二口稅務應卽遵照部議由台灣巡撫監督派員接辦以清界限並稱部定新章洋藥稅釐歸關並徵理應另款存儲查臺灣稅釐向歸台地之用所有第一百八結以前滬尾打狗二口稅釐業經隨同關稅銀兩仍行解歸台地歸入海防經費撥用應請會同 奏咨以符定案等因前來臣查滬尾打狗二口所徵關稅及洋藥稅釐銀兩係奏明向歸台防經費撥用現在海關既經部議改由臣就近監督自應截清界限于本年八

月十五日第一百九結起由臣派員接辦以專責成謹將該二口關務選派妥員認真經理並以後按結造報收支事宜仍會同福州將軍查照洋稅定章隨時奏明辦理並洋藥稅釐一併歸入海防經費另行彙案奏報

光緒十三年十月十二日奉 硃批該衙門知道欽此

官辦基隆煤礦片 十三年十二月

再查台灣基隆煤務從前每年開支銀十萬兩積成漏卮自法人來犯毀壞煤窰乏煤應用曾經商人張學熙稟請承辦於光緒十二年正月經臣附片奏明在案嗣因該礦積水過深張學熙無力購辦機器僅用人力開辦數月虧折本銀數千兩力不能支稟請退辦臣因煤炭係爲船廠機局兵輪要需不能廢棄不辦商同江督曾國荃署船政臣裴蔭森並臺灣各湊本銀二萬兩委派補用知府張士瑜招集商股六萬兩合成本銀十二萬兩於本年正月開局試辦如

有成效再行廣招商股收回官本。期官商輪船來往不至有乏煤之患。自春至冬經張士瑜添購機器雇用洋師抽去礦中積水規模已具每日可出煤百噸核計出售價值局用僅可勉支毫無利息推原其故皆由煤炭出礦之後運至基隆海口海濱浪大難用駁船旱道山路千餘里運脚太多非造鐵路以利轉輸煤務不能獲利查礦局官商原本十二萬兩辦理機器工程尙形竭蹶實無力再辦鐵路火車稟請官收另行籌辦免致虧折愈多等情由知府張士瑜具稟前來。臣查閩洋官商輪船並船政製造各局專恃基隆煤炭且台南北鐵路辦成更需煤用現在礦工已辦有十分之九以後資本無用增加未便停辦商人惟利是視既知無息可圖自難強令入股應將礦務仍舊由官收回自本月初一日接辦所有商本銀六萬兩並船政原入銀二萬兩暫由台灣於上年捐輸存餘項下籌撥歸還。臣另派洋師瑪體蓀監督工程仿照商辦章程以

除夙弊再由鐵路公司自八斗煤礦分接車路一道直通基隆碼頭以便運售
迅速將來全台鐵路告成銷路日廣利息日多仍舊招商接頂縱不能收回原
本庶不致全行虧折積久又成漏危於地方商務不無裨益除咨戶部外謹附
片具陳

光緒十三年十二月三十日奉 硃批戶部知道欽此

續報十一二兩年籌防善後撫番等款摺 十四年九月二十八日

竊查台灣行軍用款自光緒十年六月起至十一年六月止彙案造銷分別
奏咨在案惟台灣孤懸海島南洋關鎖防務固未可稍疏澎湖居台廈之衝形
勢尤關緊要不能不駐紮重兵訓練防守爲建威懾敵之謀全台勇營除先後
裁撤外共留三十五營已將官弁勇兵名餉各數駐紮之區按季造冊咨部核
查其修建各口礮台添購外洋船械招撫社番一切籌辦情形均經隨時 奏

咨在案茲據台灣善後局司道詳稱台灣籌辦海防善後并招撫諸大端自光緒十一年七月起至十二年十二月底止收支銀數督同員吏詳細勾稽核與例章相符並奉部准銷及 奏咨有案者分別核准其不符者均已核實刪除有可節減者亦復釐剔扣追填還正款計舊管接收光緒十一年六月底流存銀十四萬二千六百一十一兩有奇新收閩省協餉併台灣關稅鹽課貨釐捐輸平餘等款銀二百六十萬三千二百三十九兩有奇管收共銀二百七十四萬五千八百五十一兩有奇開除支給楚湘淮各軍官弁勇夫辦公經費薪糧柴草工食水勇礮勇輪船弁勇屯丁隘勇鹽糧水陸練兵薪糧公費隨營文武員弁及台局員役鹽菜折夫購買外洋軍火輪船價值正站書夫工食修建兵勇營房各工製造旗械軍火工料及一應雜支各款共銀二百六十七萬七千六百五十兩有奇或循照例章或續前支給或恪遵 奏案或購自外洋無例

可循均係實用實銷委無絲毫浮冒應請全數准銷除外實存銀六萬八千二百兩有奇容另歸入光緒十三年善後案內列收造報等情臣覆核無異合無仰懇 敕部全數准銷以清款項除將總細清冊另行咨送戶兵工三部核銷外謹恭摺具陳

附錄十三十四兩年海防善後撫番收支銀數並開一摺

一舊管十二年底存銀六萬八千二百兩有奇

一新收閩省並各省協餉及台灣關稅鹽課釐金捐輸平餘等款銀四百六十七萬三千八百四十兩有奇

一管收共銀四百七十四萬二千四十一兩有奇

一開除用款銀四百六十八萬七千一百三十三兩有奇

一實存銀五萬四千九百七兩五錢歸次年算

十五年收支銀數另開一摺

一舊管十四年底存銀五萬四千九百七兩五錢

一新收台灣關稅鹽課釐金平餘等款銀二百一十二萬四千五百六十六兩有奇

一管收共銀二百一十七萬九千四百七十三兩有奇

一開除用款共銀二百一十萬七千五百十四兩有奇

一實存銀七萬一千九百五十九兩有奇

以上三年均有另摺清單奏咨在案核與十一年七月初一至十二年底籌防善後撫番收支摺內出用款目一字未更惟十三四兩年收款有閩省及各省協餉十五年已無此項蓋公原奏籌防摺內請協餉五年以後不收協餉故遂截止也因此等摺奏文字差同而一省用款爲置臣操守所繫故刪

二摺而摘其收支款目於此以省煩文此外十六年未及造報以十七年四月已交卸也 陳澹然記

光緒十四年十一月初三日奉 硃批戶部知道單併發欽此

請免陣亡殉難各員短交銀兩摺 十五年五月二十一日

竊照閩省前辦軍務案內陣亡殉難各員應追應賠各款歷經奏奉 諭旨豁免在案茲查臺灣前辦軍務陣亡殉難各員交代未清應追應賠各款飭據臺灣府查報前臺灣府知府孔昭慈前署臺灣縣知縣高鴻飛前署淡水噶瑪蘭二廳秋日觀等均以剿匪陣亡共應追賠銀四萬三千九百三十九兩此三員陣亡之後均由前督撫 臣 奏准 恩卹孔昭慈高鴻飛前在閩疆各任欠款並經奏免在案惟孔昭慈任臺灣府高鴻飛署臺灣縣與秋日觀前署淡水噶瑪蘭二廳交款均在追賠今司道等憫其陣亡會詳 奏免並聲明應追銀數及

陣亡地方年月日期前來臣查該三員戰亡海外毅魄飄零旅櫬淒涼室家寥落臺壘父老歌泣難忘 國家優卹忠貞無微不至倘以生前官逋貽後人賠繳之憂甚非 朝廷哀隱忠裔至意自應援案請免以廣 皇仁除將清冊送部查照外謹會同督臣具奏

光緒十五年六月初七日奉 硃批著照所請該部知道欽此

英商承辦基隆煤礦訂擬合同摺增合同二件十五年六月二十二日

竊臺灣基隆煤礦自法人毀壞後先經商人張學熙稟請承辦旋以本虧乞退經臣商同南洋大臣曾國荃船政大臣裴蔭森并台灣各湊本銀二萬兩另集商股銀六萬兩共成本銀十二萬兩於光緒十三年正月招股接辦因舊礦產煤不多辦理年餘毫無利息商稟官收臣因閩洋官商輪船並船政製造各局需煤應用欲罷不能基隆礦局已成未便廢棄卽於十三年十二月由官收回

另行接辦所有商本及船政官本暫由台灣捐輸存餘項下籌撥歸還飭派洋人瑪體孳仿照商辦章程辦理先後 奏明在案此礦在基隆八斗地方開採年久因法人之亂停歇二年積水過深機器俱毀數年以來添購修復較從前用費更多不料煤質已完開採日絀自光緒十三年十二月改歸官辦迄今年餘綜核出入每月虧折銀三四千兩據洋師察勘非添本銀百萬另開新窰不能獲利臺灣經費支絀官既無本商股豈可再招進退徘徊適有英商范嘉士願集本銀百餘萬來臺承辦由英國駐臺北領事官班德瑞引薦到 臣據稱已勘產煤二處另開新窰暫用八斗舊礦先行接開願償八斗煤礦機器官本銀十四萬兩分期清繳詳議章程十一條開送前來 臣查臺灣產煤係地方自然之利官辦限於資本不能擴充且積習太深驟難盡革從前歲虧銀十萬兩自 臣經理以來糜費雖少每年仍虧銀四五萬兩以臺灣彈丸之地所入不敷所

出不謀補救受累無窮若由該英商承辦不特官本可以收回卽以二十年計之可免漏卮百萬關稅并車路運資轉可得數十萬利源既闢商務更興於地方民生所裨甚巨所議章程十一條臣再三推求亦無後累當派鑛務委員張士瑜先立草合同另繕清單恭呈 御覽事關中外交涉應請 飭下總理衙門會同戶部速議定奪如蒙 俞允再由臣令英商畫押承辦是否有當理合恭摺具陳 再台北新竹縣轄牛頭山地方舊產煤油曾經前福建撫臣丁日昌 奏委道員葉文瀾開採旋以虧本停止現據該英商范嘉士并請開辦事同煤礦一律並由該商另訂合同並乞一併 飭發核議

光緒十五年七月初十日奉 硃批該衙門議奏單二件併發欽此

英商范嘉士承辦煤礦擬立合同

一由該商延聘勘煤工師來台履勘產煤之區選定兩處作爲開礦之基稟准

開辦該商先在一處興工地方官立限凡離該礦三英里內不准民人挖煤倘界內該商所開煤井未得要領再易新井苟無越界悉聽其便二十年之內全台非該商不准添用機器挖煤如年限未滿第一處煤苗有罄盡之勢卽准遷第二處開挖其界限仍照前定倘兩處煤俱挖盡尙未滿二十年亦卽停止此外不得再有遷移所挖煤山如係官地不用給租如係民地卽秉公酌給地租其租僅按所種禾稻雜糧之值由官代定仿照鐵路章程每方丈給自四角至六角爲止推算倘該商煤礦所挖地洞養氣不通必開小井雖逾界限亦准其開設若所開之處係屬民地應由該商給與租值仍由地方官照前代定設界限之外民人所挖煤洞與該礦有礙應由地方官代爲調停二十年限滿該商應卽撤退所有機器價值無論多少與官無涉所安機器或就地變價或拆卸運回官不過問

二基隆八斗煤礦機器煤炭房屋卽交該商經理將來此煤礦用否悉憑該商自酌不在第一款所指兩處之內倘該商興辦八斗煤礦所有已成之小鐵路火車儘可借用不取租銀其未成至洋海關口之小鐵路該商應照公平納租其租資應卽議定日後不准加增並由地方官在洋關邊撥出官地一段爲該商修築馬頭寄屯煤炭之需此地准免地租倘係民地須按年納租仍由官定日後准不加增

三新挖煤礦所需小鐵路由官築成達至大鐵路該商應納大小鐵路載貨仿照泰西英美法德各國載價每噸以三十里路計載資約在一角四仙至五角五仙應臨時察看鐵路工本情形隨時酌定倘該商將煤運載大鐵路馬頭儘可通用勿庸納租所選礦基先請地方官議定期限築成小鐵路並定載費若干議定後將來如非該商情願准免加增

四地方官每月應收該商所挖煤炭一千噸其價值照基隆市價八折算還
五該商煤炭除撥給地方官一千噸之外其餘每噸出口應納賦課一角惟民
人所產土煤既無賦課自可輕價而賣殊礙該商售路應准設立民人釐捐
准照賦稅一體庶無偏枯至該商挖出煤炭照現時應納關稅外所有釐捐
概免

六該商煤礦應蓋夥友工師工匠人等房屋除附近官地勿庸納租外其餘別
處或屯煤或蓋屋如租民地官爲轉租照官價算給該商來台立意極欲與
官民敦睦務得情理之平第相處久遠僱工人等難保不無高抬價值包攬
把持種種情弊官必彈壓保護該商若由中國僱工來台應從其便除工師
督工夥友外其餘均用華民不准僱用外國工人如因礦中工匠衆多稟請
官派弁兵彈壓應如所請飭派倘該商請派弁兵駐防礦中其薪水多寡由

該商按月籌送

七地方官若遣生徒進礦學藝每礦可撥三人該商工師應宜優待所在任其游歷以期學業有臻

八煤在軍裝之列中外倘有戰事該礦應歸中國主政并由中國保全再由地方官派員駐礦稽查出入如有接濟敵煤查出照公法議究如與英國有戰該商係英國子民應即暫退若年限未滿事平再行接辦所有礦中屋宇機器等件應由官保護如因退歇虧累該商生意無論多少與中國無涉不敢絲毫索賠若該商情願將此煤礦頂與別國商人接辦應先稟明地方官核准別國商人承充亦應照此章程辦理

九此事一經地方官 奏准該商即繳規平洋銀二萬兩俟基隆煤礦機器等物交清馬頭屯煤之所指定洋海關一帶未成小鐵路租資議定該商即應

再繳規平洋銀五萬兩其餘應繳七萬兩准照第五款按月應撥煤價內扣除

十由地方官 奏准始行興辦 奏准後并由爵撫部院加印以昭信守

十一以上各款該商遵照來台興創煤礦獨握二十年責成重大非挾鉅費難以整理地方官准其在英國招股設立公司俾其衆力易舉

光緒十五年五月 日立合同

侯補知府張士瑜
英商范嘉士

再者此事原由班署領事官從中商辦并繙譯合同知見畫押兼請一併畫押蓋用關防以昭憑信惟中國洋商開礦之事從未辦過此次 奏准固台灣同該商均有利益如奉 旨不准此件合同應爲廢紙作罷

光緒十五年六月 日加印

一千八百八十九年七月 日加印

英商范嘉士承辦油礦擬立合

一由該商工師履勘台灣出產煤油之處先用鋼鑽探明油苗無論成否所用經費均由該商自給與官無涉倘能尋得油源足以開挖油礦稟官准其先在一處興工挖井採油凡離井十英里限內任其取油倘此處煤油顯有罄盡之勢准再遷一處其界限仍照前定如限內該商所挖兩處煤油已完尙未滿十五年亦即停止該商承辦以十五年爲限限內全臺非該商不准用機器採取煤油限滿之日應即撤退所有機器價值無論多少與官無涉該商所安機器或就地變價或拆卸運回官不過問

二該商所採煤油應照十取一之例每百擔抽取十擔以爲地基租課此外惟關稅並子口半稅應照條約完納其餘地方釐金以及別項捐輸概予免納

三該商勘定油礦地基除官地不用納租外如係民地即秉公酌給地租其租

僅按所種禾稻雜糧之值由官代定仿照鐵路章程每方丈自四角至六角爲止推算

四新挖油礦所需小鐵路由該商看定基址地方官商同築造以達官道大鐵路該商應納大小鐵路載費仿照泰西英法德各國載價每噸以三十里路計載資約在一角四仙至五角五仙總須臨時察看鐵路工本情形方能定擬自此次議定載費之後將來如非該商情願准免加增倘該商將油運載大鐵路馬頭儘可通用勿庸納租

五該商油礦應蓋夥友工師工匠人等房屋以及洗淨煤油機器所除附近礦地如係官地勿庸納租其餘別處或屯油或蓋屋租用民地官代轉租照官價算給該商來台立意極欲與官民敦睦務得情理之平第相處久遠僱工人等難保不無高治價值包攬把持官必爲之彈壓保護該商若由中國各

埠僱工來台應從其便不准僱用外國工人除工師監工夥友之外其餘均用華民如因礦中工匠衆多稟請官弁帶兵彈壓地方官應如所請飭派倘該商請派弁兵駐防礦中其薪水多寡該商按月籌送

六地方官若遣生徒進礦學藝每油礦可撥三人該商工師應宜優待所在任其游歷以期學業有臻

七煤油雖非軍火倘中外遇有戰事該礦亦應歸中國主政由官派員駐礦稽查出入如有濟敵情事查出照公法議究并由中國保全如與英國有戰該商係英國子民應即暫退若年限未滿事平再行接辦所有礦中屋宇機器等件應由地方官保護如因退歇虧累該商生意無論多少與中國無涉不敢絲毫索賠若該商情願將此油礦頂與別國商人接辦應先稟明地方官核准別國商人承充亦應照此章程辦理

八由地方官 奏準始行興辦 奏准後并由爵撫部院加印以昭信守
九以上各款該商遵照來台興創油礦獨握十五年地方官並准其在英國招
股設立公司俾其衆力易舉

光緒十五年五月

日立合同

候補知府張士瑜
英商范嘉士

再者此事原由班署領事官從中商辦並繙譯合同知見畫押兼請一併畫押
蓋用關防以昭憑信惟中國洋商開礦之事從未辦過此次 奏准固台灣同
該商均有利益如奉 旨不准此件合同應爲廢紙作罷

英國駐筭台北辦理通商事務署領事官班德瑞

光緒十五年六月 日加印

一千八百八十九年七月 日加印

海關贏餘指撥鐵路經費片 十六年二月

再准戶部咨行籌撥鐵路經費一摺內稱自光緒十六年起臺灣省按年籌銀五萬兩奉 旨依議欽此恭錄咨行並將應解銀兩在何款籌解查明咨復等因據茲善後局詳稱臺灣按年出入各款前經開單奏報本屬出入難敷關稅釐金僅敷軍餉閩省歲協銀四十四萬兩原爲建省分治之需嗣以臺灣鐵路改歸官修自光緒十五年秋先行挪用至清丈後徵收新賦雖較舊額增加現計十四五兩年開支綠營俸餉及撥給清丈給單經費毫無贏餘實無別款可挪之處惟查海關洋藥釐金奉准部咨本省用款外尙有贏餘儲候部撥可否卽就此款籌解詳請覈示前來 臣查臺灣辦理海防分治建城剿撫番社添設機器各廠購置輪船需費甚鉅歷年入不敷出庫局一空近以鐵路歸官指撥閩省協餉一切經費竭蹶倍甚於前現雖錢糧增於舊額而俸餉米折額支之外尙須抵除清丈急需海疆新設省城應用石萬難撙節無可籌撥委屬實情

查海關洋藥釐金前准部咨劃留本省銀二十九萬七千餘兩如有贏餘另儲報撥業將十三十四兩年贏餘數目報明在案現在鐵路要工奉撥之款勢難缺誤應懇 天恩俯念海疆新省正在開創之始籌款爲難准將海關洋藥釐金贏餘一款仍留臺灣自光緒十六年起專爲提解部撥鐵路之用倘本年所餘不足五萬兩由 臣 補足如有餘賸仍截存另儲聽候部撥是否有當謹附片具陳

光緒十六年三月十七日奉 硃批戶部議奏欽此

基隆煤礦仍改歸商片 十六年六月

再 臣 承准軍機大臣字寄光緒十五年八月初七日奉 上諭本日總理各國事務衙門戶部會奏議駁劉銘傳奏基隆煤礦擬令英商承辦一摺已依議行矣卽著按照該衙門所奏慎選賢員破除積習將煤礦各事宜認真覈實妥爲

經理總在用人得宜自可漸收成效如產煤日絀虧折太多亦應酌量情形另籌辦法等因欽此跪聆之下仰見 聖謨周密籌慮精詳莫名欽悚 臣查基隆煤礦創由官辦積習太深用委員稍有未當卽不免捏報虛糜用洋人較爲認真又不免價高費重閩台船政製造局以及各輪船月需煤數千噸又不能停歇不辦上年十月將洋人撤退委派候選知縣黨鳳岡管理一面仍行招商以期接辦黨鳳岡破除情面極力撐持本年正月後漸形起色商人聞風嚮慕稟辦已有數人意皆挪借官本 臣概置之現經幫辦全臺撫墾事務通政司副使 臣林維源訪招富商候選知府蔡應維雲南候補道馮城勳職員林元勝等情願鳩資三十萬元與官合辦爲期二十年官一商二仍繳原礦本銀十二萬兩承受礦存房屋機器以十萬元作官本其餘按月繳煤扣除礦務一切事宜由商經營官不過問將來無論贏虧按照成本分三股勻算據蔡成維等稟立章

程前來臣詳加察覈尙屬周詳當經批准定於七月初一日歸商接辦除將所稟章程咨部外謹附片具陳

光緒十六年七月初九日差弁賚回原摺奉 硃批戶部議奏欽此

並 旨飭商退辦煤礦並籌議情形摺十六年十月二十三日

竊臣於本年九月十三日承准軍機大臣字寄八月十五日奉 上諭戶部總理各國事務衙門會奏臺灣煤礦招商承辦章程種種紕繆請敕停辦一摺前以基隆煤礦劉銘傳與英商訂擬合同辦理粗率當經降旨申飭並諭令慎選賢員另籌辦法該撫宜如何認真覈實妥爲經理乃此次所奏僅稱訪招富商同官合辦迨章程送部後經該衙門會同查覈其辦法種種紕繆所稱可疑者三必不可行者五實屬抉摘隱微確中情弊此事既經官商合辦自應官爲主持何以一切事宜悉授權於商人官竟不能過問且章程內既稱各股皆係華

人何以總管礦務轉用洋人顯有冒充影射情事其開挖河道自撤藩籬一節更於海防大有關係况以特旨敕令另議之件該撫並不奏明請旨輒卽議立章程擅行開辦尤非尋常輕率可比劉銘傳著交部議處該撫接奉此旨卽將現辦之局趕緊停止不准遷延迴護從來創辦重大事件必應慮及久遠慎之於始不可膠執己見亦不可輕信人言基隆煤礦久無成效該撫務當熟思審慮籌一妥善辦法明晰具奏候旨定奪勿再率意徑行致干重咎戶部會奏摺著抄給閱看欽此仰見 聖恩寬大籌慮周詳莫名欽悚遵卽飭令該商蔡應維等於九月二十日退止一面委員接辦 臣久在病中精神委頓籌慮恐有未周當飭司道會籌辦法去後茲據藩司沈應奎臺灣道唐景崧詳稱基隆出煤原地方自有之利無奈人工過貴民洞本屬無多一屆農忙牛皆停歇閒時開採所出亦微前江督沈葆楨因恐民煤不敷船局應用故奏請於八斗地方由

官開礦歲虧銀十萬兩近年竭力整頓每年亦須虧折四五萬兩委員黨鳳岡辦理數月適值春夏久晴井中積水取乾出煤稍旺每月虧折較少千餘兩現查八斗老井煤炭已於本年六月間告竭僅存一井煤出無多商人蔡應維等稟請集資與官合辦估用洋三十萬元另由暖暖地方開挖新井煤礦利息本微據洋師言外洋新井初開必三年後始可見煤十年後始能獲利良以礦生地腹佳煤無不深藏非深入數百丈不能窺其奧窔入愈深則費愈重地愈遠則時愈多故西人每辦一礦非籌本金數百萬積歲十餘年不敢妄求獲利非若中國朝開一井夕卽求功往往淺嘗輒止也今商人既退官若另開新礦不獨巨款難籌以後逐歲增虧亦難爲繼倘因之停歇不獨船政乏煤應用卽台灣機器局輪船車路僅恃民煤亦恐不能應手中外商輪往來港滬半由臺灣添煤商務稅釐因之增益福泉沿海船戶運鹽來台裝煤回閩以煤獲利鹽價

因此便宜煤礦停歇商船不過臺灣稅釐必減鹽船無煤回載鹽價必昂明折暗贏所關於稅鹽尤鉅詳考台礦未開鹽昂稅少情勢昭然固不僅輪船製局應用必需海舶添煤商釐增盛已也尤可慮者礦中工匠不下千餘礦事一停流爲盜賊歷年購辦機器礦本銀十餘萬兩亦將棄置莫追並此數端不得不躊躇顧慮司道等悉心籌畫惟有暫仍其舊督令委員嚴絕虛糜認真經理以濟船政及官輪之需仍隨時察看情形如果出煤日絀虧折日多亦惟有遵照總理衙門前議停採俟籌巨款再圖新礦以開利源蓋礦伏地中本難懸測卽西國著名礦學亦不能有利無虧也臣詳核司道所籌自係審時度勢可否准照該司道所籌辦理之處伏候 聖裁

光緒十六年十一月十七日奉 硃批該衙門議奏欽此

官辦樟腦硫磺開禁出口片

再臺灣素產樟腦硫磺兩項民間私熬私售每多械爭滋事經內閣侍讀學士
 臣林維源道員林朝棟等籌商收歸官辦以助撫番經費要需臣因硫磺向歸
 通商委員李彤恩兼辦飭將樟腦硫磺兩項籌議章程以收自然之利旋據李
 彤恩等稟稱樟腦一項近來日本出產甚多香港腦價日落若歸官辦每石可
 獲利二三元臺產每年約可出腦萬石硫磺一項臺產最佳經前江督沈葆楨
 奏請開禁採備官需歷辦舊章每石成本洋一元官買每石價洋三元每年出
 產六七千石上等硫磺每年只出千石均解歸官用其次積聚三千餘石官既
 不用商禁未開不能出口日久愈積愈多不獨經費虛糜棄置尤爲可惜且香
 港年銷日本硫磺至萬餘石運至江南天津一帶民間用之薰炙葵扇草帽蒸
 炊餈餈製造爆竹銷路甚多臺灣礦產甚佳奸民私煮販運出洋不一而足以
 自採之礦禁不出口既聽日本暢銷又不能禁止奸民私煮若設法經理雖獲

利無多於撫番經費不無小補等情前來 臣查臺灣樟腦硫磺兩項民間私煮私售每多械爭滋事歸官收買出售給照出口就目前情形而論每年可獲利三萬餘元以後若能產多銷暢經理得人日漸推廣以自有之財供無窮之用實於 國計民生兩有裨益惟硫磺一項雖經沈葆楨奏請開禁採歸官用尙未准商運出洋應請 旨一體開禁以暢銷路

軍機大臣奉 旨著照所請該部知道欽此

附錄官辦樟腦出入數

一十二年十一月起十四年底止共採熬樟腦六十三萬七千觔

一售出洋應六十一萬八千觔得價銀六萬一千五百兩

一除還本銀四萬八千兩又除局用運資保險等銀八千六百兩餘銀四千

六百兩

一十五年正月起年底止共採熬九十五萬三百觔

一售價銀八萬五千五百兩

一除還本銀七萬一千八百兩

一除局用各款銀四千七十兩實餘銀九千六百兩

附錄官辦硫磺出入數

一收舊管存硫磺四十萬四千一百餘斤計成本銀三千七百八十餘兩

一自光緒十二年十一月開辦起至十四年底止共採煎硫磺八十一萬八

千三百餘斤成本銀七千六百五十九兩

一管收共存硫磺一百二十二萬二千四百餘斤

一除耗出售八十八萬三百斤得價銀一萬九千九十兩

一除還本並局用餘銀四千三百餘兩

一仍存硫磺二十五萬四百斤

一收舊管存硫磺二十五萬四百斤計本銀二千三百餘兩

一光緒十五年正月日起至十二月底止共採煖存硫磺四十一萬五千六百斤成本銀三千八百九十兩

一管收共計六十六萬六千斤

一除耗出售四十萬七千斤得價銀八千八百兩

一除還本並局用實餘銀三千二百兩

一仍存硫磺二十五萬四千斤


以上二款皆歸撫番用訖

按原本分四摺報銷見其文煩又不能不存其事故附錄於此

陳澧然記

創收茶釐片 十七年正月

再查台灣辦理撫墾闢地日廣經費日繁不得不釐剔餉源藉資接濟前當清賦之時內山新闢田園隨時報墾以便升科其高山巨嶺地利宜茶第土簿力微墾民或種或輟因就茶收豐歉量抽撫墾經費包商繳收光緒十三年試辦之初收數未暢十五六兩年每年約可收銀六七萬兩均隨時撥充辦理撫墾之需除按年截數彙入善後案內列收報銷外謹據善後稅釐兩局詳請奏咨光緒十七年正月二十二日奉 硃批戶部知道欽此



卷八勘誤表

頁數	二	二	三	三	三	三	三	二	二	頁數	十九	二十	廿三	廿四	廿四	廿四	廿六	廿六	廿八	廿九	廿九
行數	二十	十四	廿二	廿一	八	十	十四	廿二	十九	行數	六	三	十三	七	七	十五	十二	九	十四	廿一	廿二
字數	十四	十六	廿七	廿一	廿一	十六	五	廿七	廿三	字數	廿二	十四	五	三十	十三	十三	十三	官	三	十三	廿五
誤	洩						洋銀			誤	厄	厄	厄		不准			英	據		成
正	淋						銀洋			正	厄	厄	厄		准不			國	茲		應
脫										脫								辦			
衍										衍								理			
																		通			
																		商			
																		事			
																		務			
																		名			
																		領			
																		事			

劉壯肅公奏議

卷八勘誤表

一一

					卅四	卅二	卅二	卅一	三十	三十	頁數
					二	二十	十	十三	十一	三	行數
					廿九	五六	十四	二	四	十三	字數
					簿		礦	贏	礦	資	誤
					簿		礦	贏	礦	資	正
											脫
						洋應					衍

劉壯肅公奏議 獎賢畧

卷九

請還沈應奎布政使銜片 十年十二月

再已革貴州藩司沈應奎經左宗棠等委派渡台會查團練於十二月十八日潛抵臺疆臣銘傳前在陝西共事年餘知其精明練達久任儲胥歷著成績現值臺灣軍情萬緊餉需竭蹶之時亟賴得力大員綜司會計當經臣等會委該革司總辦全臺糧臺並籌辦捐借事務駐紮彰化統籌畫一庶免南北分歧沈應奎與劉璈亦係至交當可和衷共濟有裨大局查沈應奎於十一月二十二日到澎湖附搭漁船渡海正值法船封海之後嚴緊巡查其船行抵布袋嘴離岸二十餘里突遇法船追至沈應奎當飭將船趕赴淺水法船開礮連擊皆傍船身而過衣衫盡濕臣銘傳族姪劉盛琛與沈應奎後先同渡目擊危險情形沈應奎笑諭在船諸人死生有數堅坐不驚鎮定之操迥非尋常所及此來或

大有造於全臺可否仰懇天恩俯念冒險渡台艱危幾死實與尋常軍營投効遠殊酌予加恩 賞還布政使銜以示鼓勵之處出自 逾格鴻慈

軍機大臣奉 旨沈應奎獲咎較重著俟有實在勞績再行奏請恩施欽此基

隆法兵全退台北解嚴請獎戰守各員紳摺 十一年五月十二日台北府發

竊 臣岳斌抵六堵後已於四月十三日將前敵情形附片具奏其時因和議尙未定局雖暫停戰事彼族修營開路工作不休仍恐狡謀反覆與 臣銘傳督率各軍加意嚴防本月初二日直督李鴻章來電悉於上月二十七日畫押基隆法營自三月初卽陸續搬運輜重上船本月初六日法提督李士卑斯專差送信至記名提督蘇得勝營約請親到基隆面交被擄華人 臣等當令蘇得勝於初八日前往法將殷勤款送各船皆升中國龍旗並言及 臣岳斌所部將士九百餘人至澎湖一併交還當將被擄船戶百餘人放交蘇得勝等帶回卽於初

九日將各營法兵全調下船開往澎湖據云二十日內卽由澎湖回越所有臺北防務一律解嚴臣等於初九日均至基隆安撫百姓察看法營布置先調數營扼紮基隆前後徐圖修築礮臺一切善後事宜會商舉辦惟自上年六月基隆開仗以來孤島被圍時將一載封口之後兵餉砲鎗毫無接濟艱危情狀言之痛心仰蒙 宵旰憂勞廣施方略 勅各省設法救援 頒內帑以勵戰士詔書所至感泣涕零臣等藉以激勵將士上下一心九月堅持勉支危局疊據降酋供稱孤拔率兵到基隆後死亡相繼杳無捷音屢向本國請兵請餉法議院深咎孤酋不應爭基隆煙瘴之荒山喪師糜餉無傷中國徒喪法兵正月以來無餉接濟二月法兵饑苦異常紛紛降附連日法兵艦譯人密稱停戰後孤拔意甚快快屢梗和議議院斥之上月二十九日於澎湖接電知中法議成畫押孤酋憤愧痛飲而亡座上一兵酋與之同死法人諱稱醉斃實皆酖死等

情查孤拔自上年八月親將水陸大軍遠侵台北大言一月定取全台法國軍民皆知其說乃竟困於基隆瘴惡之地進有山河之險退無以踐息壤之言坐守一隅喪師糜餉徘徊海上力竭就和自爾無顏返國此次兵端孤拔實爲禍首果係飲酖自殺雖未受天朝顯戮實足快薄海人心夫豈臣下智力所能及此獨念基隆地方週圍不過三十里終年風雨瘴毒橫生不特內地無此厲鄉卽全台亦無此絕域偶罹疹疫遂與死鄰各將士致身行間不畏死於兵戎惟恐亡於烟瘴曹志忠蘇得勝劉朝祐林朝棟等所部各營防剿經年死傷枕藉彌復忍饑裹創血戰死守於槍林礮雨之中修濠築牆毫無退志俱屬堅忍刻厲死生不渝陳鳴志王詩正聶士成等軍雖到防未久當逆焰猖獗之際冒雨滾營進逼基隆與敵對壘俱係不避艱險慷慨勤王至若地方官紳或捐貲帶勇或辦練助防敵愾同仇深明大義臣岳斌隨帶文武各員適值澎湖失守

冒險渡臺均未忍沒其勞勩除力戰陣亡提督銜記名總兵果勇巴圖魯曾照禮儘先副將劉義高藍翎千總段有升藍翎把總尤運農儘先把總祁文元等已請 交部照陣亡例從優議卹外謹將異常勞瘁之將領官紳開單請 獎伏候 聖裁

光緒十一年六月初三日奉 上諭楊岳斌劉銘傳孫開華奏台北解嚴請將歷次戰守尤爲出力將弁官紳及籌運出力人員獎勵各摺片劉銘傳駐守台北未能相機決策攻復基隆本屬無功足錄而各營將弁官紳固守要隘歷時甚久迭次接仗亦能竭力抵禦自不能因督師之不力並沒行間効命之勞惟所請獎叙未免過優應量行核減酌予恩施提督蘇得勝著交部從優議叙總兵劉朝祐著以提督記名簡放提督聶士成著以總兵交軍機處記名遇有海疆總兵缺出請旨簡放總兵柳泰和著遇有陝甘總兵缺出請旨簡放副將劉

天雲著交部從優議叙提督劉見榮著以提督交軍機處記名請旨簡放總兵
易玉林著以提督交軍機處記名請旨簡放總兵唐仁元廖得勝桂占彪均著
賞給一品封典副將談發祥著以總兵記名簡放遊擊蕭清福著免補遊擊以
叅將儘先補用叅將鄭洪勝著免補叅將以副將儘先補用都司陳輝煌著免
補都司以遊擊儘先補用已革副將武青龍著賞給叅將銜已革花翎四品官
兼佐領金福元著銷除永不叙用字樣至單開之提督曹志忠等四員及另片
奏保之提督彭楚漢總兵吳鴻源據稱該員等奮勇出力請分別獎勵等語曹
志忠楊金龍申道發賀興隆彭楚漢均著交部從優議叙吳鴻源著賞給頭品
頂戴郎中林朝棟著以道員不論雙單月遇缺儘先補用道員陳鳴志著以道
員歸江蘇候補班遇缺題奏知府方策勳著免補本班以道員改留閩省補用
知縣鄭建中著免補本班以直隸州知州仍留閩省歸候補班補用郎中林汝

梅著以道員不論雙單月儘先選用知府陳霞林著免補本班以道員仍留原省歸候補班補用內閣中書潘成清著以同知不論雙單月遇缺儘先前選用廩生李秉鈞著以縣丞不論雙單月遇缺儘先前選用同知劉勳著免本班以知府仍留閩省歸候補班補用縣丞蔣本鑑黎庶懷均著俟補缺後以知縣仍留原省補用縣丞戴運寅著俟選缺後以知縣歸候補班補用福建布政使沈保靖前長蘆鹽運使額勒精額道員奎俊均著交部從優議敘道員伍廷芳著以道員不論雙單月選用盛宣懷孫欽昂葉文瀾均著交部從優議敘朱福榮胡燏棻均著仍以道員歸候補班補用邵友濂著賞給一品封典龔照瑗著賞戴花翎已革道員裕庚著以知府留閩補用王詩正沈應奎均係已革司道大員左宗棠並未先行奏明輒令赴營本不應給予獎敘姑念該革員等業經渡台不無微勞足錄王詩正著賞給五品頂戴沈應奎著賞給四品頂戴陣亡之

總兵曾照禮副將劉義高千總段有升把總尤運農祁文元等均著交部照陣亡例從優議卹該部知道單一件片二件併發欽此

奏獎道員邵友濂龔照瑗片

再台灣孤懸海外法人自恃船堅砲利一意攻圍臣銘傳於上年五月十三日由京起行二十四日單騎馳抵基隆猝臨強敵閩台軍務廢弛已久以病疲烏合之師當節制訓練之寇槍礮器械無一敵人不啻驅疲羊以逐狡兔若非

聖主發施方畧南北洋暨粵閩各疆臣力拯孤危大局何堪設想實由李鴻章曾國荃張之洞設法濟援不遺餘力惟當敵船環擾危急路窮之際運械送信兌銀非實心任事之員誰敢冒圍入險溯自封口以來至本年二月底運濟械餉未失絲毫自非承辦各員顧全大局籌畫周詳安能及此查通信兌餉以福建水師提督彭楚漢差弁次數最多運兵運械以南洋爲最力其次北洋運送

毛瑟槍五千餘桿克虜伯過山礮十六尊協餉二十餘萬廣東運送士乃得槍五百桿大唧前門槍三千桿協餉十餘萬均當急需之際立救危亡三月以後張之洞復委員陸續解餉十餘萬運送後門槍三千桿尤見始終如一各疆臣公忠任事力救孤危在各大臣受恩深重理宜竭力以分我皇太后皇
上宵旰之憂臣等當兵單援絕器乏餉窮四顧重洋決無生路豈料蹉跎今日尚在人間追念危迫情形不禁感激泣下朝廷論功行賞自有權衡非微臣
等所敢擅請惟上海道邵友濂江蘇候補道龔照瑗當上年秋冬之際濟械運兵十餘次前死後繼百折不回卒能將劉朝祐四營聶士成兩營並槍砲水雷電線等件歷艱險以達重圍且復憂念台危代向南北洋廣東乞師援救義憤忠情來信皆言隨淚下不啻身在圍中邵友濂與臣銘傳只一面之交尤爲難得彭楚漢身任提督於餉事呼應不靈獨具忠懇與福建藩司沈保靖前任廈

門道孫欽昂現署廈門道奎俊籌運接濟始終不渝可謂實力實心顧全大局
福建水師提督利勇巴圖魯彭楚漢官職較崇應如何獎勵之處不敢擅請
邵友濂龔照瑗曾經直督李鴻章請獎部駁以龔照瑗并戴花翎邵友濂一
品封典均核與定章不符應令另行奏請等因查該道等忠敢血誠力全危
局其籌運出力非尋常勞績所同實與戰功無異應懇天恩破格優獎二品
銜江蘇蘇松太道邵友濂擬請賞給一品封典二品銜江蘇候補道龔照瑗
擬請賞戴花翎均擬請賞給頭品頂戴用昭激勸出自逾格鴻慈所有
籌畫協濟之司道並冒險押運文武各員謹擇尤開單請獎其餘轉運各員
候咨請各省查明開單彙案請獎方見有勞並錄同沐恩施伏乞聖鑒
請加恩總兵吳鴻源片

再前浙江溫州鎮總兵吳鴻源奉旨援臺該鎮久經休致冒險渡臺毅然以

逐虜保臺爲已任力雖不逮志實可嘉該鎮所部土勇四營經臣銘傳商請分屯中路防禦海口聯絡民團深資得力惟目前軍事粗平餉項奇絀臺南北土勇不下三十營急應陸續裁撤以節餉需除林朝棟張李成兩營土勇能戰能守仍留辦防外其餘已經臣將台北土勇補發欠餉陸續遣歸台南亦令陳鳴志點驗清查立行裁撤吳鴻源所部土勇是否一律撤裁應俟請旨後欽遵辦理查吳鴻源自廈門率帶一營冒險赴援不避艱苦設防辦練有裨地方應懇天恩酌量加恩以示榮幸

覈減基滬立功將士懇照前單給獎摺

十一年十月初六日

竊臣奉光緒十一年八月十九日 上諭劉銘傳等奏遵保基滬獲勝立功將士並歷次戰守尤爲出力之援軍練董轉運員弁官紳併案開單請獎一摺軍營保獎人員必須打仗獲勝或扼守要隘等項實在著有勞績方足膺懋賞而

昭激勸此次單開除滬尾接戰出力各員弁應量予獎勵外其王詩正一軍前經臨敵失利吳鴻源一軍留守中路並無戰功該撫等一併彙案其餘各營何項出力亦未詳細聲明是開報既屬籠統保獎復多冒濫殊非覈實之道著劉銘傳會商孫開華將軍開員數及所請獎敘嚴行裁汰查明實在異常出力員弁再行悉心覈定分晰開單據實具奏欽此臣跪聆之下仰見天恩高厚訓示周詳莫名惶悚當卽會商覈減除滬尾接仗各員蒙恩允准獎勵外其餘各營在基隆者如暖暖大水窟月眉山等戰節經疊次奏報有案論戰功固以滬尾一捷爲最著論勞績則以基隆爲最苦最久最險最難其地瘴烟風雨寒燠不時將士隨臣身臨前敵死於戰陣者十分之一死於瘴疫者十之四五其幸而存者類皆瘡痍鋒鏑餘生恍如再世故基隆保案上年十月臣開華卽飭各營開單請獎臣銘傳方以軍勢孤危無暇及此解嚴後會商覈定其異常出

力各軍每營只准保內外獎各三十人其次分別扣減猥以各營彙併人數較多不克逐名註考故開單時但分各軍各營團練轉運並恐蹈冒濫積習汰減已多現在各軍或早經遣撤或已去臺置其留臺駐防又或蹉跎病沒臣等覈商再四實不忍更事減除至王詩正臨敵失利吳鴻源並無戰功固不應開單請獎惟當全臺危岌兩將冒險赴援王詩正雖不知兵其將士尙多敢死奈昧於地勢暗於敵情器械不精以致未能獲勝吳鴻源冒險援臺獨蒙優獎隨帶員弁俱係不避艱危用敢并開請獎臣等痛定思痛既未忍獨厚已軍接待客軍更不敢稍分畛域儻蒙聖主垂念各將士冒涉風濤不避艱險躬履孤危烟瘴之鄉恩施逾格臺灣孤懸海外將來一有戰事仍將求助他山假此鼓舞人心所裨於臺事實大此臣等所不能不爲兩軍陳乞者也惟內有陳鳴志所部土勇兩營當月眉山退守之後該部卽同蘇得勝鄭洪勝立復巷攻口

大水窟八堵尖等處要隘扼守前鋒與敵對壘屢次接仗實屬勞瘁異常應懇天恩准合前單一并給獎以明賞罰

軍機大臣奉 旨覽奏已悉王詩正吳鴻源部下擬保各員弁著劉銘傳詳加覈減至王詩正陳鳴志兩軍前單籠統開保此次單內開列釐出四十餘員以前單覈計尙有一百餘員是否全歸刪汰並未聲明殊欠明晰仍著分營逐一開單具奏其餘所請獎敘各員著該部議奏單同前單併發欽此
請獎洋員片

再上年法船窺犯滬尾李彤恩始議填塞海口各洋商以秋茶上市恫喝阻撓經淡水關稅務司法來格諭以利害開導多方始得沈船封塞並羈縻引港洋人不爲法用八月法船開礮攻擊礮臺法來格幫同防禦礮彈所及堅守不搖本年春間復籌商轟擊法國鐵甲兵船雖因攻具未備奏效殊難而急公助順

之忱實堪嘉尙又基隆海關幫辦洋人鮑郎樂於上年六月法船初犯基隆經總兵曹志忠邀請與法提督李士卑辯論數番密告曹志忠豫備戰事嗣後基隆退守洋關門前堆煤十餘萬擔鮑郎樂設法保護絲毫未至失遺及回滬防復同法來格贊助防務相度地勢安設礮基均屬異常出力據台北通商委員兼管滬尾關稅務協領兜欽等稟請 奏獎前來合無仰懇 天恩將法來格賞給三等寶星鮑郎樂傳 旨飭知總理衙門轉飭總稅務司嘉獎以昭激勸謹附片具陳

軍機大臣奉 旨著照所請該衙門知道欽此

奏雪林文明冤殺 十一年

再據道銜兵部郎中林朝棟守備林朝昌稟稱竊 朝棟 胞叔花翎副將林文明

即 朝昌 之親父於同治九年爲仇家誣控被委員凌定國冤殺縣堂 朝棟 祖母

戴氏以衰年命婦羈省候訊十有三年無如衆官相護牽合別情延宕箝制逼致祖母四番京控奉旨嚴催終難昭雪光緒七年朝棟見祖母衰病日劇亟思侍奉回臺又因拖訟多年產傾債積且是時原辦此案之前臺灣道方以京卿督辦船政爲前督何憲同鄉自知此冤斷難伸雪而各憲又許代胞叔瀚雪謀反重情請旌祖母朝棟量力度勢迫於無何代出遵斷完案而祖母猶靜候傳質不肯回台病至垂危執朝棟手謂曰吾死不能爲汝叔伸冤汝父殉難汝忠臣子也終當舍生以成吾志蓋祖母始終不知此案已經朝棟手結也去年法寇犯臺朝棟與朝昌備資募勇殺敵前驅惟冀建功報國以明先叔之冤不濟則繼之以死仰荷指授機宜幸多斬馘方擬盡殲醜類再瀝下忱乃蒙錄及纖勞疊加獎勵泣念家世受國厚恩以忠義相砥礪朝棟父諡剛愨以提督殉難漳州胞叔文明亦轉戰閩浙間平定台匪今朝棟兄弟勉效微勞猶霑

殊澤而胞叔屢著戰功洊保副將既被無辜之戮且蒙不韙之名飲恨摧心何顏自立天壤再四思維案經朝棟具結久經奏定本難再望平反惟有泣辭本身及朝昌新沐之恩施冀得滿胞叔被汗之名節不得已瀝懇鑒察確情博訪輿論奏請將朝棟朝昌擬保官職概請撤銷追復叔父文明副將原官明叔父被戕之冤慘慰祖母不暝之羈魂朝棟等必當誓死以報朝廷無任哀悚屏營之至等情臣查副將林文明被委員凌定國冤殺縣堂一案伊母林戴氏四控京都案延不結中經編修何金壽御史吳鴻恩孔憲毅先後入告並有舉人邱敏先等呈請都察院代奏疊奉諭旨限催始於光緒八年間強令該家屬遵斷奏結蓋是時已宕延十有三年林戴氏年逾九旬不勝羈候之苦又因訟凶傾產且牽連案外被誣之林萬得結案無期於是林朝棟慮其祖母衰病遂代林氏赴案遵結此原奏所以聲明告示謀反一語爲過當又附片言林

朝棟之爲善於鄉林戴氏之深明大義懇 恩旌表以慰其心其實林戴氏並不知案之已結猶日望伸雪不肯回臺以致死於閩省也臣曩歲家居卽聞臺灣有此冤獄及渡台後又備知此案奏結之未得確情去秋寇事方亟餉匱援絕林朝棟偕林文明之子林朝昌自備資財募勇五百血戰前敵艱苦備嘗累戰獲捷經臣論功先後奏保各在案臣復詢訪臺灣紳士林維源陳霞林潘成清等據稱林文明被控多屬虛誣被殺尤爲奇慘林文明胞兄林文察殉髮寇之難林文明亦累著戰功擢至花翎副將今其姪林朝棟其子林朝昌又以募勇殺敵捍衛鄉閭忠義聚於一門慈孝彰於海表林文明獨以從軍血戰退處田間蒙不韙之名含冤地下均爲聯名具稟代懇 奏請昭雪以明是非臣查台灣誣告之風本盛地方官不究反坐富家巨室時以自危林文明賦性粗豪誠不能循循繩墨然其前此控案則半由與伊兄林文察剿辦叛賊戴萬生歛

怨鄉黨遂爲仇家所誣前任督臣訪聞失實疑爲勢豪遂飭台灣鎮道便宜從事林文明被殺之日實係衣冠至縣庭投質衆目共瞻其非露刃登堂率黨拒捕無煩重辨惟事隔多年妄殺之委員既因他案參革督臣之誤辦此案訊結此案者或已物故或已去官牽累既多臣亦無庸再請查辦惟既深知林文明以忠義之門立功之將而妄罹非刑林朝棟林朝昌以世濟之忠而長留隱痛事不同於幹蠱朝廷賞功之典豈可固辭冤雖等於覆盆鄉里直道之公幸而未泯可否仰懇天恩俯念林文察死難之忠勇林朝棟等數月戰守之勤勞准將林文明開復花翎副將原官俾全台士民咸知朝廷予奪之公明不獨林朝棟兄弟感戴鴻慈涕泣效命已也臣爲明是非勵忠孝起見是否有當出自逾格鴻慈

軍機大臣奉旨林文明一案前據何璟等查明並無冤抑林朝棟情願遵斷

業經奏結林朝棟等募勇助勦著有勞績自應給予獎叙朝廷賞功罰罪各不相蒙所請撤銷保案追復林文明原官之處著毋庸議欽此

按此事爲天下奇冤奏內至爲詳晰文墨吏乃竟拘守成案不肯湔雪以固人心又何怪臺民之俯從異族耶然聞朝棟自割台後舉家改籍朝棟仍服中朝可不謂人傑哉 陳澹然記

奏留李彤恩片 十二年三月

再 臣接准前陝甘督 臣楊岳斌咨開光緒十一年六月初五日具奏遵 旨確查據實覆陳一摺六月二十三日軍機大臣奉 旨覽奏均悉李彤恩著卽驅逐回籍不准逗遛臺灣朱守謨著卽行革職永不叙用該部知道欽此欽遵恭錄咨會到 臣旋據李彤恩稟銷各差八月間遵 旨回籍嗣因淡水各鄉折毀教堂一案並李彤恩經辦捐輸殊多棘手復經署臺北府知府劉勳紳士廣東

候補道陳霞林等疊次函請李彤恩於十月底來臺立將教案結清捐輸亦辦理就緒查李彤恩自同治元年到臺至今二十餘年歷辦通商事務遇有中外交涉大端無不立時完結其才識敏斷勇於任勞臺北紳民共相欽服因臣德望淺薄不洽同僚累及無辜實深慙歎前陝甘督臣楊岳斌欽差大臣刑部尙書臣錫珍等先後到臺淡水公正紳士聯名數十人屢爲稟白此中委曲已在聖明洞鑒之中臣亦何庸再瀆惟李彤恩所辦通商礦磺非熟悉洋務之員不能接辦數月以來無人可委思維再四惟有仰懇 天恩仍將李彤恩留台差遣辦理通商並礦磺諸事以免廢弛臣爲通商要務需人起見是否有當伏乞 聖鑒

光緒二十二年三月十七日軍機大臣奉 旨著照所請欽此

援照南洋成案請獎運台各員摺 十二年四月十八

竊臣接准吏部咨覈議臣等前保台灣轉運餉械人員應照尋常勞績覈議分別准駁開單具奏一案光緒十一年十二月二十五日奉旨依議欽此咨行前來在部臣慎持名器力杜冒功自應遵照辦理惟台灣孤懸海外轉運艱險較內地殆百倍之當重圍緊急之中海道梗塞不但接濟餉械無路可通卽召募通信之人亦無敢應臣與南北洋閩粵各疆臣廣懸重獎俾由民船冒險往來其陷於敵兵壞於風濤者羣相踵接各員於萬死一生之中閒道接濟幸而得達無不蓬頭徒跣憔悴無復人形臣等接見之餘輒深憫惻各員身嬰絕險抑復何堪凡此情形實爲內地轉輸所未有種種情狀均經節次奏陳既許優獎於危難之中安忍食前言於事平之後今部臣照尋常覈議自係查按例章不知轉運渡臺艱苦遠殊內地臣身受其惠不能再事瀝陳查此次軍務凡南洋各處轉運人員曾准照異常勞績請獎由部覈准有案臺灣事同一律而

危險過之合無仰懇 天恩飭部查照除業經覈准張席珍三十員外其餘前單開列各員准照南洋成案按照異常勞績分別覈獎以免向隅伏求 聖鑒

光緒十二年五月初八日軍機大臣奉 旨著照所請該部知道欽此

保陳鳴志片 十二年四月

再現署臺澎道江蘇選缺題奏候補道陳鳴志自上年五月到任以來整頓地方遣散營勇拿辦哥老會首王春華易子林等銷患未萌辦理俱臻妥洽從前劉璈沾名蠹國視私財如性命用公款如土苴陳鳴志遣散冗員裁併散局破除情面歲節銀四萬餘金該道持躬潔廉辦事勤謹實爲司道中不可多得之員合無仰懇 天恩准將陳鳴志改爲留閩遇缺題奏以資臂助

光緒十二年四月十八日軍機大臣奉 旨著照所請該部知道欽此

統兵大員先後積勞病沒請卹摺 十二年十一月十一日

竊據武毅副營營官提督朱煥明稟報該軍統帶記名提督王貴揚於八月二十三日在營積勞病故又據記名提督劉朝祐稟報該軍代統記名提督唐仁元於十月十四日在義興社營次積勞病故復據宜蘭縣知縣林鳳章埔裏社通判林桂芬先後稟報埔裏社營官副將周鳴聲蘇澳營官副將袁紹從先後在營病故等情臣查記名提督王貴揚唐仁元均以勇日隨臣克復蘇常各府州縣剿辦捻匪馳逐東豫拔充統帶營官王貴揚自陝西撤防後即在保定經大學士臣李鴻章委帶練軍臣渡臺時咨調來臺接統滬尾三營承修滬尾礮臺事事躬親不肯一錢浪費本年四月新竹南河民番仇殺臣因時交夏令將士不便深入內山王貴揚適至淡水請具限十日決告成功卽率所部三營並袁紹從一營由南河直逼六蕃番社當時陰雨連綿河溪陡漲王貴揚親率士卒梟水過溪三道直入內山旬日之間招撫二十餘社查明滋事隘首鍾濬堯

押送新竹縣懲辦番情悅服至今六蕃等社感戴輸忱臣過南河時各番日來見聞其病沒皆感歎吁嗟足見其誠懇過人感孚蠻貊唐仁元於本年三月率隊由三角湧剿撫加九岸各社生番開路三道深入內山五十餘里沿途收撫三十餘社五月杪始振旅而還該營將士受瘴日久死亡獨多已深悼惜唐仁元撫牌奮發於本年八月率隊至義興社遽爾病亡此二員忠勇樸誠身經百戰方冀奏登薦牘儲備將才爲國家任干城之寄不意受瘴既深積勞過甚先後在營病沒殊痛惜之副將周鳴聲管帶練軍駐防埔裏社會同通判林桂芬招撫生番七十餘社擇番童之聰明者親教讀書生平儉樸自持頗通文理爲不可多得之才副將袁紹從本任龍山營守備臣知其夙負才勇咨調來臺隨同王貴揚並道員方策勳招撫新竹宜蘭生番百餘社駐防蘇澳撫馭翁和番情悅服不料又與周鳴聲先後在營病沒故憫悼尤深查臣部已故記名提督

周志本在臺病故兩江督臣沈葆楨奏准優卹在案提督王貴揚唐仁元副將周得聲袁紹從等四將轉戰數省所向有功剿撫生番尤爲勞瘁臣回思舊部益用愴懷合無仰懇 天恩准照立功後在營積勞病故例 交部從優議卹以慰忠魂無任悽懇屏營之至

軍機大臣奉 旨王貴揚等均著交部照立功後在營積勞病故例從優議卹欽此

請留已革都司管輪片

再已革澎湖協右營都司鄭漁上年澎湖失守案內奉 旨革職發往軍台効力當起解之時適值督臣楊昌濬到澎大閱隨帶橫海兵輪觸礁沉沒人力難施督臣當查鄭漁素帶兵船熟悉洋面派令起撈橫海機器兩月以來不避艱險起臥於風濤雪浪之中撈解銅鐵機器多件臣前奏記名提督吳宏洛到澎

辦理海防察知鄭漁辦事勤奮熟悉澎湖情形軍民愛戴稟請可否奏懇隨同
辦防等情臣查鄭漁失守澎湖奉旨革職發往軍臺原不應據情瀆奏惟上
年澎湖之失鄭漁雖有地方之責臣累到澎湖查察該革員尙無臨敵畏避情
事且臺澎四面皆海一舉一動非輪船不行現在臺灣兵輪日增臣時物色管
駕之才頗難多得鄭漁曾在船政管駕兵船熟習風濤沙綫勤奮耐勞合無仰
懇天恩俯念臺澎海防緊要兵輪管駕需人可否准將已革澎湖協都司
鄭漁暫留臺澎差遣以觀後效出自逾格鴻慈

軍機大臣奉旨鄭漁著准其暫留臺澎戴罪効力該撫務當隨時察看如不
得力卽奏明仍遵前旨發遣欽此

請卹王郊片

再營務處詳據已故知州王郊家僕王忠稟稱家長花翎升用知府開復留陝

補用直隸州知州王郊安徽懷甯縣人少從銘軍歷保今職本年正月聞台灣軍務危迫投效來台於二月二十二日行至廈門附平安輪船至泉州載兵東渡二十六日至台南沙碼碯洋面突遇法船追劫擄入澎湖凌辱萬端家長怒詈不已法人不明其語置之是夕執王忠手痛哭言已身受國恩荷劉帥知遇當此危難不能殺敵捐軀乃爲敵擄有死而已王忠涕泣勸以家長若死誰顧家室彼時王郊歎諭此際當明大義何能顧念室家明晨法寇來問知我爲大清官必加凌辱如國體何我死後爾可逃歸告知家中屍骸不必顧問潛於四更時分乘王忠睡熟自縊殞命次日法人將屍抬埋濠上王忠困守賊中數月幸得放歸稟請轉詳附奏等情前來臣維王郊遠涉風濤渡臺投效生遭寇擄死葬濠濱覈其殉難情形實屬深明大義合無仰懇天恩俯准交部照知府陣亡例從優議卹以慰忠魂

軍機大臣奉 旨王郊著照知府陣亡例從優議卹該部知道欽此
道員方策勛病沒請卹片

再辦理營務處道員方策勛帶隊隨同攻剿白阿歪社生番受瘴深重收隊後
中道病亡尤深悼惜查方策勛少以書生投効前督辦陝西軍務荊州將軍多
隆阿軍營并隨 臣剿辦捻匪轉戰數省功績聿彰洵保二品銜升用道鹽運使
銜河南候補知府經 臣於光緒十年六月 奏以熟悉軍務辦事勤能調臺差
遣時值法人封港冒險潛來檄令總辦全臺營務勞瘁異常解嚴案內保以道
員改留閩省補用十一年冬監造基隆礮臺並管健軍營務海濱嚴寒雨多風
肅日催工作寒暑不休上年六月調辦宜蘭剿番適當炎夏瘴疫方深水土惡
劣方策勛深入內山勦平溪頭小坡塘等十餘社回營後卽染瘴癘瀉痢月餘
九月初 臣督剿中路叛番方策勛復同銘健兩軍由北路進剿白阿歪等社力

疾率隊開路造橋勤能倍至不料瘴疾復作於十一月十四日病亡淡水營次
臣伏查方策勳才兼文武果敢耐勞爲軍營不可多得之選經臣奏調來臺
方期得收臂指之助遽以歷受瘴疫中道遽亡勞苦一生家貧如洗追念三十
年來久同患難心實傷之合無仰懇 天恩俯准敕部照軍營立功後病故例
從優議卹以慰忠魂

光緒十三年二月十四日奉 硃批方策勳着照軍營立功後病故例從優議
卹該部知道欽此

明保道員陳鳴志片 十三年閏四月

再署臺灣道福建候補道陳鳴志經臣於光緒十一年五月奏保署理臺灣道
唐景崧業已到任該道交卸後 檄飭經理全台營務並會辦鹽務釐金清賦
等差查該道自署任以來除弊剔奸整頓兵營吏治拿辦會匪遣散遊兵商同

後山統帶張兆連鳳山統帶陶茂森等招撫生番先後不下十萬人不憚勞怨力洗台南積習夙弊一清其於軍務外交尤爲熟悉持躬廉樸辦事精詳實爲道員中不可多得之選方今外患多憂人才難得臣知之既確不敢壅於上聞可否仰懇 天恩將道員陳鳴志交軍機處存記以備任使出自 逾格鴻慈

光緒十三年閏四月十六日奉 硃批陳鳴志著交軍機處存記欽此

調何嗣焜辦文案片

再臣於光緒十年渡臺之際奏留已革安徽候補道裕庚辦理文案該道公事嫻熟臂助實多不料到臺後溼熱上沖目疾沈重上年五月請假內渡就醫文牘軍書皆臣一人辦理竭蹶萬分時欲訪求品學兼優之才得資贊助未得其人現查有分發補用直隸州何嗣焜江蘇常州府人學識優長講求品節素在

故粵督張樹聲幕內持躬謹飭不事外交直隸總督李鴻章知臣左右無人馳函推薦合無仰懇 天恩俯念微臣一介武夫需員贊佐請 旨飭下江蘇撫

臣衛榮光轉飭何嗣琨馳赴臺灣以資臂助謹附片具陳

軍機大臣奉 旨知道了卽著該撫咨行江蘇巡撫轉飭何嗣琨馳赴臺灣聽候委用該部知道欽此

請休致臺灣鎮總兵片 十四年二月

再台灣鎮標兵餉優厚甲於天下其軍政廢弛亦爲天下所無上年八月臣請將屯兵四千併歸總兵調遣以免虛糜將來稽發屯糧認真操練必得樸勤忠實之員方能勝任現在署總兵萬國本駐防臺南實心辦事勤苦耐勞軍民交頌如能假以歲月或冀挽回積習以整戎規查本任總兵吳光亮人尙樸厚惟於操防器械不知講求暮氣太深難期振作擬請 旨開去臺灣鎮缺 飭令

到京另候簡用抑或 准予原品休致出自 鴻施臣爲慎重海疆總兵要缺
整頓綠營起見是否有當伏乞 聖裁

光緒十四年二月二十二日奉 旨留中欽此

按吳光亮後以 覃恩呈乞公奏還原官公念其久著戰功奏請開復降調
其無適莫如此 陳澹然記

台灣水土惡劣知縣員缺請飭部暫寬例章變通補署摺 十四年五月二十日
竊據布政使邵友濂詳稱台灣知縣一班本年春季病沒數人三次請調閩員
僅來李承緒一人近又病沒續調實缺兩員尙未到台查台地煙瘴橫生水土
惡劣兩年間病沒廳縣十餘員奉調之員聞風裹足各縣懸缺未補至八九缺
之多現據代理鳳山縣知縣吳元翰稟報病勢沈危急需委員代理值此清丈
甫竣給單升科在在均關緊要台地竟無候補人員可以委署除再遴選閩省

人員另請咨調外詳請速核辦理等情臣查台灣現辦給單升料正當喫緊全在委用得人無如知縣一官照章咨調閩省重洋遠隔呼應不靈加以水土惡劣人人視爲畏途近年所用清丈人員頗有實力耐勞熟悉地方情形堪勝繁劇之任者輒以格於成例不容假以事權棄置殊爲可惜是合例者無人可用可用者又不能合例徒使地方久懸要缺遴委無人未免貽誤伏查台灣添改廳縣暫准不拘資格變通酌補或尙可行原設各縣本難援照辦理惟現值清丈升科之際非熟悉情形能耐勞苦之員不堪委用况閩來人少現無候補可委之員可否仰懇天恩俯念台省地方緊要稍寬例章或俟省城完工或以十年爲限暫准不拘資格一體變通酌量補署以求治安飭部速行核議

光緒十四年六月十二日奉 硃批吏部速議具奏欽此

奏請林維源幫辦全台撫墾事務片 十四年十二月

再太常寺少卿臣林維源奉 旨幫辦台北撫墾事務自光緒十二年四月回籍開辦以來墾闢新舊荒埔至七萬餘畝業經淡水縣丈量三萬餘畝一律升科其餘俟三年後陸續升科納賦此外台北沿山番地種茶開田已無曠土其次皆山高土瘠招墾綦難查全台生番全行歸化僅贖新竹內山數社仍自負隅現經臣飭派都司鄭有勤統帶所部隘勇並就近化番相機勦撫不日當可告竣惟撫番必資開墾否則莫由化其獠犷化番久與民居交易婚姻乃知人世衣食倫常之樂其嗜殺之性自將默化潛移現在中路暨後山一帶曠土尙多亟須招墾非有勤實大員督率實濟良難林維源篤實忠勤感激圖報台北已徵成效自當推廣全台擬懇 天恩飭派幫辦全台撫墾事務不獨臣得資指臂之助實於全臺治化裨益無疆

光緒十四年十二月二十一日奉 上諭太常寺少卿林維原著幫辦全臺開

墾撫番事務欽此

請緩揀發知縣員缺由閩咨補片 十五年二月

再欽奉 諭旨臺灣缺員應請揀發一節飭卽酌覈具奏等因原片謂從前未聞缺員何以今竟若斯之甚不知今日之台灣安可與從前同語自開辦撫墾清丈以來頭緒紛繁規畫鉤稽在在須躬親其事偶稍違誤臣卽叅劾隨之此公事之難一也自清丈改條鞭辦法舉凡平餘火耗涓滴歸公視縣缺之簡繁分津貼之多寡雖昔稱優缺今則無能獨獲奇贏此缺分之苦二也台灣分省案內凡咨調補署差委各員倘因記過撤差知照閩垣一律停委偶經乖謬廢棄以終此考覈之嚴三也况閩員雖多真辦事之才亦寡果爲幹練非居要缺卽處要差甚或迎養老親在閩不能東渡本年夏委用需人咨調閩省實缺數員均須理清交代抵台尙待需時不得不於奏留人員中酌量試署如果人地

相得再令補捐離本省以符定章此固勉圖本屬權宜非敢故違成例也甘肅候補知縣高光斗江蘇候補知縣朱公純或在台有年或曾權劇邑破格擢用方冀得人然高光斗一經被案立予撤叅既不敢以奏保在前曲爲迴護更不敢以相知有素稍事瞻徇論者疑爲信用私人殆未知臣因地求才隨委隨撤毫無成見也至揀發一節台地皆邊要之缺自應請揀曾任實缺人員然所揀合宜固多裨賴萬一人地不宜或水土不服既由請揀固未能咨回閩省又未便徙而之他遷就因仍吏治安能就理臣悉心酌議臺灣孤懸海外缺數無多揀發人員似可不妨緩議至現在應補各缺仍當函商督臣由閩咨調請補是
否有當伏候 聖裁

光緒十五年二月十二日奉 硃批知道了欽此

奏保紳士片 十五年二月

再據代理彰化縣知縣朱公純稟稱光緒十四年秋間土匪施九段圍攻縣城四鄉盜賊竊發城南有李砥戕害提督朱煥明城北有蔡芳聽受施逆號召糾合三十六莊於甲溪阻截援軍獨賴在籍郎中蔡占鼇於官軍進援之日幫同解散三十六莊立將該族匪蔡芳拿送正法洵爲公爾忘私又據署嘉義縣知縣包容署嘉義營參將陳宗凱稟稱嘉義毘連彰化當土匪肆擾之際前署知縣羅建祥奉文交卸新任未到人心惶惑一夕數驚在籍工部主事林啓東聲望夙孚孝友素著會合陳宗凱辦理團防曉諭順逆約會各鄉聯莊緝匪民心乃安彰匪亦未敢南竄實賴林啓東保衛之功各等情先後稟請保獎前來臣查蔡占鼇幫同官軍解散脅從且能拏獲同族匪首蔡芳送官懲辦實屬不避嫌怨尙義急公林啓東孝友素著品學俱優臨亂倡團地方得以安謐於台灣民氣尤爲難得觀其効忠守正保衛鄉閭實堪爲地方表率其勞績不下於軍

功分部郎中蔡占鼇可否 賞加道銜工部主事林啓東可否 賞加五品銜
並均請 賞戴花翎俾昭激勸再匪首王煥在逃經 臣奏明緝拿在案今籍紳
工部主事徐德欽獨誘王煥至牛欄莊報知營縣會同拿獲查台紳多通匪類
互相黨援已成風氣徐德欽獨能不避怨仇誘拿匪首應請一併優叙 賞加
五品銜并賞戴花翎俾台紳咸知觀感伏乞 聖裁

開復藩司片 十五年閏四月

再前貴州藩司沈應奎於光緒十年十一月冒險渡台正值事機萬緊之時南
北軍餉告竭之際經 臣奏派辦理糧台該前司於無可羅掘之中分催各縣捐
款並查出奸商匿報洋藥釐金六萬餘元其時月需軍餉三十萬兩 臣在前敵
後路籌畫接濟全賴該前司設法支持勉保危局解嚴後遣撤客軍士勇四十
餘營補發餉需款虧尤鉅僅恃故大學士左宗棠解到所借洋款五十萬兩至

十一年冬季台南北道府各庫一空糧台存款不敷一月之用情勢岌岌該前司慘淡經營嚴催捐款以濟急需一面整頓鹽務釐金停不急之需除中飽之弊實力實心任勞任怨會計精密事事躬親全台百廢俱興辦防清賦撫番諸大端一時併舉得以支持至今日者沈應奎一人之力也現在糧台裁撤捐輸已停該前司心力俱瘁臣撫今追昔不敢沒其勤勞查近時各省司道中辦事精勤者有之持躬廉正者有之若如沈應奎之實力實心不避勞怨實罕其人臣統兵數十年仰仗 天威差幸獲立寸功者惟賞罰無私用人不分畛域毀譽一出至公除辦理捐輸出力浙江候補知府李彤恩並道府廳縣暫行記獎外開復銜翎已革貴州藩司沈應奎辦理糧台捐輸出力勞苦功多可否仰懇 天恩開復原官以示鼓勵人才之處出自 逾格鴻施

光緒十三年閏四月十五日奉 硃批沈應奎著准其開復原官餘依議該部

知道欽此

再福建布政使張夢元由台道擢任公劾劉璈疏稱其方正清廉一塵不染及夢元因事降留公復奏言台防重要賴閩協餉五年夢元深知台事艱難按月設法騰挪五年以來絕無遲誤每年二十萬未欠絲毫五年已收百萬故臣得藉茲假手設防而外更圖清賦撫番今夢元因事降三級留任可否仰懇 天恩准其開復 詔許之故節其詞而附於此以見賢帥無微不報之義云 陳澹然記

奏請沈應奎會同藩司辦理清賦片

再臺灣新賦現經臣 奏請展限所有給單徵糧正在繁緊之際自署藩司沈應奎接任以來切實督催辦理日臻起色恭閱邸鈔六月十三日奉 上諭福建臺灣布政使著蒯德標補授等因蒯德標係臣 同鄉至交忠謹廉樸久於度

支仰蒙 聖明調任台灣 臣尤得資臂助惟值此清賦之時恐於地方情形未能熟悉該司到任似應仍令沈應奎會同一手經理以期迅速報竣 臣查沈應奎優於綜核任事實心在台多年不避勞怨若能稍寬時日假以事權於海疆新設省治裨益實非淺鮮 臣爲地方用人起見謹附片密陳

光緒十五年六月三十日奉 硃批知道了欽此

遵保剿辦粵南叛番彰化土匪并歷年剿撫肅清各員弁摺

十五年六月初四日

竊 臣前於各路生番歸化並陳開山剿撫情形請獎出力官紳案內聲明其餘出力將士擬俟全台生番一律歸化彙案請獎於光緒十二年四月十八日具奏五月初八日奉 上諭著照所議辦理等因欽此溯自十一年十二月 臣於督兵克服中北兩路生番請獎在事出力員弁案內聲明其餘出力將士彙案請獎又於中北兩路化番滋事先後剿復案內聲明林朝棟李定明朱煥明余

應璜等軍尤爲出力將士由臣分別記獎十四年九月初二日 奏官軍攻克後山呂家望番社並北路接仗獲勝一案請將其餘出力各員弁請獎十四年九月二十四日 奏彰化土匪搶劫鹽館圍攻城池先後勦平一案請將其餘出力官紳員弁彙入呂家望番社案內擇尤請獎十五年二月十三日奏全台生番一律歸化逆首就擒請獎出力人員一案請將歷年剿撫各軍出力員弁並各局撫墾委員擇尤彙保均奉 諭旨允准通行遵照各在案伏查台灣生番梗化殺人橫亘南北久爲地方大患自原任兩江督臣沈葆楨創議開山撫番光緒十一年臣渡台後察勘地勢番情奏明分別剿撫沿山內外民番毗連奸宄交通藉番地爲盜藪其深山密箐生番不時竊發防不勝防而又習與人殊嗜殺成性屢服屢叛化導幾窮臣於十二年冬督兵深入內山雖兵威頗振彌知從事之難竊幸紳民一心將士効命每於臣奏奉 恩旨准予獎勵無不

踴躍前驅埤南呂家望之役叛番與影匪鉤結接踵叛亂震動全台兩月蕩平得乘兵威士氣剿撫北路未服諸番相率歸化遂歲全功自十一年舉辦撫番以來年年入山剿辦大小百餘戰將弁兵勇傷亡數千染瘴病亡數更倍此然奮發之氣歷久不衰忠勇之誠因危愈激仰仗 聖主鴻謨德威並用卒使亘古不通之境軌路同遵窮荒梗化之區 聲教咸訖諸將吏委身瘴癘鑿險緹幽困苦艱危迥非平原接仗軍情可比疊蒙 恩准獎勵亟應及時甄錄以勸將來查台灣原有三十五營分布要隘互相防剿自呂家望社及彰化變端繼作後山添募三營前山添募四營十二哨通計四十三營加以隨營辦理撫墾暨分段駐紮各局人員閱時四年彙案六次同屬異常勞績迭著優勞謹遵 恩旨擇尤保獎每營內外獎不得過四十人其承辦撫墾各員隨營併計未經深入接仗者概予刪除不敢稍涉冒濫除武職千總以下例咨兵部核獎外謹

具擬保員弁清單恭呈 御覽合無仰懇 天恩俯念各員弁海外從軍不避瘴癘異常出力准予從優照獎出自 逾格鴻施謹會同閩浙總督 臣卞寶第幫辦全臺撫墾事務太常寺少卿 臣林維源恭摺具奏

光緒十五年六月十八日奉 硃批該部議奏單二件併發欽此

請仍寬新設各官補署及留補在台各員片 十五年六月

再 臣前准部覆臺灣要缺知縣一項暫准不論資格一體酌量請補俟三年期滿仍照定例辦理新設知縣各缺先准酌量補署一次其變通章程行令察看定限奏明等因查臺灣當此行省初開百端創始吏才難得不能因地擇人實爲目前第一要義誠恐格於成例棄置人材 臣前奏所以有變通之請查舊設知縣要缺既准部議變通補署三年屆時能否仍循定例應否展期自當再行察酌惟新設各缺不特當此草創經營猝難辦理而地居番界煙瘴尤多人

地既貴相宜變通之期似不能不從寬展限應請仍照前議限以十年俾資治理據署台灣布政使沈應奎具詳前來謹附片具陳伏乞 聖鑒再現在台地各差大都借材異地一俟變通限滿各員在台效用將無補缺之期似不足以昭平允所有中簡廳縣及佐雜各缺可否仿照一咨一留章程在內地調補一次就台差委人員調補一次以免向隅是否可行併請 飭部核覆

光緒十五年六月初十日奉 硃批吏部議奏欽此

總兵留辦海防暫緩赴任摺 十五年十二月十五日

竊准閩浙督 臣 咨稱光緒十五年四月十三日內閣奉 上諭浙江處州鎮總兵員缺著寶如田補授欽此查寶如田先經 臣 於光緒十四年八月間咨調到臺委令統領銘字中軍三營駐防基隆海口茲荷補授處州鎮總兵理應入都陛見赴任惟查基隆海口爲全台第一門戶關係緊要寶如田練習基隆形

勢督飭弁勇講求操防深資得力現在辦理礮台工程未完未便遽易他員合無仰懇 天恩俯准如田暫緩赴任仍留臺灣辦理防營俾 臣得收指臂之助出自 逾格鴻慈

光緒十六年二月初十日奉 硃批著照所請兵部知道欽此

臺灣歷剿叛番并彰化土匪保案請保武職摺 十六年二月初六日

竊准兵部咨行遵 旨議奏一摺內稱福建臺灣巡撫劉銘傳等奏彙保勦辦

埤南叛番彰化土匪並歷年剿撫肅清各路番社尤爲出力員弁官紳併案開單請獎一摺光緒十五年六月十八日奉 硃批該部議奏單二件併發欽此

欽遵到部除文職應由吏部辦理外謹按定章悉心覈議分別准駁等因於光緒十五年九月初三日具奏奉 旨依議欽此欽遵鈔錄原奏清單並將千總以下另行鈔單先後咨行到 臣伏查臺灣自光緒十一年辦理番務剿撫兼施

屢服屢叛各軍節次分路剿辦如蘇魯馬那邦大埧白茆呂家望京孩兒各役戰功尤爲昭著歷次擒拿番目匪首攻奪卡礪不可勝計如埤南被圍十五日彰化被圍七日則皆叛番土匪交亂震動全臺一切接仗獲勝守城解圍各情形經臣節次奏報在案 國家獎勵戰士優定章程克復城池擒斬要逆首先出力人員准保越級其次及攻堅奪壘殲擒逆匪准保免補免選儘先遇缺卽補等班又軍營戰功卓著准保提督總兵及提督銜頭品頂戴奮勇殺賊戰功卓著者准保翎枝誠以軍功勞績迥異尋常獎賞優異疆場之士感激奮功胥在乎此臺灣剿辦生番前後五年之久大小百餘戰各軍所向克捷不得謂非戰功卓著槍林礮雨之中攻奪卡隘不得謂非奮勇擒獲匪首番目不得謂非擒斬要逆巢深險石壘堅固精銳傷亡歷奏有案不得謂非攻堅奪壘埤南廳治彰化縣城守禦解圍同屬存城之績尤不得謂非克復可比况烏道蠶叢之

境煙瘴荆棘之鄉營帳難施資糧不繼士卒暴露凍餓疾病死亡數千其戰勝
攻取之難較諸內地接仗情形不啻天壤臣於各軍出力將領業經歷次隨摺
奏蒙 恩獎其餘在事員弁時逾五年彙案六次人數較多先將出力稍次各
員一律刪汰擇其戰功最著効力最久者開單列保實屬軍營異常勞績覈與
章程相符委無冒濫若如部議各案隨摺所保員弁按照異常勞績覈獎其彙
保員弁不得援照優獎辦理是功同賞異斷不足示公平現准吏部咨查文職
請獎各員已照異常勞績覈准在案武職各員本同一案未便兩歧除盧開玉
楊興隆孫得勝三員業經兵部覈准無庸重列外合將總兵蘇得勝等三百三
十五員分晰勞績籲懇 天恩俯准飭部仍照原保階分別給獎以昭公允而
免向隅至千總以下履歷均已隨案造送並請飭照原保給獎俾資鼓勵臣軍
法素嚴苟誤戎機雖統將必殺不加厚賞何以服人愚懇微忱伏求 慈鑒

光緒十六年閏二月二十五日奉 硃批兵部議奏單併發欽此

奏請剿撫番社出力人員應照異常勞績核獎片

再准吏部議復臺灣保獎歷年剿撫番社出力人員案內聲明以後民番再有構釁派兵剿辦應照尋常勞績覈獎等因 臣查臺灣生番綿亙南北數年來剿撫兼施雖次第歸撫其殺人積習已二百餘年豈一時所能變化以後難保無滋事之虞即不能無剿辦用兵之舉 臣於南北番歸化後仍令各軍加意嚴防誠知其蠢然無知生性反覆非恩可結非理可明不過暫時羈縻逐漸誘導非一撫之後竟能永遠無事也查生番深居內山習於戰鬥槍法極精地險無路草木叢雜戰陣之事攻堅最難仰攻尤難疊次用兵傷折將士並艱難情形均經奏報在案溯查前大學士福康安兩江督 臣沈葆楨等剿辦番社以來或斬番數人或剿平一社在事各員無不照異常勞績獎擢優加原海外瘴鄉將士

履危冒險艱苦之狀非身歷其境不知其難決非內地土匪與滇粵苗搖可比以後台灣剿辦番務擬懇仍照異常勞績覈獎以明賞罰而厲戎行一俟治山撤防再遵部章辦理臣爲海疆新闢地方鼓勵將士起見謹附片陳乞 聖鑒飭部查照施行

光緒十六年閏二月二十五日奉 硃批該部議奏欽此

密保沈應奎程起鶚片十六年三月

再台灣民情強悍土豪把持清丈升科事事草創較之內地辦理尤難臣自光緒十二年四月奏請開辦以來其中雖有彰化之變嘉義之訛卒能三年竣事臣不過舉其大綱實皆署藩司沈應奎在任候補道調署台灣府知府程起鶚二人之力此二員才識練達品行端廉辦事實心任勞任怨實爲近時司道中不可多得之員 皇上親政伊始訪求人才臣知之既深不敢不上塵 天鑒

謹附片具陳

光緒十六年三月二十八日差弁遞回原片奉 硃批知道了欽此
請建劉朝帶傅德柯專祠片

再查宜蘭防軍統帶副將劉朝帶上年進山開路中伏陣亡當派傅德柯接統
該軍此次會同各軍剿辦南澳番社又復力戰陣亡業將該副將等死事情形
經臣先後具 奏請照總兵例從優議卹在案茲據宜蘭紳民前甘肅河州知
州李望洋等稟稱劉朝帶督軍開路傅柯德帶隊勦番並屬忠勇性成不避艱
險爲民捍患功德難忘懇請奏建專祠用伸報享稟由宜蘭縣詳請具奏前來
合無仰懇 天恩俯念副將劉朝帶傅德柯先後陣亡並員弁勇丁不下三百
人情形慘烈准在宜蘭縣死事地方特建專祠由官春秋致祭以彰忠烈謹附
片具陳

光緒十六年三月十七日奉 硃批著照所請該部知道欽此

奏保張兆連將才片 十六年

再查臣渡台以來隨帶記名提鎮二十餘員先後死亡已盡將才難得感悼不可爲懷惟查有記名提督張兆連始經帶兵駐防福建嗣調台灣勦辦番社疊著戰功現在督帶後山防營撫番開墾實力操防功效甚著該提督久駐後山煙瘴之地始終勤慎辦事實心曉暢戎機講求訓練爲提鎮中不可多得之員倘蒙 聖恩簡擢予以事權必能肅新軍政鎮撫地方不致有辜委任

按公參劉璈摺內張兆連進身頗卑公獨察其才力爲保奏此其所以能得人死力也 陳澹然記

光緒十六年十月初一日奉 硃批張兆連著軍機處存記欽此

總兵在台病故請卹摺 十六年八月二十九日

竊據都司蘇緒謨稟報統領健字全軍記名提督福建建寧鎮總兵蘇得勝屢以從征內山感受瘴癘積勞成疾八月十九日在營病故臣查蘇得勝籍隸安徽合肥縣自咸豐六年投効臣軍由哨長擢至營官隨同轉戰江蘇浙江山東湖北等省歷受重傷克復十餘城平定髮捻各匪洵保提督調防直隸陝西甘肅等省修築江蘇吳淞口礮臺光緒十年經臣飭調臺灣委帶健字等營疊與法人血戰奪回基隆礮台防剿經年惡戰苦守停戰之後親赴法船與法國提督李士卑斯面交俘虜臺北解嚴奉旨補授福建建寧鎮總兵仍留台灣防次迭次入山剿辦生番駐防滬尾海口該總兵忠勇素著持躬謹廉勤樸耐勞毫無嗜好感荷聖恩高厚戰輒以死自期近年統領偏師講求訓練海疆防務臂助良深方期獨任嚴疆爲國家干城之選不料感受瘴癘勞疾侵尋良將傷亡殊深悼惜合無仰懇天恩准將蘇得勝照提督軍營積勞病故例從

優議卹以勵忠勤至該總兵卓著戰功以死勤事法人之役功在海疆台北人
民至今感慕可否准於台北府城建立專祠暨入祀原籍及立功地方昭忠祠
並將生平戰績 宣付國史館立傳之處出自 逾格恩施非 微臣所敢擅請
再查蘇得勝繼妻徐氏年二十五歲痛夫情切絕食以殉距其夫亡纔五日忠
節萃於一門合併請 旌以光泉壤再統領銘字中軍記名提督劉朝祐以軍
功隨 臣轉戰江蘇浙江湖北山東等省蕩平髮捻洵保總兵光緒十年自江陰
率帶銘軍三營援台於滬尾獲勝案內荷蒙 特恩賞賚並加提督銜旋因台
北解圍奉 旨以提督 記名簡放統領銘軍剿撫生番奏蒙優叙十二年冬
調駐基隆修築礮臺不時抽隊剿番受瘴深重於十四年七月病沒軍營查該
提督久從軍旅勤奮不啻少年年來渥荷 恩施尤矢竭忠圖報詎以積勞受
瘴遽爾病亡應請 飭部一併從優議卹以厲將士報 國之忱

光緒十六年十月初一日奉 硃批蘇得勝着照原官從優議卹准於台北府城建立專祠入祀原籍並立功省分昭忠祠生平戰績宣付史館立傳伊妻徐氏以死殉夫准其旌表劉朝祐韓振基均照原官從優議卹該部知道欽此


卷九勘誤表

頁數	一	一	一	二	四	四	八	八	九	十五	十八
行數	十四	十五	十九	十八	十九	十九	二	二	十一	二十	十六
字數	三十	一上	六	三	廿六下	廿六下	七下	七下	四下	三十下	廿七
誤			裏	發							刻
正			裏	廣							劾
脫		基			運兵		斯	片	戴	現在實錄 寧海道	
衍	基										
頁數	廿四	廿五	廿六	廿六	廿六	廿六					
行數	廿一	九	二	二	十八	十八					
字數	四下	二十七	廿九	廿九	十六七	十六七					
誤			治	治	柯德	柯德					
正			沿	沿	德柯	德柯					
脫	番	官									
衍											

劉壯肅公奏議

卷九勘誤表

一



劉壯肅公奏議 懲暴略

卷十

奏參朱守謨片 十一年正月

再臣銘傳由京渡台道經上海倉猝啓行文武隨員甚少適有記名道朱守謨懇隨東渡六月十五日法攻基隆礮台臣赴前敵後路無人當委朱守謨辦理營務轉運一切會同府縣彈壓地方知其素昧戎機不令撓越月給薪費銀一百五十兩稍慰其私該道素性奢侈揮金如土未及一月卽稟稱薪費不敷火食用度月需銀三百餘兩聲明實報實銷不能限制當經批駁月增公費銀五十兩旋即請歸語多不遜因見台軍危迫規避敵鋒臣因其宦氣過深留之轉累准其給假適值河南知府方策勛冒險渡台當以營務屬之自六月半後臣在前敵軍營所住獅頭山草房濕地日日風雨困苦不堪該道端居台北府城尙自盛修公館據台北知府陳星聚詳稱擅用府庫銀二百餘兩並未報銷滯

尾通商委員浙江知府李彤恩素有幹才勇於任事臣委兼辦滬尾營務監修礮臺辦理沈船塞口各事李彤恩堅辭薪水辦事認真臣應稍爲優視該道憤甚嫉之如仇遇事齟齬已非一日適值八月十三日法礮環攻基隆退守該道遂造言傾陷徧告紳民謂基隆未敗忽退皆李彤恩得銀數十萬賈於法人城廂紳民一時譁譟及至二十日滬尾之捷紳民始各恍然深悟不撤基隆滬尾必陷滬尾不保臺北必亡浮言始息該道自知詐破未可久安當時滬尾商輪二隻尙自往來乃不由滬尾乘輪特繞臺南招搖播弄復至福州省城左宗棠楊昌濬正盼臺音聽該道一面之詞不能無惑於基隆之退楊昌濬先後派員渡台細訪當能盡得其詳查朱守謨臨危乞假規避敵鋒又復造言生事搖惑軍民尤屬故違軍令更於撤差之後沿路招搖逗留福州鑽營差委肆口讒謗計敗戎機實非尋常造謠可比應請旨將道員朱守謨革職永不叙用以示

薄懲謹附片具奏伏乞 聖鑒

光緒十一年二月初七日奉 上諭前據左宗棠奏參知府李彤思不審敵情虛詞搖惑以致基隆被踞當降旨將該員革職交楊岳斌查辦茲據劉銘傳奏道員朱守謨規避鑽營造言傾陷各情與左宗棠前奏大相逕庭必須澈底查明以昭是非之公道員朱守謨於軍務吃緊之時輒敢擅用公款乞假規避殊屬荒謬著卽行革職至所參該員招搖播弄及傾陷李彤思各節如果屬實厥罪更重非永不叙用所能蔽辜著楊岳斌卽將朱守謨飭提赴臺歸入前案秉公研究孰是孰非務得確情奏明嚴行懲辦不准稍涉偏私原摺片均著鈔給閱看將此由五百里諭令知之欽此

按公用人最稱嚴覈朱守謨紈袴積習妄請從軍中道棄捐遂生謠謗首以基隆之退誣李彤思得銀數十萬撼李卽以撼公遂釀台民譁變繼復走台

南以結劉璈居福州以搖楊左竟致左叅李彤恩以功獲罪劉璈霸捐措餉煽法嚴封內外交乘直欲致公於死偶一嚴劾湘人乃復持之論者轉謂湘淮不和借端報復迹其原始皆自朱守謨一人啟之惜乎公素嚴軍法不能於朱守謨造謗李彤恩賈退基隆台人大譁之後以搖動軍心斬之也

嚴劾劉璈摺 十一年五月二十六日

竊臣於本月十三日將奸商吞匿釐金道員通同作弊業經撤任奏報在案查台澎道劉璈到任以來全台餉需軍務一手把持既總台澎營務又統台南各軍宜如何整頓操防統籌全局台南軍務自故江督沈葆楨渡台後始行設防練兵劉璈履台數年不但台北澎湖毫無布置即台南安平旗后兩口除沈葆楨前築礮臺外竟未添一營壘築一礮台每年鉅款虛糜未購一精利槍礮臺南各軍不聞操練徒藉提截曠以掩虛冒致各營空額日多是軍務之壞自劉

璚始罪一全臺鹽務經前臺澎道夏獻綸極籌整頓歲除鹽本津貼運費外尙得洋銀十七八萬元劉璚抵任後任用私人互爲奸利每年僅收十二三萬元是鹽務之壞自劉璚始罪二全臺洋藥并茶腦釐金自前任臺澎道張夢元歸商包辦夢元方正清廉一塵不染故收數日多聞劉璚抵任後每年除正稅外洋藥釐金私得洋銀三萬元茶腦私得洋銀一萬元是釐金之壞自劉璚始罪三臺北煤務自開辦不得其人固多虧折然聞從前每年月用經費銀四五千兩自劉璚接辦後每月用銀六千兩嗣又增至八千兩遂致虧折不可勝窮是礦務之壞自劉璚始罪四臺道主治全臺察吏安民本其專責訪聞劉璚到任後全臺候補謀差視財帛之重輕定差缺之優劣財多交厚優差之後更以優繼之惟利是圖何暇更言吏治以致地方命盜巨案日積月累從未獲一正兇是吏治之壞自劉璚始罪五是數者據前嘉義知縣張星鐸揭稱該道歲吞銀

五十萬兩臣逐款訪查除糧臺歸該道督辦自用自銷無從稽查外所有營務鹽務釐金煤務四大端歲侵銀約二十萬兩雖未能盡得其實然閩臺上下無不周知前督臣何璟屢派專員渡臺訪查逢人輒告而瞻徇隱忍不肯直發其奸該道所恃既堅愈形跋扈獨行獨斷旁若無人與何璟文牘齟齬盡刻成書以形其短布散各省莫敢誰何然此猶爲前事也及臣到臺一年臺南軍務如募勇造械動用公款以及地方委差委缺該道從未請示候批輒行自辦凡所稟詳偶經批駁彼輒置之上年九月底曾自行發摺奏事附片請將澎湖一島并臺灣後山棄於德國並奏該道係奉旨辦理臺南軍防言外不歸節制據報繕摺入都不知曾否上邀聖覽其摺稿已行刊刻布散全臺詳報本省并南北洋廣東在案然此雖違節制猶爲罪之小者則請舉其大者言之自上年八月十三日基隆退守之後臺北餉需奇絀該道不獨絲毫不濟忽於八月二

十日咨行署提臣孫開華曹志忠等據稱臺北十二營俱至六月十六日起加足夫價一百九十二人當經臣商將孫開華三營自七月初一日起支其餘均自八月初一日起支該道明知臺北無餉意在誘脅各營譁潰使敵得乘我之危其時幸得滬尾關報解稅銀五萬兩復得臺北府庫積存銀十餘萬兩勉強支持十月初仰蒙聖主軫念臺危嚴飭各省接濟兵械餉項源源而來幸得稍安危局萬一無此數者臣不死於敵且死於諫餉之兵全台豈堪設想聳各軍以圖內亂其大罪一也初九十月間法雖封口并未嚴查我軍猶得用民船偷渡該道見台北餉械尙能轉運獨於十一月初照會英領謂法人封口廢弛法遂於十五日重行禁口擄船殺人斷絕臺運此時危急臣已誓不復生設非聖明在上嚴飭各省速濟援師臣豈復能見天日激強敵以絕台援其大罪二也尤可駭者十月底該道詳報派捐全臺二百萬并未分飭舉行卽報捐款

已收軍火亦經購運全臺軍餉足恃詳請左宗棠楊昌濬與臣奏咨斷朝廷拯救之心絕各省濟援之路奸謀險惡反覆欺朦不致臣於死地不止誑朝廷以陷督師其大罪三也尤有陳者據江蘇候補道陳鳴志面稱上年臘月底奉督臣楊昌濬委赴臺灣府查存庫款據呈清摺道府兩庫結自上年六月起至十一月止舊存新收共銀一百零九萬兩尙有提存兵餉截曠并購存稻穀三項銀二十餘萬除滬尾關稅台北釐金鹽課項下由臺北提用剔除十二萬拔解臺北餉銀七萬兩另由該道提存彰化嘉義十五萬統計六月至十一月臺南尙存銀一百萬兩等情乃該道至十一月底卽報台南餉竭立有潰裂之虞如果無餉其冒濫曷可勝言如果有餉藉口截留臺北協餉不發其險惡更不可測查臺北自上年六月初一日起至本年五月底止統計兵餉賞號雜款並補發各營欠餉一年之久共計用銀尙不及百萬臺南據報各營餉項四十

五日一關何以六閱月卽用百餘萬之多其爲措餉激潰不問可知設非臣與沈應奎等設法騰挪勉將饑軍拯救將全臺數千萬居民不死於強敵且死於內亂之饑軍思之令人心悸擁巨餉以速軍變其大罪四也查該道所設支應局自用自銷或以少報多或藉名開支其中不無浮冒應卽逐款核對以杜侵吞臣於劉璈撤任後卽委員會同道府將臺南支應局並鹽務煤務釐金各項帳目案牘分別查封聽候核算惟該道情罪重大應請旨先行革職並請特派清正大員渡臺逐款查辦以肅綱紀而儆奸貪所有該道劣蹟多端不勝枚舉謹將訪查營務鹽務釐金礦務數大端開單臚列恭摺具奏伏求聖鑒一訪查臺南三十營湘軍月餉由管帶幫帶各具印領勒寫銀二千九百四十餘兩除例少勇百人繳歸劉璈外另打空額截曠銀多少不一每營定章長夫一百九十二人照數請領後須繳還夫價銀三百八十兩內有管帶幫帶如副

將姚秀芳等每月由劉璈酌給薪水數十兩兵餉由劉璈內帳房給發所有公費夫價空額均歸劉璈名曰包營

一訪查臺南鎮海等營自光緒十年起至十年底止每勇月提存餉銀二兩臺灣烟瘴之地疫癘時作勇丁病故所提存餉概不給支卽有家屬來領又以箕斗不對年貌不符留難不發告假則分文不給勇丁多棄餉而逃各營空額概不令補空餉提爲截曠如各營添補一勇雖隔數百里皆須至道署驗看箕斗留難萬分嗣後各營空額無一添補上年五六月間竟有空勇至三百餘人者一臺南三十營管帶幫帶多係劉璈親戚門生如鎮海後營係其第二妾舅李德福管帶以把總冒充都司岳右營係其妾舅李立綱管帶虧欠公款改歸遊擊黃瑞清管帶彌補并送李立綱洋銀五百元另提空額十餘人歸劉璈內帳房作爲道署用人工價提督高登玉派充分統自帶兩營岳後營餉歸高登玉

領交劉城給發營官薪水公費夫價均歸劉城入私

一訪查新募仁義禮智信五營土勇營官內有本地富紳林文欽吳朝陽皆係劉城門生正副哨官俱係岳州臨湘人多係劉城親戚並無一官副將張福勝張兆連各進一女俱委統領并聞己革嘉義營守備蔣復勝幼女被劉城誘入衙內逼姦蔣復勝憤疾而死

一訪查臺南水勇多係佐雜管帶名曰調濟每百人只二三十人屯軍每百人只三四十人有魚團費有團練費自十年四月起凡百姓家有千金者月捐洋四元忽聲載道

一訪查十年正月劉城札委次子劉濟南爲行營營務處赴湖南岳州招募岳軍等營由招商局代雇廣利等船裝兵渡臺每勇船價水脚聞用洋八九元劉城捏報用洋十三四元招商局有帳可稽并浮開口糧等項共虛冒銀萬餘兩

一訪查全臺鹽務自前任臺澎道夏獻綸整頓以後每年銷鹽三十六七萬共得價洋銀四十餘萬元除津貼運費成本外尙得洋十七八萬元自劉璈抵任後每年僅得十二三萬元其總局弊端無從查考全臺差使以鹽務爲最優劉璈每局添派幫辦一人每鹽百斤抽提一斤劉璈入私從前正辦幫辦俱用親戚本家妾父妾舅後經前督臣何璟查出逐名開單驅逐有案可稽劉璈始將正辦改委本省候補人員幫辦仍用私人凡鹽局委員出息一千兩者提出四成分歸幫辦有親戚文案掛名幫辦者有到局幫辦者聞各幫辦由劉璈酌給薪水所提四成均歸劉璈私收劉璈妾舅李德福既已管帶鎮海後營又兼辦鳳山鹽務總館委員劉伯卿係劉璈姪孫又兼瀨北場委員麥葵鹽館委員楊玉臣係劉璈妻姪鹽水港鹽館委員龔若成係劉璈姻姪梧棲鹽館委員孟秀山係劉璈第五妾父已回甘肅中衛縣該館課銀歸劉璈代爲收解大甲鹽館

委員林鑄由福州買女進獻特委優差鹿港鹽幫辦委員丁少杜瀨南場委員李順卿俱係劉璈親戚牒仔脚鹽館委員江道成係劉璈第四妾兄又兼岳右營幫帶文案王秋澄兼管阿公店鹽館另屬人頂名府城西門外新街鹽館府城內嶺後街鹽館均係劉璈自辦

一訪查基隆煤務自光緒七年以前歸現任澎湖廳鄭膺杰總辦每月動用經費銀四五千兩均歸臺灣道批撥如賣煤敷用卽不請領經費自劉璈到任後於八年更易新章凡賣煤價銀俱繳歸劉璈衙門月發經費銀六千兩後又增至八千兩煤務本有外國煤師劉璈恐其走漏風聲託言薪水太大稟請裁撤另派煤務學生張金生爲煤師節省經費復又加添委員司事二十餘人半係劉璈私人較前經費更大據煤務司事工頭面稱歷年挖煤約略數目每日至少挖煤三千石統計一月可挖煤九萬石上等爲官炭中等爲總炭下等爲粉

炭一月可挖煤九萬石官總粉各三萬石官炭歸船政收用每百石價洋二十
四元總炭就地賣於洋商或本國商人每百石價洋十六元粉炭每百石價洋
三元核計一月可賣煤價一萬二千餘元據查煤務每月用帳薪水工價雜支
共用銀七千兩劉璈摺開每月動用經費銀八千兩不知所賣煤價收歸何人
查基隆附近民礦挖煤由煤務委員收買官炭每石價洋十六元總炭價洋十
二元該委員轉賣船政商人於中取利然此係委員作弊至劉璈如何侵吞須
俟調到善後局劉璈歷年報銷并提楊崇銓鄭膺杰訊究方能水落石出臣於
上年六月曾委揀選知縣汪望賡提查煤務出入細帳楊崇銓不肯交僅提
到該局月報大畧卽就所呈帳目核計煤務亦無虧折

一訪查臺北洋藥釐金由前任臺澎道張夢元於光緒六年議歸商人薛樹華
包辦彼時每箱洋藥僅收釐銀六十元薛樹華每年認繳七二番銀五萬元七

年劉墀到任更改新章每大土一箱改征銀九十六兩小土一箱改征銀八十兩仍歸薛樹華包辦共八月認繳六八重番銀一十四萬元另繳一萬元歸劉墀私收臺南係商人王青雲陳悅周等包辦每年除繳正課六八番洋二十三萬元另繳銀洋二萬元歸劉墀私收查臺北市間向用七二重番銀張夢元任內收釐繳課俱以七二番銀繳納劉墀接辦卽改收六八重番銀祇就臺北薛樹華包辦凡八月而論短征銀五千六百兩臺南向用六八重番銀不在此內一訪查臺北茶腦船貨釐金於光緒八年三月經劉墀議招董事衛伊才張慶雲等包辦全年認繳六七番銀十三萬零五十四元另繳番銀一萬元歸劉墀私收九年係歸陳魯齋陳同愚等包辦十年係歸傅政鄭昭包辦本年二月尙未開口卽經劉墀另招本包洋藥釐金商人陳郁堂等加價包辦全年認繳六八番銀十三萬七千元聞另繳洋一萬五千元歸劉墀私收查臺北從前官辦

征收茶釐向照市間行用七二重番銀完納劉璈議歸商辦遂改以六八重番銀繳課計每年短征銀五千二百兩現在征收茶釐概收七二重番銀可証密保陳鳴志署臺道片

再劉璈經臣奏參革職臺澎道缺應卽請旨簡放惟查臺灣自劉璈到任後官貪軍冒流弊已深非廉明忠實之員不可振挽上年臣奏保江蘇候補道龔照瑗堪勝此任奉旨龔照瑗着飭赴臺灣交劉銘傳委用欽此比因海道阻塞龔照瑗經臣并南北洋委在上海專理轉運現接兩江督臣曾國荃來函謂龔照瑗尙有製造局交代并購辦軍械帳未結一時難令渡臺囑臣奏請仍留上海暫辦轉運臣因龔照瑗暫難渡臺臺澎道缺已委江蘇候補道陳鳴志署理查臺南全係湘勇其廢弛虛冒積弊已深一時未能概遣所有營官統領固多劉璈私暱其中不無可用之才陳鳴志籍隸湖南查察較易且軍務熟悉謹

幹廉明奉委時力任除姦剔弊果能不避嫌怨不獨挽回積習且可查明虛冒以便省款辦防臣無黨無私惟期舉賢用才有裨 國事合無仰懇 天恩將台澎道缺暫緩 簡放待至三五月後或陳鳴志辦有實效或龔照瑗事竣渡台再行請 旨定奪謹附片密陳

光緒十一年六月十三日軍機大臣密寄奉 上諭據劉銘傳奏臺灣道劉璈貪污狡詐劣蹟多端開單列款請革職查辦一摺劉璈著卽行革職拏問交劉銘傳派員妥爲看守聽候欽派大臣到閩查辦所有該革員任所貲財著該撫遴派廉幹委員嚴密查抄毋任寄頓隱匿另片奏台灣道缺暫委陳鳴志署理期挽積習等語著依議行欽此

澎湖法兵退去查明失守各員分別處分摺 十一年六月十七日

竊臣等於本月初六日派記名提督吳宏洛乘萬年青輪船往察澎湖十四日

還至淡水據稱李士卑斯於初九日接到撤兵國書十二日開船出口并知會吳宏洛由香港法船轉電總署奏 聞想邀 聖鑒查澎湖本年二月十二日法船到境十五日失守情形已經督辦福建軍務大學士臣左宗棠閩浙督臣楊昌濬會奏在案其時臣岳斌在臺南派探回稱二十二日有法船六隻泊在珠水烏坎開邊海面十三日六隻內分一大船泊近蔴裏澳三船駛至媽宮西嶼二船至觀音亭後齊開大礮縱橫轟擊統領前路各軍代理澎湖副將周善初管帶練軍澎湖都司鄭漁出隊抵禦各礮臺亦開礮還攻經法兵將四角山觀音亭等處礮臺及媽宮協署街道營房一律轟毀周善初等不能抵敵退往大城北去十四日早敵將泊蔴裏澳大船近岸渡兵三百餘人登岸攻撲珠母水澳管帶綏靖副中營副將陳得勝率隊相持未久卽退敵亦未追十五日早法兵八九百人復由雙頂跨登岸徑至大城山下周善初率管帶綏靖前營守

備馮楚燊接仗勢不能支陳得勝帶隊來援手骹受傷乃退周善初又調管帶德義中營同知關鎮岳管帶德義後營通判梁岳英來援均難抵禦關鎮岳爲飛彈中傷周善初馮楚燊關鎮岳梁岳英鄭漁等一齊退往赤嵌北山澎湖遂失澎湖通判鄭膺杰前報募勇四百人防守及法人攻澎三日不聞其勇抵禦何處地方失守咎有應得周善初鄭膺杰二員應請旨卽行革職鄭膺杰尙有煤務經手事件由臣銘傳撤任查辦梁岳英鄭漁馮楚燊均請一併革職同知關鎮岳副將陳得勝均經帶傷應請加恩免予處分陣亡官勇查明奏請賜卹以慰忠魂惟澎湖一島地處孤危面面受敵旣無得力礮台礮位又無兵輪水雷臣銘傳上年秋冬屢接周善初等來稟請發大礮水雷愧無以應十月底臺澎道劉璈卽無餉項接濟澎軍經臣咨請督臣楊昌濬撥款接濟并請督臣運送礮雷未接咨覆劉璈申報至香港購買水雷至東洋購買大礮臣

批令趕布澎湖亦無稟覆周善初等失守地方原有應得之咎惟臣銘傳督辦台防不能預爲籌設且不能保守基隆既叅該廳協等失守若不一并處分何以服諸將之心應請旨將臣銘傳交部從嚴議處以肅軍政

光緒十一年七月十六日奉 上諭左宗棠等奏查明澎湖失事員弁請旨分別懲處一摺覽奏均悉此次澎湖失事該文武未能竭力固守致被法兵攻陷實屬咎無可辭據奏該處向無城郭與失守城池者有間雖係實情惟所擬分別懲處尙覺過輕副將周善初通判鄭膺杰均著革職發往黑龍江効力贖罪通判梁岳英都司鄭漁守備馮楚燊均著革職發往軍台効力贖罪同知關鎮岳副將陳得勝守備梁璟夫均著交部議處楊昌濬劉銘傳均有地方之責惟劉銘傳困守台北鞭長莫及自應稍予區別楊昌濬著交部嚴加議處劉銘傳著交部議處左宗棠穆圖善辦理該省軍務未能援應均著交部察議楊岳斌

於澎湖失事之時先經催令渡台自難兼顧所請議處着加恩寬免欽此

道員攻剿已撫番社請旨懲辦副將摺十一年七月十七日台北府發

竊臣於本年四月二十三日接前台灣道劉璈詳稱南路界備生番山路梗塞曾飭屯營管帶官潘高陞調和番衆招近社生番百人安輯屯營藉資聯布惟地居險遠兵力本單而生番嗜殺不問官民弁勇稍有嫌隙動肆兇殘本年四月初八日據柴裏屯隊目潘貴生等稟報以率芒七家山兩社番互殺三人潘高陞未能伸理以致屯兵潘清復被率芒社番仇殺潘高陞僅令葬埋番情兇悍請飭添棚協守等情查此案先據潘高陞稟稱董底社突來生番十餘人到卡傷斃七家山番兵加隆飽一名該同社番兵持鏢拚救亦殺董底社生番二人該社番到營無故殺人應請剿洗等情當批董底社番共有若干可否盡誅抑兇惡僅此十數人該社離大路若干里有無頭人管束應否擇尤懲創目下

法防未鬆務須出以審慎應由地方官查明稟奪在案據稟前情如果盡實潘高陞殊屬乖方隨飭管帶田豐年率兵馳往查復嚴辦去後本月十三日據潘高陞呈報董底社與率芒社大同坳等社百餘番本月初十夜圍攻該營碉堡百長楊元肇死拒對擊互有損傷適飛虎營餉員蕭順喜等四十餘人道過見番圍攻赴援番始敗退乃生番沿途埋伏竟殺斃蕭順喜等四人屯兵四人客商四人哨長屯兵受傷七人防堡被焚軍裝被搶請派數營剿洗等情到道查該番招撫經年一旦竊發焚燬防堡傷斃官兵實屬異常頑梗自須查明剿辦藉儆效尤當經移請分統方春發率部督辦暨後路統領張兆連帶隊出山會督潘高陞剿撫兼施查明分辦至潘高陞辦理不善容再詳請撤叅等情前來臣查董底率芒兩社番早經就撫內外相安何以突殺多人當有別故飭道先委確查果係無故殺人再行分別拿辦不得張大其辭派兵合剿如有擅殺無

幸惟道是問旋接劉璈四月二十九日來詳准方春發移稱該番恃強反叛非嚴剿不安現擬三路進剿二十四日三路各營均抵率芒社焚燒兇巢數百間該番抵死回救我軍奮力迎戰殺傷番衆甚多該番勢窮逃竄追奔三十餘里始各收軍會剿各員均請記名彙獎等因到道查率芒董底兩社叛番滋事原擬剿撫兼施俾知懲儆乃該番愍不畏法抗拒官軍實屬始終頑梗經此會勦難保不鋌險負隅應仍由方春發相機辦理若僅燬其番社聽其避逃則我軍一去彼仍伺殺不能不派營搜勦爲懲一儆百之謀如果悔罪輸誠仍當脅從罔治等情臣覆加詳核該社番非盜非叛種類繁多久經受撫此次因何兇殺自應查明起衅勒索交兇如抗不遵再行進剿番事在示威懷德該道等不分良莠卽將兩社焚燬殺傷多人鋪張戰功殊深怪詫當委道員陳鳴志副將戴秉綱先後赴三條崙查明起衅有無迎拒官兵及現在是否安撫情形六月十

七日接據陳鳴志稟以現奉札署臺道三條崙番案已委埤南同知吳本杰查覆據稱親至東港水底寮一帶明察番情緣駐三條崙南路屯營潘高陞招各生番充勇本年三月十五日分防七家山番勇兩人下山汲水被生番殺死一人割去首級一番勇跟蹤追覓見伺殺者行入率芒董底當報本營官潘高陞傳率董兩社番日赴營與七家山番勇質對十八日率董兩社並七家山番數十人同赴屯營爭辨不決於是兩番械鬪七家山死者一人屯勇憤恨幫同擊殺率董番二人內一人爲番日古溜之子是時潘高陞倉皇失措不置一詞率董兩番憤恨而返由是沿途伺殺行人戒嚴二十八日遂有殺死送文屯勇潘清一事隊日潘貴生控之潘高陞僅令葬埋置之不問前台灣道劉璈委管帶田豐年往查率董兩番益憤四月初十夜復聚番衆百餘人圍攻歸化門十一日岳左營幫帶劉玉山蕭順喜飛虎後營哨弁曾起成及商人挑夫等四十餘

人道經歸化見番衆圍攻羣呼叱之番等驚而走去蕭順喜等亦卽就道以行不料番等伏於道左鎗殺蕭順喜等十二人斷其首級復焚毀歸化門老社場營堡潘高陞請兵入救劉道遂調方春發統領各營相機剿撫四月二十四日各營分兩道進兵二十六日大兵行至率芒董底生番居高臨下鎗傷屯長練勇數人官軍卽燬兩社房屋三百餘間始行收隊各營復進紮率芒後山兩社始乞輸誠呈繳蕭順喜等首級七個縛送兇番六人在坊蔡巡檢衙門訊供各營亦卽於五月二十一日收隊此剿辦社番并現在安撫之實情也職道查此案當以該番滋事應否調兵剿辦有無拒敵官軍及現在如何安撫爲斷吳丞所查各節似係實在情形所送兇番大光等六人現已解府訊供如屬正兇情真罪當擬卽由道覆訊明確立正典刑等情又據副將戴秉綱查覆大略相同惟稟中叙及率芒董底兩社番與七家山番爭鬪潘高陞不能從中議斷反助

七家山番殺斃率芒番兩人又將七家山兇番兩人解臺道審辦劉璈不論法律反犒賞紅布酒飯釋回是以率董兩社番忿恨愈深激成圍攻歸化門屯營之變尤爲此案辦理失當之大關臣按各員查復二月十八日潘高陞令傳番目到營率底兩社番遵到與七家山番對質其非梗頑不化可知潘高陞不能伸理反縱勇偏助七家山番又率請派兵釀成巨禍劉璈初詳猶是委查之語乃不待查覆遽爾調派大兵分途痛剿率芒董底兩社數百家同遭焚掠良莠不分尤爲慘毒陳鳴志面稱兩社男女千餘人飢苦異常嗷嗷待斃業經量爲撫恤所交兇番臣現飭陳鳴志督同台灣府悉心研鞫果係殺害官軍罪無可赦卽行正法惟劉璈輕信方春發焚殺已撫社番潘高陞辦理乖方激成巨禍均應嚴懲除劉璈貪劣臣已專摺奏叅外副將潘高陞擬請旨革職發往軍台以示儆戒

按劉璈濫剿已撫之番其禍始於潘高陞成於方春發非春發移稱該番反叛非嚴剿勢難收服其禍尙未必若是之烈要以潘爲首禍故効之

陳澹然記

光緒十一年八月十四日奉 上諭劉銘傳奏臺灣南路率芒董底兩番社與七家山番械鬪副將潘高陞不爲伸理縱勇袒助七家山番致兩社聚衆滋事劉璈不待查覆率行調兵進剿致兩番社良莠不分同遭焚掠請旨將潘高陞懲辦等語率芒董底番社前已受撫此次與七家山番仇殺自應設法解散何得率行攻剿慘及無辜既據兩番社悔罪投誠卽著劉銘傳飭屬妥爲彈壓勿任再滋事端其被難番衆酌加撫恤交出兇番是否的係正兇訊明分別究辦除劉璈已另案革職查辦外潘高陞辦理乖方實屬罪有應得著卽革職發往軍前効力以示懲儆欽此

奏參林文欽等片

再中路通霄大甲兩海口曾經前任台澎道劉璈調派彰化紳士候選同知林文欽廣東候補同知吳朝陽各帶土勇一營分紮防守林文欽等於上年十一月募勇成軍至台南駐防劉璈申報各該營俱照楚軍坐糧章程每勇每月口糧銀三兩六錢每營只長夫八十名夫價每名每月二兩四錢本年經吳鴻源咨調至中路協防劉璈申報改照行糧章程每勇每月口糧銀四兩二錢添足長夫一百九十人俱照每名每月三兩發給臣查林文欽吳朝陽俱係彰化富紳所帶彰化土勇何以出防台南口糧尙輕調防本鄉口糧轉重深爲詫異五月初十日札飭記名提督王貴揚知府丁達意分路點裁據報王貴揚所點吳朝陽土勇一營空勇十八人全營無一長夫夫價亦未發給丁達意所點林文欽一營空勇四十九人亦無長夫官長僅見前哨哨官林文欽并各哨弁均不在營當經檄令遣散飭令林文欽等來轅聽候查辦當飭沈應奎會同方策勳

審問林文欽吳朝陽各供短勇丁扣發夫價與點冊相符若照侵餉定律重咎難寬惟訪聞該紳等均係安分富戶帶勇既非其才亦非所願林文欽不能成文係劉璈新進附生吳朝陽之子亦拜劉璈門下劉璈貪污不法誅不勝誅應無庸再事搜求以免株累查林文欽自上年十一月成軍至本年五月底止共領餉銀一萬六千一百餘兩吳朝陽自上年十二月成軍至本年五月底止共領餉銀一萬二千八百餘兩吳朝陽尙知悔畏稟繳本年三個月行糧銀八千兩懇求寬宥林文欽年少無知視空勇侵餉擅離軍營爲細故不肯認咎經沈應奎等詳報前來臣查林文欽與林朝棟親堂叔姪林朝棟家道中落尙肯急公好義備資募勇出力禦寇林文欽爲彰化第一巨富縱不如林朝棟之仗義急公乃經劉璈檄令帶勇竟敢空少勇數夫數擅自離營理應從嚴參辦惟聞該紳係劉璈勒令帶勇素昧軍營規制於尋常軍營侵冒不同應請旨將同

知林文欽卽行革職勒令將所侵餉項銀一萬六千餘兩全數繳還以示薄儉
至吳朝陽家資稍薄既據稟繳三月行糧銀八千兩應懇 天恩免予參革臣
爲鄭重軍餉起見謹附片具陳

軍機大臣奉 旨林文欽著卽革職核明該營空少勇數夫數餉銀若干勒令
呈繳餘依議該部知道欽此

迭平土匪請獎官紳摺 十二年三月初四日

竊照台灣孤峙海外山谷阻深素爲盜賊逋逃淵藪而彰嘉尤甚法事粗定臣
卽令臺鎮章高元駐防彰嘉交界之處鎮攝中權外盜稍知斂迹惟嘉境土匪
擁衆橫行其大者曰顏擺彩莊芋薛國鼇吳全印等爲最著此外著名土棍尙
有一百四十餘人地方逼近海濱彌望竹圍類皆匪黨踞藏之所其五間厝莊
及下潭竹圍角帶圍等莊著名匪黨皆十數年搶劫縱橫控案山積匪首顏擺

彩等每窩聚於角帶圍莊翁呆家中十餘年來地方官莫敢過問經臣迭飭營縣設法嚴拿殊難緝獲茲據嘉義令羅建祥稟稱飭役探明匪迹五月十一日黎明會同練營乘匪不備襲入角帶圍顏擺彩等開槍拒捕當經督練猛攻死傷十數匪捕獲翁銓等五人訊明由臣批飭分別懲辦惟顏擺彩獨率黨血戰而逃復飭趕拿顏擺彩等務獲未幾羅建祥復稟據佳里興巡檢陳炳稟稱九月二十三日晚黎明聞五閒厝莊一帶槍聲大震疑爲居民械鬪當卽會同練營哨弁周世英帶兵馳往查係頂潭下潭等八莊見顏擺彩潛返窩巢經練紳招集各莊壯丁前往圍襲顏擺彩放槍死拒被壯丁襲破其宅擒斬一人顏擺彩復率衆他徙追奔逐北相持竟日兵壯多死傷及暮始行退散羅建祥得報後急會練兵馳往鹽水港聯合各莊丁設法兜拿稟請添派營勇會拿等情臣當檄飭章高元以礮隊一營移駐嘉義督率練軍會同嘉義縣嚴密緝拿十一月

初四日復據章高元羅建祥稟稱嘉邑轄內魚蔡莊有巨匪陳註結黨橫行恣意剽擄此次顏擺彩藏匿其家見官軍嚴捕謀集黨羽樹旗抗拒練營管帶王九齡率勇四十餘人直抵陳註家中捕獲顏擺彩陳註及同住匪夥八人正在押解起行不料該黨膽敢鳴鑼集衆數百人各執鎗械圍毆奪犯王九齡用鎗血戰因衆寡不敵所獲匪犯均被奪去兵勇傷者十餘人幸得北港練兵聞信急援王九齡始行脫圍并請以後如有獲到重大案犯訊得確供擬卽由台灣鎮恭請 王命就地正法以昭炯戒等情 臣因土匪橫行拒捕毆官被拿奪脫實屬不成事體營官王九齡雖因衆寡不敵究係辦理不善當卽摘去翎頂勒限兩個月務拿顏擺彩陳註等到案並批准以後獲到要犯如果訊明情真罪當卽行循照向章由臺灣鎮總兵章高元恭請 王命立時正法去後疊據羅建祥稟先後捕獲巨匪李大樹等凡七人皆經訊明正法而顏陳二賊終未弋

獲十二月十六日章高元羅建祥復稟稱魚蔡莊距城遼遠匪黨出沒近益滋多今顏陳二賊拒捕傷官必另有爲首主謀之人非得渠魁不能剿辦當經分飭守備龍殿勳同知陳熙年都司劉全等轉飭魚蔡近地二十五莊各頭人族長飭令約束莊衆子弟毋得助匪一面購獲匪徒陳劉薯等分別囚繫羅建祥督率礮隊由撲仔脚俯攻而下參將丁映昇率礮隊自北港仰攻而上參將周士得率營兵百人伏於匪莊左側王九齡率練軍百人伏於匪莊之右以備截拿章高元自率親兵爲之策應十二月初九夜潛至魚蔡質明官軍四集匪衆大驚不及抗拒紛紛逃竄當獲匪徒陳澈陳春張勇等二十八人搜獲洋鎗火藥刀械多件因卽馳馬踏勘該莊四面符圍溝深菁密皆陳註之父陳江訓所築陳江訓前爲莊長創立小刀會勾結徒黨搶殺嘉義間與顏擺彩等互相呼應該莊旣拔所有奪犯傷官諸匪黨悉數擒獲匪巢亦立即焚燬惟顏陳二匪

復經逃竄等情十二月三十日復據章高元稟報探明顏擺彩潛入布嶼保已派兵圍攻捕獲經羅建祥審訊據供集衆五六百人縱橫於臺嘉彰三屬之間搶虜十三年所獲財物不可勝記其他勒贖金斃人命姦婦女拒官軍則固吾儕事業不必多問語次談笑從容若不知身嬰巨辟臣當批飭就地梟示居民聞之莫不稱快該黨陳澈等搶掠傷官者亦經正法其餘罪應遣流者已按照臺章分別鎖礮年滿察釋此剿辦嘉義土匪之情形也嘉彰兩縣轄境遼闊藪盜實冠全台彰化之南投地方與番境接壤匪首許添丁王烏毛陳亮等聚衆百數十人四出搶掠劫財虜人控案疊出縣令蔡麟祥稟請派兵會捕臣檄飭澎湖協副將蘇吉良帶勇會縣往拿該匪等胆敢開槍拒捕經該文武當場格斃陳亮王烏毛二名獨許添丁率衆逃去當將匪巢拆毀旋經該匪堂兄許國將許添丁拿獲解縣訊明正法十二月二十日蔡麟祥復稟稱本月十二日既

夕據童生黃玉衡赴縣喊稱伊平日讀書不與外事族人因其直舉爲總理今晨有浦底莊同族黃敏黃汶丁兄弟三人挾忿糾黨七八十人各執槍械闖入伊家強擄服物放火焚廬舉家驚惶逃走黃玉衡拆窗逃出徧體火燒傷幼子黃尙工人黃川黃鄙等俱受重傷並將伊長子黃坤元次子黃坤連擄去莊衆鳴鑼出救該匪等放槍拒敵衆莫敢前現匪等尙踞黃敏竹圍中不去哀乞救護拏辦等情蔡麟祥訊問挾忿緣由據供黃敏兄弟三人皆其族姪素以搶掠爲生族衆曾擬送官懲辦因其房衆強悍深懼報復未敢下手去冬黃敏等截奪鄰莊過路猪十餘隻失主投告黃玉衡黃玉衡充當總理不得不秉公管束當卽嚴斥黃敏等不應平空攔截他人猪隻勒令交還黃敏堅執不許黃玉衡反畏其凶虐商與武生黃朝清備銀十二元婉言贖還失主未幾黃敏妻子病死藉口玉衡開圳灌田衝犯煞氣致斃伊妻勒索出銀償命黃玉衡忿恨不允

遂卽糾衆搶擄蔡麟祥懼傷其二子急請彰化統領柳泰和遣派副將吳西元遊擊陶金魁副將周鳴聲各率兵勇於十四日黎明至浦底庄相機剿捕黃敏等見官兵已到堵塞圍門極力抗拒仍堅閉黃玉衡兩子不放黃玉衡所居之埤脚莊去浦底莊只二百餘步居宅十數間皆被焚毀蔡麟祥等一面令兵勇暫堵浦底莊外傳集該莊五房頭人黃玉有等並總理黃木火諭令先向黃敏兄弟剴切開導令官兵已至莊外若速釋黃玉衡兩兒或可格外施恩木火等往返十數次涕泣開導黃敏兄弟抗不釋放復縛兩兒於籬下以刀置頸上喝以官若攻我當先斬汝呼號慘絕耳不忍聞將士皆痛憤請速入剿捕蔡麟祥流涕諭以兵入則二子必死不若暫且容忍復令舉人黃玉書三次往諭反覆譬曉卒不釋放蔡麟祥等察其情形該匪意在先挾兩兒以爲抗拒遷延至夜則卽走逃而二子必終無下落適黃玉衡亦痛忿不堪踉蹌請不顧二子願速剿

辦以絕禍根黃氏諸族長亦然蔡麟祥等不得已乃合將士一鼓而進居民亦相助攻擊該莊竹圍甚堅匪又縱槍抗擊莫克先登遊擊陶金魁獨率死士十餘人鳧水越溝砍破竹圍諸軍逕入賊勢不支當卽格殺積匪曹猫倉黃敏兄弟七人生擒二名搜獲槍刀二十餘具各匪紛紛逃竄一面追拿一面將匪巢折毀黃玉衡二子年方幼稚圍破之時賊因兇懼砍其頸不殊幸保無恙此剿辦彰化土匪之情形也署台灣道陳鳴志拿獲哥老會匪首王春華易子林二人鳳山淡水兩縣先後拿獲糾搶重犯九人均經臣覆覈情真罪當一併批准正法梟示以竦凶殘伏查臺灣民情梟悍嘉義彰化兩縣伏莽尤多歷年搶殺拒捕未獲一人土匪橫行暗無天日地方官因循日久民玩益殘若不雷勵風行日久且生內亂臣竊念自古禦外必先靖內內不靖則根本易搖一有外憂勢且不攻而自靡故自去夏法兵去後臣卽嚴飭各地方官清結訟爭嚴拿土

匪申明賞罰不准違延搶劫巨案有犯必懲如有匿報及辦理因循非叅卽撤現署嘉義縣同知羅建祥署彰化縣通判蔡麟祥均係蒞官未久俱能奮激圖功羅建祥四月到官清理積案一百五十餘起拿獲積年巨匪四十餘人闔邑紳民翕然稱頌蔡麟祥於許添丁黃敏聚衆搶殺急切難圖之巨案立行捕滅妥速異常該二員勤能果斷奮發有爲合無仰懇 天恩將知府銜福建試用同知羅建祥補用同知試用通判蔡麟祥均請 交部從優議叙已革總兵王九齡擬請開復總兵銜參將丁映昇擬請開復原官候選教諭張步蟾擬請賞加中書銜廩生黃星華擬請以訓導歸部選用 臣爲整頓地方鼓勵人才起見是否有當出自 逾格鴻慈

光緒十二年四月十八日軍機大臣奉 旨覽奏均悉羅建祥等均著照所請獎勵該部知道欽此

再封摺間據署台灣鎮章高元稟報偵知匪首吳金印於二月二十四日潛回巢穴立即密派礮營營官丁映昇練軍管帶王九齡嘉義營參將周士得等各帶兵勇百人會商羅建祥派令署笨港縣丞吳承哲星夜馳往店子口地方五鼓時行抵吳金印住宅丁映昇王九齡率勇先自籬隙潛進圍牆分兵兜圍奪門入室草高元率隊繼至當獲吳金印暨匪黨七人搜出抬槍洋槍多件並交嘉義縣收審等情臣查吳金印頗有家資甘爲匪類歷犯拒捕搶殺重案恃其固堅黨衆官不能辦遂至橫行無忌莫敢誰何以致地方窮民窩匪以分贓富民結匪以自衛械鬪搶殺視爲故常若非嚴拿重辦以絕萌芽積久且成巨禍嘉義土匪以顏擺彩莊芋薛國璈吳金印四人爲羣盜之魁除莊芋業於上年經林朝棟收充該營哨官在營病歿薛國璈經章高元於本年正月十五夜率隊圍拿破其窠巢在逃未獲外顏擺彩吳金印均經先後拿獲實足以彰國

法而快人心謹附片具陳 伏乞 聖鑒

軍機大臣奉 旨知道了仍著嚴緝薛國璚務獲究辦毋任漏網欽此

叅記名提督方春發剋扣餉銀片

再駐防鳳山統帶鎮海前軍三營記名提督方春發經 臣訪聞侵扣餉項營伍廢弛密飭署台灣道陳鳴志就近密查并派差弁馳往確訪現據陳鳴志稟稱委員查明方春發營中餉項自本年三月起每日止發勇丁伙食錢八十文至今未發大餉仍照甘肅章程俟銷差時再行全發一勇病沒應發燒埋銀五兩並不照章發足遇有故勇欠存口糧親屬具領該提督亦始終不給並信用已革甘肅知縣陳海春由內地販運烟土多斤聽其在營煮膏賣歸勇吸按月扣餉抵銷以至營伍廢弛等情并查明管帶鎮海前軍右營總兵桂占彪亦有減發燒埋銀兩及扣發故勇存餉情事具覆前來 臣伏查方春發桂占彪均以提

鎮大員充當統領營官駐紮鳳山旗后海口宜如何認真操防方副委任乃竟敢尅扣餉項並減發燒埋廢弛營伍若不參辦何以肅軍政而飭紀綱除將方春發等卽行撤委另派前陝西榆林鎮副將陶茂森副將江南通州營遊擊余德昌分別統帶外應請 旨將記名提督方春發卽行革職總兵桂占彪以遊擊降補以肅軍政

光緒十二年九月初五日軍機大臣奉 上諭劉銘傳奏提鎮大員尅扣餉銀請旨革職降補等語記名提督方春發統帶鎮海前軍三營於營中應發各項餉銀或不照章發足或竟始終不發並信用已革知縣陳海春販運煙土聽在營各勇吸食按月扣餉抵銷以致營伍廢弛又總兵桂占彪管帶前軍右營亦有減發銀兩扣發存餉等情似此尅扣軍餉紊亂營規實屬大干法紀該撫僅請革職降補殊屬輕縱方春發桂占彪均著先行革職交該撫親提嚴訊將應

得罪名按律定擬具奏其尅扣欠發各款仍著查明確數勒限嚴追不得稍涉含混該部知道欽此

叅記名提都柳泰和營伍廢弛片

再記名提督柳泰和統帶春字三營駐防中路臣訪聞該軍勇數不足密派差弁逐哨訪查八月初適有蘇魯等社叛番滋事林朝棟稟調會剿林朝棟駐紮大隙山嶺屹然不動該提督退紮大坪相距番境二十餘里時被生番抄劫傷亡勇夫至百餘名之多臣至覃蘭後查悉該軍勇糧空額營伍廢弛立將該提督並副營營官陶廷樑一併撤委另派提都督李定明接統其軍近來軍營積習侵吞虛冒視爲故常若不切實懲辦不能挽回積習除春營營官李惟義自告奮勇攻攻破蘇魯社石卜暫行留營以觀後効外相應請旨將記名提督柳泰和先行革職撤銷勇號由臣查明空勇若干有無侵吞餉項再行陳請發

落其副營營官參將陶廷樑臨陣不力營伍廢弛應請卽行革職以肅軍政
軍機大臣奉 旨柳泰和著革職撤銷勇號由該撫查明有無侵吞餉項奏明
辦理陶廷樑著卽行革職欽此

奏參羅建祥摺 十四年九月初二日

竊照台灣舉辦清賦經 臣奏請明定賞罰在案各縣令宜如何悉心經釐以副
委任查署嘉義縣羅建祥初覺精明強幹自上年捐升知府仍留署任後卽膜
視民生既不坐堂訊案亦不巡緝各鄉搶殺重案無月不十數起未據報獲一
人訊結一案聲名狼藉民怨沸騰其於清丈一事首報丈訖升科 臣固未敢深
信隨時訪查督責羅建祥專恃狡辯矢口不移稟稱實在辦竣毫無虛偽而人
言藉藉俱謂其粉飾欺朦直至委員復丈始知該縣田多未勘盡屬空言經費
虛糜要公坐誤尤且膜視民命政務廢弛未便寬縱代理鳳山縣知縣候補通

判吳元韜承辦該縣清丈亦多蒙飾據查因病貽誤尙非羅建祥始終有心欺飾可比惟所糜經費至二萬三千餘兩自應分別重輕除將該署令等先後撤任並催接任各員速行補丈外應請 旨將羅建祥卽行革職由台灣道派員押交淡水縣看管聽候查辦用過清丈經費先行勒令全數繳賠並請將吳元韜暫行革職用過清丈經費勒繳一半仍著隨同清丈俟丈務報竣繳清經費後如果尙知愧悔出力再由 臣奏請開復原官以儆奸邪而昭公允

光緒十四年九月二十六日奉 上諭劉銘傳奏特參貽誤要公各員請旨懲辦一摺福建台灣署理嘉義縣知縣試用知府羅建祥勘丈田畝朦混欺飾並膜視民命廢弛公事著卽行革職聽候查辦代理鳳山縣知縣候補通判吳元韜承辦清丈敷衍粉飾著暫行革職仍責令隨同勘丈以觀後效該二員均有虛糜經費情事著分別勒令賠繳毋任延欠餘著照所議辦理該部知道欽此

革降參將都司片

再淡水至宜蘭縣城經臣於上年派兵開道中有番境數十里素無人煙因飭淡水縣於平林尾樟谷坑摩璧潭倒吊子四堵等處地方修蓋草屋卡房五處檄飭艋舺營參將張欣在艋舺宜蘭兩營內選兵四十人派弁帶往駐防保護行旅並照練軍章程加給口糧在案數月以來經臣訪聞此路防兵數多不足曾經面飭參將張欣派弁查看旋據稱五處防兵並無缺少復經臣委員密查據稱所過一路僅平林尾四堵兩處各有兵十人樟谷坑無兵往駐本月始有二兵到防並雇三民人爲之頂替其餘摩璧潭倒吊子兩處仍舊無兵臣查台灣自裁兵加餉以後綠營兵餉已與內地迥殊練餉再加幾與勇營無異養一兵不得一兵之用安有天良乃於派防道路兵丁四十人僅用二十所防五處僅止兩處有兵竟敢於耳目相近之區欺朦隱飾以少報多冒領加餉實屬藐

玩戎規噶瑪蘭都司李長青應派防兵二十人僅止十人住防四堵餘無一兵
平時營伍廢弛已可概見若不一並叅辦何以肅軍政而重餉需相應請 旨
將艦艍營叅將張欣卽行革職噶瑪蘭都司李長青以千總降補以儆欺冒而
杜侵漁

軍機大臣奉 旨張欣著卽行革職李長青著以千總降補餘依議兵部知道
欽此

彰匪圍城劫館派兵剿平摺 十四 九月二十四日

竊本年六月間後山番變臺南北各軍分調赴剿台民浮動謠煽紛來適嘉義
鄉民械鬪不休更致訛言紛起 臣飛飭統帶武毅軍提督朱煥明自彰化帶勇
三百人前往督同所部駐防嘉義營官朱家齊拿辦積匪數人地方始行安輯
惟嘉彰沿海一帶民貧而悍一夫倡辟萬衆蜂從八月杪據彰化縣電稱盜劫

鹿港鹽館衆至數百聲言尅日攻城當時中路祇朱煥明一軍調訪嘉義留彰防勇無多而道員林朝棟三營且分布內山相隔甚遠臣當飛檄林朝棟調出五百人屯紮彰化九月初一日續據彰化縣電稱土匪愈聚愈衆不下數千圍攻縣城電線俱遭毀斷臣急飭林朝棟自胡蘆墩星夜入援並飭駐防基隆總兵竇如田帶銘軍三營都司鄭有勤抽帶隘勇五百均自後壠至大甲會援兩軍當癘疫之後病勇過多台南各軍又遠在埤南之地台灣道唐景崧稟募土勇一營臣復電商督臣自閩派撥福甯鎮總兵曹志忠四營乘輪助剿並飛調澎湖鎮總兵宏洛各台灣鎮總兵萬國本分回台南北以待會師初五日竇如田等稟稱新竹彰化交界地方土匪乘機搶劫文報不通署彰化縣知縣李嘉棠間道告急據稱賊踞東門外八卦山分道攻城勢洶莫測當募粵勇二百會同棟字正營幫帶林超拔北路中營署都司葉永輝協力嚴禦並飭巴革都司

洪磐安招義勇二百助守登陴初一日朱煥明自嘉義得報督隊急援所帶僅三百人距城三十里衆賊環困身受重傷血戰竟日離城數里槍彈俱窮弁勇傷亡過半其餘奔入城中朱煥明行至白沙坑血戰陣亡接林朝棟初八日稟報添募土勇千人招集練勇八百偃旗息鼓步步爲營紮至距北門里許之市仔尾是夕賊衆四面攻城各擁竹梯城上槍礮抵轟賊鋒稍却林朝棟乘其無備於五鼓間親督林福濬分路突攻副將余保元把總林青雲兩面接應城內林超拔亦開城夾擊賊乃大奔生獲賊匪六人陣斬十七級立解城圍乘勢奪還八卦山要隘李嘉棠飭令洪磐安等督率諸勇奪馬祖廟番社口各莊抵暮始收軍而返當查彰化匪首施九段王煥嘉義匪首李達楊中城等糾合餘黨三千餘人屯聚西南角去城不及十里林朝棟等分兵扼隘整隊前驅十一日李嘉棠專守縣城林朝棟督帶各營出城攻剿先派洪磐安等率練勇分剿南

路浦尾大岸頭等莊之賊知縣龍贊綱等率粵勇分剿中路頂崙平等莊之賊北路磚仔窰及中路平和厝兩莊尤爲賊勢注重之區匪悍鎗多渠魁俱聚於此林文榮率領棟宇後營攻取磚仔窰已革甘肅知縣張紀南率隊策應林福濬率領棟宇前營攻取中路由三塊厝攻至平和厝等莊文童林朝瑞隨同林超拔帶隊策應賊首王煥屯駐平和厝出圍接仗鎗彈如雨死戰不休林朝棟督令林超拔向北包抄並令奈保元由後掩襲環戰兩時之久陣斬兇鋒鄭心丁一名散匪三名奪獲僞旗僞令多件哨官鄭以金異常奮勇首先衝殺該匪力始不支棄莊奔潰磚仔窰亦經林文榮同時攻破各營乘勝連破竹柵二十一處陣斬匪首四十一級生擒八人隨時梟示奪獲竹梯籐牌諸械無算我軍受傷十七人餘賊奔潰西去此彰化解圍及攻勦獲勝之情形也竇如田鄭有勤兩軍初七日至大甲初八日聞報城圍已解遂會同牛馬頭紳士解散鹿港

以東脅從三十六莊十三日帶隊到彰吳宏洛曹志忠與開復藩司沈應奎亦先後馳抵彰化萬國本駐紮嘉義待命會師臣令沈應奎會商吳宏洛等乘勢剿辦務獲匪首解散脅從以安良善旋據電稱探明匪首施九段王煥等屯聚該匪所居之鏡水莊黨羽祇數百人二十三日黎明吳宏洛督帶所部并銘軍士勇分三路往攻及至該莊匪已逃遁現經沈應奎出賞購拿所有脅從全行解散地方安謐如常惟據鹿港紳士進士蔡得芳并各堡紳士來彰訴稱彰化縣知縣李嘉棠性情剛愎不洽輿情且丈田不公任聽委員需索因失民心初一日賊衆圍城不足千人兩三日間煽惑沿海百餘莊叛民竟至五六千人若非援救迅速地方不堪設想請速更換等情臣查署彰化縣知縣李嘉棠辦事粗率紳民嘖有煩言藩司邵友濂屢請調換因地方煩劇一時擇人未定現在業經撤委雖該署令此次守城尙能堅定其在任有無實在劣蹟功過能否相

抵已由臣檄飭沈應奎詳細查辦既係丈田不公聽委需索臣不敢因原保在先稍存迴護應請 旨飭部先將署彰化縣知縣李嘉棠清賦保案撤銷聽候查辦彰化城垣低薄守禦殊難道員林朝棟未及旬日破賊解圍大局以定實屬忠勇血誠不顧嫌怨慷慨任俠仗義急公擬懇 天恩將二品頂戴候選道林朝棟 賞穿黃馬褂以示優異其餘戰守出力之官紳將弁可否准由臣彙入攻克呂家望番社案內擇尤請獎之處出自 逾格鴻施統帶武毅軍記各提督朱煥明急於赴救力戰陣亡徧體傷殘異常慘烈擬懇 天恩俯准於彰化縣城建立專祠 飭部照陣亡例從優議卹以慰忠魂此外勇弁傷亡再行查明奏咨請卹

光緒十四年十一月初十日內閣鈔出十月十七日奉 上諭劉銘傳奏彰化土匪搶劫鹽館圍攻城池先後剿平一摺本年八月鹿港鹽館土匪搶劫并攻

圍彰化縣城經劉銘傳派令朱煥明林朝棟等分路進剿立解城圍并連砍竹圍二十一處斬獲多名脅從全行解散地方安謐如常辦理尙爲迅速候選道林朝棟著賞穿黃馬褂其餘出力官紳將弁著彙入呂家望番社案內擇優請獎陣亡之記名提督朱煥明力戰捐軀深堪憫惻著照陣亡例從優議卹并加恩准於彰化縣城建立專祠以彰忠藎著彰化縣知縣李嘉棠辦事粗率不協輿情著撤銷清賦保案仍交劉銘傳認真查辦逸匪施九段王煥等仍飭派出各軍嚴拿務獲毋任漏網以靖地方餘著照所議辦理該部知道欽此

查明知縣功過并官紳比匪情形摺

十四年十一月初六日

竊臣奏報彰化土匪搶劫鹽館圍攻城池先後派兵剿平一案匪首施九段王煥等在逃未獲經臣嚴飭購拏并以署令李嘉棠有丈田不公任聽委員需索情事請旨撤銷清賦保案一面撤任並飭開復布政使沈應奎確查旋據復

稱李嘉棠自到彰化因民氣強悍欲以嚴刑峻法遏抑其風詞訟多意爲斷結未能悉得其平輿情因而不洽承辦清丈事務委員各帶書役赴地查無需索實據惟於八月中旬逆匪徧張貼勢岌可危李嘉棠壅不上聞未免貽誤並據另稟匪犯施九段等輾轉潛逃經鹿港營遊擊鄭榮紳士訓導施家珍廩生施藻修等具限拏交撤兵後託詞軟抗顯係有心庇護未便姑容請卽一體叅革各等語又據李嘉棠來轅具稟奉飭丈田清賦各堡皆踴躍輸將完納新糧均願自封投櫃惟港鹿一堡紳士疊催疊抗施九段等謀爲不軌先經訪聞飭拿因鄭榮施家珍等力保其爲善人斷無不法情事八月十九日因公繞道施九段所居之鏡水莊觀其動靜該官紳猶爲包庇九月初一匪衆圍城施家珍等函約在城紳士廩生吳景韓教官周長庚會於馬興莊請將丈田圖冊送至賊營燒毀劫館圍城各犯辦理從輕城圍可解當經堅斥不行解圍後沈應奎

吳宏洛等到彰諭令該紳等交出首犯免查通匪各情該紳等先行通告鏡水莊賊匪令其遠颺然後請兵進剿至則僅存空屋數椽施九段王煥平日均非匪人素在鹿港生理何故圍城挾官焚毀丈田圖冊顯係施家珍等主使惟先前不能防範咎實難辭等情臣查鹿港施姓族大丁多訓導施家珍廩生施藻修及前廣東新興縣蔡德芳等向來把持公事先因稟留署同知蔡嘉穀經臣痛加批斥怨忿已多上年全台開辦百貨釐金南北各屬商民一律遵辦惟鹿港軟抗一年此次清丈完糧各縣皆一律遵辦獨鹿港一堡復敢抗違查施九段王煥等平日俱非匪類素受施家珍等驅使竟敢逆謀圍城戕害提督大員肆爲悖逆李嘉棠疏於防範雖據查無任委需索及別項劣跡實憑但於該匪謀逆先已探知並不據實稟報劫館圍城之後仍不稟明匪首名目暨起事緣由直至臣以是否該署縣激變根查始據瀝陳施家珍等主使謀逆是其於此

事未發之先徇隱欺朦貽誤實非淺鮮僅予撤銷保案未足蔽辜李嘉棠應請卽行革職以示懲儆鹿港營遊擊鄭榮附和施家珍等庇護逆匪且於軍火到防被劫事前既不防範事後亦不追查並不稟報搶匪名姓應請一併革職仍俟匪犯九施段等拿獲訊明該遊擊有無勾通情事再行核辦訓導施家珍廩生施藻修主使施九段等抗官謀逆圍城戕官應請分別斥革嚴拿訊辦前廣東新興縣知縣蔡德芳本應一併叅革姑念年老迂疏不通世務事由施家珍等指使應請暫免置議勒令具限完糧如仍抗延再行參辦以示區別


光緒十四年十二月初三日奉 硃批李嘉棠鄭榮均著卽行革職施家珍施藻修著分別斥革拿辦餘依議該部知道欽此
參遊擊鄭有勤等請革職正法片

再統帶台北隘勇營遊擊鄭有勤初尙勤奮自上年全台生番歸化後該遊擊

侈功懶惰營伍廢弛該軍營務處保留江蘇補用知縣徐石麒已革縣丞凌雲營官守備張安珍等愆患爲奸同惡相濟上年八月間竹頭角等社番潛出殺人經撫墾局查明勒令各該社番目交出兇手鄭有勤膽敢私行釋放九月間隘勇被殺至四十餘人張安珍疏防失卡亦不稟究及大兵進剿時該軍遷延不進視若泛常經臣撤差查辦委驗所部隘勇竟以墾民三百人冒充勇數侵吞糧餉實屬目無軍法除已革縣丞凌雲現經遠逃俟拿獲到案再行訊辦外遊擊鄭有勤守備張安珍侵冒餉銀故違軍令均請革職正法以肅軍威保留江蘇補用知縣徐石麒並請革職永不敘用

光緒十六年二月二十二日奉 上諭劉銘傳奏剿辦台北內山番社情形一摺上年九月間宜蘭兇番戕害官弁經劉銘傳派總兵吳宏洛等督隊進剿於十二月間疊毀白阿歪等社各番恐怖將爲首兇番有敏阿歪等捆送求撫訊

明正法所有加九岸叛番據稱此次剿辦暫知斂跡該撫仍當妥爲鎮撫毋稍大意其南澳九兇社現經該撫親往督勦卽著嚴飭各將領詳審地方番情大加懲創以儆凶頑仍將剿辦情形隨時奏聞另片奏帶兵官侵冒餉銀故違軍令並營務處委員愆忠爲奸等語遊擊鄭有勤守備張安珍均著革職卽行正法江蘇補用知縣徐石麒著革職永不叙用已革縣丞凌雲俟拿獲到案訊明懲辦該部知道將此由四百里諭令知之欽此



卷十勘誤表

十五	十五	十三	十二	七	七	五	五	三	二	頁數
十一	一	十一	十六	十六	一	廿一	十	九	二	行數
十一	十一下	廿一下	一	十九下	十八下	六下	十五	卅下	廿六	字數
味			傳				打		思	誤
味			傳				扣		恩	正
	少	歸		百	館	代爲		缺		脫
										衍
廿一	廿一	二十	十九	十八	十八	十七	十七	十五	十五	頁數
十九	十四	十一	十五	廿一	十七	十六	九	十二	二十	行數
十七	五	六	三	八	七	廿二	十六	十八	十三	字數
	都	窠	蕪	鱗	令	除	符	全	芋	誤
	督	窠	翁	鱗	今	餘	竹	金	芋	正
										脫
都										衍

劉壯肅公奏議

卷十勘誤表

一

一

廿五	廿五	廿五	廿四	廿四	廿四	廿四	廿三	廿二	廿一	廿一	頁數
五	五	三	十九	十七	八	八	廿二	十六	廿一	廿一	行數
十	三	八	十九 下	十七	八	五 下	十五	一	十一	五	字數
煥		字		余			辟	蹈	卞		誤
煥		字		余			率	韜	卡		正
			分			吳					脫
	帶				各					攻	衍

									廿八	廿六	頁數
									四	六	行數
									四五	三十	字數
									九施	各	誤
									施九	各	正
											脫
											衍